

Namo tassa bhagavato arahato sammāsambuddhassa

Majjhimanikāye

Majjhimaṇṇāsaṅgī

1. Gahapativaggo

1. Kandarakasuttavaṇṇanā

1. **Ārāmapokkharāṇīdīsūti** ārāmapokkharāṇīuyyānacetiyatṭhānādīsū. **Ussannāti** bahulā. Asokakaṇṇikārakoviḷārakumbhīrājarukkhehi sammissatāya taṃ campakavanam **nīlādipaṇcavaṇṇakusumaṇṇāṇṇānti** datṭhabbam, na campakarukkhānamyeva nīlādipaṇcavaṇṇakusumatāyāti vadanti. **Bhagavā kusumagandhasugandhe campakavane viharatīti** iminā na māpanakāle eva tasmim nagare campakarukkhā ussannā, atha kho aparabhāgepīti dasseti. “Pañcasatamattehi aḍḍhatelasehī”ti evam **adassitaparicchedenā**. Hatthino cāreti sikkhāpetīti hatthācariyo hatthīnam sikkhāpako, tassa puttoti āha “**hatthācariyassa putto**”ti. Tadā bhagavā tesam pasādajananattham attano buddhānubhāvaṃ aniguhitvāva nisinnoti dassento “**chabbaṇṇanam ghanabuddharasmīna**”ntiādimāha. **Bhagavato ceva gāravenāti** bhagavato garubhāvena, bhagavati gāravenāti vā pāṭho.

Niccaṃ na hotīti abhiṇham na hoti, kadācīdeva hotīti attho. Abhiṇhaniccatā hi idha adhippetā, na kūṭatṭhaniccatā. Loke kiñci vimhayāvahaṃ disvā hatthavikārampi karonti, aṅgulim vā phoṭayanti, taṃ sandhāya vuttam “**accharam paharitam yutta**”nti. **Abhūtapubbam bhūtanti** ayam niruttinayo yebhuyyena upādāya ruḥhīvasena vuttoti veditabbo. Tathā hi pāḷiyam “yepi te, bho gotama, ahesum atītamaddhāna”ntiādi vuttam, kiñci akattabbampi kariyamānam dukkarabhāvena vimhayāvahaṃ hoti, tathā kiñci kattabbam, purimam garahacchariyam, pacchimam pasamsacchariyam, tadubhayam suttapadaso dassetum “**tatthā**”tiādi vuttam.

Sammā paṭipādītōti sammāpaṭipadāyam ṭhapito. Esā paṭipadā paramāti **etaparamam**, bhāvanapumsakaniddesoym yathā “visamam candimasūriyā parivattantī”ti (a. ni. 4.70). Ayañhettha attho – bhagavā bhikkhusaṅgho paṭipadāya tumhehi paṭipādīto, atītepi kāle buddhā etaparamameva bhikkhusaṅgham sammā paṭipādesum, anāgatepi kāle etaparamameva bhikkhusaṅgham sammā paṭipādesantīti paribbājako nayaggāhena diṭṭhena adiṭṭham anuminanto sabbesampi buddhānam sāsane saṅghasuppaṭipattim majjhe bhinnasuvannaṃ viya samasamam katvā dasseti, evam dassento ca tesam sudhammatañca tathā dasseti evāti veditabbo, buddhasubuddhatā pana nesam sarūpeneva dassitāti. **Na ito bhiyyoti** iminā pāḷiyam etaparamamevāti avadhāraṇena nivattitam dasseti sīlapadaṭṭhānattā samādhissa, samādhipadaṭṭhānattā ca paññāya sīlepi ca abhisamācārikapubbakattā ādibrahmacariyakassa vuttam “**ābhisamācārikavattam ādim katvā**”ti.

2. Pucchānusandhiādīsū anantogadhattā “**pāṭiekkō anusandhi**”ti vatvā tamevattham pākātam kātum “**bhagavā kirā**”tiādi vuttam. **Upasantakāraṇanti** upasantabhāvakāraṇam. Tañhi ariyānamyeva visayo, tatthāpi ca buddhānam eva anavasesato visayoti imamattam byatirekato anvayato ca dassetum **na hi tvantiādi** vuttam. Tattha ñātathacariyā kākajātakādivasena veditabbā, lokatthacariyā taṃtampāramipūraṇavasena, buddhatthacariyā mahābodhiṇṇātakādivasena. **Acchariyam bho gotamā**tiādinā kandarakena katam pasādapavedanam dasseti.

Yepi tetiādinā tena vuttamattham paccanubhāsantena bhagavatā sampatichchitanti caritattā āha –

“**santi hi kandarakāti ayampi pāṭiyekko anusandhī**”ti. Yo hi kandarakena bhikkhusaṅghassa upasantabhāvo kittito, taṃ vibhajitvā dassentopi tena apucchitoyeva attano ajjhāsayena bhagavā “**santi hī**”tiādinaṃ desanaṃ ārabhi. Tenāha “**bhagavato kira etadahosī**” tiādi. **Kappetvāti** aññathā santameva attānaṃ aññathā vidhāya. **Pakappetvāti** sanidassanavasena gahetvā. Tenāha “**kuhakabhāvenā**”tiādi. **Paṭipadaṃ pūrayamānāti** kāmaṃ avisesena sekkhā vuccanti, te pana adhigatamaggavasena “pūrayamānā”ti na vattabbā kiccassa niṭṭhitattā. Maggo hi ekacittakkhaṇikoti āha “**uparimaggassa vipassanāya upasantā**”ti. **Ito muttāti** maggenāgatūpasamato muttā. Kalyāṇaputhujjane sandhāya vadati. Tenāha “**catūhi satipaṭṭhānehi upasantā**”ti.

Satatasīlāti avicchinnasīlā. Sātisayo hi etesaṃ sīlassa akhaṇḍādibhāvo. Suparisuddhasīlatāvasena santatā vutti etesanti **santatavuttinoti** āha “**tasseva vevacana**”nti. Evaṃ sīlavuttivasena “santatavuttino”ti padassa atthaṃ vatvā idāni jīvitavuttivasena dassento “**santatajīvikāvāti attho**”ti āha. Sāsanassa jīvitavutti sīlasannisitā evāti āha “**tasmi**”ntiādi.

Nipayati visoseti rāgādisaṃkilesaṃ, tato vā attānaṃ nipātīti **nipako**, paññavā. Tenāha “**paññavanto**”ti. **Paññāya ṭhatvā jīvikākappanaṃ** nāma buddhapaṭikuṭṭhamicchājīvaṃ pahāya sammājīvena jīvananti taṃ dassento “**yathā ekacco**”tiādimāha. Tattha yaṃ vattabbaṃ, taṃ **visuddhimagge** (visuddhi. 1.14) **taṃsaṃvaṇṇanāyañca** (visuddhi. mahāṭī. 1.14) vuttanayeneva veditabbaṃ. Rathavinītaṭipadādayo tesu tesu suttesu vuttanayena veditabbā. Ito aññattha mahāgopālakasuttādīsu (ma. ni. 1.346 ādayo) lokuttarasatipaṭṭhānā kathitāti āha – “**idha pana lokiyalokuttaramissakā satipaṭṭhānā kathitā**”ti, satipaṭṭhānasuttepi (dī. ni. 2.373-374; ma. ni. 1.106 ādayo) vomissakāva kathitāti. **Ettakenāti** ettakāya desanāya.

3. Kāarakabhāvanti paṭipattiyāṃ paṭipajjanakabhāvaṃ. Mayampi nāma gihī bahukiccā samānā kālena kālaṃ satipaṭṭhānesu suppaṭiṭṭhitacittā viharāma, kimaṅgaṃ pana vivekavāsīnotti attano kāarakabhāvaṃ pavedento evaṃ **bhikkhusaṅghaṇca ukkhipati**. Tenāha “**ayañhettha adhippāyo**”tiādi. Nānārammaṇesu aparāparaṃ uppajjamānānaṃ rāgādīkilesānaṃ ghanajaṭṭitasāṅkhātākārena pavatti kilesagahanena gahanatā, tenāha “anto jaṭā bahi jaṭā, jaṭāya jaṭitā pajā”ti (saṃ. ni. 1.23, 192). Manussānaṃ ajjhāsayagahaṇena sāṭṭheyyampīti dassento āha “**kasaṭasāṭṭheyyesupi eseva nayo**”ti. Yathā sappimadhuphānītādīsu kacavarabhāvo, so kasaṭoti vuccati, evaṃ santāne aparisuddho saṃkilesabhāvo kasaṭanti āha “**aparisuddhaṭṭhena kasaṭatā**”ti. Attani asantaṅgaṇasambhāvaṃ **kerāṭiyatṭho. Jānātīti** “idaṃ ahitaṃ na sevitaṃ, idaṃ hitaṃ sevitaṃ”nti vicāreti deseti. Vicāraṇatthopi hi hoti jānāti-saddo yathā “āyasmā jānāti”ti. **Sabbāpi...pe... adhippetā** “pasupālakā”tiādīsu viya. Idha antara-saddo “vijjantarīkāyā”tiādīsu (ma. ni. 2.149) viya khaṇatthoti āha “**yattakena khaṇenā**”ti. **Tenāti** hatthinā. **Tānāti** sāṭṭheyyādīni.

Atthato kāyacittujukatāpaṭipakkhabhūtāva lobhasahagatacittuppādassa pavattiākāravisesāti tāni pavattiākārena dassetuṃ “**tatthā**”tiādi vuttaṃ. Tattha **yassāti** paṇabhūtassa assassa vā hatthino vā. **Ṭhassāmīti** tattheva sappaṭibhaye ṭhāne gantvā ṭhassāmīti na hoti. Imassa sāṭṭheyyatāya pākāṭakaraṇaṃ vañcanādhippāyabhāvato. Tathā hi catūsu ṭhānesu “**vañcetvā**” icceva vuttaṃ, niguhanto pana tattheva gantvā tiṭṭheyya. Esa nayo sesesupi. **Paṭimaggam ārohitukāmassāti** āgatamaggameva nivattitvā gantukāmassa. Leṇḍavissajjanādīsu kālantarāpekkhābhāvaṃ “**tathā**”ti iminā upasaṃharati.

Antojātakāti attano dāsiyā kucchimhi jātā. **Dhanakkītāti** dhanam datvā dāsabhāvena gahitā. **Karamarānītāti** dāsabhāvena karamaraggāhagahitā. **Dāsabyanti** dāsabhāvaṃ. **Pessāti** adāsā eva hutvā veyyāvaccakarā. **Imaṃ vissajjetvāti** imaṃ attano hatthagataṃ vissajjetvā. **Imaṃ gaṇhantāti** imaṃ tassa hatthagataṃ gaṇhantā. Sammukhato aññathā parammukhakāle kāyavācāsamudācāradassaneneva cīttassa nesam aññathā ṭhitabhāvo niddiṭṭhoti veditabbo.

4. Ayampi pāṭiyekko anusandhīti etthāpi anantare vuttanayeneva anusandhiyojanā veditabbā. Tenevāha “**ayañhī**”tiādi. Catuttho hitapaṭipadaṃ paṭipannoti yojanā. Puggalasīsenā puggalapaṭipattim

dassento “**puggale pahāyā**”ti āha. Paṭipatti hi idha pahātabbā, na puggalā. Yathā assaddhādipuggalaparivajjanena saddhindriyādibhāvanā ijjhanti, evaṃ micchāpaṭipannapuggalaparivajjanena micchāpaṭipadā vajjitabbāti āha – “**purime tayo puggale pahāyā**”ti. **Catutthapuggalassāti** imasmim catukke vuttacatutthapuggalassa **hitapaṭipattiyāmyeva paṭipādemī** pavattemīti **dassento. Santāti** samaṃ vināsaṃ nirodhaṃ pattāti ayamettha atthoti āha “**niruddhā santāti vuttā**”ti. Puna **santāti** bhāvanāvasena kilesapariḷāhavigamato santāti ayamettha atthoti āha “**nibbutā**”ti. Santāti ānetvā yojanā. **Santo haveti** ettha samabhāvakarena sādhubhāvassa visesapaccayabhūtena paṇḍiccena samannāgatā ariyā “santo”ti vuttāti āha – “**santo have...pe... paṇḍitā**”ti.

Āhito ahaṃmāno etthāti attā (a. ni. ṭi. 2.4.198) attabhāvo, idha pana yo paro na hoti, so attā, taṃ **attānaṃ. Paranti** attato aññaṃ. **Chātaṃ vuccati taṇhā** jighacchāhetutāya. **Anto tāpanakilesānanti** attano santāne attapariḷāhajanasantappanakilesānaṃ. **Cittaṃ ārādheti**ti cittaṃ pasādeti, sampahaṃsetīti attho. Yasmā pana tathābhūto cittaṃ sampādeto ajjhāsayaṃ gaṇhanto nāma hoti, tasmā vuttaṃ “**cittaṃ sampādeti**”tiādi.

5. Dukkhaṃ paṭikkūlaṃ jegucchaṃ etassāti dukkhapaṭikkūlo taṃ **dukkhapaṭikkūlaṃ**. Visesanavisesitabbatā hi kāmacārā. Aṭṭhakathāyaṃ pana dukkhassa visesitabbataṃ sandhāya bāhiratthasamāsaṃ anādiyitvā “**dukkhassa paṭikkūla**”nti attho vutto. Yena hi bhāgena purisassa dukkhaṃ paṭikkūlaṃ, tena dukkhassa purisopīti. Tenāha – “**paccanīkasaṅghita**”nti.

6. **Catūhi kāraṇehīti** dhātukusalatādīhi catūhi kāraṇehi. **Kammaṃ karotīti** yogakammaṃ karoti. Yasmā sambuddhā paresaṃ maggaphalādhigamāya ussāhajātā, tattha nirantaraṃ yuttappayuttā eva honti, te paṭicca tesāṃ antarāyo na hotiyevāti āha “**na pana buddhe paṭicca**”ti. **Kiriyaparihāniyā** desakassa tasseva vā puggalassa tajjapayogaḅbhāvato. “Desakassa vā”ti idaṃ sāvakānaṃ vasena daṭṭhabbaṃ. **Mahatā atthenāti** ettha **attha**-saddo ānisaṃsapariyāyoti āha “**dvīhi ānisaṃsehī**”ti. **Pasādaṃ paṭilabhati** “arahanto”tiādinā saṅghasuppaṭipattiyā sutattā. **Abhinavo nayo udapādi** santatasīlatādivasena anattantapatādivasena, sopi taṃ sutvā dāsādīsu savisesaṃ lajjī dayāpanno hitānukampī hutvā sekkhapaṭipadaṃ sīlaṃ sādheṃto anukkamena satipaṭṭhānabhāvanaṃ paribrūheti. Tenāha bhagavā “**mahatā atthena saṃyutto**”ti.

8. Paresaṃ hananaghātanādinā rodāpanato **luddo**, tathā vighātakabhāvena kāyacittānaṃ vidāraṇato **dāruṇo**, viruddhavādatāya **kakkhaḷo**, bandhanāgāre niyutto **bandhanāgāriko**.

9. **Khattiyābhisekenāti** khattiyānaṃ kattabbaabhisekena. **Santhāgāranti** santhārasena kataṃ agāraṃ yaññāvāṭaṃ. **Sappitelenāti** sappimayena telena, yamakasnehena hi tadā kāyaṃ abbhāñjati. Vacchabhāvaṃ taritvā ṭhito vacchataro. **Parikkhepakaraṇatthāyāti** vanamālāhi saddhim dabbhehi vediyā parikkhepanatthāya. **Yaññabhūmiyanti** avasesayaññatthāne. Yaṃ panettha atthato avibhattaṃ taṃ suviññeyyameva.

Kandarakasuttavaṇṇanāya līnatthappakāsanā samattā.

2. Aṭṭhakanāgarasuttavaṇṇanā

17. **Avidūreti** iminā pāḷiyāṃ “vesāliya”nti idaṃ samīpe bhummavacananti dasseti. **Sārappattakulagaṇanāyāti** (a. ni. ṭi. 3.11.16) mahāsāramahappattakulagaṇanāya. **Dasame ṭhāneti** aññe aññeti dasagaṇanāṭṭhāne. Aṭṭhakanāgare jāto bhavo **aṭṭhakanāgaro**. **Kukkuṭārāmoti** pāṭaliputte kukkuṭārāmo, na kosambiyāṃ.

18. Pakatathaniddeso ta-saddoti tassa “bhagavatā”tiādihi padehi samānādhikaraṇabhāvena vuttassa yena abhisambuddhabhāvena bhagavā pakato adhigato supākaṭo ca, taṃ

abhisambuddhabhāvaṃ saddhiṃ āgamanīyapaṭipadāya atthabhāvena dassento “**yo so...pe... abhisambuddho**”ti āha. Satipi ñāṇadassana-saddānaṃ idha paññāvevacanabhāve tena tena visesena tesam visayavisesa pavattidassanattam asādhāraṇañāṇavisesavasena vijjāttayavasena vijjābhiññānāvāraṇañāṇavasena sabbaññutāñāṇamaṃsacakkhuvāsena paṭivedhadesanāñāṇavasena ca tadattham yojtvā dassento “**tesam tesa**”ntiādimāha. Tattha **āsayānusayam jānatā** āsayānusayañāṇena **sabbam ñeyyadhammam passatā** sabbaññutānāvāraṇañāṇehi. **Pubbenivāsādīhī** pubbenivāsāsavakkhayañāṇehi. **Paṭivedhapaññāyāti** ariyamaggapaññāya. **Desanāpaññāya passatāti** desetabbadhammānaṃ desetabbappakāraṃ bodhaneyyapuggalānaṃ āsayānusayacaritādhimuttiātibhedam dhammadesanāpaññāya yāthāvato passatā. **Arīnanti** kilesārīnaṃ, pañcavidhamārānaṃ vā, sāsanassa vā paccatthikānaṃ aññatitthiyānaṃ tesam pana hananaṃ paṭihāriyehi abhibhavanaṃ appaṭibhānatākaraṇam ajjuhepkkhameva vā, **kesivinayasutta**ñcetha nidassanaṃ.

Tathā ṭhānāṭṭhānādivibhāgam **jānatā** yathākammūpagasatte **passatā**, savāsanānaṃ āsavānaṃ khīṇattā **arahatā**, abhiññeyyātibhede dhamme abhiññeyyādito aviparītāvabodhato **sammāsambuddhena**. Atha vā tīsu kālesu appaṭihatañāṇatāya **jānatā**, kāyakammādivasena tiṇṇam kammānaṃ ñāṇānuparivattito nisammakāritāya **passatā**, davādīnaṃ abhāvasādhikāya pahānasampadāya **arahatā**, chandādīnaṃ ahānihetubhūtāya akkhayaṭibhānasādhikāya sabbaññutāya **sammāsambuddhenāti** evaṃ dasabalaṭṭhārasāveṇīkabuddhadhammavasenaṃ yojanā kātābbā.

19. Abhisankhatanti attano paccayehi abhisammukhabhāvena samecca sambhūyya kataṃ, svassa katabhāvo uppādanena vedītabbo, na uppannassa paṭisaṅkharāṇenāti āha “**uppādita**”nti. Te cassa paccayā cetanāpadhānāti dassetuṃ pāḷiyam “abhisankhataṃ abhisāñcetaṃ”nti vuttanti “cetaṃ pakappita”nti atthamāha. **Abhisankhataṃ abhisāñcetaṃ** ca jhānassa pātubhāvadassanamukhena viddhamāsanabhāvaṃ ullīngeti yañhi ahutvā sambhavati, tam hutvā paṭiveti. Tenāha pāḷiyam ‘abhisankhata’ntiādi. **Samathavipassanādhamme ṭhitoti** samathadhamme ṭhitattā samāhito vipassanaṃ paṭṭhapetvā aniccānupassanādīhi niccasaññādayo pajahanto anukkamena tam anulomañāṇam pāpetā hutvā vipassanādhamme ṭhito. Samathavipassanāsāñkhātesu dhammesu rañjanaṭṭhena **rāgo**, nandanāṭṭhena **nandīti**. Tattha sukhumā apekkaṃ vuttā, yā “nikantī”ti vuccati.

Evaṃ santeti evaṃ yathārutavasena ca imassa suttapadassa atthe gahetabbe sati. **Samathavipassanāsu chandarāgo kattabboti** anāgāmiphalaṃ nibbatttvā tadatthāya samathavipassanāpi anibbatttvā kevalam tattha chandarāgo kattabbo bhavissati. Kasmā? Tesu samathavipassanāsāñkhātesu dhammesu chandarāgamattena anāgāminā laddhabbassa aladdhānāgāmiphalaṃ laddhabbattā tathā sati tena anāgāmiphalaṃ laddhabbameva nāma hoti. Tenāha – “**anāgāmiphalaṃ paṭividdham bhavissati**”ti. Sabhāvato rasitabbattā aviparīto attho eva **attharaso**. **Aññāpi kāci sugatīyoti** vinipātike sandhāyāha. **Aññāpi kāci duggatīyoti** asurakāyamāha.

Samathadhurameva dhuraṃ samathayānikassa vasena desanāya āgatattā. Mahāmālukyovāde “vivicca akusalehi dhammehi savitakkam savicāra”nti pādakajjhānaṃ katvā “so yadeva tattha hoti rūpagataṃ vedanāgata”ntiādinā vipassanaṃ vitthāretvā “so tattha ṭhito āsavānaṃ khayam pāpuṇātī”ti (ma. ni. 2.133) āgatattā “**mahāmālukyovāde vipassanāya dhura**”nti āha. **Mahāsatiṭṭhānasutte** (dī. ni. 2.373 ādayo; ma. ni. 1.106 ādayo) sabbatthakameva tikkhatāyā vipassanāya āgatattā vuttam “**vipassanuttaram kathita**”nti. **Kāyagatāsatisutte** (ma. ni. 3.153-154) ānāpānājjhānādivasena savisesam samathavipassanāya āgatattā vuttam “**samathuttaram kathita**”nti.

Appam yācītena bahum dentena uḷārapurisena viya **ekam dhammam pucchitena** “**ayampi ekadhammo**”ti **kathitattā ekādasapi dhammā** pucchāvasena **ekadhammo nāma jāto** paccekam vākyaparisaṃmāpanāyena. **Ekavīsati pabbāni** tehi bodhiyāmanāya paṭipadāya ekarūpattā **paṭipadāvasena ekadhammo nāma jātoti**. **Idha** imasmim aṭṭhakanāgarasutte. Nevasaññānāsāññāyatanadhammānaṃ sañkhārāvasesasukhumabhāvappattatāya tattha sāvakanam dukkaranti na catutthāruppavasenettha desanā āgatāti catunnam brahmavihārānaṃ, heṭṭhimānaṃ tiṇṇam

āruppānañca vasena **ekādasa. Pucchāvasenā**ti “atthi nu kho, bhante ānanda, tena...pe... sammāsambuddhena ekadhammo akkhāto”ti (ma. ni. 2.18) evaṃ pavattapucchāvasena. **Amatuppattiyatthenā**ti amatabhāvassa uppattihetutāya, sabbānīpi kammaṭṭhānāni ekarasampi amatādhigamapaṭipattiyāti attho, evamettha aggaphalabhūmi anāgāmiphalaabhūmiti dveva bhūmiyo sarūpato āgatā, nānantariyatāya pana heṭṭhimāpi dve bhūmiyo atthato āgatā evāti daṭṭhabbā.

21. Pañca satāni aggho etassāti **pañcasatam**. Sesam uttānameva.

Aṭṭhakanāgarasuttavaṇṇanāya līnatthappakāsānā samattā.

3. Sekhasuttavaṇṇanā

22. **Santhāgāranti** atthānusāsanaṅgāraṃ. Tenāha – “**uyyogakālādīsū**”tiādi. **Ādi-saddena** maṅgalamahādīnaṃ saṅgaho daṭṭhabbo. **Santhambhantī**ti vissamanti, pariṣsamaṃ vinodentīti attho. **Sahā**ti sannivesavasena ekajjhaṃ. **Saha atthānusānaṃ agāranti** etasmiṃ atthe ttha-kārassa ntha-kāraṃ katvā santhāgāranti vuttanti daṭṭhabbaṃ. **Santharantī**ti sammantanavasena tiṭṭhanti.

Tepiṭakaṃ buddhavacanaṃ āgatameva bhavissatīti buddhavacanaṃ āgamanasīsena ariyaphaladhammānampi āgamaṃ vuttameva, tiyāmarattim tattha vasantānaṃ phalasaṃpattivaḷaṅjanaṃ hotīti. Tasmīñca bhikkhusaṅghe kalyāṇaputhujjanā vipassanaṃ ussukkāpentā hontīti ce? Ariyamaggadhammānaṃ tattha āgamaṃ hotiyeva.

Allagomayenāti acchena allagomayarasena. **Opuñchāpetvā**ti vilimpitvā. **Catujjātiyagandhehī**ti tagarakuṅkumayavanapupphatamālapattāni pisitvā katagandhehī **nānāvaṇṇeti** nīlādīvasena nānāvaṇṇe, na bhittivisesavasena. Bhittivisesavasena pana nānāsaṅghānarūpameva. **Mahāpiṭṭhikako javaketi** hatthipiṭṭhīsū attharitatbatāya mahāpiṭṭhikāti laddhasamaññe kojaveti vadanti. Kuttake pana sandhāyetaṃ vuttaṃ **hatthatharaṇā** hatthirūpavicittā. **Assattharakasīhattharakā**dayopi assasīharūpādivicittā eva attharakā, **cittattharakam** nānārūpehi ceva nānāvidhamālākammādīhi ca vicittam attharakam.

Upadhānanti apassayanaṃ **upadahitvā**ti apassayayoggabhāvena ṭhapetvā gandhehī katamālā **gandhadāmaṃ**, tamālapattādīhi kataṃ **pattadāmaṃ**. **Ādi-saddena** hiṅgulatakkolaṅgātiphalajātipupphādīhi katadāmaṃ saṅgaṇhātī. Pallaṅkākārena katapīṭhaṃ **pallaṅkapīṭhaṃ**, tīsu passesu, ekapasse eva vā saupassayaṃ **apassayapīṭhaṃ**, anapassayaṃ **muṇḍapīṭhaṃ yojanāvatteti** yojanaparikkhepe.

Samvidhāyāti antaravāsakassa koṇapadesaṅca itarapadesaṅca samaṃ katvā vidhāya. Tenāha – “**kattariyā padumaṃ kantanto viyā**”ti **timaṇḍalam paṭicchādentoti** ettha ca yasmā buddhānaṃ rūpasampadā viya ākappasampadāpi paramukkamaṃsagatā, tasmā tadā bhagavā evaṃ sobhatīti dassento “**suvaṇṇapāmaṅgenā**”tiādimāha, tattha **asamena buddhavesenā**tiādinā tadā bhagavā buddhānubhāvassa niguhāṇe kāraṇabhāvato tattha sannipatitadevamanussanāgayakkhagandhabbādīnaṃ pasādajananatthaṃ attano sabhāvapakatikiriyaeva kapilavatthum pāvisīti dasseti. Buddhānaṃ kāyappabhā nāma pakatiyā asītiatthamattameva padesaṃ pharati ti āha – “**asītiatthattāṭṭhānaṃ agghesi**”ti nīlapītalohitodātamañjiṭṭhapabhassarānaṃ vasena **chabbaṇṇā buddharasmiyo**.

Sabbapāliphulloti mūlato paṭṭhāya yāva aggā phullo vikaṣito. **Paṭipāṭiyā ṭhapitānanti**tiādi parikappūpamā. **Yathā tam...pe... alaṅkatam** añño virocāti, evaṃ virocittha, samatiṃsāya pāramitāhi abhisāṅkhatattā evaṃ virocitthātī vuttaṃ hotī. **Pañcaviṣatiyā nadīnanti** gaṅgādīnaṃ candabhāgāpariyosānānaṃ pañcaviṣatiyā mahānadīnaṃ. **Sambhijjāti** sambhedam missībhāvaṃ patvā **mukhadvāreti** samuddam pavīṭṭhaṭṭhāne.

Devamanussanāgasupañṇagandhabbayakkhādīnaṃ akkhīnīti cetam parikkappanavasena vuttam. **Sahassenāti** padasahassena, bhāṇavārappamāṇena ganthenāti attho.

Kampayanto vasundharanti attano guṇavisesehi pathavīkampaṃ uppādentō, evaṃbhūtopi **ahēṭhayanto pāṇāni**. Sabbadakkhiṇattā buddhānaṃ **dakkhiṇaṃ paṭhamaṃ pādaṃ uddharanto**. **Samaṃ samphusate bhūmiṃ** suppatiṭṭhitapādatāya. Yadi pi bhūmiṃ samaṃ phusati, **rajasānupalippati** sukhumattā chaviyā. **Ninnaṭṭhānaṃ unnamatīti** ādi buddhānaṃ suppatiṭṭhitapādasāṅkhātassa mahāpurisalakkhaṇapaṭilābhassa nissandaphalaṃ. **Nātidūre uddharatīti** atidūre ṭhapetuṃ na uddharati. **Naccāsanne ca nikkhipanti** accāsanne ca ṭhāne anikkhipanto niyyāti. **Hāsayinganto sadevake** loke tosayanto. Catūhi pādehi caratīti **catucārī**.

Buddhānubhāvassa pakāsanavasena gatattā **vaṇṇakālo nāma kiresa**. Sarīraṇaṃ vā guṇavaṇṇaṃ vā kathiyamāne **dukkathitanti na vattabbaṃ**. Kasmā? **Aparimāṇavaṇṇā hi buddhā** bhagavanto, buddhaguṇasaṃvaṇṇanā jānantassa yathādhammasaṃvaṇṇanaṃyeva anupavisatīti.

Dukūlacumbaṭakenāti ganthitvā gahitadukūlavatthena, **nāgavikkantacaraṇoti** hatthināgasadisapadanikkhepo. **Satapuññalakkhaṇoti** anekasatapuññanimmitamahāpurisalakkhaṇo **maṇiverocano yathāti** ativiya virocamaṇo maṇi viya verocano nāma eko maṇivisesoti keci **mahāsālovāti** mahanto sālarukkho viya, koviḷārādimahārukko viya vā **padumo kokanado yathāti** kokanadasāṅkhātamaṃ mahāpadumaṃ viya, vikasamānapadumaṃ viya vā.

Ākāsagaṅgaṃ otārento viyāti ādi tassā pakiṇṇakakathāya aññesaṃ dukkarabhāvadassanañceva suṇantānaṃ accantasukhāvahabhāvadassanañca **pathavijaṃ ākaḍḍhento viyāti** nāḷiyantaṃ yojetvā mahāpathaviyā heṭṭhimatale pappāṭakojaṃ uddhammukhaṃ katvā ākaḍḍhento viya **yojanikanti** yojanappamāṇaṃ **madhubhaṇḍanti** madhupaṭalaṃ.

Mahantanti ulāraṃ. **Sabbadānaṃ dinnameva hotīti** sabbameva paccayajātaṃ āvāsadāyakena dinnameva hoti. Tathāhi dve tayo gāme piṇḍāya caritvā kiñci aladdhā āgatassapi chāyūdakasampannaṃ ārāmaṃ pavisitvā nhāyitvā paṭissaye muhuttaṃ nipajjitvā utṭhāya nisinnassa kāye balaṃ āharitvā pakkhittaṃ viya hoti. Bahi vicarantassa ca kāye vaṇṇadhātu vātātapehi kilamati, paṭissayaṃ pavisitvā dvāraṃ pidhāya muhuttaṃ nisinnassa visabhāgasantati vūpasammati, sabhāgasantati patiṭṭhāti, vaṇṇadhātu āharitvā pakkhittā viya hoti, bahi vicarantassa ca pāde kaṇṭako vijjhati, khāṇu paharati, sarīsapādi parissayo ceva corabhayañca uppajjati, paṭissayaṃ pavisitvā dvāraṃ pidhāya nipannassa pana sabbe parissayā na honti, ajjhayantassa dhammapītisukhaṃ, kammaṭṭhānaṃ manasikarontassa upasamasukhaṃ uppajjati bahiddhā vikkhepābhāvato, bahi vicarantassa ca kāye sedā muccanti, akkhīni phandanti, senāsanaṃ pavisanakkhaṇe mañcapīṭhādīni na paññāyanti, muhuttaṃ nisinnassa pana akkhipasādo āharitvā pakkhitto viya hoti, dvāravātapānamañcapīṭhādīni paññāyanti, etasmimpi ca āvāse vasantaṃ disvā manussā catūhi paccayehi sakkaccaṃ upaṭṭhahanti. Tena vuttam – “**āvāsadānasmim dinne sabbaṃ dānaṃ dinnameva hoti**”ti. **Bhūmaṭṭhaka...pe... na sakkāti** ayamattho **mahāsudassanavatthunā** (dī. ni. 2.241 ādayo) dīpetabbo.

Sītanti (sārattha. ṭī. cūlavagga 3.295; saṃ. ni. ṭī. 2.4.243) ajjhattadhātukkabhavasena vā bahiddhautuvipariṇāmasena vā uppajjanakasītaṃ. **Uṇhanti** aggisantāpaṃ. Tassa pana davadāhādīsu sambhavo daṭṭhabbo. **Paṭihantīti** paṭibāhati. Yathā tadubhayavasena kāyacittānaṃ bādhanāni na honti, evaṃ karoti. Sītuṇhabbhāhate hi sarīre vikkhittacitto bhikkhu yoniso padahituṃ na sakkoti. **Vālamigānīti** sīhabyagghādivālamige. Guttasenaṇāsanañhi pavisitvā dvāraṃ pidhāya nisinnassa te parissayā na honti. **Sarīsapeti** ye keci sarantā gacchante dīghajāṭike. **Makaseti** nidassanametaṃ, ḍaṃsādīnaṃ eteneva saṅgaho daṭṭhabbo. **Sisireti** sītakālavasena sattāhavaddalikādivasena ca uppanne sisirasamphasse. **Vuṭṭhiyoti** yadā tadā uppānā vassavuṭṭhiyo paṭihanatīti yojanā.

Vātātapo ghoroti rukkhagacchādīnaṃ ummūlabhañjanavasena pavattiyā ghorō sarajaarajādibhedo

vāto ceva gimhapariḷāhasamayesu uppattiyā ghero sūriyātapo ca. **Paṭihaññatīti** paṭibāhīyati. **Leṇatthanti** nānārammaṇato cittaṃ nivattetvā paṭisallānārāmatthaṃ. **Sukhatthanti** vuttaparissayābhāvena phāsuvihāratthaṃ. **Jhāyitunti** aṭṭhatimsārammaṇesu yattha katthaci cittaṃ upanijjhāyitum. **Vipassitunti** aniccādito sabbasankhāre sammāsītum.

Vihāreti paṭissaye. **Kārayeti** kārāpeyya. **Rammeti** manorame nivāsasukhe. **Vāsayettha bahussuteti** kāretvā pana ettha vihāresu bahussute sīlavante kalyāṇadhamme nivāseyya. Te nivāsento pana **tesaṃ** bahussutānaṃ yathā paccayehi kilamatho na hoti, evaṃ **annañca pānañca vatthasenāsanāni ca dadeyya ujubhūtesu** ajjhāsayasampannesu kammaphalānaṃ ratanattayaguṇānañca saddahanena **vippasannena cetasā**.

Idāni gahaṭṭhapabbajitānaṃ aññamaññūpakāraṭaṃ dassetum “**te tassā**”ti gāthamāha. Tattha **teti** bahussutā **tassāti** upāsakassa. **Dhammaṃ desentīti** sakalavaṭṭadukkhapanudanaṃ dhammaṃ desenti. **Yaṃ so dhammaṃ idhaññāyāti** so puggalo yaṃ saddhammaṃ imasmiṃ sāsane sammāpaṭipajjanena jānitvā aggamaggādhigamena anāsavo hutvā parinibbāyati.

Pūjāsakkāravaseneva paṭhamayāmo khepito, bhagavato desanāya appāvaseso majjhimayāmo gatoti pāliyaṃ “bahudeva ratti”nti vuttanti āha “**atirekataraṃ diyadḍhayāma**”nti. **Sandassesīti** ānisaṃsaṃ dassesi, āvāsādānapaṭisaṃyuttaṃ dhammiṃ katham sutvā tato paraṃ, “mahārāja, itipi sīlaṃ, itipi samādhi, itipi paññā”ti sīlādiguṇe tesam sammā dassesi, hatthena gahetvā viya paccakkhato pakāsesi. **Samādapesīti** “evaṃ sīlaṃ samādāttabbaṃ, sīle patiṭṭhitena evaṃ samādhi, evaṃ paññā bhāvetabbā”ti yathā te sīlādiguṇe ādiyanti, tathā gaṇhāpesi. **Samuttejesīti** yathā samādinnaṃ sīlaṃ suvisuddhaṃ hoti, samathavipassanā ca bhāviyamānā yathā suṭṭhu visodhitā uparivisesāvahā honti, evaṃ cittaṃ samuttejesi nisāmanavasena vodāpesi. **Sampahaṃsesīti** yathānusitṭhaṃ ṭhitasīlādiguṇehi sampati laddhaguṇānisamsehi ceva upari laddhabbaphalavisesehi ca uparicittaṃ sammā pahaṃsesi, laddhassāsavasena suṭṭhu tosesi. Evametesam padānaṃ attho vedītabbo.

Samudāyavacanopi asītimahāthera-saddo tadekadesepe niruḷhoti āha “**asītimahātheresu vijjamānesū**”ti. Ānandattheropi hi antogadho evāti. **Sākiyamaṇḍaleti** sākiyarājasamūhe.

Paṭipadāya niyuttattā **pāṭipado**. Tenāha – “**paṭipannako**”ti. Sikkhanasīlatādinā **sekho**, odhiso samitapāpatāya **samaṇo**. Sekho pāṭipado paṭipajjanapuggalādhiṭṭhānena paṭipadādesanaṃ niyamento paṭipadāya puggalaṃ niyameti nāmāti “**paṭipadāya puggalaṃ niyametvā dassetī**”ti. Sekhappaṭipadā sāsane **maṅgalapaṭipadā** sammadeva asevitabbaparivajjanena sevittabbasamādānena ukkaṃsavatthūsu ca bhāvato asekhadhammapāriṭṭhiyā āvahattā ca **vaḍḍhamānakapaṭipadā**. **Akilamantāva sallakkhessantīti** idaṃ tadā tesam asekhabhūmiadhigamāya ayogyatāya vuttaṃ. **Akilamantāvāti** iminā paṭisambhidāppattassapi anadhigatamaggasaññāpanā bhāriyāti dasseti. **Osaṭāti** anuppaviṭṭhā. **Sakalaṃ vinayapaṭikāṃ kathitameva hoti** tassa sīlakathābhāhullato sesadvayepi eseva nayo. **Tīhi piṭakehīti** karaṇatthe karaṇavacanaṃ. Tena taṃtaṃpiṭakānaṃ tassā tassā sikkhāya sādhatamabhāvaṃ dasseti.

Piṭṭhivāto uppajjati upādinnakasarīrassa tathārūpattā saṅkhārānañca aniccatāya dukkhānubandhattā. **Akāraṇaṃ vā etanti** yenādhippāyena vuttaṃ, tameva adhippāyaṃ vivaritum “**pahoti**”tiādi vuttaṃ. **Catūhi iriyāpathehi paribhuñjitukāmo ahoṣi** sakyarājūnaṃ ajjhāsayasasena. Tathā hi vakkhati “satthāpi tadeva sandhāya tattha saṅghātiṃ paññāpetvā nipajjīti”ti. Yadi evaṃ “piṭṭhi me āgilāyati”ti idaṃ kathanti āha “**upādinnakasarīrañca nāmā**”tiādi.

23. “Iminā pātimokkhasaṃvarena...pe... sampanno”tiādisu (vibha. 511) samannāgatatto sampanna-saddo, idha pana pāriṭṭhiatthoti dassetum “**paripuṇṇasīloti attho**”ti vuttaṃ. Yo pana sampannasīloyeva, so paripuṇṇasīlo. Parisuddhañhi sīlaṃ “paripuṇṇa”nti vuccati, na sabalaṃ kammāsaṃ vā. **Sundaradhammehīti** sobhanadhammehi. Yasmiṃ santāne uppannā tassa sobhanabhāvato. Tehi sappurisabhāvasādhanato **sappurisānaṃ** dhammehi.

24. Iminā ettakena thānenāti “idha, mahānāma, ariyasāvako”ti ārabhitvā yāva “akasiralābhī”ti padaṃ iminā ettakena uddesapadena mātikaṃ thapetvā. **Paṭipāṭiyāti** uddesapaṭipāṭiyā. **Evamāhāti** “evaṃ kathaṅca, mahānāmā”tiādīnā idāni vuccamānena dassitākārena āha.

25. Hiriyatīti lajjīyati pīlīyati. Yasmā hirī pāpajigucchanaḷakkhaṇā, tasmā “**jigucchati attho**”ti vuttaṃ. **Ottappatīti** uttappati. Pāputrāsalaḷakkhaṇāhi ottappaṃ. **Paggahitavīriyoti** saṅkocaṃ anāpannavīriyo. Tenāha “**anosakkitamānaso**”ti. **Pahānatthāyāti** samucchindanattāya. Kusalānaṃ dhammānaṃ upasampadā nāma adhigamo evāti āha “**paṭilābhatthāyā**”ti. **Satinepakkenāti** satiyā nepakkena tikkhavisadasūrabhāvena. **Aṭṭhakathāyaṃ** pana nepakkaṃ nāma paññāti adhippāyena “**satiyā ca nipakabhāvena cā**”ti attho vutto, evaṃ sati añño niddiṭṭho nāma hoti. **Satimāti** ca imināva visesā sati gahitā, parato “cirakatampi cirabhāsītampi saritā anussaritā”ti satikiccameva niddiṭṭhaṃ, na paññākkiccam, tasmā **satinepakkenāti** satiyā nepakabhāvenāti sakkā viññātuṃ. Teneva hi paccayavisesavasena aññadhammanirapekkho satiyā balavabhāvo. Tathā hi ñāṇavippayuttacittenapi ajjhayanāsammaṇāni sambhavanti.

Cetiyaṅgaṇavattādīti ādi-saddena bodhiyaṅgaṇavattādīni saṅgaṇhāti.

Asīmahāvattapaṭipattipūraṇanti ettha asītivattapaṭipattipūraṇaṃ mahāvattapaṭipattipūraṇanti vattapaṭipattipūraṇa-saddo paccekaṃ yojetabbo. Tattha **mahāvattāni** (vibha. mūlaṭī. 406) nāma vattakhandhake (cūḷava. 356 ādayo) vuttāni āgantukavattaṃ āvāsikaṃ gamikaṃ anumodanaṃ bhattaggaṃ piṇḍacārikaṃ āraññikaṃ senāsaṇaṃ jantāgharaṃ vaccaḷuṭi upajjhāyaṃ saddhivihārikaṃ ācariyaṃ antevāsikavattanti cuddasa. Tato aññāni pana kadāci tajjanīyakammakatādīkāle pārivāsikādīkāle ca caritabbāni asīti khuddakavattāni sabbāsu avatthāsu na caritabbāni, tasmā mahāvattesu, aggahitāni. Tattha “pārivāsikānaṃ bhikkhūnaṃ vattaṃ paññapessāmī”ti ārabhitvā “na upasampādetabbaṃ...pe... na chamāyaṃ caṅkamaṇte caṅkame caṅkamitabba”nti (cūḷava. 81) vuttāni pakabhatte caritabbavattāvasānāni chasaṭṭhi, tato paraṃ “na, bhikkhave, pārivāsikena bhikkhūnā pārivāsikavuddhatarena bhikkhūnā saddhiṃ mūlāyapaṭikassanārahena mānattārahena mānattacārikaṇa abbhānārahena bhikkhūnā saddhiṃ ekacchane āvāse vattabba”ntiādīni (cūḷava. 82) pakatatte caritabbēhi anaññattā viṣuṃ viṣuṃ agaṇetvā pārivāsikavuddhatarādīsu puggalantaresu caritabbattā tesam vasena sampiṇḍetvā ekekaṃ katvā gaṇitabbāni pañcāti ekasattativattāni, ukkhepaniyakammakatavattesu vattapaññāpanavasena vuttaṃ – “na pakatattassa bhikkhuno abhivādanaṃ paccuṭṭhānaṃ...pe... nhāne piṭṭhiparikammaṃ sādītāba”nti (cūḷava. 51) idaṃ abhivādanādīnaṃ asādiyaṇaṃ ekaṃ, “na pakatatto bhikkhu sīlavipattiyā anuddhaṃsitabbo”tiādīni ca dasāti evametāni dvāsīti. Etesveva pana kānici tajjanīyakammādivattāni kānici pārivāsikādivattāni aggahitaggahaṇena dvāsīti, evaṃ appakaṃ pana ūnamadhikaṃ vā gaṇanupagaṃ na hotīti idha “asīti”cveva vuttaṃ. Aññattha pana aṭṭhakathāpadese “dvāsīti khandhakavattāni”ti vuccati.

Sakkaccaṃ uddisanaṃ sakkaccaṃ uddisāpananti paccekaṃ sakkaccaṃ-saddo yojetabbo.

Uddisanaṃ uddesaggahaṇaṃ. **Dhammosāraṇaṃ** dhammassa uccāraṇaṃ. **Dhammadesanā** –

“Ādimhi sīlaṃ deseyya, majjhe jhānaṃ vipassanaṃ;

Pariyosāne ca nibbānaṃ, esā kathikasāṅghitī”ti. (dī. ni. aṭṭha. 1.190; saṃ. ni. aṭṭha. 3.4.246) –

Evam kathitalakkhaṇā dhammakathā. Upagantvā nisinnassa yassa kassaci gahaṭṭhassa pabbajitassa vā taṅkhaṇānurūpā dhammī kathā **upanisinnakathā**. Bhattānumodanakathā **anumodaniyā**. **Saritāti** ettha na kevalaṃ cirakatacirabhāsītānaṃ saraṇamanussaraṇamattaṃ adhippettaṃ, atha kho tathāpavattarūpārūpadhammānaṃ pariggahamukhena pavattavipassanācāre satisambojjhaṅgasamuṭṭhāpananti dassetuṃ “**tasmiṃ kāyena cirakate**”tiādī vuttaṃ. **Sakimpi saraṇenāti** ekavāraṃ saraṇena. **Punappaṇaṃ saraṇenāti** anu anu saraṇena. Satisambojjhaṅgampi vivekanissitaṃ virāganissitaṃ nirodhanissitaṃ vosaggapariṇāmiṇca katvā saranto tattha tattha javanavāre saraṇajavanavāre parittajavanavasena **anussaritāti veditabbā**.

Gatiatthā dhātusaddā buddhiatthā hontīti āha – “**udayañca vayañca paṭivijjhitaṃ samatthāyā**”ti. Missakanāyenaṃ desanā āgatāti āha – “**vikkhambhanavasena ca samucchavedavasena cā**”ti. Tenāha “**vipassanāpaññāya cevā**”tiādi. Vipassanāpaññāya nibbedhikapariyāyato. Sā ca kho padesikāti nippadesikaṃ katvā dassetaṃ “**maggapaññāya paṭilābhasamvattanato cā**”ti vuttaṃ. Dukkakkhayagāminibhāvepi eseva nayo. **Sammāti** yāthāvato. Akuppadhammatāya hi maggapaññā khepitakhepanāya na puna kiccaṃ atthīti upāyena ñāyena yā pavatti sā evāti āha – “**hetunā nāyena**”ti.

26. Adhikaṃ ceto abhiceto, mahaggatacittaṃ, tassa pana adhikatā kāmaccchandāpaṭipakkhavigamena viṭṭhabhāvappatti, tannissitāni **ābhicetasikāni**. Tenāha “**ābhicittaṃ seṭṭhacittaṃ sitāna**”nti. **Diṭṭhadhammasukhavihārānanti** imasmiṃyeva attabhāve phāsuvihārabhūtānaṃ. Tehi pana samaṅgitakkhaṇe yasmā vivekajaṃ pītisukhaṃ samādhijam pītisukhaṃ apītiyaṃ satipārisuddhiñānasukhañca paṭilabhati vindati, tasmā āha – “**āpittappitakkhaṇe sukhaṃ paṭilābhahetūna**”nti. **Icchicchittakkhaṇe samāpajjitāti** iminā tesu jhānesu samāpajjanavasībhāvamāha, “**nikāmalābhī**”ti pana vacanato āvajjanādhīṭṭhānā paccavekkhaṇavasiyo ca vuttā evāti vedītabbā. **Nidukkhalābhīti** iminā tesam jhānānaṃ sukhaṃ paṭipadākkhippābhīññataṃ dasseti, **vipulābhīti** iminā paṇḍitaṃ tappamānadassitabhāvadīpanato. Tenāha “**paṇḍitabhāvenā**”tiādi. **Samāpajjitaṃ sakkoti** samāpajjanavasībhāvatāya sādhitattā. **Samādhīpāripanthikadhammeti** vasībhāvassa paccanīkadhamme. Jhānādhigamassa pana paccanīkadhammā pageva vikkhambhitā, aññathā jhānādhigamo eva na siyā. **Akilamanto vikkhambhetuṃ na sakkoti**ti kicchena vikkhambhethi visodheti, kāmādinavapaccavekkhaṇādīhi kāmaccchandādinam aññesaṃ samādhīpāripanthikānaṃ dūrasamussāraṇaṃ idha vikkhambhanaṃ visodhananti vedītabbā.

27. Vipassanāhitāya uparūparivisesāvahattā vaḍḍhamānāya pubbhāgasīlādīpaṭipadāya. Sā eva pubbhāgapāṭipadā yathābhāvitāya avassaṃ bhāvinam viśesaṃ pariggahitattā aṇḍaṃ viyāti aṇḍaṃ, kilesehi adūsitātāya apūti aṇḍaṃ etassāti apuccaṇḍo, vipassanaṃ ussukkāpetvā ṭhitapuggalo, tassa bhāvo **apuccaṇḍatā**. **Vipassanādiñānappabhedāyāti** pubbenivāsañānādiñānappabhedāya. **Tatthāti** cetokhīlasutte (ma. nī. 1.185) “sa kho so, bhikkhave, evaṃ ussoḥhipannarasaṅgasamānāgato bhikkhu bhabbo abhinibbidāyā”ti āgatattā **ussoḥhipannarasehi aṅgehi samānāgatabhāvoti evaṃ yaṃ opammasaṃsandanaṃ āgataṃ**, taṃ opammasaṃsandanaṃ idha imasmiṃ sekhasutte yojetvā vedītabbanti sambandho.

28. Mahaggatādībhāvena heṭṭhimānaṃ jhānānaṃ anurūpampi attano viśesena te uttaritvā atikkamitvāna ṭhitanti **anuttaraṃ**, tenāha – “**paṭhamādījjhānehi asadisam uttama**”nti. **Dutiyādīsūpi** abhinibbidāsu. Pubbenivāsañānaṃ uppajjamānaṃ yathā attano viśayapaṭicchādakaṃ kilesandhakāraṃ vidhamantameva uppajjati, evaṃ attano viśaye kañci viśesaṃ karontameva uppajjati āha – “**pubbenivāsañāna paṭhamam jāyati**”ti, sesañānadvayepi eseva nayo.

29. **Caraṇasminti** paccatte bhummavacananti āha “**caraṇaṃ nāma hotīti attho**”ti. **Tenāti** karaṇatthe karaṇavacanaṃ āgatapubbadisāgamane tesam sādhatamabhāvato.

Aṭṭha ñāṇānīti idha āgatāni ca anāgatāni ca **ambāṭṭhasuttā**dīsū (dī. nī. 1.254 ādayo) āgatāni gahetvā vadati. **Vinivijjhivāti** pubbenivāsaṭicchādakādīkilesatamaṃ bhinditvā padāletvā.

30. **Sanaṅkumārenāti** sanantanakumārena. Tadeva hi tassa sanantanakumārataṃ dassetaṃ “**cirakālato paṭṭhāyā**”ti vuttaṃ. **So attabhāvoti** yena attabhāvena manussapathe jhānaṃ nibbattesi, so kumārattabhāvo, tasmā brahmabhūtopi tādisena kumārattabhāvena carati.

Janitasmiṃ-saddo eva i-kāraṣa e-kāraṃ katvā “**janetasmi**”nti vutto, **janitasminti** ca janasminti attho vedītabbo. **Janitasminti** sāmāññaggahaṇepi yattha catuvaṇṇasamaññā, tattheva manussaloke. **Khattiyo seṭṭhoti** lokasamaññāpi manussalokeyeva, na devakāye brahmakāye vāti dassetaṃ “**ye gottapaṭisārino**”ti vuttaṃ. **Paṭisarantīti** “ahaṃ gotamo, ahaṃ kassapo”ti pati pati attano gottaṃ

anuseranti paṭijānanti vāti attho.

Ettāvātāti “sādhu sādhu ānandā”ti ettakena sādhu kārādānena. **Jinabhāsitaṃ nāma jātanti**ādito paṭṭhāya yāva pariyoṣānā therabhāsitaṃ buddhabhāsitaṃ nāma jātaṃ. “Kimpanidaṃ suttaṃ satthudesanānuvidhānato jinabhāsitaṃ, udāhu sādhu kārādānamattenā”ti evarūpā codanā idha anokāsā therassa desanāya bhagavato desanānuvidhānahetukattā sādhu kārādānassāti. Yaṃ panettha atthato avibhattaṃ, taṃ suviññeyyameva.

Sekhasuttavaṇṇanāya līnatthappakāsanā samattā.

4. Potaliyasuttavaṇṇanā

31. Aṅgā nāma janapadino rājakumārā, tesam nivāso ekopi janapado ruḥhivasena aṅgātveva vuccatīti āha “**aṅgāyeva so janapado**”ti. **Mahiyā panassa uttarena yā āpoti** mahiyā nadiyā yā āpo tassa janapadassa uttarena honti. **Tāsam avidūrattā** so janapado **uttarāpoti vuccati**. Sā pana mahī katthaci katthaci bhijjivā gatīti āha “**kataramahiyā uttarena yā āpo**”ti. **Tatthāti** tassā mahiyā āgamanato paṭṭhāya **ayaṃ avibhāvakathā**. Yasmā (a. ni. ṭī. 3.8.19) lokiyā jambudīpo himavā tattha paṭṭhitasamuddadahapabbatanadiyoti etesu yaṃ yaṃ na manussagocaraṃ, tattha sayam sammūlha aññepi sammohayanti, tattha tattha sammohavidhamanattaṃ “**ayaṃ kira jambudīpo**”tiādīmāraddhaṃ. **Dasasahassayojanaparimāṇo** āyāmato ca vitthārato cāti adhippāyo. Tenāha “**tatthā**”tiādi. **Udakena ajjhotthaṇo** tadupabhogisattānaṃ puññakkhayaena.

Sundaradassanaṃ kūṭanti **sudassanakūṭaṃ**, yaṃ loka “hemakūṭa”nti vuccati. **Mūlagandho** kāḷānūsāriyādi. **Sāragandho** candanādi. **Pheggugandho** salalādi. **Tacagandho** lavaṅgādi. **Papaṭikagandho** kabittādi. **Rasagandho** sajjādi, **pattagandho** tamālahiriverādi. **Pupphagandho** nāgakunkumādi. **Phalagandho** jātiphalādi. **Gandhagandho** sabbesaṃ gandhānaṃ gandho. Yassa hi rukkhassa sabbesaṃpi mūlādīnaṃ gandho atthi, so idha gandho nāma. Tassa gandhassa gandho gandhagandho. Sabbāni puthulato paññāsajjanāni, āyāmato pana ubbedhato viya dviyojanasatānevāti vadanti.

Manoharasilātālānīti otaraṇatthāya manuññasopānasilātālāni. **Supaṭiyattānīti** tadupabhogisattānaṃ sādharāṇakammānubhāvena suṭṭhu paṭiyattāni suppavattitāni honti. Macchakacchapaḍāyodayo udakaṃ malinaṃ karonti, tadabhāvato **phalikasadisanimmaludakāni**. Tiriyato dīghaṃ uggatakūṭanti “**tiracchānapabbata**”nti āha.

Āpaṇāni eva vohārassa mukhabhūtānīti āha “**āpaṇamukhasahassāni**”ti. **Vibhattānīti** vavattitāni aññamaññāsambhinnāni. **Vasanaṭṭhānanti** attano yathāphāsukaṃ vasitabbaṭṭhānaṃ. Āsati etthāti **āsanam**, nisīditabbaṭṭhānāni.

Asārappaṃ paṭicca uppajjanakassa chādanato channaṃ **anucchavikaṃ**, tadeva ajjhāsayasampattiṃ patirūpeti pakāsetīti **patirūpaṃ**. Tenāha “**nappatirūpa**”nti. **Kāraṇavevacanānīti** nāpakāraṇavevacanāni. Nāpakañhi kāraṇaṃ adhippetam. Atthaṃ ākaroti pakāsetīti **ākāro**, tameva līnaṃ guḷhaṃ atthaṃ gametīti **liṅgaṃ**, so tena nimīyatīti **nimittanti** vuccati. Idāni tamevatthaṃ vivarituṃ “**dīghadasavattha...pe... nimittāti vuttā**”ti āha. **Teti** ākārādayo. **Tathā hi pana metiādīnā** potaliyo gahapati “paribbājakanīyāmena ahaṃ jīvāmi, tasmā gahapati na homīti vadati. **Ovadantoti** anusāsanto. **Upavadantoti** paribhāsanto.

32. Gedhabhūto lobhoti gijjhanasabhāvo lobho. Agijjhanalakkhaṇo na lobho, **anindābhūtaṃ aghaṭṭananti** nindāya paṭipakkhabhūtaṃ paresaṃ aghaṭṭanaṃ. **Nindāghaṭṭanāti** nindāvasena paresaṃ ghaṭṭanā akkosanā. **Byavahāravohāropīti** kayavikkayalakkhaṇo sabyohāropi dānaggahaṇaṃ vohāro. “Datto tisso” tiādīnā voharaṇaṃ paññāpananti **paññatti vohāro**. Yathādhippetasā atthassa voharaṇaṃ

kathanam bodhananti **vacanam vohāro**. Yāthāvato ayāthāvato ca voharati etenāti **vohāro, cetanā**. **Ayamidhāhippetoti** ayam cetanālakkaṇo vohāro idha imasmiṃ atthe adhippeto, so ca kho sāvajjova samucchadassa icchitattā. Idāni catubbidhassapi vohārassa idha sambhavam dassetum **“yasmā vā”**tiādi vuttam. **Gihīti cetanā natthīti** aham gihīti cetanāpavatti natthi. **Gihīti vacanam natthīti** gihīti attano paresaṇca vacanappavatti natthi. **Gihīti paṇṇatti natthīti** gihīti samaññā natthi. **Gihīti byavahāro natthīti** samudācāro natthi.

33. Pāṇātipātova saṃyojanam. Kasmā? Bandhanabhāvena pavattanato nissaritam appadānato. Pāṇātipātassa atthitāya so puggalo **“pāṇātipātī”**ti vuccatīti āha – **“pāṇātipātassa...pe... hotī”**ti. Yañhi yassa atthi, tena so apadissatīti. **Bahutāyāti** acakkhukādibhedena bahubhāvato. Pāṇātipātassa paṭipakkho **apāṇātipāto**. So pana atthato kāyadvāriko sīlasaṃvaroti āha **“kāyikasīlasaṃvarenā”**ti. **Attāpi maṃ upavadeyyāti**tiādi pāṇātipāte ādīnavadassanam. Ādīnavadassino hi tato oramaṇam. **Desanāvasenāti** aññattha sutte abhidhamme ca dasasu saṃyojanesu pañcasu nīvaraṇesu desanāvasena apariyāpannampi **saṃyojanantipi nīvaraṇantipi** idha **vuttam**. Kasmā? Tadatthasambhavato. Tenāha – **“vaṭṭabandhanatṭhena hitappaṭicchādānatṭhena cā”**ti, pāṇātipāto hi apāṇātipātapaccayam hitam paṭicchādentova uppajjatīti. **Eko avijjāsavoti** idam sahaṃjātasena vuttam, upanissayavasena pana itaresampi āsavānam yathāraham sambhavo vedītabbo. Pāṇātipātī hi puggalo **“tappaccayam attham karissāmī”**ti kāme pattheti. Diṭṭhiṃ gaṇhāti, bhavavisesam paccāsīsatī. Tattha uppamaṃ vihanati bādhatīti **vighāto**, dukkham, pariḷāhanam anattuppādavasena upatāpanam **pariḷāho**, ayametesam viseso. **Sabbatthāti** sabbesu vāresu. **Iminā upāyenāti** atidesena pana pariggahito attho parato āgamissatīti.

34-40. Imasmiṃ padeti etena sattasupi vāresu tathā āgataṃ padaṃ sāmāññato gahitam. Tenāha **“iminā”**tiādi. Rosanam kāyikam vācasikañcāti tappātipakkho arosopi tathā duvidhoti āha **“kāyikavācasikaṃvarenā”**ti. Yathā abhijjhā lobho, anabhijjhā alobho, evam **akodhūpāyāso** abyāpādo, saṃvare sukhanti **saṃvaroti** daṭṭhabbo, anatilobho pana satisaṃvare, anātimāno nīṇasaṃvare saṅgaham gacchatīti daṭṭhabbam. Imesu pana padesu evam sabbavāresu yojanā kātābbāti sambandho.

Evam āsavuppatti vedītabbāti ettha vuttassapi ekajjham vuccamānattā **“puna ayam saṅkhepavinicchayo”**ti vuttam. **Asammohattham** ārammaṇassa. **Purimesu tāva catūsu** vāresu **viramitam na sakkomīti vattabbam**. **“Attāpi maṃ upavadeyyā”**ti etassa padassa atthavaṇṇanāyam **“na sakkomī”**ti, **“anuvijjāpi maṃ viññū garaheyyu”**nti etassa padassa atthavaṇṇanāyam **“na sakkoti”**ti vattabbam, iminā nayena pacchimesupi catūsu yathāraham yojanā vedītabbā. **Atimāne bhavāsavaavijjāsavāti** vuttam mānena saha diṭṭhiyā anuppajjanato, atimāno pana kāmarāgenapi uppajjatevāti **“atimāne kāmāsavaavijjāsavā”**ti vattabbam siyā, svāyam nayo vuttanayattā suviññeyyoti na dassito. **Pātimokkhasaṃvarasīlam kathitam** ādito catūhi chaṭṭhena vāti pañcahi vārehi, sesehi tīhi **pātimokkhasaṃvarasīle ṭhitassa bhikkhuno paṭisaṅkhāpahānam**, sabbehipi pana bhikkhubhāve ṭhitassa **gihivohārasamucchedo kathito**. Tattha sabbattha vattam **“idañcidañca mayham katum nappatirūpa”**nti paṭisaṅkhānavasena akaraṇam pajahanaṇca paṭisaṅkhāpahānam.

Kāmādīnavakathāvaṇṇanā

42. Upasumbheyyāti ettha **upa-saddo** samīpattho, sumbhanam vikkhepanam. Teneva **tamenanti** bhummatthe upayogavacananti āha – **“tassa samīpe khipeyyā”**ti, tassa kukkurassa samīpe atṭhikaṅkalam khipeyyāti attho. **Nimmaṃsattā kaṅkalanti vuccatīti** iminā vigatamaṃsāya atṭhikaṅkalikāya uraṭṭhimhi vā piṭṭhikaṅṭake vā sīsaṭṭhimhi vā kaṅkala-saddo nirulhoti dasseti. **Sunikkantanti** nillikhitam katvāva nibbisesam likhitam.

Ekattupaṭṭhānassa ajjupekkhanavasena pavattiyā **ekattā**. Tenāha **“catutthajhānupekkhā”**ti. Yasmā panassa ārammaṇampi ekasabhāvameva, tasmā āha **“sā hī”**tiādi. **Lokāmisasaṅkhātāti** apariññātavatthunā lokena āmasitabbato, loke vā āmisoti saṅkham gatāya vasena kāmaguṇānam

kāmabhāvo ca āmisabhāvo ca, so eva nippariyāyato āmisanti vattabbataṃ arahati.
Kāmaguṇāmisāti kāmaguṇe chandarāgā. **Gahaṇaṭṭhena** bhusaṃ ādānaṭṭhena.

43. Dayanaṃ ākāseṇa gamananti āha “**uppativā gaccheyyā**”ti. Gijjhādīnaṃ vāsipharasu na hotīti āha – “**mukhatuṇḍakena ḍasantā taccheyyu**”nti. **Vissajjeyyunti** ettha “vissajjana”nti ākaḍḍhanaṃ adhippetamaṃ anekathattā dhātūnaṃ, ākaḍḍhanañca anubandhitvā pātananti āha “**maṃsapesiṃ nakhehi kaḍḍhitvā pāteyyu**”nti.

47. Purisassa ārohanayogyamaṃ **poriseyyamaṃ**.

48. Sampannaṃ sundaraṃ phalamassāti **sampannaphalaṃ**. **Phalūpapannanti** phalehi upetanti āha “**bahuphala**”nti.

50. **Suvidūravidūreti** ariyassa vinaye vohārasamucchedato suṭṭhu vidūrabhūte eva vidūre **ahamaṃ** ṭhito. Kassaci nāma atthassapi ajānanato na ājānantīti **anājāniyāti** kattusādhanamassa dassento **ajānanaketi** ajānantabhojanasīseṇa tesamaṃ dātabbapaccaye vadati. Sesamaṃ suviññeyyameva.

Potaliyasuttavaṇṇanāya līnatthappakāsānā samattā.

5. Jīvakasuttavaṇṇanā

51. Kumāreṇa bhato posāpitoti kumārabhato, kumārabhato eva **komārabhacco** yathā “bhisakkameva bhesajja”nti.

Ārabhantīti ettha **ārabha**-saddo kāmaṃ kāmāyūhanayaññuṭṭhāpanaāpattiāpajjanaviññāpanādīsupi āgato, idha pana hiṃsane icchitabboti āha – “**ārabhantīti ghātentī**”ti. **Uddisitvā katanti** (a. ni. ṭī. 3.8.12; sāratta. ṭī. mahāvagga 3.294) attānaṃ uddisitvā māraṇavasena kataṃ nibbattitaṃ. **Paṭiccekammaṃ** ettha **kamma**-saddo kammaśādhano atītakālikoti āha – “**attānaṃ paṭicca kata**”nti. **Nimittakammassetamaṃ adhivacanaṃ** “paṭicca kammaṃ phusati”tiādīsū (jā. 1.4.75) viya. **Nimittakammassāti** nimittabhāveṇa laddhabbakammaṃ, na karaṇakārāpanavasena. **Paṭiccekammaṃ ettha atthīti maṃsaṃ paṭiccekammaṃ** yathā “buddhaṃ etassa atthīti buddho”ti. **Tesanti** nigaṇṭhānaṃ. Aññepi brāhmaṇādayo taṃladdhikā attheva.

Kāraṇanti ettha yutti adhippetā, sā eva ca dhammato anapetattā “dhammo”ti vuttāti āha – “**kāraṇaṃ nāma tikoṭiparisuddhamacchamaṃsaparibhogo**”ti. **Anukāraṇaṃ nāma mahājanassa tathā byākaraṇaṃ** yuttiyā dhammassa anurūpabhāvato maṃsaṃ paribhuñjitabbanti anuññātaṃ tatheva kathananti katvā. **Tanti** “jānaṃ uddissakataṃ maṃsaṃ paribhuñjati”ti evamaṃ vuttaṃ paribhuñjanaṃ **neva kāraṇaṃ hoti** sabbeṇa sabbaṃ abhāvato sati ca ayuttiyamaṃ adhammoti katvā. **Tathā byākaraṇanti** “jānaṃ uddissakataṃ maṃsaṃ paribhuñjati”ti kathanamaṃ yuttiyā dhammassa ananurūpabhāvato **na anukāraṇaṃ hoti**. **Parehi vuttakāraṇeṇa sakāraṇo hutvāti** pare tiṭṭhiyā ‘jāna’ntiādīnā dhammaṃ kathenti vadanti, tena kāraṇabhūteṇa sakāraṇo hutvā. Tehi tathā vattabbo eva **hutvā tumhākaṃ vādo vā anuvādo vā** “maṃsaṃ paribhuñjitabba”nti pavattā tumhākaṃ kathā vā parato parehi tathā pavattitā tassā anukathā vā. **Viññūhi garahitabbakāraṇanti** tiṭṭhiyā tāva tiṭṭhantu, tato aññehi paṇḍitehi garahitabbakāraṇaṃ. **Koci na āgacchatīti** garahitabbataṃ na āpajjatīti attho. **Abhibhavivā ācikkhantīti** abhibhuyya madditvā kathenti, abhibhūteṇa akkosantīti attho.

52. **Kāraṇehīti** paribhogacittassa avisuddhatāhetūhi. Bhikkhū uddissakataṃ diṭṭhaṃ. Tādisamaṃsañhi paribhogānārahattā cittaavisuddhiyā kāraṇaṃ cittasaṃkilesāvahato. Idāni diṭṭhasutaparisaṅkitāni sarūpato dassetaṃ “**diṭṭhādīsū**”tiādī vuttaṃ. Tattha **tadubhayavimuttaparisaṅkitanti** “diṭṭhaṃ suta”nti imaṃ ubhayaṃ anissāya – “kiṃ nu kho imaṃ

bhikkhuṃ uddissa vadhitvā sampādita’nti kevalameva parisāṅkitaṃ. **Sabbasaṅgāhakoti** sabbesaṃ tiṇṇaṃ parisāṅkitānaṃ saṅgaṇhanaṅko.

Maṅgalādīnanti ādi-saddena āhunapāhunādikaṃ saṅgaṇhāti. **Nibbematikā** hotīti sabbena sabbam parisāṅkitābhāvamaṅha. **Itaresanti** ajānantānaṃ **vaṭṭati**, jānato evettha āpatti hoti. **Teyevāti** ye uddissa kataṃ, teyeva.

Uddissakatamaṃsaparibhogato akappiyamaṃsaparibhogassa visesaṃ dassetuṃ “**akappiyamaṃsaṃ paṇā**”tiādi vuttaṃ. Purimasmiṃ sacittakā āpatti, itarasmiṃ acittakā. Tenāha – “**akappiyamaṃsaṃ ajānitvā bhuttassapi āpattiyevā**”ti. **Paribhoganti** paribhuñjitabbanti vadāmīti attho.

53. Tādisassāti tikoṭiparisuddhassa macchamaṃsassa paribhoge. **Mettāvihārinopīti** **api**-saddena amettāvihārinopi. Mettāvihārinopi paribhoge sikhāppattā anavajjatāti dassetuṃ “**idha, jīvaka, bhikkhū**”tiādi vuttaṃ. **Aniyametvāti** avisesetvā sāmaññato. Yasmā bhagavatā – “yato kho, vaccha, bhikkhuno taṇhā pahīnā hotī”tiādinā mahāvacchagottasutte (ma. ni. 2.194) attā aniyametvā vutto. Tathā hi vacchagotto – “tiṭṭhatu bhavaṃ gotamo, atthi pana bhoto gotamassa ekabhikkhupi sāvako āsavānaṃ khayā...pe... upasampajja viharatī”ti āha, “idha, bhāradvāja, bhikkhu aññataraṃ gāmaṃ vā nigamaṃ vā upanissāya viharatī”tiādinā caṅkīsutte (ma. ni. 2.430) attā aniyametvā vutto. Tathā hi tattha parato – “yaṃ kho pana ayamāyasmā dhammaṃ deseti, gambhīro so dhammo duddaso duranubodho santo paṇīto atakkāvacaro nipuṇo paṇḍitavedanīyo, na so dhammo sudesanīyo luddenā”tiādinā desanā āgatā, tasmā vuttaṃ “**bhagavatā hi mahāvacchagottasutte, caṅkīsutte imasmiṃ sutteti tīsu ṭhānesu attānaṃyeva sandhāya desanā katā**”ti. **Mamaṃsūpasecanova adhippeto** macchamaṃsasahitassa āhārassa paribhogabhāvato macchamaṃsassa ca idha adhippetattā.

Agathito appaṭibaddho. **Taṇhā mucchanāyāti** taṇhāyanavasena mucchāpattiyā. **Anajjhapano** taṇhāya abhibhavivā na ajjhotthaṭo, gilivā pariniṭṭhapetvā na saṅghitoti attho. Tenāha – “**sabbam ālumpitvā**”tiādi. Idha ādīnava āhārassa paṭikūlabhāvoti āha “**ekarattivāsenā**”tiādi. Ayamatto āhāraparibhogoti atthasamyojanaparicchedikā “yāvadeva imassa kāyassa ṭhitiyā”tiādinā (dī. ni. 3.182; ma. ni. 1.23; 2.24; 3.75; saṃ. ni. 4.120) pavattā āhārapaṭibaddhachandarāganissaraṇabhūtā paññā assa atthīti **nissaraṇapañño**. **Idamatthanti** etamatthāya. **Evam santeti** “brahmāti ca mettāvihārinopi samaññā”ti avatvā ye dhammā mettāvihārassa paṭipakkhabhūtā, tattha sāvasesaṃ pahāsi brahmā, anavasesaṃ pahāsi bhagavāti sace te idaṃ sandhāya bhāsitaṃ, evaṃ sante tava idaṃ yathāvuttavacanāṃ anujānāmi, na mettāvihāritāsāmaññamattatoti attho.

55. “Pāṭiyekko anusandhī”ti vatvā visuṃ anusandhibhāvaṃ dassetuṃ “**imasmiṃ hī**”tiādi vuttaṃ. **Dvāraṃ thaketīti** macchamaṃsaparibhogānuññāya aññesaṃ vacanadvāraṃ pidahati, codanāpathaṃ nirundhati. Kathaṃ **sattānuddayaṃ dasseti**? Sattānuddayamukhena bāhirakānaṃ macchamaṃsaparibhogapaṭikkhepo tayidaṃ micchā, tikoṭiparisuddhasseva macchamaṃsassa paribhogo bhagavatā anuññāto. Tathā hi vuttaṃ – “tīhi kho ahaṃ, jīvaka, ṭhānehi maṃsaṃ paribhoganti vadāmī”tiādi (ma. ni. 2.52). **Vinayepi** (pārā. 409; cūlava. 343) vuttaṃ – “tikoṭiparisuddhaṃ, devadatta, macchamaṃsaṃ mayā anuññāta”nti. Tikoṭiparisuddhaṅca bhuñjantānaṃ sattesu anuddayā niccalā. “**Sattānuddayaṃ dasseti**”ti saṅkhepato vuttamatthaṃ vivaranto “**sace hī**”tiādimāha.

Paṭhamena kāraṇenāti desanāvasenapi payogavasenapi paṭhamena parūpaghātahetunā. **Kaḍḍhito** so pāṇo. **Galena pavedhentenāti** yottagalena karaṇena asayhamānena. **Bahupuññameva hoti** āsādanāpekkhāya bhāvato, hitajjhāsayaṭṭā vāti adhippāyo. **Esāhaṃ, bhantetiādi** kasmā vuttaṃ, saraṇagamanavaseneva gahitasaraṇoti codanaṃ sandhāyāha “**aya**”ntiādi. **Ogāhantotiādito** paṭṭhāya yāva pariyoṣanā suttam anussaranto atthaṃ upadhārento. Sesam suviññeyyameva.

Jīvakasuttavaṇṇanāya līnatthappakāsanā samattā.

6. Upālisuttavaṇṇanā

56. Pāvāraṃ pārupatīti pāvāriko, idaṃ tassa kulasamudāgataṃ nāmaṃ, so pana mahaddhano mahābhogo nagare seṭṭhiṭṭhāne ṭhito. Tenāha “**dussapāvārikaseṭṭhino**”ti. **Dīghattā** dīghatamattā. So kira pamānato upavacchayato diyaḍḍharatanaṃ atikkamma ṭhito. **Evaṃladdhanāmoti** “dīghatapassī”ti laddhasamañño. **Bāhirāyataneti** titthiyasamaye **piṇḍapātoti vohāro natthi**, tasmā sāsanavohārena “**piṇḍapātappaṭikkanto**”ti vuttanti adhippāyo.

Dassetīti deseti. **Ṭhapetīti** aññamaññasaṅkarato vavatthapeti. **Kiriyaṃyāti** karaṇena. **Pavattiyāti** pavattanena. **Daṇḍāni paññapetīti** ettha kasmā bhagavatā āditova tathā na pucchitanti? Yasmā sā tasmim atthe sabhāvanirutti na hoti, sāsane loke samayantaresu ca tādiso samudācāro natthi, kevalaṃ pana tasseva nigaṇṭhassāyaṃ koṭṭhālakasādiso samudācāroti imamatthaṃ dassetuṃ “**kammāni paññapeti**” iccevāha. **Acittakanti** cittarahitaṃ, cittena asamuṭṭhāpitanti attho. Kathaṃ pana tadubhayassa cittena vinā sambhavoti codanaṃ sandhāya tattha nidassanamāha “**yathā kirā**”tiādi. **Paṭivibhattānanti** atthato bhinnānaṃ. **Paṭivisiṭṭhānanti** visesanapadavasena saddatopi bhinnānaṃ. **Vacanaṃ paṭiṭṭhapetukāmoti** dīghatapassino yathāvuttavacanaṃ paṭiṭṭhapetukāmo. Tasmimhi paṭiṭṭhāpīte tenappasaṅgena āgato, upāli gahapati tasmim padese dhammaṃ disvā sāsane abhippasīdissati.

Kathā eva upari vādāropanassa vatthubhāvato **kathāvatthu**. **Kathāyaṃ paṭiṭṭhapesīti** kathāvatthusmim, tadatthe vā paṭiṭṭhapesi. Yathā taṃ vādāropanabhayena na avajānāti, evaṃ tassaṃ kathāyaṃ, tasmim vā atthe dīghatapassim yāvattiyam vāde paṭiṭṭhapesi. **Vādanti** dosaṃ.

57. Idāni cetanāsampayuttadhammampi gahetvā kāyakammādivasena saṅgahetvā dassetuṃ “**apicā**”tiādi vuttaṃ. Tattha **tividhaṃ kāyaduccaritaṃ kāyakammaṃ nāmāti**ādi “kammaṃsa kiriyāyā”ti pāliyaṃ akusalakammaṃsa adhigatattā vuttaṃ, pubbe pana **aṭṭhakāmāvacarakusalacetanāti**ādi sāvajjaṃ anavajjañca sāmāññato ekajjhaṃ katvā dassitaṃ. Kasmā panettha cetanā na gahitāti āha “**imasmim sutte kammaṃ dhura**”nti. Kāyakammādivhedhaṃ kammameva **dhuraṃ** jeṭṭhakaṃ pubbaṅgamaṃ, na cetanāmatameva. **Evaṃāgatepīti** kammānīti evaṃ nāmena āgatepi cetanā dhuraṃ, tattha cetanaṃ jeṭṭhakaṃ pubbaṅgamaṃ katvā vuttanti adhippāyo. Kathaṃ pana tattha kammanti vā kammānīti vā āgate tesam cetanāya dhurabhāvoti āha “**yattha katthaci...pe... labhati**”ti. Tattha **yattha katthaci**ti yasimim kismiñci dvāre. **Sā vuttāvāti** sā cetanā vuttāva, yā kāyasaṅkhārādipariyāyena (yassa kassaci kammaṃsa kāyadvārādīsu pavattāpanacetanā) sampayuttadhammāpi tadaggena lokiyāpi lokuttarāpi kammameva, abhijjhādayo pana cetanāpakkhikāti daṭṭhabbaṃ.

Mahantanti kaṭukaphalaṃ. **Na kilamati** sappāṭihāriyattā paṭiññāya. Idāni tesam sappāṭihāriyataṃ dassetuṃ “**tathā hī**”tiādi vuttaṃ. Yadi akusalaṃ patvā kāyakammaṃ vacīkammaṃ mahantanti vadanto na kilamati, atha kasmā bhagavā idha akusalaṃ manokammaṃ mahāsāvajjaṃ kathesīti āha “**imasmim pana ṭhāne**”tiādi. Yāvattiyam paṭiṭṭhāpanamattena **gatamaggaṃ paṭipajjanto**. Tenāha “**kiñci atthanipphattiṃ apassantopi**”ti.

58. Nivāsaṭṭhānabhūto bālako etissā atthīti **bālakinī**. Satthupaṭiññātātāya nigaṇṭhānaṃ mahāti sambhāvitattā **mahānigaṇṭho**.

60. Āvaṭṭeti purimākārato nivatteti attano vase vatteti etāyāti **āvaṭṭanī**, māyā. Tenāha “**āvaṭṭetvā gahaṇamāya**”nti. Satthupaṭiññānaṃ buddhadassane cittameva na uppajjati, ayamettha dhammatā. Sace pana so taṃ paṭiññaṃ appahāya buddhānaṃ sammukhībhāvaṃ upagaccheyya, sattadhā muddhā phaleyya, tasmā bhagavā “mā ayaṃ bālo vinassī”tiāditova yathā sammukhībhāvaṃ na labhati, tathā karoti. Svāyamattho **pāthikaputtasamāgamena** dīpetabbo. Dassanasampattiniyāmamāha “**tathāgataṃ hī**”tiādi. **Āgamā nu kho idha** tumhākaṃ santikaṃ.

61. Vacīsacce paṭiṭṭhahitvāti yathāpaṭiññātāya paṭiññāya ṭhatvā.

62. Sītodake amatā pāṇā pānakāle pana maranti, tepi tena sītodakaparibhogena mārītā honti, tasmā tapassinā nāma sabbena sabbam sītodakam na paribhuñjitabbanti tesam laddhi. Pākatikam vā udakam sattoti purātanānam nigaṇṭhānam laddhi. Tenāha “**sattasaññāya sītodakam paṭikkhipanti**”ti. Tesam tam adhunātanānigaṇṭhānam vādena virujjhati. Te hi pathavādīnavapadatthato aññameva jīvitam paṭijānanti. Cittena sītodakam pātukāmo paribhuñjitukāmo hoti roge ṭhatvāpi sattānam cittassa tathā na vitatātā. Tenāha – “**tenassa manodaṇḍo tattheva bhijjati**”ti. **Tenāti** sītodakam pātum paribhuñjituñca icchanena. **Assāti** yathāvuttassa nigaṇṭhassa. **Tatthevāti** tathācittuppādane eva. **Bhijjati** saṃvarassa vikopitattā. Tathābhūto so nigaṇṭho sītodakam ce labheyya, katipayam kalam jīveyya, alābhena pana parisussamānakaṇṭhoṭṭhatāluji vāhādiko sabbaso paridāhābhībūto mareyya. Tenāha – “**sītodakam alabhamāno kalam kareyyā**”ti. Kasmā? Yasmā sītodakam pivāya sannissitacittassa maraṇam hoti, tasmā vuttam “**manodaṇḍo pana bhinnopi cutimpi ākaḍḍhati**”ti. Yasmā pana tathābhūtacittassa nigaṇṭhassa manosattesu nāma devesu upapatti hotīti titthiyānam laddhi, tasmā vuttam “**manodaṇḍo pana bhinnopi paṭisandhimpī ākaḍḍhati**”ti. **Itīti** evam “idhāssa nigaṇṭho”tiādiākārena. **Nanti** upāliṃ gahapatim. **Mahantoti vadāpesi** “manopaṭibaddho kālaṅkarotī”ti vadantoti adhippāyo.

Upāsakassāti upālissa gahapatissa. **Mucchāvasenāti**ādīnā anvayato byatirekato ca manodaṇḍassa mahantatam vibhāveti. **Cittasantatippavattimattenevāti** vinā kāyadaṇḍena vacīdaṇḍena ca kevalam cittasantatippavattimattena. **Bhijjivāpīti** ettha pi-saddena abhijjivāpi. **Aniyyānikāti** appāṭihīrā, ayuttāti attho. **Sallakkhesi** upāsakoti vibhattim vipariṇāmetvā yojanā. **Pañhapaṭibhānānti** nātum icchite atthe uppajjanakapaṭibhānāni.

“Manopaṭibaddho kalam karotī”ti vadantena atthato manodaṇḍassa taduttarabhāvo paṭiññāto hotīti āha “**idāni manodaṇḍo mahantoti idaṃ vacana**”nti. Tathā ceva vuttam – “manodaṇḍova balavā mahantoti vadāpesī”ti.

63. Pāṇātipātādito yamaṇam yāmo, catubbidho yāmo catuyāmo, catuyāmasaṅkhātena saṃvarena saṃvuto **cātuyāmasaṃvarasaṃvuto**. Aṭṭhakathāyaṇam pana yāma-saddo koṭṭhāsapariyāyoti “**iminā catukoṭṭhāsenā**”ti vuttam. Piyajātikam rūpādīrammaṇam rāgavasena bālehi bhāvanīyattā “bhāvita”nti vuccatīti āha “**bhāvantanti pañca kāmaguṇā**”ti.

Yo sabbam pāpaṇam āsavañca vāretīti sabbavārī, tassa navasu padatthesu sattamo padattho, tena sabbavārīnā pāpaṇam vāritvā ṭhitoti **sabbavārivarito**. Tenāha “**sabbena pāvāraṇena vāritapāpo**”ti. Tato eva sabbassa vāritabbassa āsavassa dhunanato **sabbavāridhuto**. Vāritabbassa nivāraṇavasena sabbavārīno phuṭo phusitoti **sabbavārīphuṭo**. **Saṅghātanti** sahasā hananaṇam, asañcetanikavadhanti attho. **Katarasmim koṭṭhāseti** tīsu daṇḍakoṭṭhāsesu katarakoṭṭhāse.

64. Khaliyati samādiyatīti **khalam**, rāsīti āha – “**ekam maṃsakhalanti ekam maṃsarāsi**”nti. Vijjādharaiddhiyā **iddhimā**. Sā pana iddhi yasmā ānubhāvasampannasseva ijjhāti, na yassa kassaci. Tasmā āha “**ānubhāvasampanno**”ti. Vijjānubhāvavaseneva **ānubhāvasampanno**. **Citte vasībhāvappatto** ānubhāvāya eva vijjāya paguṇabhāvāpādanena. Etena vasībhāvam lokiyasamaññāvasena bhagavā upāliṃ gahapatim paññāpetukāmo evamāha. Lokikā hi “bhāvanāmayaiddhiyā iddhimā cetovasībhāvappatto parūpaghātam karotī”ti maññanti. Tathā hi te isayo paresam saṃvaṇṇenti, isīnaṇam ānubhāvam kittenti. Yaṃ panettha vattabbam, tam parato āgamiṣṣatīti.

65. Araññameva hutvāti sabbaso araññameva hutvā. Araññabhāvena **araññaṇam jātam**, na nāmamattena. **Isīnaṇam atthāyāti** isīnaṇam āsādanatthāya.

Godhāvaritīrato nātidūre. **Usūyamānoti** “na maṇ esa jano parivāretī”ti usūyaṇam karonto. **Kiliṭṭho vatāti** paṅkadantarajasiratādīhi kiliṭṭhasarīro. **Anañjītaṇḍitoti** anañjītakkhiko sabbena,

sabbaṃ amaṇḍito ca. Tasmim̄ kāle ‘‘kālasseva akkhīnaṃ aṅjanaṃ maṅgala’’nti manussānaṃ laddhi, tasmā anaṅjanaṃ viṣuṃ gahitaṃ.

Rājā tassa vacanaṃ gahetvāti ‘‘vedesu īdisaṃ āgataṃ bhavissatīti evaṃ, bhante’’ti rājā tassa purohitassa vacanaṃ gahetvā. **Usumajātahadayoti** uttattahadayo. Nāsikānaṃ appahonte **mukhena assasanto**.

Vijitajayehi āgantvā nakkhattayuttaṃ āgamentehi nisīditabbaṭṭhānaṃ **jayakhandhāvāraṭṭhānaṃ**. Udakavuṭṭhipātanādi tasmim̄ pāpakamme asamaṅgibhūtānampi samanūññatāya antokaraṇatthaṃ kataṃ. **Katabhaṇḍavuṭṭhīti** ābharaṇavassaṃ. Mahājano samanūñño jātoti yojanā. **Mātuposakarāmoti** mātari sammāpaṭipanno rāmo nāma eko puriso. **Asamaṅgibhūtānanti** asamanūññānaṃ.

Avakiriyāti asussūsataṃ paṭicca. **Phuliṅgānīti** aggikaṇāni. **Patanti kāyeti** kāye ito cito nipatanti. Ete kira nirayaṃ vivarivā mahājanassa dassenti.

Yathāphāsukaṭṭhānanti mayaṃ kañcīpi desaṃ uddissa na gacchāma, yattha pana vasantassa pabbajitassa phāsu hoti, taṃ yathāphāsukaṭṭhānaṃ gacchāmāti adhippāyo. **Saṅghāti** saṃhatā. **Gaṇāti** taṃtaṃseṇibhāvena gaṇitabbatāya gaṇā. **Gaṇībhūtāti** ekajjhāsaya hutvā rāsibhūtā. **Adinnādānanti**ādīsipi niraye paccivā manussalokaṃ āgatassa vipākāvasesenāti ānetvā yojetabbaṃ.

Paggaṇhissāmīti sambhāvanaṃ uppādessāmi. **Nesaṃ kattabbanti** cintesīti yojanā. Kim̄ cintesi? Āghātaṃ uppādetvā anattakaraṇūpāyaṃ. Tenāha ‘‘so dhammakathāpariyosāne’’tiādi. **Nāgabalapicchillādīnanti** nāgabalaśāpaan̄kolatelakanaṅikāraṇiyyāsādīnaṃ cikkhallānaṃ. **Viheṭṭhayimsu** nirayādikathāhi ghaṭṭentā. **Chadvārārammaṇeti** cakkhādīnaṃ channaṃ dvārānaṃ ārammaṇabhūte rūpādivisaye.

Nava vuṭṭhiyoti udakavuṭṭhi sumanapupphavuṭṭhi māsakavuṭṭhi kahāpaṇavuṭṭhi ābharaṇavuṭṭhi āvudhavuṭṭhi āṅgaravuṭṭhi pāsāṇavuṭṭhi vālikāvuṭṭhīti imā nava vuṭṭhiyo. **Avañcayīti** sakkāraṃ karonto viya hutvā asakkāraṃ karonto anattakaraṇena vañcayī. **Adūsaketi** anaparādhe.

‘‘Diṭṭhamaṅgalikā brāhmaṇakaññā’’ti jātakaṭṭhakathādīsū (jā. aṭṭha. 4.15.mātaṅgajātakavaṇṇanā) āgataṃ, idha pana ‘‘setṭhidhīta’’ti. **Vāreyyatthāyāti** āvāhatthāya, **assāti** pesitapuggalassa. Tādisena nīcakulasamvattaniyena kammunā laddhokāsenā **caṇḍālayoniyaṃ nibbatto**.

Cammaḡeheti cammena chādite gehe. **Mātaṅgottevassa nāmaṃ ahosi** jātisamudāgataṃ. **Tanti** ghaṇṭaṃ. **Vādentō** tālanena saddaṃ karonto. **Mahāpathaṃ paṭipajji** diṭṭhamaṅgalikāya gehadvārasamīpena.

Tassā veyyāvaccakarā ceva **upaṭṭhākamanussā** paṭibaddhā ca **surāsoṇḍādayo** jāṇukapparādīhi sukoṭṭitaṃ koṭṭitabhāvena mucchaṃ āpannattā **matoti saññāya chaḍḍesum**.

Atha bodhisatto āyuavasesassa atthitāya mandamande vāte vāyante cirena saññāṃ paṭilabhāti. Tenāha ‘‘mahāpuriso’’tiādi. **Gehaṅgaṇeti** gehassa mahādvārato bahi vivaṭaṅgaṇe. **Patitoti** pātaṃ katvā icchitathanipphattiṃ antaraṃ katvā anuppavesena nipanno. **Diṭṭhamaṅgalikāyāti** diṭṭhamaṅgalikākāraṇena.

Yasanti vibhavaṃ kittisaddaṅca. **Candanti** candamaṇḍalaṃ, candavimānanti attho. **Ucchiṭṭhageheti** parehi paribhuttagehe. **Maṇḍapeti** nagaramajjhe mahāmaṇḍape.

Khīramaṇimūlanti khīramūlaṃ, pādesu baddhamaṇimūlaṅca. **Yāvatā vācuggatā pariyattīti**

yattako manussavacīdvārato uggato nikkhanto pavatto, yaṃkiñci vacīmayanti attho. **Ākāsaṅgaṇeti** vivaṅgaṇe.

Dummavāsīti dhūmo dhūsaro, anañjitāmaṇḍitoti adhippāyo. **Otallakoti** nihīnajjhāsayo, appānubhāvoti attho. **Paṭimuñca kaṅṭheti** yāva galavāṭakā pārupitvā. **Ko re tuvanti** are ko nāma tvam.

Pakatanti paṭiyattaṃ nānappakārato abhisankhataṃ. **Uttīṭṭhapinḍanti** antaragharaṃ upagamma ṭhatvā laddhabbapinḍaṃ, bhikkhāhāranti attho. **Labhatanti** lacchatu. **Sapākoti** mahāsatto jātivāsena yathābhūtaṃ attānaṃ āvikaroti.

Atthatthitaṃ saddahatoti samparāyikassa atthassa atthibhāvaṃ saddahantassa. **Apehīti** apagaccha. **Ettoti** imasmā ṭhānā. **Jammāti** lāmaka.

Anūpakhetteti ajaṅgale udakasampanne khette phalavisesaṃ paccāsīsantā. **Etāya saddhāya dadāhi dānanti** ninnaṃ thalañca pūrento megho viya guṇavante nigguṇe ca dānaṃ dehi, evaṃ dento ca appeva ārādhaye dakkhiṇeyyeti. **Dakkhiṇeyyeti** silādiguṇasamannāgate.

Tānīti te brāhmaṇā. **Veṇupadarenāti** veḷuvilīvena.

Giriṃ nakhena khaṇasīti pabbataṃ attano nakhena khaṇanto viya ahoṣi. **Ayoti** kālaloḥaṃ. **Padahasīti** abhibhavasi, attano sarīrena abhibhavanto viya ahoṣi.

Āvedhitanti calitaṃ viparivattetvā ṭhitaṃ. **Piṭṭhitoti** piṭṭhipassena. **Bāhuṃ pasāreti** akammaṇeyyanti akammakkhamaṃ bāhudvayaṃ thaddhaṃ sukkhadaṇḍakaṃ viya kevalaṃ pasāreti, na samiñjati, **setāni akkhīni** parivattanena kaṅṭhamaṇḍalassa adissanato.

Jīvanti jīvanaṃ.

Vehāyasanti ākāse. **Pathaddhunoti** pathabhūtaddhuno viya.

Saññampi na karotīti “ime kulappasutā”ti saññāmatampī na karoti. **Dantakaṭṭhakucchiṭṭhakanti** khāditadantakaṭṭhattā vuttaṃ. **Etasseva upari patissati** appadutṭhapadosabhāvato, mahāsattassa tadā ukkaṃsagatakhettabhāvato. **Iddhivisayo nāma acinteyyo**, tasmā kathaṃ sūriyassa uggantuṃ nādāsīti na cintetabbaṃ. **Aruṇuggaṃ na paññāyatīti** tasmīṃ padese aruṇapabhā na paññāyati, andhakāro eva hoti.

Yakkhāvatto nu kho ayaṃ kālavipariyāyo. **Mahāpaññanti** mahantānaṃ paññānaṃ adhiṭṭhānabhūtaṃ. **Janapadassa mukhaṃ passathāti** imassa janapadavāsino janassa upaddavena maṅkubhūtaṃ mukhaṃ passatha.

Etassa kathā etasseva upari patissatīti yāhi tena pāramitāparibhāvanasamiddhāhi nānāsamāpattivihāraparipūrītāhi silādiṭṭhisampadāhi susankhataśantāne mahākaraṇādhivāse mahāsatte ariyūpavādakammaabhisapasaṅkhātā pharusavācā pavattitā, sā abhisapi tassa khettavisesabhāvato tassa ca ajjhāsaya pharusatāya diṭṭhadhammavedaniyakammaṃ hutvā sace so mahāsattaṃ na khamāpeti, sattame divase vipaccanasabhāvaṃ jātaṃ, khamāpite pana mahāsatte payogasampatti paṭibāhitattā avipākadhammataṃ āpajjati ahoṣikammabhāvato. Ayañhi ariyūpavādapāpassa diṭṭhadhammavedaniyassa dhammatā, tena vuttaṃ ‘etassa kathā etasseva upari patissatī’ tiādī. Mahāsatto pana taṃ tassa upari patituṃ na adāsī, upāyena mocesi. Tena vuttaṃ **cariyāpiṭake** (cariyā. 2.64) –

“Yaṃ so tadā maṃ abhisapi, kupito dutṭhamānaso;

Tasseva matthake nipati, yogena taṃ pamocayi”nti.

Yañhi tattha sattame divase bodhisattena sūriyuggamananivāraṇaṃ kataṃ, ayamettha yogoti adhippeto. Yogena hi ubbalhā sarājikā parisā nagaravāsino negamā ceva jānapadā ca bodhisattassa santikaṃ tāpasam ānetvā khamāpesuṃ. So ca bodhisattassa guṇe jānitvā tasmim cittaṃ pasādesi. Yaṃ panassa matthake mattikāpiṇḍassa ṭhapanam, tassa ca sattadhā phālanam kataṃ, taṃ manussānam cittānurakkhaṇattham. Aññathā hi – “ime pabbajitā samānā cittassa vase vattanti, na pana cittaṃ attano vase vattāpentī”ti mahāsattampi tena sadisaṃ katvā gaṇheyyuṃ, tadassa tesam dīgharattaṃ ahitāya dukkhāyāti. Tenāha “**athassā**”tiādi.

Lohakūṭavassanti ayaguḷavassam. Tadā hi ratanamattāni diyaddharatanamattānipi tikhiṇamsāni ayaguḷamaṇḍalāni ito cito ca nipatantā manussānam sarīrāni khaṇḍakhaṇḍakāni akaṃsu. **Kalalavassanti** tanukakaddamaṭṭalakaddamaṃ. **Upahaccāti** āghāṭetvā. **Tadeva** majjhāraññaṃ.

67. Anuviccekāraṇti anuviccekaraṇam. Kāraṇehi dvīhi aniyyānikasāsane ṭhitānaṃ attano sāvakattaṃ upagate paggahaniggahāni dassetuṃ “**kasmā**”tiādi vuttaṃ.

69. Anupubbim kathanti (dī. ni. ṭī. 2.75-76; a. ni. ṭī. 3.8.12) anupubbiyā anupubbaṃ kathetabbakathaṃ, kā pana sā? Dānādikathā. **Dānakathā** tāva pacurajanesupi pavattiyā sabbasādhāraṇattā sukarattā sīle patiṭṭhānassa upāyabhāvato ca āditova kathitā. Pariccāgasīlo hi puggalo pariggahavattūsu nissaṅgabhāvato sukheveva sīlāni samādiyati, tattha ca suppatiṭṭhito hoti. Sīlena dāyakapaṭiggahaṇavisuddhito parānuggahaṃ vatvā parapīḷānivattivacanato, kiriyadhammaṃ vatvā akiriyadhammavacanato, bhogayasasampattihetuṃ vatvā bhavasampattihetuvacanato ca dānakathānantaraṃ **sīlakathā** kathitā. Tañca sīlaṃ vaṭṭanissitaṃ, ayaṃ bhavasampatti tassa phalanti dassanattaṃ, imehi ca dānasīlamayehi paṇītacariyabhedabhinnehi puññakiriyavattūhi eṭā cātumahārājikādīsu paṇītataraḍibhedabhinā aparimeyyā bhogabhavasampattiyoti dassanattaṃ tadanantaraṃ **saggakathā**. Svāyaṃ saggo rāgādīhi upakkiliṭṭho sabbadā anupakkiliṭṭho ariyamaggoti dassanattaṃ saggānantaraṃ **maggo**, maggañca kathentena tadadhigamūpāyasandassanattaṃ saggapariyāpannāpi pageva itare sabbepi kāmā nāma bahvādīnavā aniccā addhuvā vipariṇāmadhammāti kāmānaṃ **ādīnavo**. Hīnā gammā pothujjanikā anariyā anattasāñhitāti tesam **okāro** lāmakabhāvo, sabbepi bhavā kilesānaṃ vatthubhūtāti tattha **saṃkilesa**. Sabbaso kilesavippamuttaṃ nibbānanti **nekkhamme ānisaṃso** ca kathetabboti ayamatto **maggantīti** ettha **iti**-saddena dassitoti vedītabbaṃ.

Sukhānaṃ nidānanti diṭṭhadhammikānaṃ samparāyikānaṃ nibbānasañhitānañcāti sabbesampi sukhānaṃ kāraṇaṃ. Yañhi kiñci loke bhogasukhaṃ nāma, taṃ sabbam dānanidānanti pākaṭo ayamatto. Yaṃ pana jhānavipassanāmaggaḥalanibbānapaṭisaṃyuttaṃ sukhaṃ, tassapi dānaṃ upanissayapaccayo hotiyeva. **Sampattīnaṃ mūlanti** yā imā loke padesarajjasirissariyasattaratanaṃ samujjalacakkavattisampadāti evaṃpabhedā mānusikā sampattiyo, yā ca cātumahārājīgatā dibbā sampattiyo, yā vā panaññāpi sampattiyo, tāsam sabbāsam idaṃ mūlakāraṇaṃ. **Bhogānanti** bhujjītabbaṭṭhena “bhogo”nti laddhanāmānaṃ manāpiyarūpādīnaṃ, tannissayānaṃ vā upabhogasukhānaṃ, **patiṭṭhā** niccalādhiṭṭhānatāya. **Visamagatassāti** byasanappattassa. **Tānanti** rakkhā tato paripālanato. **Leṇanti** byasanehi paripātiyamānassa oḷīyanapadeso. **Gatīti** gantabbaṭṭhānaṃ. **Parāyaṇanti** paṭisaraṇaṃ. **Avassayoti** vinipatituṃ adento nissayo. **Ārammaṇanti** olubbhārammaṇaṃ.

Ratanamayasihāsanasadisanti sabbaratanamayasattaṅgamahāsīhāsanasadisam, mahaggaṃ hutvā sabbaso vinipatituṃ appadānato. **Mahāpathavisadisam** gatagataṭṭhāne patiṭṭhāsambhavato. Yathā dubbalassa purisassa ālambanarajju uttiṭṭhato tiṭṭhato ca upatthambho, evaṃ dānaṃ sattānaṃ sampattibhave upapattiyā ṭhitiyā ca paccayo hotīti āha “**ālambanaṭṭhena ālambanarajjusadisa**”nti. **Dukkhanittharaṇaṭṭhena**ti duggatidukkhanittharaṇaṭṭhena. **Samassānaṭṭhena**ti lobhamacchariyādiṭṭhānatupaddavato sammadeva assānaṭṭhena. **Bhayaparitāṇaṭṭhena**ti dāliddiyabhayato paripālanatthena. **Maccheramalādīhīti**

maccheralobhadosaissāmicchādīṭṭhivicikicchādi cittamalehi. **Anupalittaṭṭhenāti** anupakkiliṭṭhatāya. **Tesanti** maccheramalādīnaṃ. Etesaṃ eva **durāsadaṭṭhena**. **Asantāsanatṭhenāti** asantāsaṭṭubhāvena. Yo hi dāyako dānapati, so sampatipi na kutoci santasati, pageva āyatim. **Balavantatṭhenāti** mahābalavatāya. Dāyako hi dānapati sampati pakkhabalena balavā hoti, āyatim pana kāyabalādīhi. **Abhimaṅgalasammataṭṭhenāti** “vuḍḍhikāraṇa”nti abhisammatabhāvena. Vipattito sampattiyā nayanam **khemantabhūmisampāpanam**.

Idāni mahābodhicariyabhāvenapi dānaguṇam dassetum **dānam nāmetanti**tiādi vuttam. Tattha **attānam niyyādentenāti** etena dānaphalam sammadeva passantā mahāpurisā attano jīvitampi pariccajanti, tasmā ko nāma viññujātiko bāhire vatthumhi saṅgam kareyyāti ovādam deti. Idāni yā lokiyā lokuttarā ca ukkaṃsagatā sampattiyō, tā sabbā dānatoyeva pavattantīti dassento “**dānañhi**”tiādimāha. Tattha sakkamārabrahmasampattiyō attahitāya eva, cakkavattisampatti pana attahitāya ca parahitāya cāti dassetum sā tāsam parato vuttā. Etā lokiyā, imā pana lokuttarāti dassetum “**sāvakaṃpāramīṇāṇa**”ntiādi vuttam. Tāsupi ukkaṭṭhukkaṭṭhatarukkaṭṭhatamameva dassetum kamena ñāṇattayam vuttam. Tesam pana dānassa paccayabhāvo heṭṭhā vuttoyeva. Eteneva tassa brahmasampattiyāpi paccayabhāvo dīpitoti veditabbo.

Dānañca nāma hitajjhāsayena, pūjāvasena vā attano santakassa paresam pariccajanam, tasmā dāyako purisapuggalo paresam santakam harissatīti aṭṭhānametanti āha – “**dānam dadanto silam samādātum sakkoti**”ti. **Sīlalaṅkārasadiso alaṅkāro natthi** sobhāvisesāvahattā sīlassa. **Sīlapupphasadisam pupham natthīti** etthāpi eseva nayo. **Sīlagandhasadiso gandho natthīti** ettha “candanam tagaram vāpi”tiādikā (dha. pa. 55; mi. pa. 4.1.1) gāthā – “gandho isīnam cīradikkhitānam, kāyā cuto gacchati mālutenā”tiādikā (jā. 2.17.55) jātakaḡāthāyo ca āharitvā vattabbā, sīlañhi sattānam ābharaṇaṅceva alaṅkāro ca gandhavilepanaṅca dassanīyabhāvāvahañca. Tenāha “**sīlalaṅkārena hī**”tiādi.

Ayam saggo labbhatīti idam majjhimehi chandādīhi samādānasīlam sandhāyāha. Tenāha sakko devarājā –

“Hīnena brahmacariyena, khattiye upapajjati;
Majjhimena ca devattam, uttamena visujjhatī”ti. (jā. 1.8.75; 2.22.429; dī. ni. ṭī. 2.75-76);

Iṭṭhoti sukho. **Kantoti** kamanīyo. **Manāpoti** manavaḍḍhanako. Tam pana tassa iṭṭhādibhāvam dassetum “**niccmettha kīlā**”tiādi vuttam.

Dosoti aniccatādīnā appassādādīnā ca dūsitabhāvo, yato te viññūnam cittam nārādhenti. Atha vā ādīnam vāti pavattetīti **ādīnavo**, paramakapaṇatā. Tathā ca kāmā yathābhūtam paccavekkhantānam paccupatiṭṭhanti. **Lāmakabhāvoti** aseṭṭhehi sevitabbo, seṭṭhehi na sevitabbo nihīnabhāvo. **Samkilissananti** vibādhakatā upatāpatā ca.

Nekkhamme ānisamsanti ettha yattakā kāmesu ādīnavā, tappaṭipakkhato tattakā nekkhamme ānisamsā. Apica – “nekkhammam nāmetam asambādham asaṃkiliṭṭham nikkhantam kāmehi, nikkhantam kāmasaṅñāya, nikkhantam kāmavitakkehi, nikkhantam kāmapariḷāhehi, nikkhantam byāpādasaṅñāyā”tiādinā (sārattha. ṭī. mahāvagga 3.26; dī. ni. ṭī. 2.75-76) nayena **nekkhamme ānisamse pakāsesi**, pabbajjāya jhānādīsu ca guṇe vibhāvesi vaṇṇesi. **Kallacittanti** heṭṭhā pavattitadesanāya assaddhiyādīnam cittadosānam vigatattā uparidesanāya bhājanabhāvūpagamanena kammakkhamacittam. Aṭṭhakathāyam pana yasmā assaddhiyādayo cittassa rogabhūtā, tadā te vigatā, tasmā āha “**arogacitta**”nti. Diṭṭhimānādīkilesavigamena **muḍucittam**. Kāmacchandādivigamena **vinīvaraṇacittam**. Sammāpaṭipattiyam uḷārapītipāmojjayogena **udaggacittam**. Tattha saddhāsampattiyā **pasannacittam**. Yadā bhagavā aññāsīti sambandho. Atha vā **kallacittanti** kāmacchandavigamena arogacittam. **Muḍucittanti** byāpādivigamena mettāvasena akathinacittam.

Vinīvaraṇacittanti uddhaccakukkucavigamena vikkhepassa vigatattā tena apihitacittam.
Udaggacittanti thinamiddhavigamena sampaggahitavasena alīnacittam. **Pasannacittanti**
 vicikicchāvigamena sammāpaṭipattiyam adhimuttacittanti evamettha sesapadānam attho veditabbo.

Seyyathāpītiadinā upamāvasena upālissa saṅkilesappahānam ariyamagganipphādanañca dasseti.
Apagatakālakanti vigatakālakam. **Sammadevā**ti suṭṭhu eva. **Rajananti** nīlapītādiraṅgajātam.
 Paṭiggaṇheyyāti gaṇheyya pabhassaram bhaveyya. **Tasmimyeva āsaneti** tissam eva nisajjāyam.
 Etenassa lahuvipassakatā tikkhapaññatā sukhapaṭipadākhippābhiññatā ca dassitā hoti. **Virajanti**
 apāyagamanīyarāgarajādīnam vigamena virajam. Anavasesadiṭṭhivicikicchāmalāpagamena **vītamalam**.
Tiṇṇam maggānanti heṭṭhimānam tiṇṇam maggānam. **Tassa uppattiākāradassananti** kasmā vuttam?
 Nanu maggañānam asaṅkhatadhammārammaṇanti codanam sandhāyāha “**taṃ hi**”tiādi. Tattha
paṭivijjhantanti asammohapaṭivedhavasena paṭivijjhantam. Tenāha “**kiccavasenā**”ti.

Tatridam upamāsaṃsandanam – vattham viya cittam, vatthassa āgantukamalehi kiliṭṭhabhāvo viya
 cittassa rāgādīmalehi saṅkiliṭṭhabhāvo, dhovanasilā viya anupubbīkathā, udakam viya saddhā, udake
 temetvā ūsagomayachārikābharehi kālakapadese sammadditvā vatthassa dhovanapayogo viya
 saddhāsinehena temetvā satisamādhipaññāhi dose sīhile katvā sutādividhinā cittassa sodhane
 vīriyārambho. Tena payogena vatthe kālakāpagamo viya vīriyārambhena kilesavikkhambhanam,
 raṅgajātam viya ariyamaggo, tena suddhassa vatthassa pabhassarabhāvo viya vikkhambhitakilesassa
 cittassa maggena pariyoḍapananti.

Diṭṭhadhammoti vatvā dassanam nāma ñānadassanato aññampi atthīti tannivattanattham
 “**pattadhammo**”ti vuttam. Patti ca ñānasampattito aññāpi vijjatīti tato visesanattham
 “**viditadhammo**”ti vuttam. Sā panesā viditadhammatā dhammesu ekadesanāpi hotīti nippadesato
 viditabhāvam dassetum “**pariyogāḷhadhammo**”ti vuttam. Tenassa saccābhisambodhamyeva dīpeti.
 Maggañānañhi ekābhisamayavasena pariññādikiccam sādhetam nippadesena catusaccadhammam
 samantato ogāhantam nāma hoti. Tenāha – “**diṭṭho ariyasaccadhammo etenāti diṭṭhadhammo**”ti.
Tiṇṇā vicikicchāti sappaṭibhayakantārasadisā soḷasavatthukā aṭṭhavatthukā ca tiṇṇā vicikicchā
tiṇṇavicikicchā. **Vigatakathamkathoti** pavattīdīsū “evam nu kho, kiṃ nu kho”ti evam pavattikā
vigatā samucchinnā **kathamkathā**. Sārājjakarānam pāpadhammānam pahīnattā tappaṭipakkhesu
 silādiguṇesu suppaṭiṭṭhitattā **vesārajjam** visāradabhāvam veyyattiyam **patto**. Attanā eva paccakkhato
 diṭṭhattā na tassa paro paccetabbo atthīti **aparappaccayo**.

71. **Paṇḍitoti** paññavā.

72. **Tena hi sammāti** dovārikena saddhim sallapatiyeva, “**etthevā**”ti tena vuttavacanam sutvāpi
 tassa attham asallakkhento. Kasmā? Paridevatāya. Tenāha “**balavasokena abhibhūto**”ti.

73. **Tenevāti** yena uttarāsaṅgena āsanam sammajjati, **teneva udare parikkhipanto** “māham
 satthāram mama sarīrena phusi”nti antaram karonto uttarāsaṅgena tam udare parikkhipanto
 pariggahetvā. “Dattapaññatta”ntīdīsū (dī. ni. 1.171) viya datta-saddo ettha bālapariyāyoti āha “**jaḷosi**
jāto”ti. **Upaṭṭhākassa aññathābhāvenāti** pubbe attano upaṭṭhākassa idāni anupaṭṭhākabhāvena.

75. **Aviññānakam** dārusākhādimayam. **Bahalabahalam pītāvalepanam raṅgajātanti** ativiya
 bahalam pītavaṇṇamañjīṭṭhādiavalepanarajanam. **Ghaṭṭetvā uppāditacchaviṃ, yā raṅgam pivati**.
Nilomatanti punappunam anulimpanena. **Khaṇḍakhaṇḍitanti** khaṇḍakhaṇḍitabhāvam. **Raṅgakkhamo**
 rajaniyo. Tenāha “**rāgamattam janeti**”ti. **Anuyoganti** codanam. **Vīmaṃsanti** vicāraṇam. **Thuse**
koṭṭetvā taṇḍulapariyesanam viya kadaliyam sārāpariyesanam viya ca nigaṇṭhavāde
 sārāvīmaṃsanam. Tato eva ca tam vīmaṃsanto **rittako tucchakova hotīti**. Sabbampi buddhavacanam
 catusaccavinimuttam natthi, tañca vīmaṃsiyamānam viññūnam pītisomanassameva janeti, atappakañca
 asecanābhāvenāti āha “**catusaccakathā hi**”tiādi. **Yathā yathāti** yadi khandhamukhena yadi

dhātāyatanādīsu aññataramukhena buddhavacanam ogāhissati, tathā tathā gambhīraññānamyeva gocarabhāvato gambhīrameva hoti. Yo cettha paṇḍito nipuṇo kataparappavādo paṇidhāya sabbathāmena codanam ārambhati tassa codanā kesaggamattampi cāletuṃ na sakkoti. Puna sucirampi kālam vicārentesupī vimaddakkhamato, evaṃ tathāgatavādo svākhyātabhāvato āha “**anuyogakkhamo vimajjanakkhamo cā**”ti.

76. Visayapariññāna dāhāti paṭipakkhe sodhetīti **dhīro**, svāyamassa dhīrabhāvo sabbaso sammohavidhamsanatāyāti āha – “**yā paññā...pe... tena samannāgatassā**”ti. **Pabhinnakhīlassāti** samucchinnasabbacetokhīlassa, kilesamaccumāravijayeneva abhisankhārakhandhamārā jītava hontīti tesam dvinnam idha aggahaṇam. Īgha-saddo dukkhapariyāyoti āha “**niddukkassā**”ti. Tattha saupādisesanibbānappattiyā kilesena niddukkhatā, anupādisesanibbānappattiyā vipākadukkheṇa niddukkhatā. Rajjanadussanamuyhanādivasena vividham īsanato vīsam, vīsameva vesam, rāgādīti āha – “**vesantarassāti rāgādivīsam taritvā vitaritvā ṭhitassā**”ti.

Tusitassāti karuṇāyanavasena tusiyā itassa samvattassa. Evaṃ sati “**muditassā**”ti idam punaruttameva hoti. **Manujassāti** paṭhamāya jātiyā bhagavā manussajātiyo hutvā vuttānam vakkhamānānañca vasena sadevakam abhibhavitvā ṭhito acchariyo bhagavāti dasseti. Sadevakam lokam saṃsārato nibbānasukham narati neti pāpetīti naro, nāyakoti attho, tassa **narassa**, tenāha “**punarutta**”nti. “Manujassā”ti vatvā “narassā”ti punaruttam padam. Atthavasena **aññathā vuccamāne ekekagāthāya dasaguṇā nappahonti**, na pūrentīti attho.

Vinetīti vinayo, vinayo eva veneyikoti āha “**sattānam vināyakassā**”ti. Viññūnam ruciṃ rāti, īretīti vā **ruciro**, svāyamassa rucirabhāvo kusalatāyāti āha “**sucidhammassā**”ti. Pabhāsakassāti ñāñalokena pabhassarabhāvakarassa. **Nissāṅgassāti** aṭṭhasupī parisāsu, sadeve vā sabbasmim loke aggaṇhāpanapariccāgena nissāṭassa. **Gambhīraguṇassāti** paresam ñāṇena appatīṭṭhabhāvā gambhīraguṇassa. Tenāha bhagavā – “atthi, bhikkhave, aññeva dhammā gambhīrā”tiādī (dī. ni. 1.28). Ariyāya vā tuṇhībhāvena **monappattassa**. **Dhamme ṭhitassāti** dhammakāye suppatīṭṭhitassa. **Samvutattassāti** arakkhiyakāyasamācārādītāya samvutasabhāvassa.

Āguṃ na karotītiādīhi **catūhi kāraṇehi, pantasenāsanassāti** vivittasenāsanassa. **Paṭimantanapaññāyāti** sabbaparappavādānam viparāvattamantanapaññāya. **Monam vuccati ñāṇam** sabbato kilesānam nidhunanato.

Isisattamassāti sabbaisīsu jeṭṭhassa sādhutamassa. **Seṭṭhappattassāti** seṭṭham uttamam sammāsambodhim pattassa. **Akkharādīnīti** akkharapadabyañjanākāra-niruttiniddesa-saṃkāsanaapakāsana-vivaraṇa-vibhajanuttānikaraṇānīti byañjanatthapadāni. **Samodhānetvā** vineyyajjhāsayanurūpaṃ pakāsana kathanato padakassa. Puri-saddo “pubbe”ti iminā samānatthoti āha – “**purindadassāti sabbapaṭhamam dhammadānādāyakassā**”ti. Bhagavā asayham sahituṃ samatthoti āha “**samatthassā**”ti. Tenāha – “tathāgataṃ buddhamasayhasāhina”nti (itivu. 38). **Te pattassāti** te guṇe anavasesato pattassa. Vitthāretvā saṃkilesavodānadhammam byākarotīti byākaraṇo, byākaraṇo eva **veyyākaraṇo**. **Tantipadanti** tantim āropetvā ṭhapitam padam.

Taṇhābandhanena sabbena vā kilesabandhanena **abaddhassa**. **Mahāpaññāyāti** mahānubhāvāya paññāya, mahāvisayāya vā paññāya. Sabbā hi bhagavato paññā mahānubhāvā, yathāsakam visaye mahāvisayā ca ekādivasena anavasesato mahāvisayā nāma sabbaññutāva. **Ānubhāvadassanaṭṭhenāti** acchariyācinteyyāparimeyyassa attano ānubhāvassa lokassa dassanaṭṭhena. **Yakkhassāti** vā lokena pūjanīyassa. Ayaṃ upāsako khujjuttarā viya upāsikā sekhaṭṭasambhidāpattoti āha “**sotāpattimaggeneva paṭisambhidā āgatā**”ti. **Kilesappahānavaṇṇam kathentoti** kilesappahānam visayam nimittam katvā vaṇṇam kathento.

77. **Sampiṇḍitāti** sannicitā, ganthitāti attho. **Ime sattāti** yaṃ yadeva paribbhamantā sattā.

Attanova cintayantīti avītataṇhatāya sakamyeva payojanaṃ cintenti. Tathā hi mate ñātake anusocantāpi tehi sādhetabbassa attano payojanasseva vasena anusocanti. **Uṇhaṃ ahoṣī**ti balavatā cittassa santāpena santattaṃ abbhantaraṃ hadayaṭṭhānaṃ khadirāṅgārasantāpitaṃ viya uṇhaṃ ahoṣi. Tenāha “**lohitam viliyitthā**”ti. **Pattamattanti** ekapattapūramattaṃ. Abhisamayāsādhikāya catusaccadesanāya saṅkhepeneva desitattā āha – “**ugghaṭitaññupuggalassa vasena dhammadesanā pariniṭṭhitā**”ti.

Upālisuttavaṇṇanāya līnatthappakāsanā samattā.

7. Kukkuravatikasuttavaṇṇanā

78. Koliyesūti bahuvacanavasenāyaṃ pālī āgatā. **Evamṇāmake janapadeti** atthavacanaṃ kasmā vuttanti āha “**so hī**”tiādi. Na niyamitoti “asukamhi nāma vihāre”ti na niyametvā vutto. **Senāsaneyevāti** āvāseyyeva, na rukkhāmūlādike. Vesakiriyā ghāsaggahaṇādinā samādātabbatṭhena govataṃ, tasmim̐ niyutto **govatiko**. Tenāha “**samādinnavo**”ti. Yaṃ sandhāyāhu vedavedino – “gacchaṃ bhakkheti, tiṭṭhaṃ mutteti, upāhā udakaṃ dhūpeti, tiṇāni chindati”tiādi. **Ayaṃ aceloti** acelakapabbajjāvasena **acelo**, purimo pana govatiko **kukkuravatiko**ti ettha vuttanayānusārena attho vattabbo. **Palikuṇṭhitvāti** ubho hatthe ubho pāde ca samīṇjivā. “Ukkuṭiko hutvā”tipi vadanti. Gamaṇaṃ nipphajjanaṃ gatīti āha – “**kā gatīti kā nipphatti**”ti. Nipphattipariyosānā hi vipākadhammappavatti. Katūpacitakammavasena abhisampareti etthāti **abhisamparāyo**, paraloko. Tatthassa ca nipphattiṃ pucchatīti āha – “**abhisamparāyamhi kattha nibbatti**”ti. **Kukkuravatasamādānanti** kukkurabhāvasamādānaṃ, “ajja paṭṭhāya ahaṃ kukkuro”ti kukkurabhāvādhiṭṭhānaṃ.

79. Paripuṇṇanti yattakā kukkuravikārā, tehi paripuṇṇaṃ. Tenāha “**anūna**”nti. **Abbokiṇṇanti** tehi avomissaṃ. **Kukkurācāranti** kukkurānaṃ gamaṇākārotiādiācārena kukkurabhāvādhiṭṭhānacittamāha. Tathā tathā ākappetabbato **ākappo**, pavattiākāro. So panettha gamaṇādikoti āha “**kukkurānaṃ gamaṇākāro**”tiādi. **Ācārenāti** kukkurasīlācārena. **Vatasamādānenāti** kukkuravatādhiṭṭhānena. Kukkuracariyādiyeva **dukkaratapacaraṇaṃ**. Tena gatvipariyēsākārena pavattā laddhi. **Assa** kukkuravatikassa **aññā gati natthīti** itaragatiṃ paṭikkhipati, itarāsaṃ pana sambhavo eva natthīti. **Nipajjamānanti** vatasīlādīnaṃ saṃgopana vasena sijjhamānaṃ. Yathā sakammakadhātusaddā atthavisesavasena akammakā honti “vibuddho puriso vibuddho kamalasaṇḍo”ti, evaṃ atthavisesavasena akammakāpi sakammakā hontīti dassento “**na paridevāmi na anutthunāmī**”tiādimāha. **Anutthunasaddo** ca sakammakavasena payujjati “purāṇāni anutthuna”ntiādisu. **Ayañcetha payogoti** iminā gāthāyañca anutthunanarodanaṃ adhippetanti dasseti.

80. Vuttanayenevāti iminā **govatanti** govatasamādānaṃ. **Gosīlanti** gavācāraṃ. **Gocittanti** “ajja paṭṭhāya gohi kātabbaṃ karissāmī”ti uppannacittanti imamatthaṃ atidisati. Gvākappe pana vattabbaṃ avasiṭṭhaṃ “**kukkurākappe vuttasadisamevā**”ti imināva atidiṭṭhaṃ, visiṭṭhañca **yathā pana tatthāti**ādinā vuttameva. Yaṃ panettha vattabbaṃ, taṃ kukkuravatādīsu vuttanayameva.

81. Ekaccakammakiriyāvasenāti ekaccassa akusalakammassa kusalakammassa karaṇappasaṅgena. **Imesanti** govatikakukkuravatikānaṃ. **Kiriyāti** govatabhāvanādivasena pavattā kiriyā. **Pākaṭā bhavissatīti** “imasmiṃ kammacatukke idaṃ nāma kammaṃ bhajati”ti pākaṭā bhavissati.

Kālakanti (a. ni. tī. 2.4.232) malīnaṃ, cittassa apabhassarabhāvakaraṇanti attho. Taṃ panettha kamma pathasampattameva adhippetanti āha “**dasaakusalakamma patha**”nti. **Kaṇhanti** kaṇhābhijāti hetuto vā kaṇhaṃ. Tenāha “**kaṇhavipāka**”nti. Apāyūpapatti manusse su ca dobhaggiyaṃ kaṇhavipāko, yathā tamabhāvo vutto, ekattaniddesena pana “**apāye nibbattanato**”ti vuttaṃ, nibbattāpanatoti attho. **Sukkanti** odātaṃ, cittassa pabhassarabhāvakaraṇanti attho, sukkābhijāti hetuto vā

sukkam. Tenāha “**sukkavipāka**”nti. Saggūpapatti manussaloke sobhaggiyañca sukkavipāko, yathā ca jotibhāvo vutto, ekattaniddesena pana “**sagge nibbattanato**”ti vuttaṃ, nibbattāpanatoti attho, **vomissakakammanti** kālena kaṇhaṃ, kālena sukkanti evaṃ missakavasena katakammaṃ. “**Sukhadukkhavipāka**”nti vatvā sukhadukkhānaṃ pavattiākāraṃ dassetuṃ “**missakakammañhi**”tiādi vuttaṃ. Kammassa kaṇhasukkasamaññā kaṇhasukkābhijātihetutāyāti, apaccayaḡāmitāya tadubhayavinimuttassa kammakkhayakarakammassa idha sukkapariyāyopi na icchitoti āha – “**ubhaya...pe... asukkanti vutta**”nti. Tattha **ubhayavipākassāti** yathādhigatassa vipākassa. Sampattibhavapariyāpanno hi vipāko idha “**sukkavipāko**”ti adhippeto, na accantaparisuddho.

Sadukkhanti attanā uppādetabbena dukkhena sadukkhāṃ, dukkhasaṃvattanikanti attho. “Imasmiṃ sutte cetanā dhuraṃ, upālisutte (ma. ni. 2.56) kamma”nti heṭṭhā vuttampi atthaṃ idha sādheyati vijānanatthaṃ. **Abhisāṅkharitvāti** āyūhitvā. Taṃ pana paccayasamavāyasiddhito saṃkaḡḡhanaṃ piṇḡanaṃ viya hotīti āha – “**saṅkaḡḡhitvā, piṇḡaṃ katvāti attho**”ti, **sadukkhāṃ lokanti** apāyalokamāha. **Vipākaphassāti** phassaśīsenā tattha vipākavattamāha. **Bhūtakammato** nibbattakammato attanā katūpacitakammato. **Yathābhūtanti** yādisaṃ. **Kammasabhāgavasenāti** kamasarikkhakavasena. **Upapatti hotīti** apadāḡibhedā upapatti. **Kammena viya vuttāti** yaṃ karoti, tena upapajjati ekakammeneva jāyamānā viya vuttā apadāḡibhedā. **Upapatti ca nāma vipākena hoti** vipāke sambhavante ekaṃsena te upapattivisesā sambhavanti. Yadi evaṃ kasmā “tena upapajjati”ti upapattikammahetukā vuttāti āha “**yasmā panā**”tiādi. **Yena kammavipākena nibbattoti** yena kammavipākena vipaccamānena ayaṃ satto nibbattoti vuccati. **Taṃkammavipākaphassāti** tassa tassa kammassa vipākabhūta phassā. Kammena dātabbaṃ dāyaṃ tabbipākaṃ ādiyanti **kammadāyādā**, phassā. Kammassa dāyajjātā kammaphalassa dāyajjaṃ, tasmā vuttaṃ “**kammadāyajjā**”ti. Tenāha “**kammameva nesam dāyajjaṃ santaka**”nti.

Tisso ca heṭṭhimajjhānacetanāti idaṃ abyābajjhavedanaṃ vediyanaekantasukhuppattiyā hetubhāvasādhanāṃ. Yadi evaṃ yathāvuttā **jhānacetanā tāva hotu** ekantasukhuppattihetubhāvato. **Kāmāvacarā kintīti** kāmāvacarā pana kusalacetanā taṃsabhāvābhāvato kinti kena pakārena **abyābajjhamanosāṅkhāro nāma jātoti** codeti, itaro pana na sabbā kāmāvacarakusalacetanā tathā gahitā, atha kho ekaccā jhānacetanānukūlāti dassento “**kasiṇasajjanakāle kasiṇāsevanakāle labbhanti**”ti āha. Tattha kasiṇāsevanacetanā gahetabbā, sā upacārajjhānassa sādhiḡkā. Tena **kāmāvacaracetanā paṭhamajjhānacetanāya ghaṭitāti** kasiṇasajjanacetanāpi kadāci tādisā hotīti gahitā. Parikammādivasena hi pavattā bhāvanāmayā kāmāvacarakusalacetanā paṭhamajjhānassa āsannatāya vuttā. **Catutthajjhānacetanā tatiyajjhānacetanāya ghaṭitāti** idaṃ ekattakāyaekattasaññīsattāvāsavatāya taṃsarikkhāḡ upekkhāpi īdisesu ṭhānesu sukhasarikkhatā, evaṃ santasabhāvata nānasahitā ca. Keci pana catutthajjhānacetanānugunāti nidassentā kasiṇasajjanakāle kasiṇajjhānakāle kasiṇāsevanakāle labbhātīti tatiyajjhānacetanāya āsannaghaṭitatā vuttāti vadanti, taṃ tesam matimattaṃ, vuttanayeneva tāsam ghaṭitatā veditabbā. **Ubhayamissakavasenāti** ubhayesam kusalākusalasāṅkhāraṃ sukhadukkhānañca missakabhāvavasena. **Vemānikapetananti** idaṃ bāhullato vuttaṃ, itaresampi vinipātikānaṃ kālena dukkhāṃ hotiyeva.

Tassa pahānāyāti tassa yathāvuttassa kammassa anuppattidhammatāpādanāya. **Yā cetanāti** yā apacayaḡāminicetanā. **Kammaṃ patvāti** sukhakammanti vuccamāne **maggacetanāya añño paṇḡarataro dhammo nāma natthi** accantapārisuddhibhāvato. **Akaṇhā asukkāti āgatāti** ettha sukkabhāvapaṭikkhepakāraṃ heṭṭhā vuttanayameva. Tenāha “**idaṃ pana kammacatukkaṃ patvā**”tiādi.

82. Aniyānikapakkheti aceḡakapabbajjāya kukkuravate ca. **Yogeti** nāyadhammapaṭipattiyanti attho. **Yonenāti** yo tiṭṭhiyaparivāso tena bhagavatā **paññatto**. Yaṃ tiṭṭhiyaparivāsaṃ samādiyitvāti ayamettha yojanā. **Ghaṃsitvā** suvaṇṇaṃ viya nighaṃsoppale. **Koṭṭetvā** hatthena viya kulālabhājanaṃ.

Vūpakaṭṭhoti vivitto ekībhūto. **Pesitattoti** nibbānaṃ pati pesitatto. Kāmaṃ **tadanuttaraṃ brahmacariyapariyosānaṃ...pe... vihāsīti** imināva arahattanikūṭena desanā niṭṭhāpitā hoti, āyasmato pana seniyassa paṭipattikittanaparametaṃ ujukaṃ āpannaarahattabhāvadīpanaṃ, yadidaṃ “aññataro kho panā” tiādivacananti āha “**arahattanikūṭenevā**” ti. Arahattādhigamoyeva tassa tesāṃ **abbhantaratā**. Sesāṃ sabbaṃ suviññeyyameva.

Kukkuravatikasuttavaṇṇanāya līnatthappakāsānā samattā.

8. Abhayarājakumārasuttavaṇṇanā

83. Jātiyā asamāno nihīnācariyo paradattūpajīvikāya mātuyā kucchiyaṃ jāto pādasikaputto. Nindāvasena vadati etenāti vādo aguṇoti āha – “**vādaṃ āropehīti dosaṃ āropehī**” ti. Nibbattavasena nirayaṃ arahati, nirayasāṃvattaniyena vā kammaṃ niraye niyutto **nerayiko**. **Āpāyikoti** etthāpi eseva nayo. Avīcimhi uppajjitvā tattha āyukappasaññitaṃ antarakappaṃ tiṭṭhatīti **kappaṭṭho**. Nirayūpapattipariharaṇavasena tikicchitūṃ sakkuṇeyyoti tekiccho, na tekiccho **atekiccho**. **Dve ante mocetvāti** pharusāṃ vā appiyaṃ vā kappeyyāti dve koṭṭhāse muñcitvā te anāmasitvā pucchitaṃ atthaṃ tato bahi karonto uggilati nāma. Taṃ pana evaṃ kātūṃ na sakkotīti āha – “**uggilitūṃ bahi nīharitūṃ na sakkhīti**” ti. Evamevāyaṃ pucchā na gahetabbā, ayamettha dosoti taṃ apucchāṃ karonto apanayanto ogilati nāma, tathā pana asakkonto paṭiṭṭhāpento na ogilati nāma, bhagavā pana tamatthaṃ okāsampi akaronto ubhayathāpi asakkhīti veditabbo. Kathaṃ? Bhagavā hi “**na khvettha rājakumāra ekamsenā**” ti vadanto nigaṇṭhassa adhippāyaṃ viparivatteti, ubho ante mocetvā pañhaṃ vissajjesi, evaṃ tāva uggilitūṃ asakkhī. “Na tatra rājakumāra ekamsenā” ti vadanto eva ca “nāyaṃ pucchā evaṃ avibhāgena pucchitabbā, vibhajitvā pana pucchitabbā” ti pucchāya dosaṃ dīpento taṃ hārento ogilitumpi sakkhatīti.

Uṭṭhātūṃ na sakkhissati cittassa aññathā pavattiyā. Abhayo dve magge kataparicayo cheko nipuṇo vādasīlo ca hutvā vicarati. Tenāha – “**so vādajjhāsayatāya tassa vacanaṃ sampaṭicchanto ‘evaṃ, bhante’ ti āhā**” ti.

85. **Evarūpanti** yā paresāṃ appiyā amanāpā duruttavācā, evarūpā vācā, na pana pharusavācā. Pharusavācāya hi setughāto tathāgatānaṃ. Cetanāpharusatāya hi pharusavācā icchitā, na paresāṃ appiyatāmattena. **Naṭṭhā nigaṇṭhā** ogilikādisammatassa pañhassa ekavacanena viddhaṃsitattā.

86. Dārakassa anke nisīdanassa kāraṇaṃ dassetūṃ “**lesavādino**” tiādi vuttaṃ. Tattha **lesavādinoti** chalavādino, vādamagge vā aparipunṇatāya lesamatteneva vādasīlā. **Osaṭasaṅgāmoti** anekavāraṃ paravādamaddanavasena otiṇṇavādasāṅgāmo. **Vijjhivāti** nakhena vijjhivā. **Imamevāti** yvāyaṃ dāraṃ attano vādabhaṅgapariharaṇatthaṃ iminā anke nisīdāpito, imameva **assa dāraṃ** upamaṃ nissayaṃ katvā **vādaṃ bhindissāmi**. “Assa vādaṃ appaṭitāya upamāya bhañjissāmi” ti **cintevā**.

Apaneyyaṃ assa ahanti assa dārakassa mukhato ahaṃ taṃ apaneyyaṃ. Abhūtatthova abhūtaṃ uttarapadalopenāti āha “**abhūtanti abhūtattha**” nti. Atacchanti tasseva vevacananti āha “**atacchanti na taccha**” nti. **Abhūtanti** vā asantaṃ avijjamānaṃ. **Atacchanti** atathākāraṃ. **Anatthasamhitanti** diṭṭhadhammikenā, samparāyikena vā anathena samhitāṃ, anatthe vā samhitāṃ, na atthoti vā anattho, atthassa paṭipakkho sabhāvo, tena samhitanti **anatthasamhitāṃ**, piṣuṇavācāṃ samphappalāpañcāti attho. Evamettha catubbidhassapi vacīduccaritassa gahitatā daṭṭhabbā.

Duppyuttoti duppaṭipanno. **Na taṃ tathāgato bhāsati** abhūtatādidosaḍḍhattā. **Tampi tathāgato na bhāsati** bhūtatthepi anatthasamhitatādidosaḍḍhattā.

Ṭhānaṃ kāraṇaṃ etissā atthīti ṭhāniyā ka-kāraṇaṃ katvā, na ṭhāniyāti atṭhāniyā, nikkāraṇā ayuttiyuttā, sā eva kathāti **atṭhāniyakathā**. **Attapaccakkhakatthaṃ kathamāti** attanā eva paccakkhaṃ

katvā pavattiyamānaṃ chalakathaṃ kathema.

Gāmikamahallako “ime maṃ vañcetukāmā, ahameva dāni ime vañcessāmī”ti cintetvā “**evaṃ bhavissatī**”tiādimāha. “**Na mayaṃ dāsā**”**tipi vattum nāsakkhimsu** pubbe tathākatikāya katattā.

Tatiyaṃ tatiyamevāti dvīsipi pakkhesu tatiyaṃ tatiyameva vācaṃ. **Bhāsītābbakālaṃ anatikkamitvā**ti yassa yadā yathā bhāsītābbaṃ, tassa tadā tatheva ca bhāsanato bhāsītābbaṃ kāraṇaṃ bhāsītābbakālaṃ anatikkamitvāva bhāsati.

87. Thānuppattikañāṇenāti thāne eva uppajjanakañāṇena. Tasmim tasmim kāraṇe tassa taṃ taṃ avatthāya uppajjanakañāṇena, dhammānaṃ yathāsabhāvato avabujjhanasabhāvoti **dhammasabhāvo**. Dhamme sabhāvadhamme anavasese vā yāthāvato upadhāretīti **dhammadhātu**, sabbaññutā. Tenāha “**sabbaññutaññāṇassetam adhivacana**”nti. **Suppaṭividdhanti** sabbaṃ ñeyyadhammaṃ suṭṭhu paṭivijjhanavasena, suṭṭhu paṭividdhanti attho. Tenāha “**hatthagataṃ bhagavato**”ti. **Neyyapuggalavasena pariniṭṭhitā**ti kathāparivibhāgena ayameva desanā cattāri ariyasaccāni dassento arahattaṃ paccakkhāsīti.

Abhayarājakumārasuttavaṇṇanāya līnatthappakāsanā samattā.

9. Bahuedaniyasuttavaṇṇanā

88. Pañcakaṅgoti vaḍḍhakīkiccasādhane vāsiādīpañcakaṃ aṅgaṃ saṃdhanam etasminti pañcakaṅgo. Thambhādivatthūnaṃ thapanatthēna **thapati. Paṇḍitaudāyitthero**, na kāḷudāyī thero.

89. Pariyāyati attano phalaṃ vattetīti **pariyāyo**, kāraṇaṃ. Vedanāsannissito ca kāyikacetāsikabhāvo **kāraṇaṃ**. Tenāha – “**kāyikacetāsikavasena dve vedītābbā**”ti. Tattha pasādakāyasannissitā kāyikā, cetosannissitā cetāsikā. **Sukhādivasena** tissoti ettha sukhanadukkhānupekkhānāni sukhādivedanāya kāraṇaṃ. Tāni hi pavattinimittāni katvā tattha sukhādisaddappavatti, iminā nayena sesesupi yathārahaṃ kāraṇaṃ niddhāretvā vattābbaṃ. **Upavicāravasenā**ti ārammaṇaṃ upecca savisesapavattivasena. Yasmiñhi ārammaṇe somanassavedanā pavattati, ārammaṇatāya taṃ upagantvā itaravedanāhi viṣiṭṭhatāya savisesaṃ tattha pavatti. Tenāha “**somanassaṭṭhāniyaṃ rūpaṃ upavicarati**”ti. Esa nayo sesavedanāsu **gehassitānī**ti gehanissitāni.

90. Pariyāyenāti “idamettha dukkhasminti vadāmī”ti vuttaṭṭhānaṃ sandhāya vadati. **Taṃ dassentoti** kāmañcetha sutte – “dvepānanda, vedanā vuttā”ti dve ādiṃ katvā vedanā dassitā, ekāpi pana dassitā evāti dassento. **Upatthambhetunti** ekāpi vedanā vuttā mayā pariyāyena, evaṃ sati dvepi vattābbāti evaṃ tassa vādaṃ upatthambhetum. Kathaṃ pana ekā vedanā vuttāti? Yaṃ kiñci vedayitaṃ sukhaṃ vā dukkhaṃ vā adukkhamasukhaṃ vā, idamettha dukkhasminti vadāmīti. Yaṃ panettha vattābbaṃ, taṃ **itivuttakavaṇṇanāyaṃ** (itivu. aṭṭha. 52 ādayo) paramatthadīpaniyaṃ vuttanayena vedītābbaṃ.

Kathaṃ panettha rūpāvācaracattatthe arūpesu saññāvedayitanirodhe sukhaṃ uddhatanti āha “**ettha cā**”tiādi. **Santatṭhenā**ti paṭipakkhadhammānaṃ vūpasantabhāvena. **Paṇītatṭhenā**ti bhāvanāvisesaviṣiṭṭhena atappakabhāveneva seṭṭhabhāvena ca, paccayavisesena padhānabhāvaṃ nītantipi paṇītaṃ. **Vedayitasukhaṃ** nāma vedanābhūtaṃ sukhanti katvā. **Avedayitasukhaṃ nāma yāvata niddukkhatā, tāvatā sukhanti vuccatīti**. Atha vā **nirodho** suṭṭhu khādati khanati kāyikacetāsikābādhanāti vattābbaṃ arahati sattāhampi tattha dukkhassa nirujjhanato. Tenāha “**niddukkhabhāvasaṅkhātena sukhatṭhenā**”ti.

91. Yasmiṃ yasmiṃ bhava, cittuppāde, avatthāya vā niddukkhabhāvo, dukkhassa paṭipakkhatā

anupalabbhanena dukkhavivittam, tam sukhasmimyeva paññapeti. Sesam suviññeyyameva.

Bahuvedanīyasuttavaṇṇanāya līnatthappakāsanā samattā.

10. Apaṇṇakasuttavaṇṇanā

93. Nānāvidhāti nānāvidhaditthikā **samaṇabrāhmaṇāti** pabbajjāmettena samaṇā, jātimattena brāhmaṇā ca. **Dassananti** ditthi. **Gahitanti** abhinivissa gahitam. Iti te attano dassanam gahetukāmā pucchanti. **Vinā dassanena loko na niyyātīti** vimokkhabhāvanāya ekena dassanena vinā loko saṃsāradukkhato na nigacchati. **Ekaditthiyampi patitthātum nāsakkhimsu** saddhākārābhāvato. Tathā hi te imāya desanāya saraṇesu patitthahimsu. Yasmā aviparīte saddheyyavattusmiṃ uppannasaddhā “ākāravatī”ti adhippetā, tasmā yo loko aviparītadhammadesanā, ayamevesāti pavattā maggāsādhanaṅgātāya saddhāya kāraṇābhāvato tannissayā saddhā, sā **ākāravatīti** vuttā. Avattusmiñhi saddhā ayuttakāraṇatāya na ākāravatī. **Ākāravatīti** ettha **vatī**-saddo na kevalam atthitāmettadīpako, atha kho atisayatthadīpako pāsamsatthadīpako vā daṭṭhabbo. Tena **ākāravatīti** saddheyyavattusvasena atisayakāraṇavatīti vā pāsamsakāraṇavatīti vā ayamettha attho. **Apaṇṇakoti** ettha yathā kañci attham sādhetum āradhassa payogo viraddho, tattha akārako viya hoti punapī ārabhitabbatāya. **Aviraddho** pana atthassa sādhanato apaṇṇako, evam ayampi dhammo abhibhavivā pavattanato ekamsato “apaṇṇako”ti vutto. Tenāha “**aviraddho advejjhagāmī ekamsagāhiko**”ti.

94. Tabbipaccanīkabhūtāti tassā micchādītthiyā paccanīkabhūtā.

95. Nesanti kusalānam dhammānam. **Akusalato nikkhantabhāveti** asaṃkiliṭṭhabhāve. **Ānisaṃsoti** suddhavipākatā. **Visuddhipakkhoti** visuddhibhāvo pariyodātātā. Abhūtadhammassa ditthibhāvassa saññāpanā ācikkhanā **abhūtadhammasaññāpanā**. Sāvajjesu paramavajje micchādassane paggahaṇanti kuto susīlyassa paggahoti āha – “**micchādassanam gaṇhantasseva susīlyam pahīnam hoti**”ti. **Micchādītthiādayoti** ettha micchāsankappo paralokābhāvācintā, micchāvācā paralokābhāvavādabhūto musāvādo, ariyānam paccanīkatādayo. **Aparāparam uppajjanavasena**ti punappunam citte uppajjanavasena. **Pāpakā akusalā dhammāti** paccavekkhaṇasaññāpanādīkāle uppajjanakā tathāpavattā akusalakhandhā.

Kaliggahoti anattapariggaho. So pana yasmā dittheva dhamme abhisamparāyaṅca parājayo hotīti āha “**parājayaggāho**”ti. **Dussamattoti** ettha **du**-saddo “samādinno”ti etthāpi ānetvā yojetabboti āha “**dupparāmaṭṭho**”ti. Yathā dupparāmaṭṭho hoti, evam samādinno dussamatto dusamādinno vutto. **Sakavādameva pharivāti** attano natthikavādameva “idameva saccam moghamañña”nti (ma. ni. 2.187; 3.27-28) avadhārento aññassa okāsaadānavasena pharivā. Tenāha “**adhimuccivā**”ti. “Sambuddho”tiādi adhimuccanākāradassanam. **Riñcatīti** viveceti apaneti. Tenāha “**vajjeti**”ti.

96. Kaṭaggahoti katam sabbaso siddhimeva katvā gahaṇam. So pana jayalābho hotīti vuttam “**jayaggāho**”ti. **Suggahitoti** suṭṭhukaraṇavasena gahito. **Suparāmaṭṭhoti** suṭṭhu parāparam āsevanavasena āmaṭṭho. Ubhayenapi tassa kammassa katūpacitabhāvam dasseti, **sotthibhāvāvahattaṅca** saggupapattisaṃvattanato pāpasabhāvapahānato ca.

97. Sahatthā karontassāti (dī. ni. ṭī. 1.166; saṃ. ni. ṭī. 2.3.211) sahattheneva karontassa. Nissaggiyathāvarādayopi idha sahatthakaraṇeneva saṅgahitā. **Pacanam** dahanam vibādhananti āha “**daṇḍena pīlentassā**”ti. **Sokam sayam karontassāti** parassa sokakāraṇam sayam karontassa, sokam vā uppādentassa. **Parehi** attano vacanakarehi. **Sayampi phandatoti** parassa vibādhanapayogena sayampi phandato. **Atipātayatoti** padaṃ suddhakattuatthe hetukattuatthe ca vattatīti āha “**hanantassapi hanāpentassāpi**”ti.

Gharassa bhitti anto bahi ca sandhitā hutvā ʘhitā **gharasandhi**. Kiñcipi asesetvā niravasesameva lopoti **nillopo**. Ekāgāre niyutto vilopo **ekāgāriko**. Parito sabbaso panthe hananam **paripantho**. **Pāpaṃ na kariyati** pubbe asato uppādetuṃ asakkuṇeyyattā, tasmā **natthi pāpaṃ**. Yadi evaṃ kathaṃ sattā pāpaṃ paṭipajjantī āha – “**sattā pana karomāti evaṃsaññino hontī**”ti. Evaṃ kirassa hoti “imesaññi sattānaṃ hiṃsādikiriyā na attānaṃ phusati tassa niccatāya nibbikāratā, sarīraṃ pana acetanaṃ kaṭṭhakaliṅgarūpamaṃ, tasmim vikopitepi na kiñci pāpa”nti. **Khuranemināti** nisitakhuramayanaṃ. Gaṅgāya dakkhiṇadisā appatirūpadeso, uttaradisā patirūpadeso adhippāyena “dakkhiṇaṅce”tiādi vuttanti “**dakkhiṇatīre manussā kakkhaḷā**”tiādimāha.

Mahāyāganti mahāvijitayaññasadisam mahāyāgaṃ. **Silasamyamenāti** kāyikavācasikasamvarena. **Saccavacanenāti** saccavācāya. Tassa visuṃ vacanaṃ loke garutarapuññasammatabhāvato. Yathā hi pāpadhammesu musāvādo garu, evaṃ puññadhammesu saccavācā. Tenāha bhagavā – “ekam dhammatāssā”tiādi (dha. pa. 176). **Vuttanayenevāti** kaṇhapakkhe vuttanayena. Tattha hi – “natthi pāpaṃ, natthi pāpassa āgamo”ti āgataṃ, idha “atthi puññaṃ, atthi puññassa āgamo”ti āgataṃ, ayameva viseso. **Sesaṃ vuttasadisamevāti** “tesametam paṭikāṅkha”nti evamādiṃ sandhāya vadati, tam heṭṭhā purimavārasadisam.

100. Ubhayenāti hetupaccayapaṭisedhavaçanena. **Samkilesapaccayanti** saṃsāre paribbhamanena kilinnassa malinabhāvassa kāraṇam. Vuttavipariyāyena **visuddhipaccayanti** saddattho veditabbo. **Balantiādisu** sattānaṃ saṃkilesāvahaṃ vodānāvahaṅca ussāhasaṅkhātam **balam vā**, sūravīrabhāvasaṅkhātam **vīriyam vā**, purisena kattabbo **purisathāmo vā**, so eva paraṃ paraṃ ʘhānaṃ akkamanappattiyā **purisaparakkamo vā natthi na** upalabbhati.

Satvayogato, rūpādīsu sattavisattatāya ca **sattā**. Pānanato assāsapassāsavasena pavattiyā **pāṇā**. Te pana so ekindriyādivasena vibhajitvā vadatīti āha “**ekindriyo**”tiādi. Aṇḍakosādīsu bhavanato **bhūtāti** vuccantīti āha “**aṇḍakosa...pe... vadantī**”ti. Jīvanato pānaṃ dhārento viya vaḍḍhanato **jīvāti** evaṃ sattapāṇabhūtajīvesu saddattho veditabbo. Natthi etesaṃ saṃkilesavisuddhīsu vasoti **avasā**. Natthi nesaṃ balaṃ vīriyaṅcāti **abalā avīriyā**. **Niyatatāti** acchejjasuttāvutābhejjamaṇi viya niyatapavattanatāya gatijātibandhapajahasena niyāmo. **Tattha tattha gamananti** channaṃ abhijātīnaṃ tāsū tāsū gatīsu upagamaṇam samavāyena samāgamo. **Sabhāvoyevāti** yathā kaṇṭakassa tikkhatā, kabiṭṭhaphalānaṃ parimaṇḍalatā, migapakkhīnaṃ vicittākāratā, evaṃ sabbassapi lokassa hetupaccayena vinā tathā tathā pariṇāmo, ayaṃ sabhāvoyeva akittimoyeva. Tenāha “**yena hi**”tiādi.

Sakuṇe hanatīti **sakuṇiko**, tathā **sūkariko**. **Luddoti** aññopi yo koci māgaviko nesādo. Pāpakammaṃpasutatāya **kaṇḥābhijāti nāma**. **Bhikkhūti** sākiyā bhikkhū, macchamaṃsakhādanato **nīlābhijātīti vadanti**. Nāyaladdhepi paccaye bhuñjamānā ājīvakaṃsamayassa vilomagāhitāya “**paccayesu kaṇṭake pakkhipitvā khādanti**”ti vadanti. **Eke pabbajitā**, ye savisesaṃ attakilamathānuyogamanuyuttā. Tathā hi te kaṇṭake vattentā viya hontīti **kaṇṭakavuttikāti** vuttā. ʘhatvā bhuñjanadānapaṭikkhepādivatasamāyogena **paṇḍaratarā**. **Acelakasāvakāti** ājīvakaṃsāvake vadati. **Te kira** ājīvakaḷaddhiyā visuddhacittatāya nigaṇṭhehipi **paṇḍaratarā**. Nandādayo hi tathārūpāya paṭipattiyā pattabbā, tasmā nandādayo nigaṇṭhehi ājīvakaṃsāvakehi ca paṇḍaratarāti vuttā “**sukkābhijātī**”ti.

Ayametesam laddhīti sakuṇikādībhāvūpagamanena kaṇḥābhijātīādisu dukkhaṃ sukhaṅca paṭisaṃvedentā anukkamaṇa mahākappānaṃ cullāsītisahassāni khepetvā ājīvakaḷbhāvūpagamanena paramasukkābhijātīyam ʘhatvā saṃsārato sujjhantīti ayaṃ tesam niyati ājīvakaṇam laddhi.

“Natthi dinna”nti vadanto natthiko dānassa phalaṃ paṭikkhipatīti āha – “**natthikadiṭṭhi vipākaṃ paṭibāhati**”ti. Tathā ceva heṭṭhā saṃvaṇṇitaṃ “natthikadiṭṭhi hi natthitamāhā”ti. **Ahetukadiṭṭhi ubhayanti** kammaṃ vipākaṅca ubhayaṃ. So hi “ahetū apaccayā sattā saṃkilissanti visujjhantī”ti vadanto kammaṃ viya vipākassapi saṃkilesavisuddhīnaṃ paccayattābhāvavacanato tadubhayaṃ paṭibāhati nāma. **Vipāko paṭibāhito hoti** asati kamme vipākābhāvato. **Kammaṃ paṭibāhitaṃ hoti**

asati vipāke kammaṣṣa niratthakabhāvāpattito. **Atthatoti** sarūpena. **Ubhayapaṭibāhakā**ti viṣuṃ viṣuṃ taṃtaṃdiṭṭhitā vuttāpi sabbe te natthikādayo natthikadiṭṭhiādivasena paccekam tividhadiṭṭhikā eva ubhayapaṭibāhakattā. “Ubhayapaṭibāhakā”ti hi hetuvacanam. **Ahetukavādā** cātiādi paṭiññāvacanam. Yo hi vipākapaṭibāhanena natthikadiṭṭhiko, so atthato kammaapaṭibāhanena akiriyadiṭṭhiko, ubhayapaṭibāhanena ahetukadiṭṭhiko ca hoti. Sesadvayepi eseva nayo.

Sajjhāyantīti taṃ diṭṭhidīpakam gantham uggahetvā paṭhanti. **Vīmaṃsantī**ti tassa attham vicārenti. **Tesantiā**di vīmaṃsanākāradassanam. **Tasmiṃ ārammaṇeti** yathāparikkappitakammaphalābhāvadīpake “natthi dinna”ntiādinayappavattāya laddhiyā ārammaṇe. **Micchāsati santiṭṭhatī**ti “natthi dinna”ntiādivasena anussavūpaladdhe atthe tadākāraparivitakkanehi saviggahe viya sarūpato cittassa paccupaṭṭhite cirakālaparicayena “evameta”nti nijjhānakkhamabhāvūpagamanena nijjhānakkhantiyā tathā gahite punappunam tatheva āsevantassa bahulīkarontassa micchāvitakkena samādiyamānā micchāvāyāṃupatthambhitā atamsabhāvaṃ “taṃsabhāva”nti ganthantī micchāsati laddhanāmā taṃladdhisahagatā taṃhā santiṭṭhati. **Cittam ekaggam hotī**ti yathāvuttavitakkādīpaccayalābhena tasmiṃ ārammaṇe avaṭṭhitatāya anekaggam pahāya ekaggam appitam viya hoti. Micchāsamādhipi hi paccayavisesehi laddhabhāvanābalehi kadāci samādhānapatirūpakiccaro hotiyeva vālavijjhanādīsu viyāti daṭṭhabbam. **Javanāni javantī**ti anekakkhattum tenākārena pubbhāgiyesu javanavāresu pavattesu sabbapacchime javanavāre satta javanāni javanti. **Paṭhamajavane pana satekicchā hontī, tathā dutiyādīsūti** dhammasabhāvadassanametaṃ, na pana tasmiṃ khaṇe tesam satekicchabhāvāpādanam kenaci sakkā kātum.

Tatthāti tesu tīsu micchādassanesu. **Koci ekam dassanam okkamati**ti yassa ekasmiṃyeva abhiniveso āsevanā ca pavattā, so ekam yeva dassanam okkamati. Yassa pana dvīsu, tīsupi vā abhinivesanā pavattā, so **dve tīni okkamati**. Etena yā pubbe ubhayapaṭibāhanatāmukhena vuttā atthasiddhā sabbadiṭṭhikatā, sā pubbhāgiyā. Yā pana micchattaniyāṃmokkanti bhūtā, sā yathāsakam paccayasamudāgamasiddhito bhinnārammaṇam viya visesādhigamānam aññamaññam ekajjham anuppattiyā asaṃkiṇṇā evāti dasseti. **Ekasmiṃ okkantepītiā**dinā tissannampi diṭṭhinam samānabalatam samānaphalatañca dasseti, tasmā tissopi cetā ekassa uppannā aññamaññam abbokiṇṇā eva, ekāya vipāke dinne itarā anubalappadāyikā hontī. **Vaṭṭakhāṇu nāmāti** idam vacanam neyyattham, na nītatthanti taṃ vivarivā dassetum **kiṃ panesātiā**di vuttam, akusalam nāmetam abalam dubbalam, na kusalam viya mahābalanti āha – “**ekasmiṃyeva attabhāve niyato**”ti. Aññathā sammattaniyāmo viya micchattaniyāṃmopi accantiko siyā. Yadi evam vaṭṭakhāṇukajotanā kathanti āha “**āsevanavasena panā**”tiādi, tasmā yathā “sakim nimuggo nimuggova hotī”ti (a. ni. 7.15) vuttam, evam vaṭṭakhāṇukajotanā. Yādise hi paccaye paṭicca ayam taṃtaṃdassanam okkanto puna kadāci tapaṭipakkhe paccaye paṭicca tato sīsukkipanamassa na hotīti na vattabbam. Tena vuttam “**yebhuyenā**”ti.

Tasmāti yasmā evam saṃsārakhāṇubhāvassapi paccayo akalyāṇajano, tasmā. **Bhūtikāmoti** diṭṭhadhammikasamparāyikaparamatthānam vasena attano guṇehi vaḍḍhikāmo. Yam panettha keci vadanti “yathā cirakālabhāvanāya paripākūpagamaladdhabalattā upanissayakusalā akusale sabbaso samucchindanti, evam akusaladhammā tatopi cirakālabhāvanāsambhavato laddhabalā hutvā kadāci kusaladhammepi samucchindanti. Evañca katvā dalhamicchābhinivesassa micchādiṭṭhikassa vaṭṭakhāṇukabhāvajotanāpi samatthitā hotī”ti yathā taṃ “vassabhaññānam diṭṭhī”ti, taṃ na, micchattaniyatadhammānam cirakālabhāvanāmattena na paṭipakkhassa pajahanasamatthātā, atha kho dhammatāsiddhena paccayavisesāhitasāmatthiyena attano pahāyakasabhāvena pahāyakabhāvo bhāvanākusalānam yeva vutto, akusalānam yeva ca pahātabbhāvo “dassanena pahātabbā”tiādinā nayena, akusalānam yeva dubbalabhāvo “abalānam balīyanti”tiādinā (su. ni. 776; mahāni. 5) (yuttināpi nāmato vā adhigamaniyo āloko ālokabhāvato bhāhirāṇekā viya na cettha paṭiññatte bhāvesatā sotuno āsaṃkitabbā visesavassa sādhetabbato sāmāññassa ca sotubhāvena adhippetattā veda-saddassa lopo dīpe sabhāve sādhanē yathā taṃ saddayabhāvassa nāpi visuddhakaanumānādivirodhasambhāvato. Na hi

sakkā antarālokassa bāhirālokassa viya rūpakāyaṃ upādāya rūpatā cakkhuviññeyyattādike patiṭṭhāpetuṃ sakkāti vuttaṃ, nanupi antarāloko aviggahattā vedanā viyāti saddheva ñāṇālokassa avijjandhakārā viya vidhamaniyabhāve sabbesampi kusaladhammānaṃ kenacipi akusaladhammena samucchindaniyatā siddhāva hoti). Vaṭṭakhāṇukacodanāya yaṃ vattabbaṃ, taṃ heṭṭhā vuttamevāti tiṭṭhatesā bālaṇavikātthanā.

103. Jhānacittamayāti rūpāvacarajjhānacittena nibbattā. Tathā hi tesāṃ visesena jhānāmanasā nibbattattā “manomayā”ti vuttā, avisesena pana abhisāṅkhāramanasā sabbepi sattā manomayā eva. **Saññāmayāti** etthāpi eseva nayo. Tenāha “**arūpajjhānasaññāyā**”ti. **Ayanti** rūpitābhāvapaṭipajjanakapuggalo. **Appaṭiladdhajjhānoti** anadhigatarūpajjhāno. **Tassapīti** takkinopi. **Rūpajjhāne kaṅkhā natthi** anussavavasena laddhavinicchayattā.

104. Sārāgāyāti sarāgabhāvāya. **Santiketi** samīpe, na thāmagatā diṭṭhinātidūrattā sarāgā, na sampayuttattā. Sā hi na thāmagatā vaṭṭapariyāpannesu dhammesu rajjatīti viññāyatīti āha – “**rāgavasena vaṭṭe rajjanassā**”ti. Sabbepi saṃyojanā taṇhāvaseneva sambhavantīti āha – “**taṇhāvasena saṃyojanatthāyā**”ti. **Āruppe panassa kaṅkhā natthīti** anussavavasena laddhavinicchayaṃ sandhāya vuttaṃ. Kāmaṃ duggatidukkhānaṃ ekantasāṃvattanena natthikadiṭṭhiādīnaṃ apaṇṇakatā pākaṭā eva, nippariyāyena pana anavajjassa atthassa ekantasādhakaṃ apaṇṇakanti katvā codanā, sāvajjassapi atthassa sādhanē ekaṃsīkabhāvaṃ gahetvā parihāro. Tenāha “**gahaṇavasenā**”tiādi. Tena ruḷhīvasena “natthi dinna”ntiādīni apaṇṇakaṅgāni jātānīti dasseti.

105. Heṭṭhā tayo puggalāva hontīti attantapo parantapoti imasmim̃ catukke heṭṭhā tayo puggalā hontī. Yathāvuttā pañcapi puggalā duppaṭipannāva, tato **atthikavādādayo pañcapuggalā** sammāpaṭipannatāya imasmim̃ catukke **eko catutthapuggalova hoti. Etamattham̃ dassetunti** idha heṭṭhā vuttapuggalapañcakadvayaṃ imasmim̃ catukke eva saṅghaṃ gacchatīti vibhāgena duppaṭipattisuppaṭipattīyo dassetuṃ **bhagavā imaṃ desanaṃ ārabhīti**. Yaṃ panettha atthato avibhattaṃ, taṃ suviññeyyameva.

Apaṇṇakasuttavaṇṇanāya līnatthappakāsanā samattā.

Niṭṭhitā ca gahapativaggavaṇṇanā.

2. Bhikkhuvaggo

1. Ambalaṭṭhikarāhulovādasuttavaṇṇanā

107. Ambalaṭṭhikāyanti ettha ambalaṭṭhikā vuccati sujāto taruṇambarukkho, tassa pana avidūre kato pāsādo idha “ambalaṭṭhikā”ti adhippeto. Tenāha “**veḷuvanavīhārassā**”tiādi. **Padhānagharasaṅkhepeti** bhāvanāgehappakāre yogīnaṃ geheti attho. **Tikhiṇova hoti**, na tassa tikhiṇabhāvo kenaci kātabbo sabhāvasiddhattā. **Evameva** attano vimuttipariṇāpanakammunā tikkhavisadabhāvappattiyā **ayampi āyasmā...pe... tattha vihāsi. Pakatipaṇṇattamevāti** pakatīyā paṇṇattaṃ buddhānaṃ upagamanato puretameva cārittavasena paṇṇattaṃ.

108. Udakaṃ anena dhīyati, ṭhapīyati vā etthāti **udakādhānaṃ. Udakaṭṭhānanti** ca khuddakabhājanāṃ. “**Ovādānattham̃ āmantesi**”ti vatvā taṃ panassa ovādānaṃ na idheva, atha kho bahūsu ṭhānesu bahukkhattuṃ pavattitanti tāni tāni saṅkhepato dassetvā idha saṃvaṇṇanattham̃ “**bhagavatā hī**”tiādi vuttaṃ.

Tattha **sabbabuddhehi avijahitanti** iminā sabbesaṃ buddhānaṃ sāsane kumārappañhā nāma hotīti dasseti. Ekekato paṭṭhāya yāva dasakā pavattā dasa pucchā etassāti **dasapuccham̃**, ekekato paṭṭhāya

yāva dasakā ekuttaravasena pavattaṃ vissajjanatthāya **pañcapaṇṇasavissajjanam** sāmaṇerapañhanti sambandho. Yaṃ panettha vattabbaṃ, taṃ paramatthajotikāyaṃ **khuddakaṭṭhakathāyaṃ** (khu. pā. aṭṭha. 4.kumārappañhavaṇṇanā) vuttanayeneva veditabbaṃ. Anādīnavadassitāya abhiñhaṃ musā samudācaraṇato “**piyamusāvādā**”ti vuttaṃ, udakāvasesachaddanaudakādhānanikuḷjanaukkuḷjanadassanasaññitā **catasso udakādhānūpamāyo** sabbassa yuddhakammaṃ akaraṇakaraṇavasena dassitā **dve hatthiupamāyo**.

Tattha rāhulasuttanti suttanipāte āgataṃ rāhulasuttaṃ (su. ni. 337 ādayo). **Abhiñhovādavasena vuttanti** iminā antarantarā taṃ suttaṃ kathetvā bhagavā theram ovadatīti dasseti. **Idaṅca panāti** idaṃ yathāvuttaṃ bhagavato taṃtaṃkālānurūpaṃ attano ovādadānaṃ sandhāya. **Bijanti aṇḍam. Passasi nūti nu-saddo** anujānane, nanu passasīti attho. Saccadhammaṃ laṅghitvā ʒhitassa kiñcipi akattabbaṃ nāma pāpaṃ natthīti āha – “**sampajānamusāvāde saṃvararहितassa opammadassanattham vuttā**”ti. Tathā hi –

“Ekam dhammatītassa, musāvādissa jantuno;
Vitiṇṇaparalokassa, natthi pāpamakāriya”nti. (dha. pa. 176);

Uruḷhavāti uruḷho hutvā ussito. So pana damavasena abhiruyha vaḍḍhito ārohanayogyo ca hotīti āha “**abhivaḍḍhito ārohasampanno**”ti. **Āgatāgate**ti attano योग्यपadesam āgatāgate. **Paṭisenāya phalakakoṭṭhakamuṇḍapākārādayoti** paṭisenāya attano ārakkhatthāya ʒhapite phalakakoṭṭhake ceva uddhacchadapākārādike ca. **Etam padesanti** etam parasenāpadesam. **Ettakenāti** olokanamattena. Tassa olokanākārādassaneneva. **Satampi sahasampi senānikam dvedhā bhijjati**, tīrapātikam maddītam hutvā padātā hutvā dvedhā hutvā palāyanti. **Kaṇṇehi paharivāti** pageva sarānaṃ āgamanasaddam upadhāretvā yathā vego na hoti, evam samuṭṭhāpetvā tehi paharivā **pātanam. Paṭihatthipaṭiassāti**adinā paccakam pati-saddo yojetabboti. **Dighāsilaṭṭhiyāti** dīghalatāya asilaṭṭhiyā.

Karaṇeti kammakaraṇe. **Maññati** hatthāroho. **Ayamuggaranti** tādise kāle gahitamuggaram. **Oloketvāti** ñāṇacakkhunā disvā, abhiñhaṃ sampajāññaṃ upaṭṭhapetvāti attho.

109. Sasakkanti passitum yuttaṃ katvā ussāham janetvā **na karaṇīyam**, tādissam niyamato akattabbaṃ hotīti āha “**ekamseneva na kātabba**”nti. **Paṭisamhareyyāsīti** karaṇato saṅkocam āpajjeyyāsī. Yathābhūto asanto nivatto akaronto nāma hotīti āha “**nivatteyyāsī mā kareyyāsī**”ti. **Anupadeyyāsīti** anubalappadāyī bhaveyyāsī. Tenāha “**upatthambheyyāsī**”ti. Taṃ pana anubalappadānaṃ upatthambhanaṃ punappunaṃ karaṇamevāti āha “**punappunam kareyyāsī**”ti. **Sikkhamānoti** taṃyeva adhisīlasikkham tannissayañca sikkhādvayaṃ sikkhanto sampādentō.

111. Kittake pana ʒhāneti kittake ʒhāne pavattāni. Avidūre eva pavattānīti dassento “**ekasmiṃ purebhatteyeva sodhetabbāni**”ti āha. Evañhi tāni susodhitāni hontī suparisuddhāni. **Paresam appiyam** garuṃ gārayham, yathāvuttaṭṭhānato pana aññaṃ vā kammaṭṭhānāmanasikāreneva kāyakammādīni parisodhitāni hontīti na gahitam. **Paṭigham vāti** ettha vā-saddena asamapekkhaṇe mohassa saṅgaho daṭṭhabbo.

112. Vuttanayena kāyakammādi parisodhanaṃ nāma idheva, na ito bahiddhāti āha “**buddhā...pe... sāvakā vā**”ti. Te hi atthato samaṇabrāhmaṇā vāti. **Tasmāti** yasmā sabbabuddhapaccakabuddhasāvakehi āruḷhamaggo, rāhula, mayā tuyham ācikkhito, tasmā. Tena anusikkhantena tayā evam sikkhitabbanti ovādam adāsī. Sesam vuttanayattā suviññeyyameva.

Ambalaṭṭhikarāhulovādasuttavaṇṇanāya līnatthappakāsanā

Samattā.

2. Mahārāhulovādasuttavaṇṇanā

113. Iriyāpathānubandhanenāti iriyāpathagamanānubandhanena, na paṭipattigamanānubandhanena. Aññameva hi buddhānaṃ paṭipattigamaṇaṃ aññaṃ sāvakaṇaṃ. **Vilāsitaḡamanenāti** – “dūre pādaṃ na uddharati, na accāsanne pādaṃ nikkhipati, nātisīghaṃ gacchati nātisaṇika”ntiādina (saṃ. ni. aṭṭha. 3.4.243; udā. aṭṭha. 76; sāratta. ṭi. mahāvagga 3.285) vuttena sabhāvasīlena buddhānaṃ cāturiyagamaṇena. Tadeva hi sandhāya “**pade padaṃ nikkhipanto**”ti vuttaṃ. **Padānupadiko**ti rāhulatherassaṃpi lakkhaṇapāripūriyā tādisameva gamaṇanti yattaṃ padesaṃ antaraṃ adavā bhagavato piṭṭhito gantaṃ āradḡho, sabbattha tameva gamaṇapadānupadaṃ gacchatīti padānupadiko.

Vaṇṇanābhūmi cāyaṃ tatta bhagavantaṃ therāṇa anekarūpāhi upamaḡhi vaṇṇento “**tattha bhagavā**”tiādimaḡha. **Nikkhantaḡajapotako viya** virocithāti padaṃ ānetvā yojanā. Evaṃ taṃ **kesarasīho viyāti**ādīsūpi ānetvā yojetabbaṃ. **Tārakarājā** nāma cando. **Dvinnam candamaṇḡalānanti**ādi parikappavacaṇaṃ, buddhāveṇikasantaḡaṃ viya buddhānaṃ ākappasobhā ahoṣi, aho sirīsampattīti yojanā.

Ādiyamānāti gaṇhanti. “Pacchā jānissāmā”ti **na ajupekkhitabbo. Idaṃ na kattabbanti vutteti** idaṃ pāṇaatiṃpātanaṃ na kattabbanti vutte idaṃ daṇḡena vā leḡḡunā vā vihethanaṃ na kattabbaṃ, idaṃ pāṇinā daṇḡakadānaṇca antamaso kujjhivā olokanamattampi na kattabbamevāti nayasatenapi nayasahassenapi paṭivijjhati, tathā idha tāva sammajjanaṃ kattabbanti vuttepi tatta paribhaṇḡakaraṇaṃ vihāraṇaḡasammajjanaṃ kacavarachaḡḡanaṃ vālikāsamakiraṇanti evamādinā nayasatena nayasahassena paṭivijjhati. Tenāha – “**idaṃ kattabbanti vuttepi eseva nayo**”ti. **Paribhāsanti** tajjanaṃ. **Labhāmīti** paccāsīṣati.

Sabbametanti sabbaṃ etaṃ mayi labbhamānaṃ sikkhākāmatam. **Abhiññāyāti** jānitvā. **Sahāyoti** raṭṭhapālattheraṃ sandhāyāha. So hi bhagavatā saddhāpabbajitabhāve etadagge ṭhapito. **Dhammārakkhoti** satthu saddhammaratanānupālako dhammabhaṇḡāḡāriko. **Pettiyoti** cūlapitā. **Sabbaṃ me jinasāsananti** sabbampi buddhasāsaṇaṃ mayhameva.

Chandarāgaṃ ñatvāti chandarāgaṃ mama citte uppannaṃ ñatvā. **Aññatarasmiṃ rukkhamūleti** vihārapariyante aññatarasmiṃ rukkhamūlaṭṭhāne anucchavike.

Tadāti aggasāvakehi pasādāpanakāle. Aññakammaṭṭhānāni caṅkamanairiyāpathepi piṭṭhipasāraṇakālepi samijjhanti, na evamidanti āha – “**idamassa etissā nisajjāya kammaṭṭhānaṃ anucchavika**”nti. **Ānāpānassatinti** ānāpānassatikammaṭṭhānaṃ.

Samasīsī hotīti sace samasīsī hutvā na parinibbāyati. **Paccekabodhiṃ sacchikaroti** no ce paccekabodhiṃ sacchikaroti. **Khippābhiññoti** khippaṃ lahuṃyeva pattabbachaḡabhiñño.

Paripuṇṇāti soḡasasu ākāresu kassacipi atāpanena sabbaso puṇṇā. **Subhāvitāti** samathabhāvanāya vipassanābhāvanāya ca anupubbasampādanena subhāvitā. Gaṇanāvidhānānupubbhiyā āsevitattā **anupubbaṃ paricitā**.

Omānaṃ vāti avajānanaṃ uññātanti evaṃvidhaṃ mānaṃ vā. **Atimānaṃ vāti** “kiṃ imehi, mameva ānubhāvena jīvissāmī”ti evaṃ atimānaṃ vā kuto jaṇessatīti.

114. Visāṅkharitvāti viṣaṃyutte katvā, yathā saṅgākārena gahaṇaṃ na gacchati, evaṃ vinibhuṇḡitvāti attho. Mahābhūtāni tāva vitthāretu, sammasanūpagattā, asammasanūpagaṃ ākāsadhātuṃ atha kasmā vitthāresīti āha “**upādārūpadassanattha**”nti. Āpodhātu sukhumarūpaṃ. Itarāsu

oḷārikasukhumatāpi labbhatīti āha “**upādārūpadassanatta**”nti. **Heṭṭhā cattāri mahābhūtāneva kathitāni, na upādārūpanti** tassa panettha lakkhaṇahāranayena ākāsadassanena dassitatā veditabbā. Tenāha “**iminā mukhena taṃ dassetu**”nti. Na kevalaṃ upādārūpaggahaṇadassanattameva ākāsadhātu vittharītā, atha kho pariggahasukhatāyapīti dassento “**apicā**”tiādīmāha. Tattha paricchinditabbassa rūpassa niravasesapariyādānatthaṃ “**ajjhattikenā**”ti visesanamāha. **Ākāsenāti** ākāsadhātuyā gahitāya. **Paricchinnarūpanti** tāya paricchinditakalāpagatampi pākaṭaṃ hoti vibhūtaṃ hutvā upaṭṭhāti.

Idāni vuttamevatthaṃ sukhaggahaṇatthaṃ gāthāya dasseti. **Tassāti** upādāyarūpassa. **Evam āvibhāvattanti** evaṃ paricchinnatāya ākāsassā vasena vibhūtabhāvattthaṃ. **Tanti** ākāsadhātuṃ.

118. Ākāsabhāvaṃ gatanti catūhi mahābhūtehi asamphuṭṭhānaṃ tesam paricchedakabhāvena ākāsanāti gahetabbataṃ gataṃ, ākāsameva vā ākāsatagataṃ yathā “**diṭṭhigataṃ** (dha. sa. 381; mahāni. 12), atthaṅgata”nti (a. ni. aṭṭha. 1.1.130) ca. **Ādinnanti** imanti taṇhādiṭṭhīhi ādinnam. Tenāha “**gahitaṃ parāmatṭha**”nti. Aññattha kammajaṃ “**upādinna**”nti vuccati, na tathā idhāti āha “**sarīraṭṭhakanti attho**”ti. **Pathavīdhātuādīsu vuttanayenevāti** mahāhatthipadopame (ma. ni. 1.300 ādayo) vuttanayadassanaṃ sandhāya vadati.

119. Tādibhāvo nāma niṭṭhitakiccassa hoti, ayañca vipassanaṃ anuyuñjati, atha kimatthaṃ tādibhāvata vuttāti? Pathavīsamatādīlakkhaṇācikkhaṇāhi vipassanāya sukhappavattiatthaṃ. Tenāha “**iṭṭhāniṭṭhesū**”tiādi. **Gahetvāti** kusalappavattiyā okāsādanavasena pariggahetvā. **Na patiṭṭhitoti** na nissito na laggo.

120. Brahmavīhārabhāvanā asubhabhāvanā ānāpānassatibhāvanā ca upacāraṃ vā appanaṃ vā pāpento vipassanāya pādakabhāvāya aniccādisaññāya vipassanābhāvena ussakkītvā maggapaṭipāṭiyā arahattādhigamāya hotīti “**mettādibhāvanāya pana hotī**”ti vuttaṃ. **Yattha katthaci sattesu saṅkhāresu ca paṭihaññanakilesoti** āghātabhāvameva vadati ñāyabhāvato aññesampi. **Asmimānoti** rūpādike paccekaṃ ekajjhaṃ gahetvā “**ayamahamasmi**”ti evaṃ pavattamāno.

121. Idaṃ kammaṭṭhānanti ettha gaṇanādivasena āseviyamānā assāsapassāsā yogakammasa patiṭṭhānatāya kammaṭṭhānaṃ. Tattha pana tathāpavatto manasikāro bhāvanā. Ettha ca tasseva therassa bhagavatā bahūnaṃ kammaṭṭhānānaṃ desitattā caritaṃ anādiyitvā kammaṭṭhānāni sabbesaṃ puggalānaṃ sappāyānīti ayamatto siddho, atisappāyavasena pana kammaṭṭhānesu vibhāgakathā kathitāti veditabbā.

Mahārāhulovādasuttavaṇṇanāya līnatthappakāsānā samattā.

3. Cūḷamālukyasuttavaṇṇanā

122. Evaṃ ṭhapitānīti “**sassato loko**”tiādinayappavattāni diṭṭhigatāni aniyyānikatāya na byākātabbāni na kathetabbāni, evaṃ ṭhapanīyapakkhe **ṭhapitāni ceva** niyyānikasāsane chaḍḍanīyatāya **paṭikkhittāni ca**, apicettha atthato paṭikkhepo eva byākātabbato. Yathā eko kammakilesavasena itthattaṃ āgato, tathā aparopi aparopīti satto tathāgato vuccatīti āha – “**tathāgatoti satto**”ti. **Taṃ abyākaraṇaṃ mayhaṃ na ruccatīti** yadi sassato loko, sassato lokoti, asassato loko, asassato lokoti jānāmāti byākātabbameva, yaṃ pana ubhayathā abyākaraṇaṃ, taṃ me cittaṃ na ārādheti ajānanahetukattā abyākaraṇassa. Tenāha – “**ajānato** kho pana apassato etadeva ujukaṃ, yadidaṃ na jānāmi na passāmī”ti. **Sassatotīādīsu sassatotī** sabbakāliko, nicco dhuvo avipariṇāmadhammoti attho. So hi diṭṭhigatikehi lokīyanti ettha puññapāpatabbipākā, sayam vā tabbipākākarādibhāvena aviyuttehi lokīyatīti **lokoti** adhippeto. Etena cattāropi sassatavādā dassitā honti. **Asassatotī** na sassato, anicco addhuvo bhedanadhammoti attho, asassatotī ca sassatabhāvapaṭikkhepena ucchedo dīpitoti sattapi ucchedavādā dassitā honti. **Antavāti** parivaṭumo paricchinnaparimāṇo, asabbagatotī attho. Tena

“sarīraparimāṇo, aṅguṭṭhaparimāṇo, yavaparimāṇo paramāṇuparimāṇo attā”ti (udā. aṭṭha. 54; dī. ni. 1.76-77) evamādivādā dassitā honti.

Tathāgato paraṃ maraṇāti tathāgato jīvo attā maraṇato imassa kāyassa bhedato paraṃ uddhaṃ hoti atthi saṃvijjatīti attho. Etena sassatabhāvamukhena soḷasa saññīvādā, aṭṭha asaññīvādā, aṭṭha ca nevasaññīnāsaññīvādā dassitā honti. **Na hotīti** natthi na upalabbhati. Etena ucchedavādo dassito hoti. Apica **hoti ca na ca hotīti** atthi natthi cāti. Etena ekaccasassatavādo dassito. **Neva hoti na na hotīti** pana iminā amarāvikkhepavādo dassitoti veditabbaṃ. Bhagavatā pana aniyyānikattā anattasamhitāni imāni dassanānīti tāni na byākatāni, taṃ abyākaraṇaṃ sandhāyāha ayaṃ thero “taṃ me na rucati”ti. **Sikkhaṃ paṭikkhipivā** yathāsamādinnaṃ sikkhaṃ pahāya.

125. Tvaṃ neva yācakoti ahaṃ bhante bhagavati brahmacariyaṃ carissāmītiādinā. **Na yācitakoti** tvaṃ mālukyaputta mayi brahmacariyaṃ carātiādinā.

126. Parasenāya ʒhitena purisena. **Bahalalepanenāti** bahalavilepanena. Mahāsupiyādi sabbo muduhidako veṇuviseṣo **saṅho. Maruvāti** makaci. **Khīrapaṇṇinoti** khīrapaṇṇiyā, yassā chindanamatte paṇṇe khīraṃ paggharati. **Gacchanti** gacchato jātaṃ sayamaṃjātagumbato gahitanti adhippāyo. **Sithilahanu** nāma dattā kaṇṇo pataṅgo. **Etāya diṭṭhiyā sati na hotīti** “sassato loko”ti etāya diṭṭhiyā sati maggabrahmacariyavāso na hoti, taṃ pahāya eva pattabbato.

127. Attheva jāṭītiādinā etā diṭṭhiyo paccekampi saṃsāraparibrūhanā kaṭasivaḍḍhanā nibbānavibandhanāti dasseti.

128. Tasmātihāti idamaṃ aṭṭhāne uddhaṃ, ʒhāneyeva pana “vuttapaṭipakkhanayena veditabba”nti imassa parato katvā saṃvaṇṇetabbaṃ. Attano phalena araṇīyato anugantabbato kāraṇampi “**attho**”ti vuccatīti āha “**kāraṇanissita**”nti. Tenāha “**brahmacariyassa ādimattampī**”ti. **Pubbapadaṭṭhānanti** paṭhamārambho. Sesamaṃ suviññeyameva.

Cūḷamālukyasuttavaṇṇanāya līnatthappakāsanā samattā.

4. Mahāmālukyasuttavaṇṇanā

129. Oraṃ vuccati kāmādhātu, tattha pavattiyā saṃvattanato oraṃ bhajantīti **orambhāgiyāni**, heṭṭhimamaggavajjhatāya orambhāge heṭṭhākoṭṭhāse bhajantīti **orambhāgiyāni** ka-kārassa ya-kāraṃ katvā. Tenāha “**heṭṭhākoṭṭhāsikāni**”tiādi. Kammunā hi vaṭṭena ca dukkhaṃ saṃyojenti **saṃyojanāni**, orambhāgiyasaññitāni saṃyojanāni yassa appahīnāni, tasseva vaṭṭadukkhaṃ. Yassa pana tāni pahīnāni, tassa taṃ natthīti. **Appahīnatāya anusetīti** ariyamaggena asamucchinnatāya kāraṇalābhe sati uppajjati, appahīnabhāvena anuseti. **Anusayamāno saṃyojanaṃ nāma hotīti** anusayattaṃ pharivā pavattamāno pāpadhammo yathāvuttenatthena saṃyojanaṃ nāma hoti. Etena yadi pana anusayato saṃyojanaṃ pavattaṃ, tathāpi ye te kāmāragādayo “anusayā”ti vuccanti, teyeva bandhanaṭṭhena saṃyojanānīti dasseti.

Evamaṃ santepīti yadeva orambhāgiyasamaṃyojanaṃ bhagavatā pucchitaṃ, tadeva therenapi vissajjitaṃ, tathāpi ayaṃ laddhi sannissayā. Tattha dosāropanāti dassetaṃ “**tassa vāde**”tiādi vuttaṃ. **Samudācārakkhaṇeyevāti** pavattikkhaṇe eva. Na hi sabbe vattamānā kilesā saṃyojanatthaṃ pharantīti adhippāyo. **Tenāti** tena kāraṇena, tathā laddhikattāti attho. Cintesī “dhammaṃ desessāmī”ti yojanā. **Attano dhammatāyevāti** ajjhattāsayeneva. **Visaṃvāditāti** satthu cittassa anārādhanaena vivecitā. **Evamakāsi** evamaṃ dhammaṃ desāpesi.

130. Sakkāyadiṭṭhipariyuṭṭhitenāti pariyuṭṭhānasamatthasakkāyadiṭṭhikena. Tathābhūtaṃ cittaṃ

tāya diṭṭhiyā vigayhitam ajjhotthatañca nāma hotīti āha “**gahitena abhibhūtenā**”ti.

Diṭṭhinissaraṇam nāma dassanamaggo tena samucchinditabbato, so pana nibbānam āgamma tam samucchindati, tasmā vuttam “**diṭṭhinissaraṇam nibbāna**”nti. **Avinoditā anīhaṭāti** padadvayenapi samucchedavasena appahīnatamyeva vadati. **Aññaṃ saṃyojanam añño anusayoti vadanti**, sahabhāvo nāma aññena hoti. Na hi tadeva tena sahāti vuccatīti tesam adhippāyo. **Aññenāti** atthato aññena. Avatthāmatatto yadipi avayavavinimutto samudāyo natthi, avayavo pana samudāyo na hotīti so samudāyato añño evāti sakkā vattunti yathāvuttassa parihārassa appāṭihīrakatam āsaṅkitvā pakkhantaram āsallitam “**athāpi siyā**”tiādīnā. Pakkhantarehi parihārā hontīti yathāvuttanāyenapi añño puriso athāpi siyā, ayam panettha añño dosoti āha “**yadi tadevā**”tiādi. Athāpi siyā tuyham yadi parivittakko īdiso yadi tadeva saṃyojanantiādi. **Imamattham sandhāyāti** paramatthato so eva kilesa saṃyojanamanusayo ca, bandhanatthaappahīnatthānam pana attheva bhedoti imamattham sandhāya.

132. Tacacchedo viya samāpatti kilesānam samāpattivikkhambhanassa sārachedassa anusayassa dūrabhāvato. **Pheggucchedo viya vipassanā** tassa āsannabhāvato. **Evarūpā puggalāti** abhāvitasaddhādibalatāya dubbalanāmakāyā puggalā, yesam sakkāyanirodhāya...pe... nādhimuccati. **Evam datṭhabbāti** yathā so dubbalako puriso, evam datṭhabbo so puriso gaṅgāpāram viya sakkāyapāram gantum asamatthattā. Vuttavipariyāyena sukkapakkhassa attho veditabbo.

133. Upadhivivekenāti iminā **upadhivivekāti** karaṇe nissakkananti dasseti, **upadhivivekāti** vā hetumhi nissakkavacanassa **upadhivivekenāti** hetumhi karaṇavacanena pañcakāmaguṇaviveko kathito. Kāmaguṇāpi hi upadhīyati ettha dukkhanti upadhīti vuccantīti. Thinamiddhapaccayā kāyavijambhitādibhedam **kāyālasiyam**. **Tatthāti** antosamāpattiyam samāpattiabbhantare jātam. Tam pana samāpattipariyāpannampi apariyāpannampīti tadubhayam dassetum “**antosamāpattikkhaṇeyevā**”tiādi vuttam. **Rūpādayo dhammeti** rūpavedanādike pañcakkhandhadhamme. **Na niccatoti** iminā niccapaṭikkhepato tesam aniccatamāha. Tato eva udayavayantato vipariṇāmato tāvakālikato ca te aniccāti jotitam hoti. Yañhi niccam na hoti, tam udayabbayaparicchinnam jarāya maraṇena cāti dvedhā vipariṇatam ittarakhaṇameva ca hoti. **Na sukhatoti** iminā sukhaṭikkhepato tesam dukkhatamāha, ato eva abhiṇham paṭipīlanato dukkhavatthuto ca te dukkhāti jotitam hoti. Udayabbayavantatāya hi te abhiṇham paṭipīlanato nirantaradukkhatāya dukkhasseva ca adhiṭṭhānabhūtāti. Paccayayāpaniyatāya rogāmūlatāya ca **rogato**. Dukkhatāsūlayogitāya kilesāsucipaggharaṇato uppādayarābhaṅgehi uddhumātapakkabhijjanato ca **gaṇḍato**. Pīḷājananato antotudanato dunnīharaṇato ca avaddhīāvahato aghavatthuto ca aserībhāvato ābādhapadaṭṭhānatāya ca **ābādhato**. Avasavattanato avidheyyatāya **parato**. Byādhijarāmarāṇehi palujjanīyatāya **palokato**. Sāmīnīvāsīkārakavedakaadhiṭṭhāyakavirahato **suññato**. Attapaṭikkhepaṭṭhena **anattato**, rūpādiddhammāpi na ettha attā hontīti anattā, evam ayampi na attā hotīti anattā. Tena abyāpārato nirīhato tucchato anattāti dīpitam hoti. Lakkhaṇattayameva avabodhattham ekādasahi padehi vibhajitvā gahitanti dassetum “**tatthā**”tiādi vuttam.

Antosamāpattiyanti samāpattīnam sahañātātāya samāpattīnam abbhantare. **Cittam paṭisaṃharatīti** tappaṭibaddhachandarāgādiupakkilesavikkhambhanena vipassanācittam paṭisaṃharati. Tenāha “**mocetī**”ti. **Savanavasenāti** “sabbasaṅkhārasamatho”tiādīnā savanavasena. **Thutivasenāti** tatheva thomanāvasena guṇato saṃkittanavasena. **Pariyattivasenāti** tassa dhammassa pariyaṇanavasena. **Paññattivasenāti** tadatthassa paññāpanavasena. **Ārammaṇakaraṇavaseneva** upasaṃharati maggacittam. **Etam santantiādi** pana avadhāraṇanivattitattadassanam. Yathā vipassanā “**etam santam etam paṇīta**”ntiādīnā asaṅkhatāya dhātuyā cittam upasaṃharati, evam maggo nibbānam sacchikiriyābhisamayavasena abhisamento tattha labbhamāne sabbe visese asammoḥato **paṭivijānanto tattha cittam upasaṃharati**. Tenāha “**iminā pana ākārenā**”tiādi. **So tattha ṭhitoti** so adandhavipassano yogī tattha tāya aniccādīlakkhaṇattayārammaṇāya vipassanāya ṭhito. **Sabbasoti** tassa maggassa adhigamāya nibbattitasamathavipassanāsu. **Asakkonto anāgāmī hotīti** heṭṭhimamaggavahāsu eva samathavipassanāsu chandarāgam pahāya aggamaggavahāsu tāsu nikantiṃ pariyaḍātuṃ asakkonto anāgāmitāyameva saṅṭhāti.

Samatikkantattāti samathavasena vipassanāvasena cāti sabbathāpi rūpassa atikkantattā. Tenāha “**ayañhi**”tiādi. **Anenāti** yoginā. **Taṃ atikkammā**ti idaṃ yo vā paṭhamam pañcavokārabhavapariyāpanne dhamme sammadeva sammasitvā te vivajjetvā tato arūpasamāpattim samāpajjivā arūpadhamme sammasati, taṃ sandhāya vuttam. Tenāha “**idāni arūpaṃ sammasatī**”ti.

Samathavasena gacchatoti samathappadhānam pubbabhāgapaṭipadam anuyuñjantassa. **Cittekaggatā dhuraṃ hotī**ti tassa vipassanābhāvanāya tathā pubbe pavattattā vuṭṭhānagāminivipassanā samādhippadhānā hoti, maggepi cittekaggatā dhuraṃ hoti, samādhindriyaṃ pubbaṅgamaṃ balavaṃ hoti. **So cetovimutto nāmāti** so ariyo cetovimutto nāma hoti. **Vipassanāvasena gacchatoti** “samathavasena gacchato”ti ettha vuttanayānusārena attho veditabbo. Ayañca puggalavibhāgo suttantanayena idhābhīhito pariyāyo nāma, abhidhammanayena parato kīṭāgirisuttavaṇṇanāyaṃ dassayissāma. **Ayaṃ sabhāvadhammoyevāti** pubbabhāgapaṭipadā samathappadhānā ce samādhi dhuraṃ, vipassanāpadhānā ce paññā dhuranti ayaṃ dhammasabhāvoyeva, ettha kiñci na āsankitabbaṃ.

Indriyaparopariyattaṃ **indriyavemattatā**. Tenāha “**indriyanānattaṃ vadāmī**”ti. **Indriyanānattatā kāraṇanti** idaṃ dasseti – aniccādivasena vipassanābhiniveso viya samathavasena vipassanāvasena ca yaṃ pubbabhāgagamaṃ, taṃ appamāṇam taṃ vuṭṭhānagāminivipassanaṃ, yassa samādhi dhuraṃ pubbaṅgamaṃ balavaṃ hoti, **so ariyo cetovimutti nāma hoti**. Yassa paññā dhuraṃ pubbaṅgamaṃ balavaṃ hoti **so ariyo paññāvimutto nāma hoti**. Idāni tamatthaṃ buddhivisiṭṭhena nidassanena dassento “**dve aggasāvaka**”tiādimāha, taṃ suviññeyyameva.

Mahāmālukyasuttavaṇṇanāya līnatthappakāsanā samattā.

5. Bhaddālisuttavaṇṇanā

134. Asiyatīti asanaṃ, bhuñjanaṃ bhojanaṃ, asanassa bhojanaṃ asanabhojanaṃ, āhāraparibhogo, ekasmiṃ kāle asanabhojanaṃ **ekāsanabhojanaṃ**. So pana kālo sabbabuddhānaṃ sabbapacekabbuddhānaṃ āciñṇasamāciñṇavasena pubbaṅho eva idhādhīppetoti āha “**ekasmiṃ purebhatte asanabhojana**”nti. **Vippaṭisārakukkucanti** “ayuttaṃ vata mayā kataṃ, yo attano sarīrapakatiṃ ajānanto ekāsanabhojanaṃ bhuñji, yena me idaṃ sarīraṃ kisaṃ jātaṃ brahmacariyānuggaho nāhosī”ti evaṃ vippaṭisārakukkucam bhavēyya. **Etam sandhāya satthā āha**, na bhaddālimeva tādisaṃ kiriyaṃ anujānanto. **Itarathāti** yadi ekameva bhattaṃ dvidhā katvā tato ekassa bhāgassa bhuñjanaṃ ekadesabhuñjanaṃ adhippetam. **Ko sakkotī**ti ko evaṃ yāpetuṃ sakkoti. Atītajātiparicayopi nāma imesaṃ sattānaṃyeva anubandhatīti āha “**atīte**”tiādi. **Viravantasēvāti** anādare sāmivacanaṃ. **Taṃ madditvāti** “ayaṃ sikkhā sabbesampi buddhānaṃ sāsane āciñṇam, ayañca bhikkhu imaṃ sikkhatevā”ti vatvā taṃ bhaddāliṃ tassa vā anussāhapavedanaṃ abhibhavivā. Bhikkhācāragamanatthaṃ **na vitakkamāḷakaṃ** agamāsi, vihāracārikaṃ caranto **tassa vasanaṭṭhānaṃ bhagavā gacchati**.

135. Dūsayanti garahanti etenāti doso, aparādho, so eva kucchitabhāvena **dosako**. Garahāya pavattiṭṭhānato **okāso**. Tenāha – “**etam okāsam etam aparādha**”nti. **Dukkarataranti** patikāravasena atisayena dukkaraṃ. Aparādho hi na khamāpentaṃ yathāpaccayaṃ vitthārito hutvā duppatikāro hoti. Tenāha “**vassañhi**”tiādi.

Alaggitvāti imampi nāma apanītaṃ akāsīti evaṃ avinetvā, taṃ taṃ tassa hitapaṭipattim nivāraṇam katvāti attho. Nāyapaṭipattim aticca eti pavattatīti **accayo**, aparādho, purisena madditvā pavattito aparādho atthato purisaṃ aticca abhibhavivā pavatto nāma hoti. Tenāha “**accayo maṃ, bhante, accagamā**”ti. Avasesapaccayānaṃ samāgame eti phalaṃ etasmā uppajjati pavattati cāti **samayo**, hetu yathā “samudāyo”ti āha “**ekam kāraṇa**”nti. Yaṃ panettha bhaddālittherassa aparipūrākāritāya bhikkhuādīnaṃ jānanaṃ, tampi kāraṇam katvā “ahaṃ kho, bhante, na ussahāmī”tiādinā vattabbanti dasseti.

136. Ekacittakkhaṇikāti paṭhamamaggacittakkhaṇena ekacittakkhaṇikā. **Evam āṇāpetum na yuttanti** saṅkamatthāya āṇāpetum na yuttam payojanābhāvato. Anāciṇṇañcetam buddhānam, yadidam padasā akkamaṇam. Tathā hi –

“Akkamivāna maṃ buddho, saha sissehi gacchatu;
Mā maṃ kalalaṃ akkamittha, hitāya me bhavissatī”ti. (bu. vaṃ. 2.53);

Sumedhapaṇḍitena paccāsīsitam na kataṃ. Yathāha –

“Dīpaṅkaro lokavidū, āhutiṇam paṭiggaho;
Ussīsake maṃ ṭhatvāna, idaṃ vacanamabravī”ti. (bu. vaṃ. 2.60);

Bhagavatā āṇatte sati tesampi evam kātum na yuttanti ethhāpi eseva nayo. **Etesam paṭibāhitum yuttanti** idaṃ aṭṭhānaparikappanavaseneva vuttam. Na hi buddhānam kātum āraddham nāma kiccaṃ kehici paṭibāhitum yuttam nāma atthi paṭibāhitumyeva akaraṇato. Sammattaniyāmassa anokkantattā vuttam “**bāhirako**”ti.

137. Na kammaṭṭhānam alliyatīti cittam kammaṭṭhānam na otarati.

140. Punappunam kārentīti daṇḍakammaṇāmanādikāraṇam punappunam kārenti. **Sammāvattamhi na vattatīti** tassā tassā āpattiyā vuṭṭhānattham bhagavatā paññattasammāvattamhi na vattati. **Anulomavatte na vattatīti** yena yena vattena saṅho anulomiko hoti, tasmim tasmim anulomavatte na vattati vilomameva gaṇhāti, paṭilomena hoti. **Nitthāraṇakavattamhīti** yena vattena saṅho anulomiko hoti, sāpattikabhāvato nitthiṇṇo hoti, tamhi nitthāraṇavattasmim na vattati. Tenāha “**āpattī**”tiādi. **Dubbacakarāṇeti** dubbacassa bhikkhuno karaṇe.

144. Yāpetīti vattati, sāsane tiṭṭhatīti attho. **Abhiññāpattāti** “asuko asuko ca thero sīlavā kalyāṇadhammo bahussuto”tiādinā abhiññātabhāvaṃ pattā adhigataabhiññātā.

145. Sattesu hāyamānesūti kilesabahulatāya paṭipajjanakasattesu parihāyantesu paṭipathesu jāyamānesu. **Antaradhāyati nāma** tadādharatāya. **Diṭṭhadhammikā** parūpavādādayo. **Samparāyikā** apāyadukkhavisesā. Āsavanti tena tena paccayena pavattantīti **āsavā**. **Nesanti** parūpavādādiāsavānaṃ. **Teti** vītikkamadhammā.

Akālam dassetvāti sikkhāpadapaññattiyā akālam dassetvā. **Uppattinti** āsavaṭṭhāniyānaṃ dhammānamuppattiṃ. Sikkhāpadapaññattiyā **kālam, tāva senāsanāni pahonti**, tena āvāsamacchariyādihetunā sāsane ekacce āsavaṭṭhāniyā dhammā na uppajjanti. **Iminā nāyenāti** iminā pana hetunā padasodhammasikkhāpadānaṃ saṅgaho daṭṭhabbo.

Yasanti kittisaddam parivāraṇa. Sāgatattherassa nāgadamanakittiyasādivasena surāpānasānkhāto āsavaṭṭhāniyo dhammo uppajji.

Rasena rasam saṃsandetvāti upādinnakaphassarasena anupādinnakaphassarasam saṃsandetvā.

146. Na kho, bhaddāli, eseva hetu, atha kho aññampi atthīti dassento bhagavā “**apicā**”tiādimāha. Tena dhammassa sakkaccasavane theram niyojeti.

147. Visevanācāranti adantakiriyaṃ. **Parinibbāyatīti** vūpasammati. Tattha adantakiriyaṃ pahāya danto hoti. **Yugassāti** rathadhurassa.

Anukkameti anurūpaparigame. Tadavatthānurūpaṃ pādānaṃ **ukkipane nikkhipane** ca. Tenāha “**cattāro pāde**”tiādi. **Rajjubandhanavidhānenā**ti pādato bhūmiyā mocanavidhānena. **Evaṃ karaṇatthanti** yathā asse nisinnasseva bhūmiṃ gahetuṃ sakkā, evaṃ cattāro pāde tathā katvā attano niccalabhāvakarāṇatthaṃ. **Maṇḍaleti** maṇḍaladhāvīkāyaṃ. **Pathavīkamaneti** pathaviṃ phuṭṭhamattena gamane. Tenāha “**aggaggakhurehī**”ti. **Okkantakarāṇasminti** okkantetvā parasenāsammaddana okkantakaraṇe. **Ekasmiṃ ṭhāneti** catūsu pādesu yattha katthaci ekasmiṃ ṭhāne gamanaṃ codentīti attho, so panettha sīghataro adhippeto. **Davatteti** mariyādākopanehi nānappayojane, parasenāya pavattamahānādapaharaṇehi attho. Tenāha “**yuddhakālasmi**”ntiādi.

Raṇṇā jānitabbaguṇeti yathā rājā assassa guṇe jānāti, evaṃ tena jānitabbaguṇakāraṇaṃ kāreti. **Assarājavamseti** dussahaṃ dukkhaṃ patvāpi yathā ayaṃ rājavamaṣanurūpakiriyaṃ na jahissati, evaṃ sikkhāpane. Sikkhāpanameva hi sandhāya sabbattha “**kāraṇaṃ kāretī**”ti vuttaṃ tassa karaṇakārāpanapariyāyattā.

Yathā uttamajavo hotīti javadassanaṭṭhāne yathā hayo uttamajavaṃ na hāpesi, evaṃ sikkhāpeti. **Uttamahayabhāve, yathā uttamahayo hotīti** kammakaraṇakāle attano uttamabhāvaṃ aniguhitvā avajjetvā yathā atthasiddhi hoti, evaṃ paramajavena sikkhāpeti. Yathā kiriyaṃ vinā dabbampi vinā kiriyaṃ na bhavati, evaṃ daṭṭhabbanti dassetuṃ “**tattha pakatiyā**”tiādi vuttaṃ.

Tatrāti tasmīṃ pakatiyā uttamahayasseva uttamahayakāraṇārahattā uttamajavapaṭipajjane. **Māsakhādakaghoṭakānanti** māsaṃ khādītva yathā tathā viguṇakhaluṅgakānaṃ. **Valañjakadaṇḍanti** raṇṇā gahetabbasuvaṇṇadaṇḍaṃ. **Dhātupatthaddhoti** attanāva samuppāditadhātuyā upatthambhito hutvā.

Uttame sākhalyeti paramasakhilabhāve sakhilavācāya eva dametabbatāya. Tenāha “**muduvācāya hī**”tiādi.

Arahattaphalasammādiṭṭhiyāti phalasamāpatikāle pavattasammāñānaṃ. **Sammāñānaṃ pubbe vuttasammādiṭṭhiyevāti** pana idaṃ phalasammādiṭṭhibhāvasāmaññena vuttaṃ. Keci pana “paccavekkhaṇaṇāṇa”nti vadanti, taṃ na yujjati “asekkhenā”ti visesitattā. Tampi asekkhaṇāṇanti ce? Evampi nippariyāya sekkhaggahaṇe pariyāyasekkhaggahaṇaṃ na yuttameva, kiccabhedenā vā vuttanti daṭṭhabbaṃ. Ekā eva hi sā paññā nibbānassa paccakkhākiriyaṃ sammādasanakkiccam upādāya “sammādiṭṭhi”ti vuttā, sammājananakkiccam upādāya “sammāñāna”nti. Aññātāvindriyavasena vā **sammādiṭṭhi**, paññindriyavasena **sammāñānaṃ**ti evamettha attho daṭṭhabbo. Maggaphalāvahāya desanāya saṅkhepatova āgatattā vuttaṃ “**ugghaṭitaññupuggalassa vasenā**”ti.

Bhaddālisuttavaṇṇanāya līnatthappakāsanā samattā.

6. Laṭukikopamasuttavaṇṇanā

148. Mahāudāyittheroti kāludāyilāḷudāyittherehi añño mahādehatāya mahāudāyīti sāsane paññāto thero. Apahari apaharati apaharissatīti **apahattā**. Tekāliko hi ayaṃ saddo. **Upahattāti** etthāpi eseva nayo. **Apahārakoti** apanetā. **Upahārakoti** upanetā.

149. Yanti bhummatthe paccattavacanaṃ, tena ca anantaraniddiṭṭhasamayo paccāmaṭṭhoti āha “**yasmiṃ samaye**”ti. **Na bhagavantaṃ paṭiccāti** na bhagavantaṃ ārammaṇaṃ katvā.

Kammanipphannatthanti attanā āyāciyamānakammasiddhiatthaṃ. Bhavatīti bhū, na bhūti **abhū**, bhayavasena pana sā itthī “**abhu**”nti āha. **Ātu mātūti** ettha yathā –

“Āṅgā āṅgā sambhavaṣi, hadayā adhiḷyāyase;
Attā eva putta nāmāsi, sa jīva saradosata”nti. –

Ādīsu putto “attā”ti vuccati kulavasena santāne pavattanato. Evaṃ pitāpi “puttassa attā”ti vuccati. Yasmā “bhikkhussa attā mātā”ti vatthukāmā bhayavasena “**ātu mātū**”ti āha. Tenāha “**ātūti pitā**”tiādi.

150. Evamevanti idaṃ garahatthajotananipātapadanti vuttaṃ “**garahanto āhā**”ti. Tathā hi naṃ vācakasaddeneva dassento “**idhekacce moghapurisā**”ti āha. **Āhamsūti** tesam tathā vacanassa avicchedena pavattidīpananti āha “**vadantī**”ti. **Kim panimassa appamattakassāti** pahātabbavattum avamaññamānehi vuttaṃ. Tenāha “**kiṃ panā**”ti. Hetumhi jotetabbe cetam sāmivacanam yathā “anussavassa hetu, ajjhenassa hetū”ti. Tenāha “**appamattakassa hetū**”ti. Nanu apassantena viya asuṇantena viya bhavitabbanti? Sathārā nāma appamattakesu dosesu apassantena viya ca asuṇantena viya ca bhavitabbanti tesam adhippāyena vivaraṇam. **Tesu cāti** sikkhākāmesu ca. Appaccayam upatthāpentīti ānetvā sambandhitabbanti dasseti. **Tesanti** ye “moghapurisā”ti vuttā puggalā, tesam. **Gale baddham mahākattanti** gale olambetvā baddham rukkhadāḍamāha. **Pūtilatāyāti** galociyā. **Pārājikavattu viya duppajham hotīti** chandakappahānavasena tam pajahitum na sakkoti.

151. Anussukkāti tassa pahātabbassa pahāne ussukkarahitā. **Apaccāsīsanapakketi** tāya paradattavuttitāya kassaci paccayassa kutoci apaccāsīsakapakkhe thitā hutvā suppajham hoti, na tassa pahāne bhāriyam atthi.

152. Daliddo duggato. **Assakoti** asāpateyyo. **Gehayatthiyoti** gehachadanassa ādhārā, tā ujukam tiriyam thapetabbadaṇḍā. Samantato bhittipādesu thapetabbadaṇḍā **maṇḍalā**. **Kākātidāyinti** ito cito kākehi atipātavasena uḍdetabbaṃ. Tenāha “**yattha kiñcīdevā**”tiādi. **Sūrakākāti** kākānam uḍdepanākāramāha. **Naparamarūpanti** hīnarūpaṃ. **Vilivamañcakoti** tālavettakādīhi vītamañcako. Sā panassa santānānam chinnabhinnatāya oluggaviluggatā, tathā sati sā visamarūpā hotīti āha “**oṇatā**”tiādi. So puggalo lūkhabhojī hotīti āha “**dhaññam nāma kudrūsako**”ti. Samakālam vapitabbatāya **samavāpakam**, yathāutu vapitabbabījā. **Jāyikāti** kucchitā bhariyā, sabbattha garahāyam ka-saddo. **So vatāham pabbajeyyanti** soham kesamassum ohāretvā pabbajeyyam, yoham puriso nāma assam vatāti pabbajjāvasena attano purisam bodheyya. Tam sabhāve thitassa bodhā na tu dukkarā, sā **khatopikā**. Sā kumbhī. Meṇḍakasetthino **aḍḍhateḷasāni koṭṭhāgārasatāni viya**.

153. Suvaṇṇanikkhasatānanti anekesam suvaṇṇanikkhasatānam. **Cayoti** santānehi nicayo avīci niccappabandhanicayo. Tenāha “**santānato katasannicayo**”ti.

154. Heṭṭhā kiñcāpi appajahanakā paṭhamam dassitā, pajahanakā padhānā, tesañca vasenettha puggalacatukkam dassitam. **Te tañceva pajahantīti** pajahanakā paṭhamam gahitā. **Rāsivasenāti** “idhudāyi ekacco puggalo”tiādinā catukke āgatavibhāgam anāmasitvā “te te”ti pacuravasena vuttaṃ. Tenāha “**na pāṭiyekkam vibhattā**”ti. Avibhāgena gahitavatthūsu vibhāgato gahaṇam lokasiddhametanti dassetum “**yathā nāmā**”tiādi vuttaṃ. **Pajahanakapuggalāti** “te tañceva pajahantī”ti evam pajahanakapuggalā eva.

Upadhianudhāvanakāti upadhīsu anuanudhāvanakā upadhiyo ārabba pavattanakā. **Vitakkāyevāti** kāmasaṅkappādivitakkāyeva. **Indriyanānattatāti** vimuttiparipācakānam indriyānam paropariyattam. Tassa hi vaseneva te cattāro puggalā jātā. Aggamaggaṭṭhāya vipassanam ussukkāpetvā yāva na tam maggena samugghātentī, tāva nappajahanti nāma. Iti heṭṭhimā tayopi ariyā appahīnassa kilesassa vasena “nappajahantī”ti vuttā, pageva puthujjanā. Vuttanayena pana vipassanam maggena ghaṭentā te cattāro janā aggamaggakkhaṇe pajahanti nāma. Te eva tattha sīghakārino khippam pajahanti nāma, tenāha “**tatthā**”tiādi.

Samvegaṃ katvā aggiṃ akkantapuriso viya. **Maggenāti** anukkamāgatena aggamaggena. **Mahāhatthipadopameti** mahāhatthipadopamasutte (ma. ni. 1.300 ādayo). Tattha hi “tassa dhātārammaṇameva cittaṃ pakkhandati pasīdati santiṭṭhati adhimuccatī”ti (ma. ni. 1.302) ettha atitikkhanātitikkha-nātimandaatimanda-puggalavasena aṭṭhakathāyaṃ (ma. ni. aṭṭha. 2.302) tayo vārā uddhaṭā, tattha majjhimavaseneva pañho kathito. **Indriyabhāvaneti** indriyabhāvanāsutte, tatthāpi majjhimanayeneva pañho kathito. Tenāha “**imesū**”tiādi.

Tanti “upadhī”ti vuttaṃ khandhapañcakaṃ. **Dukkhassa mūlanti** sabbassapi vaṭṭadukkhassa kāraṇaṃ. **Niggahaṇoti** nirupādāno. Tenāha “**nittaṇho**”ti.

155. Ye pajahantīti “te tañceva pajahantī”ti evaṃ vuttapuggalā. **Te ime nāma ettake kilese pajahantīti** ye te puthujjanā lābhino ca pañca kāmagaṇe ettake taṃtaṃjhānādivatthuke ca taṃtaṃmaggavajjhatāya paricchinnattā ettake kilese pajahanti. **Ye nappajahantīti** ettha vuttanayānusārena attho veditabbo. **Asucisukhaṃ** kāyāsucisannissittā. **Anariyehīti** aparissuddhehi. **Paṭilābhato bhāyitabbaṃ** kilesadukkhagatikattā. **Vipākato bhāyitabbaṃ** apāyadukkhagatikattā. **Gaṇatopi kilesatopi vivittasukhanti** gaṇasaṅgaṇikato ca kilesasaṅgaṇikato ca vivittasukhaṃ. **Rāgādivūpasamatthāyāti** rāgādivūpasamāvahaṃ sukhaṃ. **Na bhāyitabbaṃ** sampati āyatiñca ekantahitabhāvato.

156. Iñjitasminti paccatte bhummavacananti āha “**iñjana**”ntiādi. Iñjati tenāti **iñjitaṃ**, tassa tassa jhānassa khobhakaṃ oḷārikaṃ jhānaṅgaṃ. **Catutthajjhānaṃ aniñjanaṃ** sannissinnābhāvato. Tathā hi vuttaṃ “ṭhite āneñjappatte”ti (dī. ni. 1.244-245; ma. ni. 1.384-386; pārā. 12-13).

Alaṃ-saddo yuttatthopi hoti – “alameva nibbindituṃ, alaṃ vimuccitu”ntiādisu (dī. ni. 2.272; saṃ. ni. 2.124, 128, 134, 143), tasmā **analaṃ** anusaṅgaṃ kātuṃ ayuttanti attho. Tenāha “**akattabbaālayanti vadāmi**”ti. **Sanniṭṭhānanti** sammāpaṭipattiyāṃ alaṃ ettāvātāti ussāhapaṭippassambhanavasena sanniṭṭhānaṃ na kātabbanti yojanā. Uddhambhāgiyasaññitaṃ **aṇuṃ vā** orambhāgiyasaññitaṃ **thūlaṃ vā**, rūparāgoti evarūpaṃ **aṇuṃ vā** kāmāsavo paṭighanti evarūpaṃ **thūlaṃ vā**, mudunā pavattiākāravisesena **appasāvajjaṃ**, kammabandhanaṭṭhena vā **appasāvajjaṃ**, tabbipariyāyato **mahāsāvajjaṃ** veditabbaṃ. Nātitikkhapaññassa vasena desanāya pavattattā “**neyyapuggalassa vasenā**”ti vuttaṃ. Sabbaso hi pariyaḍinnanikantikassa ariyapuggalassa vasena saññāvedayitanirodhassa āgatattā “**arahattanikūṭeneva niṭṭhāpitā**”ti vuttaṃ. Yaṃ panettha atthato na vibhattaṃ, taṃ suviññeyyameva.

Laṭukikopamasuttavaṇṇanāya līnatthappakāsanā samattā.

7. Cātumasuttavaṇṇanā

157. Yathāupanissayenāti yo yo upanissayo yathāupanissayo, tena yathāupanissayena sammāpayogena. **Paṭiṭṭhahissanti** sāsane paṭiṭṭhaṃ paṭilabhissanti. **Vasanaṭṭhānānīti** vassaggādivasena vasanaṭṭhānāni. **Saṅṭhāpayamānāti** suvibhattabhāvena ṭhapentā.

Avinibbhogasaddanti vinibhuñjitvā gahetuṃ asakkuṇeyyasaddaṃ. Vacīghosopi hi bahūhi ekaccaṃ pavattito ṭhānato ca dūrataro kevalaṃ mahānigghoso eva hutvā sotapathamāgacchati. **Macchavilopeti** macche vilumpitvā viya gahaṇe, macchānaṃ vā nayane.

158. Vavassaggattheti nicchayatthe, idaṃ tāva amhehi vuccamānavacanaṃ ekantasotabbaṃ, pacchā tumhehi kātabbaṃ karoṭhāti adhippāyo. **Vacanaparihāro** tehi sakyaṛājūhi vuttavacanassa parihāro. **Lesakappanti** kappiyalesaṃ. **Dhuravahāti** dhuravāhino, dhorayhāti attho. **Pādamūlanti** upacāraṃ vadati. **Vigacchissatīti** hāyissati. **Paṭippharitoti** na bhagavato sammukhāva, sakyaṛājūnaṃ puratopi vippharitova hoti.

159. Abhinandatūti abhimukho hutvā pamodatu. **Abhivadatūti** abhirūpavasena vadatu. **Pasādaññathattanti** appasādassa vipariṇāmo hīnāyāvattanasaṅkhātaṃ parivattanaṃ, tenāha “**vibbhamantānaṃ. Vipariṇāmaññathatta**”nti. Kāraṇūpacārena sassesu bījapariyāyoti āha “**bijānaṃ taruṇānanti taruṇasassāna**”nti. Taruṇabhāveneva tassa bhāvino phalassa abhāvena **vipariṇāmo**.

160. Kattabbassa saraseneva karaṇaṃ cittaruciyaṃ, na tathā parassa ussādanenāti āha – “**pakkosiyamānānaṃ gamanaṃ nāma na phāsuka**”nti. Mayampi bhagavā viya **diṭṭhadhammasukhavihārenea viharissāmāti dīpeti** pakatiyā vivekajjhāsaya bhāvato viraddho āgatassa bhārassa avahanatoyeva. Tenāha “**attano bhārabhāvaṃ na aññāsī**”ti.

161. Kasmā ārabhīti? Sappāyato. Pañcasatā hi bhikkhū abhinavā, tasmā tesam ovādadānattham bhagavā imaṃ desanaṃ ārabhīti.

162. Kodhupāyāsassāti ettha kujjhanatthena kodho, sveva cittassa kāyassa ca atippamaddanamathanuppādanehi daḷhaṃ āyasaṭṭhena upāyāso. Anekavāraṃ pavattitvā attanā samavetaṃ sattaṃ ajjhottharivā sīsaṃ ukkhipituṃ adatvā anayabyasanapāpanena kodhupāyāsassa ūmisadisatā daṭṭhabbā. Tenāha “**kodhupāyāse**”tiādi.

163. Odarikattena khāditoti odarikabhāvena āmisagedhena micchājīvena jīvikākappanena nāsitasīlādiguṇatāya khāditadhammasarīro.

164. Pañcakāmaguṇāvaṭṭe nimujjivāti ettha kāmarāgābhībhūte satte ito ca etto, etto ca itoti evaṃ manāpiyarūpādivisayasāṅkhāte āvaṭṭe attānaṃ saṃsāretvā yathā tato bahībhūte nekkhamme cittampi na uppādeti, evaṃ āvaṭṭetvā byasanāpādanena kāmaguṇānaṃ āvaṭṭasadisatā daṭṭhabbā. Tenāha “**yathā hī**”tiādi.

165. Rāgānuddhamṣitenāti rāgena anuddhamṣitena. Caṇḍamacchaṃ āgammāti susukādicāṇḍamacchaṃ āgamma. **Mātugāmaṃ āgammāti** mātugāmo hi yonisomanasikārahitaṃ adhīrapurisaṃ itthikuttabhūtehi attano hāvabhāvavilāsehi abhibhuyya gahetvā dhīrajātiyampi attano rūpādīhi palobhanavasena anavasesaṃ attano upakāradhamme sīlādike sampādetuṃ asamatthaṃ karonto anayabyasanaṃ pāpeti. Tenāha – “**mātugāmaṃ āgamma uppannakāmarāgo vibbhamati**”ti.

Bhayaṃ nāma yattha bhāyitabbavatthu, tattha otarantasseva hoti, na anotarantassa, taṃ otarivā bhayaṃ vinodetvā tattha kiccaṃ sādhetabbaṃ, itarathā catthasiddhi na hotīti imamattaṃ upamopamitabbasarūpavasena dassetuṃ “**yathā**”tiādi vuttaṃ. Tattha **udakaṃ nissāya ānisamso** pipāsavinayanaṃ sarīrasuddhi pariḷāhūpasamo kāyautuggāhāpananti evamādi. **Sāsaṇaṃ nissāya ānisamso** pana saṅkhepato vaṭṭadukkhūpasamo, vitthārato pana sīlānisamsādivasena anekavidho, so **visuddhimagge** (visuddhi. 1.9) vuttanayena veditabbo. **Vuttappakāro ānisamso hoti** tāni bhayāni abhibhuyya pavattassāti adhippāyo. **Imāni abhāyivāti** imāni kodhūpāyāsādibhāyāni abhibhuyya pavattitvā abhāyivā. Kodhūpāyāsādayo hi bhāyati etasmāti bhayanti vuttā. **Theroti** mahādhammarakkhitatthero. Kāmaṃ pahānābhīsamayakālo eva sacchikiriyābhīsamayo, sammādiṭṭhiyā pana saṃkilesavodānadhammesu kiccaṃ asaṃkiṇṇaṃ katvā dassetuṃ samānakālikampi asamānakālikaṃ viya vuttaṃ “**taṇhāsotaṃ chinditvā nibbānapāraṃ daṭṭhuṃ na sakkotī**”ti. Sesam suviññeyyameva.

Cātumasuttavaṇṇanāya līnatthappakāsānā samattā.

8. Naḷakapānasuttavaṇṇanā

166. Yattha bodhisattapamukho vānaro naḷakena pānīyaṃ pivi, sā pokkharāṇī, tassāmanto bhūmippadeso, tattha niviṭṭhagāmo ca “**naḷakapāna**”nteva paññāyittha, idha pana gāmo adhippetoti āha

“**naḷakapāneti evaṃnāmake gāme**”ti. Idāni tamatthaṃ āgamanato paṭṭhāya dassetuṃ “**pubbe kirā**”ti āradhāṃ. **Paññāvāti** itikattabbatāya paññāya paññāvā.

Thūladīghabahulabhāvena mahatīhi dāṭṭhikāhi samannāgatattā **mahādāṭṭhiko**. “Udakarakkhaso aha”nti vatvā vānarānaṃ kañci amuñcivā “sabbe tumhe mama hatthagatā”ti dasseto “**tumhe pana sabbe khādissāmi**”ti āha. **Dhami...pe... pivimsūti** bodhisattena gahitanaḷo anavaseso abbhantare sabbasandhīnaṃ nibbādheṇa ekacchiddo ahoṣi. **Neva maṃ tvam vadhissasīti** udakarakkhasa tvam vadhītukāmo pi mama purisathāmena na vadhissasī.

Evaṃ pana vatvā mahāsatto “ayaṃ pāpo ettha pānīyaṃ pivante aññepi satte mā bādhayitthā”ti karuṇāyamāno “ettha jāyantā naḷā sabbe apabbabandhā ekacchiddāva hontū”ti adhiṭṭhāya gato. Tenāha “**tato paṭṭhāyā**”tiādi.

167. Anuruddhappamukhā bhikkhū bhagavatā “kacci tumhe anuruddhā”ti pucchitāti thero “**taggha mayaṃ, bhante**”ti āha.

Sace pabbajati, jīvitaṃ labhissati, no aññathāti raññā pabbajjāya abhinītāti **rājābhinītā**. **Corābhinītāti** etthāpi eseva nayo. **Corānaṃ mūlaṃ chindanto** “kaṇṭakasodhanaṃ karissāmi”ti. **Ājīvikāyāti** ājīvena jīvitavuttiyā. **Imesu pana** anuruddhattherādīsu.

Vivekanti pubbakālikakiriyaṃ padhānaṃ “abyāpajjaṃ upeta”ntiādīsu viyāti āha – “**viviccā**”ti, viviccivā vivitto hutvā vinā hutvāti attho. **Pabbajitakiccanti** pabbajitassa sārūpakiccaṃ. **Samaṇakiccanti** samaṇabhāvakaraṇakiccaṃ. Yadaggena hi pabbajitakiccaṃ kātuṃ na sakkoti tadaggena samaṇabhāvakarampi kiccaṃ kātuṃ na sakkoti. Tenāha “**so yevā**”tiādi.

168. **Appaṭisandhike** tāva byākaronto pavattīsu ṭhānaṃ atītoti katvā upapattīsu byākaroti nāma tattha paṭisandhiyā abhāvakittanato. **Mahantatuṭṭhinoti** vipulapamodā.

169. **Imassāti** “assā”ti padassa atthavacanāṃ. Imassa ṭhitassa āyasmato sāmaṃ ditṭho vā hoti anussavasuto vāti yojanā. **Samādhīpakikkhikā dhammā dhammāti adhippetā**, samādhī pana **evaṃvihārīti** ettha vihārasaddena gahito. **Evaṃvimuttāti** ettha pana vimuttisaddena phalavimutti gahitā. **Caratopīti** samathavipassanācārena caratopi viharantassapi. Upāsakaupāsikāṭhānesu labbhānāmpī arahattaṃ appakabhāvato pāḷiyaṃ anuddhaṭanti daṭṭhabbaṃ. Sesāṃ suviññeyyameva.

Naḷakapānasuttavaṇṇanāya līnatthappakāsanā samattā.

9. Goliyānisuttavaṇṇanā

173. **Padasamācāroti** taṃtaṃpaccayabhedadassanāya vigatattā pakārehi daliddasamācāro sithilasamācāroti attho. Yasmā pana tādīso samācāro thiro daḷho nāma na hoti, tasmā vuttaṃ “**dubbalasamācāro**”ti. “Sākhāsamācāro”ti vā pāṭho, tattha tattha lagganaṭṭhena sākhāsadisāsīloti attho. Tenāha “**oḷārīkacāro**”ti. **Paccayesu sāpekkhoti** paccayesu sāpekkhatāya eva hissa oḷārīkacāratā veditabbā. Garuṇā kismiñci vutte gāravavasena patissavanaṃ patisso, patissavacanabhūtaṃ taṃsabhāgañca yaṃ kiñci gāravanti attho. Saha patissenāti **sappatissena**, sappatissavena ovādasampaṭicchanena. Patissīyatīti vā patisso, garukātabbo, tena saha patissenāti sabbāṃ pubbe viya. Tenāha “**sajetṭhakenā**”ti. **Serivihāro** nāma attappadhānavāso. Tenāha “**niraṅkusavihārenā**”ti.

Anupakhajjāti anupakaḍḍhitvā. Garuṭṭhānīyānaṃ antaraṃ anāpucchā anupavisitvāti imamatthaṃ dassetuṃ “**tattha yo**”tiādi vuttaṃ.

Ābhisamācārikanti abhisamācāre bhavaṃ. Kiṃ pana tanti āha “**vattapaṭipattimattampī**”ti. Nātikālasseva saṅghassa purato pavisitabbaṃ, na pacchā paṭikkamitabbanti adhippāyena atikāle ca gāmapaveso atidivā paṭikkamanañca nivāritaṃ, taṃ dassetuṃ “**na atipāto**”tiādi vuttaṃ. **Uddhaccapakatikoti** vibbhantacitto. **Avacāpalyenāti** daḷhavātāpahatapallavasadisena lolabhāvena.

Paññavatāti iminā bhikkhusāruppesu itikattabbesu upāyapaññā adhippetā, na sutamayapaññā. **Abhidhamme abhivinaye yogoti** iminā bhāvanāpaññāuttarimanussadhamme yogo pakāsito. **Yogoti** ca paricayo uggaṇhavasena.

Āruppāti iminā catassopi arūpasamāpattiyo gahitā, tā pana catūhi rūpasamāpattihi vinā na sampajjanṭīti āha – “**āruppāti ettāvataṃ aṭṭhapi samāpattiyo vuttā hontī**”ti. **Kasiṇeti** dasavidhe kasiṇe. **Ekam parikkammakammaṭṭhānanti** yaṃ kiñci ekabhāvanā parikkammadīpanaṃ khandhakammaṭṭhānaṃ. Tenāha “**paṇaṇaṃ katvā**”ti. Kasiṇaparikkammaṃ pana taggahaṇeneva gahitaṃ hoti, lokiyā uttarimanussadhammā heṭṭhā gahitāti āha “**uttarimanussadhammeti iminā sabbepi lokuttaradhamme dasseti**”ti. **Neyyapuggalassa vassenāti** jānitvā vitthāretvā ñātābbapuggalassa vassenāti.

Goliyānisuttavaṇṇanāya līnatthappakāsanaṃ samattā.

10. Kīṭāgirisuttavaṇṇanā

174. Pañca ānisaṃseti appābādhatādike pañca guṇe. Tattha akkhirogakucchirogādīnaṃ abhāvo **appābādhatā**. Sarīre tesam kuppānādukkhassa abhāvo **appātaṅkaṃ**. Sarīrassa uṭṭhānasukhatā **lahuṭṭhānaṃ**. **Balaṃ** nāma kāyabalaṃ. **Phāsuvihāro** iriyāpathasukhatā. **Anupakkhandānīti** duccajanavasena sattānaṃ anupaviṭṭhāni. **Sañjānissathāti** ettha **iti**-saddo ādiattho, tasmā iti evaṃ ānisaṃsanti attho.

175. Āvāse niyuttāti **āvāsikā** tassa anativattanato. Tenāha “**nibaddhavāsino**”ti, niyatavāsīnoti attho. **Tannibandhāti** nibandhaṃ vuccati byāpāro, tattha bandhā pasutā ussukāti tannibandhā. Kathaṃ te tattha nibandhāti āha “**akataṃ senāsana**”ntiādi. Uppajjanakena kālena pattabbaṃ **kālikam** so pana kālo anāgato eva hotīti āha “**anāgate kāle pattabba**”nti.

178. Ettakā vedanā sevitabbāti aṭṭhārasapi nekkhammanissitā vedanā sevitabbā, gehassitā **na sevitabbā**.

181. Taṃ kataṃ soḷasavidhassapi kiccassa niṭṭhitattā. **Anulomikānīti** utusukhabhāvena anurūpāni. Tenāha “**kammaṭṭhānasappāyānī**”ti. **Samānaṃ kurumānāti** omattataṃ adhimattatañca pahāya samakiccataṃ sampādentā.

182. Te dve hontīti te ādito vuttā dve.

Ubhato (a. ni. ṭi. 3.7.14) ubhayathā ubhohi bhāgehi vimuttoti **ubhatobhāgavimutto** ekadesasarūpekasesanayena. Tathā hi vuttaṃ **abhidhammaṭṭhakathāyaṃ** (pu. pa. aṭṭha. 24) “dvīhi bhāgehi dve vāre vimuttoti ubhatobhāgavimutto”ti. Tattha keci tāva therā – “samāpattiyā vikkhambhanavimokkhena, maggena samucchavedavimokkhena vimuttoti ubhatobhāgavimutto”ti vadanti. Aññe therā – “ayaṃ ubhatobhāgavimutto rūpato mucchitvā nāmaṃ nissāya ṭhito puna tato mucchanato nāmanissitako”ti vatvā tassa ca sādhaṃ –

“Acci yathā vātavegena khittā, (upasivāti bhagavā,
Atthaṃ paleti na upeti saṅkhaṃ;

Evam muni nāmakāyā vimutto,
Atthaṃ paleti na upeti saṅkha’nti. (su. ni. 1080; cūḷani. upasīvamāṇavapucchā 11;
upasīvamāṇavapucchānidessa 43) –

Imaṃ suttapadaṃ vatvā “nāmakāyato ca rūpakāyato ca suvimuttattā ubhatobhāgavimutto”ti vadanti. Sutte hi ākiñcaññāyatanaḷābhino upasivabrāhmaṇassa bhagavatā nāmakāyā vimuttoti ubhatobhāgavimuttoti akkhātoti. Apare pana “samāpattiyā vikkhambhanavimokkhena ekavāraṃ vimutto, maggena samucchadavimokkhena ekavāraṃ vimuttoti evaṃ ubhatobhāgavimutto”ti vadanti. Ettha paṭhamavāde dvīhi bhāgehi vimuttoti ubhatobhāgavimutto. Dutiyavāde ubhatobhāgato vimuttoti ubhatobhāgavimutto. Tatiyavāde pana dvīhi bhāgehi dve vāre vimuttoti ayametesam viseso. Kilesehi vimutto kilesā vā vikkhambhanasamucchadehi kāyadvayato vimuttā assāti ayamatto daṭṭhabbo. Tenāha “**dvīhi bhāgehi**”tiādi.

Soti ubhatobhāgavimutto. Kāmañcettha rūpāvacaracattutthajjhānampi arūpāvacarajjhānaṃ viya duvaṅgikaṃ āneñjappattanti vuccati. Taṃ pana padaṭṭhānaṃ katvā arahattaṃ patto ubhatobhāgavimutto nāma na hoti rūpakāyato avimuttattā. Tañhi kilesakāyatova vimuttaṃ, na rūpakāyato, tasmā tato vuṭṭhāya arahattaṃ patto ubhatobhāgavimutto na hotīti āha – “**catunnaṃ arūpa...pe... pañcavidho hotī**”ti. “Rūpī rūpāni passatī”tiādike nirodhasamāpattianta aṭṭha vimokkhe vatvā – “yato ca kho, ānanda, bhikkhu ime aṭṭha vimokkhe kāyena phusitvā viharati, paññāya cassa disvā āsavā parikkhīṇā hontī, ayaṃ vuccati, ānanda, bhikkhu ubhatobhāgavimutto”ti yadipi **mahānidāne** (dī. ni. 2.129-130) vuttaṃ, taṃ pana ubhatobhāgavimuttasetṭhavasena vuttanti idha sabbaubhatobhāgavimuttasaṅgahaṇatthaṃ “**pañcavidho hotī**”ti vatvā “**pāli panettha...pe... abhidhamme aṭṭhavimokkhalābhino vasena āgatā**”ti āha. Idhāpi hi kīṭāgirisutte “idha, bhikkhave, ekacco puggalo...pe... ubhatobhāgavimutto”ti arūpasamāpattivaseṇa cattāro ubhatobhāgavimuttā, seṭṭho ca vutto vuttalakkaṇūpapattito. Yathāvuttesu hi pañcasu purimā cattāro nirodhaṃ na samāpajjantīti pariyāyena ubhatobhāgavimuttā nāma. Aṭṭhasamāpattilābhī anāgāmī taṃ samāpajjitvā tato vuṭṭhāya vipassanaṃ vaḍḍhetvā arahattaṃ pattoti nipariyāyena ubhatobhāgavimuttasetṭho nāma.

Katamo ca puggalotiādisu katamoti pucchāvacaṇaṃ, **puggaloti** asādhāraṇato pucchitabbavacaṇaṃ. **Idhāti** imasmim sāsane. **Ekaccoti** eko. **Aṭṭha vimokkhe kāyena phusitvā viharatīti** aṭṭha samāpattiyo sahañjātanāmakāyena paṭilābhivā viharati. **Paññāya cassa disvā āsavā parikkhīṇā hontīti** vipassanāpaññāya saṅkhāragataṃ, maggapaññāya cattāri saccāni passitvā cattāropi āsavā parikkhīṇā hontīti evamattho daṭṭhabbo.

Paññāvimuttoti visesato paññāya eva vimutto, na tassā patiṭṭhānabhūtena aṭṭhavimokkhasaṅkhātena sātisayena samādhināti paññāvimutto. Yo ariyo anadhigataaṭṭhavimokkhena sabbaso āsavehi vimutto, tassettaṃ adhivacaṇaṃ. Adhigatepi hi rūpajjhānavimokkhe na so sātisayasamādhinissitoti na tassa vasena ubhatobhāgavimutto hotīti vuttovāyamatto. Arūpajjhānesu pana ekasmimpi sati ubhatobhāgavimuttoyeva nāma hoti. Tena hi aṭṭhavimokkhekadesena taṃnāmadānasamatthena aṭṭhavimokkhalābhīveva vuccati. Samudāye hi pavatto vohāro avayavepi dissati yathā “sattisayo”ti. **Pāḷīti** abhidhammapāḷi. **Etthāti** etissaṃ paññāvimuttikathāyaṃ. **Aṭṭhavimokkhapatiṭṭhāpavasenevāti** avadhāraṇena idhāpi paṭikkhepavaseneva āgatabhāvaṃ dasseti. Tenāha “**kāyena phusitvā viharatī**”ti.

Phuṭṭhantaṃ sacchikarotīti phuṭṭhānaṃ anto phuṭṭhanto, phuṭṭhānaṃ arūpajjhānānaṃ anantaro kāloti adhippāyo. Accantasamyoge cetam upayogavacaṇaṃ, phuṭṭhānantarakālemeva sacchikarotīti sacchikātabbopāyenāti vuttaṃ hoti. Bhāvanapūṃsakaṃ vā etaṃ “ekamantaṃ nisīdī”tiādisu (pārā. 2) viya. Yo hi arūpajjhānena rūpakāyato nāmakāyekadesato ca vikkhambhanavimokkhena vimutto, tena nirodhasaṅkhāto vimokkho ālocito pakāsito viya hoti, na pana kāyena sacchikato, nirodhaṃ pana ārammaṇaṃ katvā ekaccesu āsavesu khepitesu tena so sacchikato hoti, tasmā so sacchikātabbaṃ nirodhaṃ yathāālocitaṃ nāmakāyena sacchikarotīti “**kāyasakkhī**”ti vuccati, na tu “vimutto”ti

ekaccānaṃ āsavānaṃ aparikkhīṇatā. Tenāha – “**jhānaphassaṃ paṭhamam phusati, pacchā nirodham nibbānaṃ sacchikaroti**”ti. Ayaṃ catunnaṃ arūpasamāpattīnaṃ ekekato vuṭṭhāya saṅkhāre sammāsivā kāyasakkhibhāvaṃ pattānaṃ catunnaṃ, nirodhā vuṭṭhāya aggamaggappattaanāgāmino ca vasena ubhatobhāgavimutto viya pañcavidho nāma hoti. Tena vuttaṃ **abhidhammaṭṭikāyaṃ** “kāyasakkhimhipi eseva nayo”ti.

Diṭṭhantaṃ pattoti dassanasāṅkhātassa sotāpattimaggañāṇassa anantaraṃ pattoti vuttaṃ hoti. “Diṭṭhattā patto”tipi pāṭho. Etena catusaccadassanasāṅkhātāya diṭṭhiyā nirodhassa pattataṃ dīpeti. Tenāha “**dukkhā saṅkhārā, sukho nirodhoti nātaṃ hoti**”ti. Tattha **paññāyāti** maggapaññāya. Paṭhamaphalaṭṭhato yāva aggamaggaṭṭhā, tāva **diṭṭhippatto**. Tenāha “**sopi kāyasakkhi viya chabbidho hoti**”ti. Yathā pana paññāvimutto pañcavidho vutto, evaṃ ayampi sukkhavipassako, catūhi rūpajjhānehi vuṭṭhāya diṭṭhippattabhāvappattā cattāro cāti pañcavidho hotīti veditabbo. Saddhāvimuttepi eseva nayo. **Idaṃ dukkhanti** ettakaṃ dukkhaṃ, na ito uddhaṃ dukkhanti. **Yathābhūtaṃ pajānāti** ṭhapetvā taṇhaṃ upādānakkhandhapañcakaṃ dukkhasaccanti yāthāvato pajānāti. Yasmā pana taṇhā dukkhaṃ janeti nibbatteti, tato taṃ dukkhaṃ samudeti, tasmā naṃ “**ayaṃ dukkhasamudayo**”ti **yathābhūtaṃ pajānāti** yasmā pana idaṃ dukkhaṃ samudayo ca nibbānaṃ patvā nirujjhati appavattiṃ gacchati, tasmā “**ayaṃ dukkhanirodho**”ti **yathābhūtaṃ pajānāti**. Ariyo pana aṭṭhaṅgiko maggo taṃ dukkhanirodhaṃ gacchati, tena “**ayaṃ dukkhanirodhagāminipaṭipadā**”ti **yathābhūtaṃ pajānāti**. Ettāvata nānakkhaṇe saccavavattānaṃ dassitaṃ. Idāni taṃ ekakkhaṇe dassetuṃ “**tathāgatappaveditā**”tiādi vuttaṃ, tassattho āgamissati.

Saddhāya vimuttoti etena sabbathā avimuttassapi saddhāmattena vimuttabhāvo dīpito hoti. **Saddhāvimuttoti** vā saddhāya adhimuttoti attho. **Vuttanayenevāti** “sotāpattiphala”ntiādinā vuttanayena. **Saddahantassāti** “ekamsato ayaṃ paṭipadā kilesakkhayaṃ āvahati sammāsambuddhena bhāsītattā”ti evaṃ saddahantassa. Yasmā panassa aniccānupassanādīhi nīccasaññāpahānavasena bhāvanāya pubbenāparaṃ viśesaṃ passato tattha tattha paccakkhatāpi atthi, tasmā vuttaṃ “**saddahantassa viyā**”ti. Sesapadadvayaṃ tasseva vevacanaṃ. Ettha ca **pubbabhāgamaggabhāvanāti** vacanena āgamanīyapaṭipadānānattena saddhāvimuttadiṭṭhippattānaṃ paññānānattaṃ hotīti dassitaṃ. **Abhidhammaṭṭhakathāyampi** (pu. pa. aṭṭha. 28) “nesaṃ kilesappahāne nānattaṃ natthi, paññāya nānattaṃ atthiyevā”ti vatvā – “āgamanīyanānatteneva saddhāvimutto diṭṭhippattaṃ na pāpuṇāṭīti sanniṭṭhānaṃ kata”nti vuttaṃ.

Paññāsaṅkhātāṃ dhammaṃ adhimattatāya pubbaṅgamaṃ hutvā pavattaṃ anussaratīti **dhammānūsārī**. Tenāha “**dhammo**”tiādi. Saddhaṃ anussarati saddhāpubbaṅgamaṃ maggaṃ bhāvetīti imamatthaṃ “**eseva nayo**”ti atidisati. Paññaṃ vāhetīti **paññāvāhī**, paññaṃ sātisaṃ pavatteti attho. Tenāha “**paññāpubbaṅgamaṃ ariyamaggaṃ bhāvetī**”ti. **Saddhāvāhinti** ettha vuttanayena attho veditabbo. **Ubhatobhāgavimuttādīkathāti** ubhatobhāgavimuttādīsu āgamanato paṭṭhāya vattabbakathā. **Etesanti** yathāvuttānaṃ ubhatobhāgavimuttādīnaṃ. **Idhāti** imasmiṃ kīṭāgirisutte. Nanu ca aṭṭhasamāpattilābhivasena ubhatobhāgavimutto kāyasakkhīdayo ca abhidhamme āgatā, kathamidha arūpajjhānalābhivaseneva uddhaṭāti codanaṃ sandhāyāha “**yasmā**”tiādi.

Phusitvā patvā. **Paññāya cassa disvā āsavā parikkhīṇā** hotīti na āsavā paññāya passiyanti, dassanakāraṇā paññāya parikkhīṇā “disvā paññāya parikkhīṇā”ti vuttā. Dassanāyattaparikkhayatā eva hi dassanaṃ āsavānaṃ khayassa purimakiriyā hotīti. **Tathāgatena paveditāti** bodhimaṇḍe nisīditvā tathāgatena paṭividdhā viditā pacchā paresaṃ pākāṭikatā. “**Catusaccadhammā**”ti vatvā tadantogadhattā silādīnaṃ “**imasmiṃ ṭhāne silaṃ kathita**”ntiādi vuttaṃ. **Atthenāti** avippaṭisārādiṇaṃ avippanaṃ tasmim tasmim pītiādīkena atthena. **Kāraṇenāti** sappurisūpanissayādīnaṃ kāraṇena tasmim tasmim samādhiādīpataṭṭhānatāya silādi **kāraṇe**. **Ciṇṇacaritattāti** saddhāciṇṇabhāvena sambodhāvahabhāve. Tattha tattha **vicarītā** viśesena caritā, tesu tena paññā suṭṭhu carāpitāti attho. **Paṭiṭṭhitā hoti** maggena āgatattā. **Mattāya** parittappamāṇena. **Olokanam khamanti**, paññāya gahetabbataṃ upenti.

Tayoti kāyasakkhidiṭṭhippattasaddhāvimuttā. **Yathāḥhitova pāliattho**, na tattha kiñci niddhāretvā vattabbaṃ atthīti suttantapariyāyena avuttaṃ vadati. **Tassa maggassāti** sotāpattimaggassa yaṃ kātābbaṃ, tassa adhigatattā. **Upari pana tiṇṇaṃ maggānaṃ atthāya sevamānā** anulomasenāsanāṃ, **bhajaṃānā** kalyāṇamitte, **samannāyamaṃānā** indriyāni **anupubbena** bhāvanāmaggaṇṇapāṭiyā **arahattaṃ pāpuṇissanti** maggassa anekacittakkhaṇikatāyāti ayamettha suttapadese pāliyā attho.

Imameva pāliṃ gahetvāti “katamo ca puggalo saddhānusārī”ti maggaṭṭhe puggale vatvā “imassa kho ahaṃ, bhikkhave”tiādinaṃ tesāṃ vasena anulomasenāsanasevanādīnaṃ vuttattā imameva yathāvuttaṃ pālipadesaṃ gahetvā “**lokuttaradhammo bahucittakkhaṇiko**”ti vadati. **So vattabboti** so vitaṇḍavādī evaṃ vattabbo. Yadi maggaṭṭhapuggale vatvā anulomikasenāsanasevanādi pāliyaṃ vuttanti maggasaṃgino eva hutvā te tathā paṭipajjanti, evaṃ sante senāsanapaṭisaṃyuttarūpādivipassanaggahaṇasmiṃ tava matena maggasaṃgino eva āpajjeyyūṃ, na cetāṃ evaṃ hoti, tasmā suttaṃ me laddhanti yaṃ kiñci mā kathehīti vāretabbo. Tenāha “**yadi aññena cittenā**”tiādi. Tattha **evaṃ santeti** nānācitteneva senāsanapaṭisevanādike sati. Tattha pāliyaṃ yadi lokuttaradhammasaṃgino eva pañcaviññāṇasaṃgikālepi lokuttarasamaṅgitaṃ **sace sampaṭicchasi, satthārā saddhiṃ paṭivirujjhasi** suttavirodhādīpanato. Tenāha “**satthārā hī**”tiādi. Dhammavicāraṇā nāma tuyhaṃ avisayo, tasmā **yāguṃ pivāhīti uyyojetabbo**.

183. Ādikenevāti paṭhameneva. **Anupubbāsikkhāti** anupubbeneva pavattasikkhāya. Tenāha “**karaṇatthe paccattavacana**”nti. Saddhā jātā etassāti **saddhājāto**, agyāhitātipakkhepena jāta-saddassa pacchāvacaṇaṃ. Evametanti adhimuccanaṃ **okappaniyasaddhā**. **Santike nisīdati** upaṭṭhānavasena. **Sādhukaṃ katvā dhāretīti** yathāsutāṃ dhammaṃ vācuggata karaṇavasena taṃ paṇaṇaṃ katvā sāravasena dhāreti. **Chando jāyatīti** dhammesu nījjhānakkhamesu ime dhamme bhāvanāpaññāya paccakkhato ussāmīti kattukamyatākusalacchando jāyati. **Ussahatīti** chando uppādamatte aṭṭhatvā tato bhāvanārambhavasena ussahati. **Tulayatīti** sammāsanavasena saṅkhāre. **Tīraṇavipassanāya tulayantoti** tīraṇapariññāya jānitvā upari pahānapariññāya vasena paritulayanto paṭijānanto. **Maggapadhānaṃ padahatīti** maggalakkhaṇaṃ padhānikaṃ maggaṃ padahati. **Pesitacittoti** nibbānaṃ pati pesitacitto. **Nāmakāyenāti** maggaṇṇapāṭiyā taṃtaṃmaggasampayuttanāmakāyena. **Na pana kiñci āhāti** dūrātāya samānaṃ na kiñci vacanaṃ bhagavā āha te dāḥataraṃ niggaṇhituṃ.

184. Paṇena vohārena byākaraṇaṃ **paṇaviyā**, paṇaviyā abhāvena **opaṇaviyā**, **na upetīti** na yujjati. **Tanti idaṃ idha adhippetāṃ paṇo paṇaviyaṃ dassetuṃ**. Tayidaṃ sabbaṃ bhagavā “mayāṃ kho, āvuso, sāyañceva bhuñjāmā”ti assajipunabbasukehi vuttaṃ sikkhāya avattanabhāvadīpanavacanaṃ sandhāya vadati.

Ukkipitvāti sīsena gahetvā viya samādāya. **Anudhammoti** anurūpo sabhāvo, sāvaka bhāvassa anucchavikā paṭipatti. **Rohanīyanti** viruḥhibhāvaṃ. Siniyhati ettha, etena vāti sineho, kāraṇaṃ. Taṃ ettha atthīti **sinehavantaṃ**, pādakanti attho. **Taco ekaṃ aṅganti** taco vīrapakkhabhāve ekamaṅgaṃ. Padhānaṃ anuyūñjantassa hi tace palujjamaṇepi taṃnimittaṃ avosānaṃ anāpajjanakasseva vīriyassa ekaṃ aṅgaṃ ekaṃ kāraṇaṃ. Evāṃ sesesu vattabbaṃ. Tenāha – “**arahattaṃ appatvā na vuṭṭhahissāmīti evaṃ paṭipajjati**”ti. Sesāṃ suviññeyyameva.

Kīṭāgirisuttavaṇṇanāya līnatthappakāsanā samattā.

Niṭṭhitā ca bhikkhuvaggaṇṇanā.

3. Paribbājakavaggo

1. Tevijjavacchasuttavaṇṇanā

185. Tatthāti ekapuṇḍarīkasaññite paribbājakārāme. Anāgatapubbo lokiyasamudāhārasena “**cirassaṃ kho, bhante**”tiādīnā vuccati, ayaṃ panettha āgatapubbataṃ upādāya tathā vutto. Bhagavā hi kesañci vimuttijananatthaṃ, kesañci indriyaparipākattaṃ, kesañci visesādhigamatthaṃ kadāci tiṭṭhiyārāmaṃ upagacchati. **Ananuññāya ṭhatvāti** ananujānitabbe ṭhatvā. **Anujānitabbaṃ siyā** anaññātassa ñeyyassa abhāvato. Yāvatakañhi ñeyyaṃ, tāvatakaṃ bhagavato ñāṇaṃ, yāvatakañca bhagavato ñāṇaṃ tāvatakaṃ ñeyyaṃ. Tenevāha – “na tassa aditṭhamidhatthi kiñci, atho aviññātamajānitabba”ntiādi (mahāni. 156; cūḷani. dhotakamāṇavapucchāniddeśa 32; paṭi. ma. 1.121). **Sabbaññutaññāṇena hi** bhagavā **āvajjetvā pajānāti**. Vuttañhettaṃ “āvajjanapaṭibaddhaṃ buddhassa bhagavato ñāṇa”nti (mi. pa. 4.1.2). Yadi evaṃ “caraṃ samāhito nāgo, tiṭṭhaṃ nāgo samāhito”ti (a. ni. 6.43) idaṃ suttapadaṃ kathanti? Vikkhepābhāvadīpanapadametaṃ, na anāvajjanenapi ñāṇaṃ pavattiparidīpanaṃ. Yaṃ panettha vattabbaṃ, taṃ heṭṭhā vitthārato vuttameva.

186. Yāvadevāti idaṃ yathārucci pavatti viya aparāparuppattipi icchitabbāti tadabhāvaṃ dassento āha – “**sakiṃ khīṇānaṃ āsavānaṃ puna khepetabbābhāvā**”ti. **Paccuppannajanaganuṇanti** idaṃ dibbacakkuhūṇāssa paribhaṇḍaṇāṇaṃ anāgataṃsaññāṇaṃ anādiyitvā vuttaṃ, tassa pana vasena anāgataṃsaññāṇaṃ dassetīti vattabbaṃ siyā.

Ghiparikkhāresūti vatthābharaṇādīdhanadhaññādīghiparikkhāresu. Gihilingaṃ pana appamaṇaṃ, tasmā ghibandhanaṃ chinditvā dukkhassantakarā hontiyeva. Sati pana dukkhassantakiriyaṃ gihilinge te na tiṭṭhantiyevāti dassento “**yepī**”tiādīmāha. **Sukkhāpetvā** samucchinditvā. Arahattaṃ pattadivaseyeva pabbajanaṃ vā parinibbānaṃ vāti ayaṃ nayo na sabbasādhāraṇoti āha “**bhūmadevatā pana tiṭṭhanti**”ti. Tattha kāraṇavacanaṃ “**nilīyanokāsassa atthitāyā**”ti. Araññapabbatādīpavivekaṭṭhānaṃ **nilīyanokāso. Sesakāmbhavi**ti kāmaloke. **Laḷitajanassāti** ābharaṇālanākāranaccagītādivasena vilāsayuttajanassa.

Sopīti “so aññatra ekenā”ti vutto sopi. Karato na kariyati pāpanti evaṃ **na kiriyaṃ paṭibāhati**. Yadi attānaṃyeva gahetvā katheti, atha kasmā mahāsatto tadā ājīvakaṃpabbajjaṃ upagacchīti āha “**tadā kirā**”tiādi. **Tassapīti** na kevalaṃ aññesaṃ eva pāsaṇḍānaṃ, tassapi. **Vīriyaṃ na hāpesīti** tapojigucchavādaṃ samādiyitvā ṭhito virāgatthāya taṃ samādiṇṇavattaṃ na pariccaji, satthusāsaṇaṃ na chaḍḍesi. Tenāha – “**kiriyaṃvādī hutvā sagge nibbattatī**”ti.

Tevijjavacchasuttavaṇṇanāya līnatthappakāsanā samattā.

2. Aggīvacchasuttavaṇṇanā

187. Lokassa sassatāpavattipaṭikkhepavasena pavatto vādo ucchedavādo eva hotīti sassataggāhābhāve ucchedaggāhābhāvato puna paribbājakena “asassato loko”ti vadantena ucchedaggāho pucchito, bhagavatāpi so eva paṭikkhittoti āha “**dutiye nāhaṃ ucchedaditṭhiko**”ti. **Antānantikādivasenāti** ettha **antānantikaggahaṇena** antavā loko anantavā lokoti imaṃ vādadvayamāha. **Ādi-saddena** “taṃ jīvaṃ taṃ sarīra”ntiādivādacattukkaṃ saṅgaṇhāti, itaraṃ pana dvayaṃ sarūpeneva gahitanti. **Paṭikkhepo veditabboti** “tatiye nāhaṃ antavādītṭhiko, cattutthe nāhaṃ anantavādītṭhiko”ti evamādinā paṭikkhepo veditabbo. “Hoti tathāgato paraṃ maraṇā”ti ayampi sassatavādo, so ca kho aparantakappikavasena, “sassato loko”ti pana pubbantakappikavasenāti ayametesam viseso. “Na hoti tathāgato paraṃ maraṇā”ti ayampi ucchedavādo, so ca kho sattavasena, “asassato loko”ti pana sattasañkhārasenāti vadanti.

189. Sappatibhayaṃ uppajjanato saha dukkhenāti **sadukkhāṃ**. Tenāha “**kilesadukkhena**”tiādi. **Tesaṃyevāti** kilesadukkhavipākadukkhānaṃyeva. **Saupaghātakanti** sabādhāṃ. **Saupāyāsanti** saparissamaṃ saupatāpaṃ sapīḷaṃ. **Saparīḷahanti** sadarathaṃ.

Kiñci ditṭhigatanti imā tāva aṭṭha ditṭhiyo mā hontu, atthi pana, bho gotama, yaṃ kiñci ditṭhigataṃ

gahitaṃ. Na hi tāya diṭṭhiyā vinā kañci samayaṃ pavattetuṃ yujjati adhippāyena pucchati. **Apaviddhanti** samucchadappahānavasena chadditaṃ. **Paññāya diṭṭhanti** vipassanāpaññāsahitāya maggapaññāya bhagavatā paṭividdhaṃ. Yattha uppajanti, taṃ sattaṃ mathenti sammaddantīti **mathitāti** āha “**mathitānanti tesamyeva vevacana**”nti. **Kañci dhammanti** rūpadhammaṃ arūpadhammaṃ vā. **Anupādiyivāti** aggahetvā.

190. Na upetiti saṅkhaṃ na gacchatīti atthoti āha “**na yujjati**”ti. **Anujānitabbaṃ siyā** anupādāvimuttassa kañcīpi uppattiyā abhāvato. “Evaṃ vimuttacitto na upapajjati”ti kāmañcetaṃ sabhāvapavedanaṃ parinibbānaṃ, eke pana ucchedavādino “mayampi ‘satto āyatim na upapajjati’ti vadāma, samaṇo gotamopi tathā vadati”ti ucchedabhāveveva paṭiṭṭhahissanti, tasmā bhagavā “na upapajjati kho vaccha na upeti”ti āha. “Upapajjati”ti pana vutte sassatameva gaṇheyyāti yojanā. Sesadvayepi eseva nayo. **Appatiṭṭhoti** ucchedavādādivasena paṭiṭṭhārahito. **Anālamboti** tesamyeva vādānaṃ olambārammaṇassa abhāvena anālambo. **Sukhapavesanaṭṭhānanti** tesaññeva vādānaṃ sukhapavesanokāsaṃ **mā labhatūti**. **Ananuññāya ṭhatvāti** “na upapajjati”tiādinā anujānitabbāya paṭiññāya ṭhānāhetu. **Anuññampīti** anujānitabbampi dutiyapañhaṃ **paṭikkhipi**. Pariyatto pana dhammo atthato paccayākāro evāti āha “**dhammoti paccayākāradhammo**”ti. **Aññattha payogenāti** imahā niyyānikasāsānā aññasmiṃ micchāsamaye pavattappayogena, aniyyānikaṃ vividhaṃ micchāpaṭipattiṃ paṭipajjantenāti attho. “Aññavādiyakenā”tipi pāṭho, paccayākārato aññākāradipakaācariyavādaṃ paggayha tiṭṭhantenāti attho.

191. Appaccayoti anupādāno, nirindhanoti attho.

192. Yena rūpenāti yena bhūtopādādibhedena rūpadhammena. **Taṃ rūpaṃ** tappaṭibaddhasaṃyojanappahānena khīṇāsava-**tathāgatassa pahīnaṃ** anuppattidhammataṃ āpannaṃ. Tena vuttaṃ pāliyaṃ “anuppādadhama”ntiādi. Aññesaṃ jānanāya abhāvaguṇatāya **guṇagambhīro**. “Ettakā guṇā”ti **pamāṇaṃ gaṇhituṃ na sakkuṇeyyo**. “Īdisā etassa guṇā”ti pariyogāhituṃ asakkuṇeyyatāya **duppariyogāḷhoti**. **Dujjānoti** agādhatāya gambhīro “ettakāni udakaḷhakasatāni”tiādinā pametuṃ na sakkāti appameyyo, tato eva dujjāno. **Evamevānti** yathā mahāsamuddo gambhīro appameyyo dujjāno, evameva khīṇāsavopi guṇavasena, tasmā ayaṃ rūpādiṃ gahetvā rūpītiādivohāro bhavēyya, parinibbutassa pana tadabhāvā tathā paññāpetuṃ na sakkā, tato taṃ ārabba upapajjatiādi na yujjēyya. Yathā pana vijjamaṇo eva jātavedo byattena purisena nīyamāno puratthimādidisaṃ gatoti vucceyya, na nibbuto, evaṃ khīṇāsavopīti dassento “**evamevā**”tiādimāha.

Aniccatāti ettha aniccatāgahaṇaṃ asāranidassanaṃ. Tena yathā so sālarukkho sākāpalāsādiāsārāpagamena suddho sāre paṭiṭṭhito, evamayaṃ dhammavinayo sāsavasāṅkhātasārāvigamena lokuttaradhammasāre paṭiṭṭhitoti dasseti. Sesam suviññeyyameva.

Aggivacchasuttavaṇṇanāya līnatthappakāsānā samattā.

3. Mahāvaccasuttavaṇṇanā

193. Saha kathā etassa atthīti **sahakathī**, “mayam pucchāvasena tumhe vissajjanavasena”ti evaṃ sahapavattakathoti attho. **Etasseva kathitāni**, tattha paṭhame vijjāttayaṃ desitaṃ, dutiye agginā dassitanti tevijjavaccasuttaṃ aggivaccasuttanti nāmaṃ visesetvā vuttaṃ. **Sighaṃ laddhiṃ na vissajjenti**, yasmā saṅkhārānaṃ niyatoyaṃ vināso anaññāsamuppādo, hetusamuppannāpi na cirena nijjhānaṃ khamanti, na lahuṃ. Tenāha “**vasātela ...pe... sujjhanti**”ti. **Pacchimagamanam** ñāṇassa paripākaṃ gatattā. Yaṭṭhiṃ ālambitvā udakaṃ tarituṃ otaranto puriso “**yaṭṭhiṃ otaritvā udake patamāno**”ti vutto. **Kammapathavasena vitthāradesananti** saṃkhittadesanaṃ upādāya vuttaṃ. Tenāha “**mūlavasena cetthā**”tiādi. **Vitthārasadisāti** kammapathavasena idha desitadesanāya mūlavasena desitadesanaṃ upādāya vitthārasadisā. **Vitthāradesanā nāma natthīti** na kevalam ayameva, atha kho sabbāpi buddhānaṃ nipariyāyena ujukena niravasesato vitthāradesanā nāma natthi

desanāññāssa mahāvisayatāya karaṇasampattiyā ca tajjāya mahānubhāvattā sabbaññutaññāssa. Sabbaññutaññāsamāngitāya hi avasesapaṭisambhidānubhāvītāya aparimitakālasambhataññāsamānubhāvītāya kadācīpi parikkhayānarahāya anaññāsādhāraṇāya paṭibhānapaṭisambhidāya pahūtajivhāditanurūparūpakāyasampattisampadāya vitthāriyamānā bhagavato desanā katham parimitā paricchinnā bhaveyya, mahākāruṇikatāya pana bhagavā veneyyajjhāsayanurūpaṃ tattha tattha parimitaṃ paricchinnaṃ katvā niṭṭhapeti. Ayañca attho **mahāsīhanādasuttana** (ma. ni. 1.146 ādayo) dīpetabbo. **Sabbaṃ saṃkhittameva** attajjhāsaya vasena akathetvā bodhaneyyapuggalajjhāsaya vasena desanāya niṭṭhāpitattā. Na cettha dhammasāsanavirodho pariyāyaṃ anissāya yathādhammaṃ dhammānaṃ bodhitattā sabbalahuttā cāti.

194. Satta dhammā kāmāvacarā sampattasamādānaviratīnaṃ idhādhippetattā.

Aniyametvāti “sammāsambuddho, sāvako”ti vā niyamaṃ visesena akatvā. **Attānameva...pe... veditabbaṃ**, tathā hi paribbājako “tiṭṭhatu bhavaṃ gotamo”ti āha.

195. Satthāva arahā hoti paṭipattiyā pāripūribhāvato. **Tasmiṃ byākateti** tasmiṃ “ekabhikkhupi sāvako”tiādinā suṭṭhu pañhe kathite.

196. Sampādakoti paṭipattisampādako.

197. Sekhāya vijjāyāti sekhalakkhaṇappattāya maggapaññāya sātisayaṃ katvā karaṇavasena vuttā, phalapaññā pana tāya pattabbattā kammabhāvena vuttā. Tenāha “**heṭṭhimaphalattayaṃ pattabba**”nti. Imaṃ panettha aviparītamattaṃ pālito eva viññāyamānaṃ appaṭivijjhanato vitaṇḍavādī “yāvatakaṃ sekkena pattabbaṃ, anuppattaṃ taṃ mayā”ti vacanalesaṃ gahetvā “arahattamaggopi anena pattoyevā”ti vadati. **Evanti** idāni vuccamānāya gāthāya.

Kilesāni pahāya pañcāti pañcorambhāgiyasaṃyojanasaṅkhāte saṃkilese pahāya pajahitvā, pahānhetu vā. **Paripuṇṇasekhoti** sabbaso vaḍḍhitasekhadhammo. **Aparihānadhammoti** aparihānasabhāvo. Na hi yassa phāṭigatehi sīlādiddhammehi parihāni atthi, samādhimhi paripūrakāritāya **cetovasippatto**. Tenāha “**samāhitindriyo**”ti. Aparihānadhammattāva **ṭhitatto**.

Anāgāminā hi asekkabhāvāvahā dhammā paripūretabbā, na sekhabhāvāvahāti so ekantaparipuṇṇe sekho vutto. **Etaṃ na buddhavacananti** “maggo bahucittakkhaṇiko”ti etaṃ vacanaṃ na buddhavacanaṃ anantarekantavipākādānato, bahukkhattuṃ pavattane payoanābhāvato ca lokuttarakusalassa, “samādhimānantarikaññāmaṃ (khu. pā. 6.5; su. ni. 228), na pāraṃ dīguṇaṃ yanti”ti (su. ni. 719) evamādīni suttapadāni etassatthasādhakāni. Orambhāgiyasaṃyojanappahānena sekkhadhammaparipūribhāvassa vuttatāya **attho** tava vacanena **virujjhatīti**. **Assa** āyasmato vacchassa.

198. Abhiññā vā kāraṇanti yañhi taṃ tatra tatra sakkhibhabbatāsaṅkhātāṃ iddhividhapaccanubhavanādi, tassa abhiññā kāraṇaṃ. Atha iddhividhapaccanubhavanādi abhiññā, evaṃ sati **abhiññāpādakajjhānaṃ kāraṇaṃ**. **Avasāne** chaṭṭhābhiññāya **pana arahattaṃ**. Ettha ca yasmā paṭhamasutte āsavakkhāyo adhippeto, āsavā khīṇā eva, na puna khepetabbā, tasmā tattha “yāvadevā”ti na vuttaṃ. Idha phalasaṃpatti adhippetā, sā ca punappunaṃ samāpajjīyati, tasmā “yāvadevā”ti vuttaṃ. Tato eva hi “**arahattaṃ vā kāraṇa**”nti vuttaṃ. Tañhi “kudāssu nāmāhaṃ tadāyatanaṃ upasampajja viharissāmi, yadariyā etarahi upasampajja viharanti”ti (ma. ni. 1.465; 3.307) anuttare su vimokkhesu pihaṃ upaṭṭhapetvā abhiññā nibbattentassa kāraṇaṃ, tayidaṃ sabbasādhāraṇaṃ na hotīti sādāraṇavasena naṃ dassento “**arahattassa vipassanā vā**”ti āha.

200. Paricaranti nāma vipakatabrahmacariyavāsattā. **Pariciṇṇo hoti** sāvakena nāma satthu dhamme kattabbā paricariyā sammadeva niṭṭhāpitattā. Tenāha “**iti...pe... thero evamāhā**”ti. **Tesaṃ guṇānanti** tesaṃ asekkhaguṇānaṃ. Sesam suviññeyyameva.

Mahāvaccasuttavaṅṅanāya līnatthappakāsanā samattā.

4. Dīghanakhasuttavaṅṅanā

201. Khananam khatam, sūkarassa khatam ettha atthīti sūkarakhatā, sūkarassa vā imasmim buddhuppāde paṭhamam khatam upādāya **sūkarakhatā**, tāya. **Evamṇāmaketi** evam itthilingavasena laddhanāmake. **Pamsudhoteti** dhotapamsuke. **Otaritvā abhiruhitabbanti** pakatibhūmito anekehi sopānaphalakehi otaritvā puna leṇadvāram katipayehi abhiruhitabbam.

Ṭhitakovāti mātulassa ṭhitattā tattha sagāravasapatissavasena ṭhitakova. Kiñcāpi sabba-saddo avisesato anavasesapariyādāyako, vatthuadhippāyānurodhī pana saddappayogoti tamattham sandhāya paribbājako **“sabbam me nakkhamatī”**ti āha. Yā loke manussaupapattiyotiādikā upapattiyo, tā anattasamudāgatā tattha tattheva sattānam ucchijjanato, tasmā samayavādīhi vuccamānā sabbā āyatim uppajjanaupapatti na hoti. Jalabubbūlakā viya hi ime sattā tattha tattha samaye uppajjitvā bhijjanti, tesam tattha paṭisandhi natthīti assa adhippāyo. Tenāha **“paṭisandhiyo”**tiādi. **Assa adhippāyam muñcitvā**ti yenādhippāyena paribbājako **“sabbam me nakkhamatī”**ti āha, tam tassa adhippāyam jānantopi ajānanto viya hutvā tassa **akkhare tāva dosam dassentoti** padesasabbam sandhāya tena vuttam, sabbasabbavisayam katvā tattha dosam gaṇhanto. Yathā loke kenaci **“sabbam vuttam, tam musā”**ti vutte tassa vacanassa sabbantogadhātā musābhāvo āpajjeyya, evam imassapi **“sabbam me nakkhamatī”**ti vadato tathā pavattā diṭṭhipi nakkhamatīti atthato āpannameva hoti. Tenāha bhagavā – **“esāpi te diṭṭhi nakkhamatī”**ti. Yathā pana kenaci **“sabbam vuttam musā”**ti vutte adhippāyānurodhini saddappavatti, tassa vacanam muñcitvā tadaññesameva musābhāvo ñāyāgato, evamidhāpi **“sabbam me nakkhamatī”**ti vacanato yassā diṭṭhiyā vasena **“sabbam me nakkhamatī”**ti tena vuttam, tam diṭṭhim muñcitvā tadaññameva yathādhippetam sabbam nakkhamatīti ayamatto ñāyāgato, bhagavā pana vādīvaro sukhumāya āṇiyā thūlam āṇim nīharanto viya upāyena tassa diṭṭhigatam nīharitum tassa adhippāyena avatvā saddavasena tāva labbhamānam dosam dassento **“yāpi kho te”**tiādimāha. Tena vuttam – **“assa adhippāyam muñcitvā akkhare tāva dosam dassento”**ti.

Paribbājako pana yam sandhāya **“sabbam me nakkhamatī”**ti mayā vuttam, **“ayam so”**ti yathāvuttadosapariharattham tasmim atthe vuccamāne esa doso sabbo na hoti, evampi samaṇo gotamo mama vāde dosameva āropeyyāti attano ajjhāsayam niguhitvā yathāvuttadosam pariharitukāmo **“esā me”**tiādimāha. Tattha **tampassa tādisamevā**ti yam **“sabbam me nakkhamatī”**ti gahitam vatthu, tampi tādisameva bhavēyyāti. Ayañca sabbantogadhadiṭṭhi mayhampi diṭṭhivatthu, tam me khomeyyavāti. Yasmā pana **“esāpi diṭṭhi tuyham nakkhamatī”**ti yāpi diṭṭhi vuttā bhavatā gotamena, sāpi mayham nakkhamati, tasmā sabbam me nakkhamatevāti paribbājakassa adhippāyo. Tenāha – **“tam pariharāmīti saññāya vadatī”**ti. Tathā ca vakkhati **“tasmāpi ucchedadiṭṭhi mayham nakkhamatī”**ti. **“Esā me diṭṭhi”**ti yā ṭhitibhūtā diṭṭhi, tāya **“sabbam me nakkhamatī”**ti panettha sabbagahaṇena gahitattā āha – **“atthato panassa esā diṭṭhi na me khamatīti āpajjati”**ti. Ayam dosoti dassento āha **“yassa panā”**tiādi. **Esāti diṭṭhi. Rucitanti diṭṭhidassanena abhinivisitvā roctvā gahitam. Tena hi diṭṭhiakkhameva arucitena bhavitabbanti** sati diṭṭhiyā akkhamabhāve tato tāya gahitāya khomeyya ruceyya yathā, evam sabbassa akkhamabhāveti aparabhāge **sabbam khamati rucitīti āpajjati. Na panesa tam sampatiçchatīti** esa **“sabbam me nakkhamatī”**ti evam vadanto ucchedavādī tam vuttanayena sabbassa khamanam rucanam na sampatiçchati. Ñāyena vuttamattham katham na sampatiçchati āha **“kevalam tassāpi ucchedadiṭṭhiyā ucchedameva gaṇhātī”**ti. Sabbesañhi dhammānam āyatim uppādam aruccitvā tam sandhāya ayam **“sabbam me nakkhamatī”**ti vadati, ucchedadiṭṭhikesu ca ucchinnesu kuto ucchedadiṭṭhisabhāvoti.

Tenāti tena kāraṇena, yasmā idhekacce sattā īdisam diṭṭhim paggayha tiṭṭhanti, tasmāti vuttam hoti. Pajahanakena vā citta ekajjam gahetvā pajahanakehi appajhanake niddhāretum bhagavā **“ato... pe... bahutarā”**ti avocāti āha – **“pajahanakesu nissakka”**nti yathā **“pañcasīlehi pabhāvanā pañnavantatarā”**ti. **“Bahū”**ti vatvā na kevalam bahū, atha kho ativiya bahūti dassento **“bahutarā”**ti

āha. “**Bahū hī**”ti nayidaṃ nissakkavacanaṃ, atha kho paccattavacanaṃ. Kathaṃ hi-saddoti āha “**hi-kāro nipātamatta**”nti. Anissakkavacanaṃ tāva tassa pajahanakānaṃ bahubhāvato tepi parato “bahutarā”ti vuccīyanti. **Mūladassananti** ye tādisaṃ dassanaṃ paṭhamaṃ upādiyanti, tajjātikameva pacchā gahitadassanaṃ. Vijātiyañhi paṭhamaṃ gahitadassanaṃ appahāya vijātiyassa gahaṇaṃ na sambhavati viruddhassa abhinivesassa saha anavaṭṭhānato. Aviruddhaṃ pana mūladassanaṃ avissajjitvā visayādibhedabhinnaṃ aparadassanaṃ gahetuṃ labbhati. Tenāha “**ettha cā**”tiādi.

Tattha kiñcāpi ekaccasassatavādo sassatucchedābhinivesānaṃ vasena yathākkamaṃ sassatucchedaggāhanañātikko, ucchedaggāhena pana sassatābhinivesassa taṃgāhena ca asassatābhinivesassa virujjhanato ubhayatthapi “**ekaccasassataṃ vā gahetuṃ na sakkā**”ti vuttaṃ, tathā “**sassataṃ vā ucchedaṃ vā na sakkā gahetu**”nti ca. Mūlasassatañhi paṭhamaṃ gahitaṃ. **Āyatanesupi yojetabbanti** paṭhamaṃ cakkhāyatanamaṃ sassatanti gahetvā aparabhāge na kevalaṃ cakkhāyatanameva sassataṃ, sotāyatanampi sassataṃ, ghānāyatanādipi sassatanti gaṇhātītiādinā yojetabbaṃ. **Āyatanesupīti** pi-saddena dhātūnaṃ indriyānampi gāho daṭṭhabbo. **Idaṃ sandhāyāti** “mūle sassata”ntiādinā vuttapaṭhamaggāhassa samānājātiyaṃ aparaggāhaṃ sandhāya.

Dutiyavāre paṭhamavāre vuttasadisamaṃ vuttanayeneva veditabbaṃ. **Tattha ādīnavaṃ disvāti** “yadī rūpaṃ sassataṃ siyā, nayidaṃ ābādhāya saṃvatteyya. Yasmā ca kho idaṃ rūpaṃ asassataṃ, tasmā abhinīhapaṭipīḷanaṭṭhena udayavayavantaṭāya rūpaṃ aniccaṃ saṅkhatamaṃ paṭiccasamuppannaṃ, sassatābhiniveso micchā”tiādinā tattha sassatavāde ādīnavaṃ dosaṃ disvā. **Oḷārikanti** tasmā paṭipīḷanaṭṭhena ayāthāvaggāhatāya rūpaṃ na saṅhaṃ oḷārikameva. Vedanādīnampi aniccādibhāvadassanaṃ rūpavedanāādīnaṃ samānāyogakkhamatā. **Vissajjetīti** pajahati.

Tisso laddhiyoti sassatucchedaekaccasassatadiṭṭhiyo. Yasmā sassatadiṭṭhikā vaṭṭe rajjanassa āsannā. Tathā hi te olīyantīti vuccanti, bhavābhavadiṭṭhīnaṃ vasena imesaṃ sattānaṃ saṃsārato sīsukkipanaṃ natthīti etāva tisso visesato gahetabbā.

Idhalokaṃ paralokañca atthīti jānātīti ettāvataṃ sassatadassanassa appasāvajjatakāraṇamaṃha, **vaṭṭamaṃ assādeti, abhinandati** iminā dandhavirāgatāya. Tenāha “**tasmā**”tiādi. **Idhalokaṃ paralokañca atthīti jānātīti** iminā tāsu tāsu gaṭṭisu sattānaṃ saṃsaraṇaṃ paṭikkhipatīti dasseti, **sukatadukkaṭānaṃ kammānaṃ phalaṃ atthīti jānātīti** iminā kammaphalaṃ. **Kusalaṃ na karotīti** iminā kammaṃ, **akusalaṃ karonto na bhāyatīti** iminā puññāpuññāni sabhāvato jāyantīti dasseti. **Vaṭṭamaṃ assādeti abhinandati** tanninnabhāvato. **Sīghamaṃ laddhiṃ jahitumaṃ na sakkoti** vaṭṭupacchedassa aruccanato. Ucchedavādī hi tasmīṃ bhava ucchedaṃ maññati. Tato paraṃ **idhalokaṃ paralokañca atthīti jānāti** sukatadukkaṭānaṃ phalaṃ atthīti jānāti kammaphalavādībhāvato. Yebhuyyena hi ucchedavādī sabhāvanīyatiyadicchābhinivesesu aññatrābhiniveso hoti. **Sīghamaṃ dassanaṃ pajahati** vaṭṭābhiratīyā bhāvato. **Pāramīyo pūretumaṃ sakkonto paccekabuddho hutvā**, lokavohāramatteneva so sammāsambuddho hutvā parinibbāyatīti yojanā. **Asakkontoti** buddho hotumaṃ asakkonto. **Abhinīhāraṃ katvā** aggasāvakaḍibhāvassa abhinīhāraṃ sampādetvā. **Sāvako hutvāti** aggasāvako mahāsāvako hutvā, tatthāpi tevijjo chaḷabhiñño paṭisambhidāpattaṃ vā sukkhavipassako eva vā buddhasāvako hutvā parinibbāyati. Sabbamidaṃ ucchedavādino kalyāṇamittanissayena sammattaniyāmokkamane khippavirāgatādassanattamaṃ āgataṃ. Tenāha “**tasmā**”tiādi.

202. Kañjiyenevāti āraṇāḷena. Kañjiyasadisena ucchedadassanena. **Pūritoti** paripuññañjāsayo. **Soti** paribbājako. **Appahāyāti** abhinditvā. **Viggahoti kalaho** idameva saccamaṃ, moghamaññanti aññamaññaṃ viruddhaggāhoti katvā. **Vivādanti** viruddhavādaṃ. **Vighātanti** virodhahetukaṃ cittavighātaṃ. **Vihesanti** viggahavivādanimittaṃ kāyikaṃ cetasañca kilamathaṃ. **Ādīnavaṃ disvāti** etāsaṃ diṭṭhīnaṃ evarūpo ādīnavaṃ, anīyānikabhāvataṭāya pana sampati āyatiñca mahādīnavoti evamaṃ ādīnavaṃ disvā.

205. “Esohamasmi, eso me attā”tiādinā (ma. ni. 1.241; saṃ. ni. 3.8) kāyamaṃ anvetīti kāyanvayo,

soyeva, tassa vā samūho **kāyanvayatā**, kāyapaṭibaddho kilesa. Tenāha “**kāyaṃ...pe... attho**”ti.

Asammissabhāvanti asaṅkarato vavatthitabhāvaṃ. Tena tāsam yathāsakaṃ paccayānaṃ uppajjitvā vigamaṃ dasseti. Evañhi tāsam kadācipi saṅkaro natthi. Tenāha “**tatrāyaṃ saṅkhepattho**”tiādi. Sarūpaṃ aggahetvā “**aññā vedanā**”ti aniyamena vuttattā tameva vigamaṃ dassento “**anuppannāva honti antarahitā vā**”ti āha. Sarūpato niyametvā vuccamāne kāci anuppannā vā hoti, kāci antarahitā vāti. **Cuṇṇavicuṇṇabhāvadassanattanti** khaṇe khaṇe bhijjamānabhāvadassanattam.

Na **kenaci saṃvadatīti** kenaci puggalena saddhiṃ diṭṭhirāgavasena saṃkiliṭṭhacitto na vadati. Tenāha “**sassataṃ gahetvā**”tiādi. Na **vivadatīti** viruddhabhāvo hutvā na vivadati. **Parivattetvāti** ucchedaṃ gahetvā ekaccasassataṃ gahetvā evaṃ vuttanayena tayopi vādā parivattetvā yojetabbā. **Tena voharatīti** tena lokavohārena lokasamaññaṃ anatiḍhāvanto satto puriso puggalotiādinā voharati, na pana ito bāhirakā viya abhinivisati. Tenāha “**aparāmasanto**”ti. **Kaṅci dhammanti** rūpādīsu ekaṃ dhammampi. **Parāmāsaggāhena aggaṇhantoti** “**nicca**”ntiādinā, “**etaṃ mamā**”tiādinā ca dhammasabhāvaṃ atikkamitvā parato āmasitvā gahaṇena aggaṇhanto.

Katāvīti katakicco. **So vadeyyāti** khīṇāsavo bhikkhu ahānkāramamaṅkāresu sabbaso samucchinesupi ahaṃ vadāmīti vadeyya. Tattha **ahanti** niyakajjhattasatāne. **Mamanti** tassa santakabhūte vatthusmiṃ lokanirulhe. **Samaññanti** tattha sukusalatāya loke samaññā kusalo veditvā. **Vohāramattenāti** kevalaṃ paccekabuddho hutvā mahābodhipāramiyo pūreṭuṃ asakkonto sāvako hutvā desavohāramattena na appahīnataṇho viya andhaputhujjano abhinivesanavasena.

206. Sassatādīsūti sassatābhinivesādīsu. **Tesaṃ tesaṃ dhammānanti** niddhāraṇe sāmivacanaṃ. **Sassataṃ abhiññāyāti** sassatadiṭṭhiṃ samudayato atthaṅgamaṭo assādato nissaraṇato abhivisiṭṭhāya paññāya paṭivijjhivā. **Pahānanti** accantappahānaṃ samucchedaṃ. **Rūpassa pahānanti** rūpassa tappaṭibaddhasaññojanappahānena pahānaṃ. **Anuppādanirodhena niruddhehi āsavehi agghetvāva cittaṃ vimucci.** “**Āsavehi cittaṃ vimucci**”ti ettha kiṅcipi agghetvā asetvā. **Soḷasa paññāti** mahāpaññādikā soḷasa paññā. **Caturaṅgasamannāgatoti** puṇṇauposathadivasatā, kenaci anāmantitameva anekasatānaṃyeva anekasahassānaṃ vā bhikkhūnaṃ sannipatitā, sabbesaṃ ehibhikkhubhāvena upasampannatā, chaḷabhiññatā cāti. Tenāha “**tatrimāni aṅgāni**”tiādi. Yaṃ panettha atthato avibhattaṃ, taṃ suviññeyyameva.

Dīghanakhasuttavaṇṇanāya līnatthappakāsanā samattā.

5. Māgaṇḍiyasuttavaṇṇanā

207. Dve māgaṇḍiyāti dve māgaṇḍiyanāmakā. **Devagabbhasadisanti** devānaṃ vasanaovarakasadisam. **Etaṃ vuttanti** “**bhāradvā jagottassa brāhmaṇassa agyāgāre tiṇasanthārake**”ti etaṃ vuttaṃ. Na **kevalaṃ taṃ divasamevāti** yaṃ divasaṃ māgaṇḍiyo paribbājako tiṇasanthārakaṃ paññattaṃ, na kevalaṃ taṃ divasameva bhagavā yenaññataro vanasaṇḍo, tenupasaṅkamīti yojanā. **Gāmūpacāreti** gāmasamīpe. **Saññānaṃ katvāti** saññānaṃ katvā viya. Na hi bhagavato tassa saññānakaṇḍe payojanaṃ atthi.

Samaṇaseyyānurūpanti samaṇassa anucchavikā seyyā. Pāsamsattho hi ayaṃ rūpa-saddo. Tenāha “**imaṃ tiṇasanthāraka**”ntiādi. **Anākiṅṇoti** viluḷito aghaṭṭito. Hatthapādasīsehi tattha tattha pahaṭena na calito **abhinno**, acalitattā eva abhinnaṃ attharaṇaṃ. **Paricchinditvā paññatto viyāti** ayaṃ chekena cittakārena cintetvā tulikāya paricchinnalekhāya paricchinditvā likhitā cittakataseyyā viya. Bhūnaṃ vuccati vaḍḍhitam, taṃ hantīti **bhūnahuno**. Tenāha “**hatavaḍḍhino**”ti. Taṃ panāyaṃ cakkhādīsū saṃvaravidhānaṃ vaḍḍhihananaṃ maññati. Tenāha “**mariyādakārakassā**”ti. **Brūhetabbanti** uḷāravisaṃyūpahārena vaḍḍhetabbam pīṇetabbam. Taṃ pana ananubhūtānubhavanena hotīti āha “**adiṭṭham dakkhitabba**”nti. Anubhūtaṃ pana apaṇītaṃ hotīti vuttaṃ “**diṭṭham**

samatikkamitabba’nti. Sesavāresupi eseva nayo. Paramadiṭṭhadhammanibbānavādī kiresa paribbājako, tasmā **evaṃ chasu dvāresu vadḍhiṃ paññapeti**. Yasmā yaṃ channampi cakkhādīnaṃ yathāsakaṃ visayaggahaṇaṃ paṭikkhipanto lokassa avadḍhitāṃ vināsameva paññapeti, **tasmā so** sayampi **vadḍhihato** hatavadḍhito.

Samkilesato ārakattā **ariyo** niyyānikadhammabhāvato **ñāyo dhammo**. Vajjalesassapi abhāvato **kusalo**. Tenāha “**parisuddhe kāraṇadhamme anavajje**”ti. **Uggatassāti** uccakulīnatādīnā uḷārassa. **Mukhe ārakkhaṃ ṭhapetvāti** mukhena saṃyato hutvā. **Ambajambūādīni gahetvā viya apūrayamānoti** ambajambūādīni aññamaññavisadisāni viya pūraṇakathānāyena yaṃ kiñci akathetvā. Tenāha “**mayā kathitaniyāmenā**”ti.

208. Phalasangāpattiyā vuṭṭhitoti divāvihārato vuṭṭhitoti attho. Divāvihāropi hi “paṭisallāna”nti vuccati “rahogataṃ paṭisallānaṃ evaṃ cetaso parivattakko udapādī”tiādīsu (pārā. 18). Bhagavā hi phalasangāpattito vuṭṭhānuttarakālaṃ tesāṃ kathāsallāpaṃ sutvā divāvihārato vuṭṭhāya tattha gato. Saṃvego nāma saḥottappaññaṃ, taṃ nibbindanavasenaṃ hoti, saṃveganissitaṃ sandhāyāha “**pīṭisaṃvegena saṃviggo**”ti. So pana yasmā purimāvattāya calanaṃ hoti cittassa, tasmā āha “**calito kampito**”ti. **Tikhiṇasotena purisenāti** bhagavantaṃ sandhāyāha.

209. Dhammadesanaṃ ārabhi yathā vineyyadamanakusalo **vasanaṭṭhānaṭṭhenāti** idaṃ āramitabbabhāvassa bhāvalakkhaṇavacanāṃ. Āramati etthāti ārāmo, rūpaṃ ārāmo etassāti **rūpārāmaṃ**, tato eva tanninnabhāvena **rūpe ratanti rūparataṃ**, tena sammo duppattiyā rūpeṇa sammuditanti **rūpasammuditaṃ**, tadetaṃ tadabhihatajavanakiccaṃ tattha āropetvā vuttaṃ. **Dantanti**ādīsipi eseva nayo. **Dantaṃ** damitaṃ. **Nibbisevananti** vigatavisukāyikaṃ. **Guttanti** satiyā guttaṃ. **Rakkhitanti** tasseva vevacanaṃ. **Samvutanti** apanītaṃ pavesanivāraṇena. Tenāha “**pihita**”nti.

210. Uppajjanaparilāhanti uppajjanakilesaparilāhaṃ. **Kiṃ vacanaṃ vattabbaṃ assāti** rūpārammaṇaṃ anubhavitvā samudayādīpahānaṃ pariggaṇhitvā parinibbinditvā virajjitvā yo vimutto, tattha kiṃ vuddhihatapariyāyo avassaṃ labhati na labhatīti pucchati. Paribbājako tādisse sārabbaddhvimuttike vuddhihatoti na vadeyyāti āha “**na kiñci, bho, gotamā**”ti.

211. Teti tayā, ayameva vā pāṭho. **Vassaṃ vāso vassaṃ** uttarapadalopena, vassitaṃ arahatīti **vassiko**, vassakāle nivāsānucchavikoti attho.

Nātiucco hoti nātinīcoti gimhiko viya ucco, hemantiko viya nīco na hoti, atha kho tadubhayavemajjalakkhaṇatāya nātiucco hoti nātinīco. **Nātitanūnīti** hemantikassa viya na khuddakāni. **Nātibahūnīti** gimhikassa viya na atibahūni. **Missakānevāti** hemantikagimhikesu vuttalakkhaṇavomissakāni. **Uṇhapavesanattāyāti** niyūhesu purebhattaṃ pacchābhattaṃca patitasūriyobhāsavasena uṇhassa abhantarapavesanattāyā. **Bhittiniyūhāni nīharīyantīti** dakkhiṇapasse bhittīsū niyūhāni nīharitvā karīyanti. **Vipulajālānīti** puthulachiddāni. **Udakayantānīti** udakavāhakayantāni.

Nīluppalagacchake katvāti vikasitehi nīluppalehi gacchake naḷinike katvā. **Gandhakalalanti** gandhamissakakaddamaṃ. **Yamakabhittīti** yugaḷabhitti, tassā antare nāḷi, yato udakaṃ abhiruhati. **Lohanāḷinti** lohamayayantanāḷiṃ. **Jālanti** tambalohamaṃ jālaṃ. **Heṭṭhā yantaṃ parivattenti** heṭṭhābhāge udakayantaṃ gamenti. **Udakaphusite temente vivaṇṇatā māhosīti nīlappaṭaṃ nivāseti**. **Divākāleti** divasavelāya. **Ajjhattaṃ vūpasantacitto viharāmīti** etena attano phalasangāpattivihāro bhagavatā dassitoti āha – “**tāya ratiyā ramamānoti idaṃ catutthajjhānikaphalasangāpattiratitaṃ sandhāya vutta**”nti.

212. Mahā ca nesaṃ papañcoti nesaṃ rājūnaṃ mahāpapañco rājiddhivasena sabbadā sampattivisaṃyo ca, anubhavitūṃ na labhantīti adhippāyo. **Mante gavesantā vicaranti**, na bhogasukhaṃ.

Gaṇanā nāma acchinnagaṇanā, na vigaṇagaṇanā na paṇagaṇanā. **Āvaṭṭoti** yathādhigate dibbe kāme pahāya kāmahetu āvaṭṭo nivatto parivattito **bhaveyya**. **Evaṃ mānusakā kāmāti** yathā koci kusaggena udakaṃ gahetvā mahāsamudde udakaṃ mineyya. Tattha mahāsamudde udakameva mahantaṃ vipulaṃ paṇītaṅca, evaṃ dibbānaṃ kāmānaṃ samīpe upanidhāya mānusakā kāmā appamattakā oramattakā nihīnā, dibbāva kāmā mahantā vipulā uḷārā paṇītā. **Samadhigayhāti** sammā adhigamanavasena niggayha dibbampi sukhaṃ hīnaṃ katvā **tiṭṭhati**.

213. Ārogyahetukaṃ sukhaṃ assa atthīti **sukhī**, taṃ panassa rogavīgamatovāti āha “**paṭhamaṃ dukkhito pacchā sukhito**”ti. Serī nāma attādhīnavuttīti āha “**serī ekako bhaveyyā**”ti. Attano vaso sayamaṃvaso, so etassa atthīti **sayamaṃvasī**. **Āngārakapallaṃ viya** kāmavattupariḷāhahetuto. **Tacchetvāti** ghaṭṭetvā, kaṇḍūyitvāti attho.

214. Yena kāyo madhurakajāto hoti, taṃ kira kuṭṭhaṃ chaviṃ vināseti, cammaṃ chiddajātaṃ viya hoti. Tenevāha “**upahatakāyappasādo**”ti. **Paccalattāti** paṭilabhi. Avijjābhūtatāya virodhipaccayasamāyogena **paññindriyassa upahattā**. Āyatīṃ dukkhaphalatāya etarahi ca kilesadukkhahulatāya kāmānaṃ **dukkhasamphassatā**, tadubhayasaṃyuttesu tesu ca taṃ asallakkhitvā ekantasukhābhīniveso viparītasāññāya, na kevalāya sukhavedanāya sukhāti pavattasāññī.

215. **Tānīti** kuṭṭhasarīre vaṇamukhāni. **Asucīnīti** asubhāni. **Duggandhānīti** vissagandhāni. **Pūtīnīti** kuṇapabhūtāni. **Idānīti** etarahi. Nakhehi vippatacchanaaggiparīṭāpanehi atinippīḷānakāle **pāṇakā...pe... paggharanti**, tena vedanā tanukā hoti. **Evanti** vuttanayena vedanāya tanukabhāvato.

Ārogyabhāve dhanalābhādīlābhuppattito, asati ca ārogye lābhassa niratthakabhāvato, diṭṭhadhammikādisabbasampattīnaṃ lābhassa nimittabhāvato ca **ārogyaparamā lābhā**. Nibbāne sukhuppattito, asati ca nibbānādhigame tādisassa sukhassa anupalabbhanato, sabbasaṅkhatavivittattā ca sabbaso ca saṃsāradukkhābhāvato, adhigate ca tasmīṃ sakalavaṭṭadukkhābhāvato ca **nibbānaṃ paramaṃ sukhaṃ**. **Pubbabhāgamaggānanti** kāyānupassanādibhedabhinnānaṃ ariyamaggassa pubbhāgiyānaṃ maggānaṃ. Tesaṅca amatagāmitā nāma tanninnatāvaseneva sacchikiriyāvasenāti āha “**pubbhāgagamaneneva amatagāmina**”nti. **Aṭṭhaṅgiko** ariyamaggo **khemo** sabbaparissayasamugghātanena anupaddutattā, taṃsamaṅgīnaṃ sabbaso anupaddutattā taṃsamaṅgīnaṃ sabbaso anupaddavahetuto ca. **Laddhivasena gahitāti** sassatavādādīhi kevalaṃ tesam laddhivasena tathā gahitā. **Khemaamatagāminanti** iminā hi “**khemaṃamatagāmina**”nti vibhattalopena niddeso, attho pana vibhattalopena daṭṭhabboti dasseti.

216. **Anomajjātīti** anu anu omajjati. Aparāparaṃ hatthaṃ **heṭṭhā otārento majjati**.

217. **Chekanti** ghanabhāvena vītaṃ. Ghanamaṭṭhabhāvena sundaraṃ hotīti āha “**sampanna**”nti. Sādhūhi paramappicchasantuṭṭhehi lāto gahitoti **sāhūli**. **Saṅkāracoḷakaṃ** niccakāḷakaṃ.

218. Tattha tattha rujanaṭṭhena vibādhanatṭhena **rogova bhūto**. Vipassanāññānenapi sikhāppattena ārogyaṃ ekadesena passati, nibbānaṅca vaṭṭapaṭipakkhatoti āha “**vipassanāññāṇāṇevā**”ti.

219. **Antarāti** paṭhamuppatti jarāmarāṇānaṃ vemajjhe. **Upahatoti** pittasemhādīdosehi dūsitabhāvena kathito. Pittādīdose pana bhesajjasevanāya nivattento upahataṃ paṭipākatikaṃ karonto **cakkhūni uppādeti nāma**. **Vinaṭṭhānīti** anuppattidhammataṃ āpannāni.

220. **Pubbe vutte** sāhūliyācīre. **Vaṭṭe anugatacittenti** anamatagge saṃsāravatṭe anādīnavadassitāya anugāmicittena.

221. **Dhammassāti** nibbānassa. **Anudhammanti** anurūpaṃ niyyānadhammaṃ. Tenāha

“**anucchavikaṃ paṭipada**”nti. **Pañcakkhandheti** pañcupādānakkhandhe dasseti. “Dīgharattaṃ vata, bho”tiādinaṃ pāḷiyaṃ vivaṭṭaṃ dassitaṃ. Tenāha “**upādānanirodhāti vivaṭṭaṃ dassento**”ti. Sesam suviññeyyameva.

Māgaṇḍiyasuttavaṇṇanāya līnatthappakāsanā samattā.

6. Sandakasuttavaṇṇanā

223. Devena vassena kato sobbho devakatasobbho. Tenāha “**vasso...pe... rahado**”ti. **Guhāti** paṃsuguhā pāsāṇaguhā missakaguhāti tisso guhā. Tattha **paṃsuguhā** udakamuttaṭṭhāne ahoṣi ninnatṭhānaṃ pana udakena ajjhotthataṃ. **Umaṅgaṃ katvāti** heṭṭhā suduggaṃ katvā. **Anamataggiyaṃ paccavekkhitvāti** “na kho so sattāvāso sulabharūpo, yo iminā dīghena addhunā anāvuṭṭhapubbo”tiādinaṃ (ma. ni. 1.160) idaṅca taḷākaṃ mayā vutthapubbaṃ bhavissati, tampi ṭhānaṃ so ca attabhāvo apaññattikabhāvaṃ gatoti evaṃ anamataggiyaṃ paccavekkhitvā tādisaṃ ṭhānaṃ gantuṃ vaṭṭati. Iminā nayena samuddapabbatadassanādīsupi paccavekkhaṇāvidhi veditabbo.

Uccaṃ nadamānāyāti uccaṃ katvā saddaṃ karontiyā **kāmassādabhavassādādivatthunti** “ayaṅca ayaṅca kāmo iṭṭho kanto manāpo, asuko bhavo iṭṭho kanto manāpo, evamayaṃ loko piyehi piyataro”ti evaṃ kāmassādabhavassādālokassādādisaṅkhātaṃ vatthum. Duggatito saṃsārato ca niyyāti etenāti niyyānaṃ, saggamaggo mokkhamaggo ca, taṃ niyyānaṃ arahati, niyyāne vā niyuttāti niyyānikā, niyyānaṃ vā phalaṃ etissā atthāti niyyānikā, vacīduccarītādisaṅkilesato niyyātīti vā niyyānīyā, i-kārassa rassattaṃ ya-kārassa ca ka-kāraṃ katvā niyyānikā, cetanāya saddhiṃ samphappalāpā veramaṇi. Tappaṭipakkhato aniyyānikā, tassā bhāvo aniyyānikattaṃ, tasmā **aniyyānikattā**. **Tiracchānabhūtāti** tirokaraṇabhūtā. **Gehassitakathāti** kāmapaṭisaṃyuttakathā. **Kammaṭṭhānabhāveti** aniccatāpaṭisaṃyuttacatusaccakammaṭṭhānabhāve. Saha atthenāti **sāthakaṃ**, hitapaṭisaṃyuttanti attho. **Visikhāti** gharasanniveso, visikhāgahaṇena ca tannivāsino gahitā “gāmo āgato”tiādīsū (sārattha. ṭi. 1.ācariyaparamparakathāvaṇṇanā) viya. Tenevāha “**sūrā samatthā**”ti “**saddhā pasannā**”ti ca. Kumbhaṭṭhānappadesena kumbhadāsīyo vuttāti āha “**kumbhadāsīkathā vā**”ti.

228. Vohāro viya tesam tathā vohāramattaṃ gahetvā vuttaṃ “**brahmacariyavāse**”ti. **Akatāti** samena, visamena vā kenaci hetunā na katā na vihitā. Katavidho karaṇavidhi natthi etesanti **akaṭavidhā**. Padadvayenapi loke kenaci hetupaccayena nesam anibbattataṃ dasseti. **Iddhiyāpi na nimmitāti** kassaci iddhimato cetovasippattassa devassa, issarādino vā iddhiyāpi na nimmitā. **Animmātāti** kassaci animmāpitā. **Rūpādījanakabhāvanti** rūpasaddādīnaṃ paccayabhāvaṃ, rūpādayopi pathaviyādīhi appaṭibaddhavuttikāti tassa adhippāyo. Yathā pabbatakūṭaṃ kenaci anibbattitaṃ kassaci ca anibbattanaṃ, evametepīti āha “**pabbatakūṭā viya ṭhitāti kūṭaṭṭhā**”ti. Yamidaṃ bījato aṅkurādi jāyatīti vuccati, taṃ vijjamaṇameva tato nikkhamati nāvijjamaṇaṃ, aññathā aññatopi aññassa upaladdhi siyāti adhippāyo. **Evaṃ ṭhitāti** evaṃ nibbikārā ṭhitā. **Ubhayenapīti** atthadvayenapīti vadanti. “Kūṭaṭṭhā esikaṭṭhāyīṭṭhitā”ti padadvayenapi. **Tesam** sattannaṃ kāyānaṃ. **Ṭhitattāti** nibbikārābhāvena ṭhitattā. **Na calantīti** vikāraṃ nāpajjanti. Vikārābhāvato hi tesam sattannaṃ kāyānaṃ esikaṭṭhāyīṭṭhitatā. Aniñjanaṅca atthato pakatiyā avaṭṭhānamevāti dassetuṃ “**na vipariṇāmentī**”ti vuttaṃ. Tathā avipariṇāmadhammattā eva te **aññamaññaṃ na byābādhenti**. Sati hi vikāraṃ āpādetabbatāya byābādhakatāpi siyā, tathā anuggahetabbatāya anuggāhakatāti tadabhāvaṃ dassetuṃ pāḷiyaṃ “nāla”ntiādi vuttaṃ.

Pathavī eva kāyekadesattā **pathavīkāyo**. **Hantuṃ vā ghātetuṃ vā samattho nāma natthi** jīvasattamānaṃ kāyānaṃ niccatāya nibbikārābhāvato, eteneva nesamahantabbatā aghātetabbatā atthato vuttāyevāti daṭṭhabbā. Tathā hi vuttaṃ “**sattannaṃtveva kāyāna**”ntiādi. **Sotuṃ vā sāvetuṃ vā samattho nāma natthīti** paccekaṃ nesam savanesu asamatthattā tadekadesādīsupi asamatthataṃ dīpeti. Yadi koci hantā natthi, kathaṃ satthappahāroti āha “**yathā muggarāsīādīsū**”tiādi. **Kevalaṃ saññāmatameva hoti**, hananaghātānādi pana paramatthato nattheva kāyānaṃ avikopaṇiyabhāvato

adhippāyo. **Kevalam takkamattena niratthakam diṭṭhim dīpetī**ti etena yasmā takkikā nirānkusatāya parikkappanassa yaṃ kiñci attanā parikkappitaṃ sārato maññamānā tatheva abhinivissa takkaditṭhiggāhaṃ gaṇhanti, tasmā na tesam diṭṭhivatthusmiṃ viññūhi vicāraṇā kattabbāti dasseti. **Kecīti** sārassamāsācariyā. **Pañcindriyavasenā**ti pañcarūpindriyavasena. **Kammanti laddhi** kammabhāvena supākaṭattā. Avañkakathātāraṇādikā **dvāsaṭṭhi paṭipadā**. **Ekasmiṃ kappeti** ekasmiṃ mahākappe.

Purisabhūmiyoti padhānapuggalena niddeso, itthīnampetā bhūmiyo icchanteva. **Bhikkhu ca pannakoti**ādi tesam pāḷiyeva. Tattha **pannakoti** bhikkhāya vicāraṇakoti vadanti, tesam vā paṭipattim paṭipannako. **Jinoti** jinno, jarāvasena nihīnadhātukoti vadanti, attano vā paṭipattiyā paṭipakkham jinitvā ṭhito. So kira tathābhūto kassacipi dhammaṃ na katheti, tenāha “**na kiñci āhā**”ti. **Alābhinti** “so na kumbhimukhā paṭiggaṇhatī”tiādina (dī. ni. 1.394) nayena vuttaalābhahetusamayogena alābhim. Tato eva jigghacchādubbalaparetatāya sayanaparāyaṇam **samaṇam pannabhūmīti vadati**.

Ājīvavuttisatānīti sattānam ājīvabhūtāni jīvikāvuttisatāni. Pasuggahaṇena eḷakajāti gahitā, migaggahaṇena rurugavayādisabbamigajāti. **Bahū devāti** cātumahārājikādibrahmakāyikādivasena nesam antarabhedavasena bahū devā. Tattha cātumahārājikanam ekacco antarabhedo “**mahāsamayasuttana**” (dī. ni. 2.331 ādayo) dīpetabbo. **Mānusāpi anantāti** dīpadesakulavamsājīvādivihāgavasena mānusāpi anantabhedā. Pisācā eva pesācā, te aparapetādayo **mahantā** veditabbā.

Chaddantadahamandākinīyo **kuḷīramucalindanā**mena vadati. **Gaṇṭhikāti** pabbagaṇṭhikā. **Paṇḍitopi...pe... uddham na gacchati**, kasmā? Sattānam saṃsaraṇakālassa niyatabhāvato.

Aparipakkaṃ saṃsaraṇanimittaṃ sīlādina **paripāceti nāma** sīghaṃyeva visuddhipattiyā. **Paripakkaṃ phussa phussa** patvā patvā paripakkabhāvāpādanena **byantiṃ karoti nāma**. **Suttaguḷeti** suttavaṭṭiyam. **Nibbēṭhiyamānameva paletīti** upamāya sattānam saṃsāro anukkamena khīyateva, na tassa vaddhīti dasseti paricchinnarūpattā.

229. Niyativāde pakkhipantoti sabbaññutaṃ paṭijānitvāpi padesaññutāya asampāyamāno tattha attano aññānakiriyaṃ pariharitum asakkonto ca “evamesā niyatī”ti niyativāde pakkhipanto.

230. Dhammakathāya apassayabhūto anussavo etassa atthīti **anussavī**, tenevassa apassayavādaṃ dassetuṃ “**anussavanissito**”ti āha. **Savanam saccatoti** yaṃ kiñci anussavam, taṃ savanam saccanti gahetvā ṭhito. **Piṭakasampadāyāti** ganthasampādanena, tādisam gantham paguṇam vācuggatam katvā taṃ nissāya dhammaṃ katheti. Tenāha “**vaggapaṇṇāsakāyā**”tiādi.

232. Mandapaññoti parittapañño. **Momūhoti** sammuyhako. “Evantipi me no”tiādina vividho nānappakāro khepo vācāya paravādānam khīpanam vācāvikkhepo, taṃ **vācāvikkhepaṃ**, na marati na pacchijjati yathāvutto vādavikkhepo etāyāti amarā, tattha pavattā diṭṭhi amarāvikkhepo, taṃ **amarāvikkhepaṃ**. **Apariyantavikkhepanti** “evantipi me no”tiādina pucchitassa apariyosāpanavasena vikkhepaṃ. **Ito cito ca sandhāvati** ekasmiṃ sabhāve anavaṭṭhānato. **Gāham na upagacchatīti** micchāgāhatāya uttaravidhānāya purimapakkaṃ ṭhapetvā gāham na upagacchati. Amarāsadisāya amarāya vikkhepoti **amarāvikkhepo**.

Idam kusalanti ettha **iti**-saddo pakārattho, iminā pakārenāti attho. Amarāvikkhepiko yathā kusale, evam aññasmim yaṃ kiñci kenaci pucchitam attham attano aruccanatāya “evantipi me no”tiādina tattha tattha vikkhepaññeva āpajjati, tasmā “evantipi me no”tiādi tattha tattha pucchitākārapaṭisedhanavasena vikkhipanākāradassanam. Nanu cettha vikkhepavādino vikkhepapakkhassa ananujānanam vikkhepapakkhe avatṭhānam yuttanti? Na, tatthāpi tassa sammūḷhassa paṭikkhepavaseneva vikkhepavādassa pavattanato. Tena vuttam “**no**”ti. Tathā hi sañcayo belatṭhaputto rañña ajātasattunā sandiṭṭhikam sāmaññaphalam puṭṭho paralokattikādinaṃ paṭisedhanamukhena vikkhepaṃ byākāsi.

Etthāha – “nanu cāyaṃ sabbopi amarāvikkhepiko kusalādayo dhamme paralokattikādīni ca yathābhūtaṃ anavabujjhamāno tattha tattha pañhaṃ puṭṭho samāno pucchāya vikkhepamattaṃ āpajjati, tassa kathaṃ diṭṭhigatabhāvo. Na hi avattukāmassa viya pucchitamattaṃ ajānantassa vikkhepakaraṇamattena tassa diṭṭhigatikatā yuttā”ti? Vuccate – na heva kho pucchāya vikkhepakaraṇamattena tassa diṭṭhigatikatā, atha kho micchābhini vesavasena. Sassatābhini vesena micchābhini viṭṭhoyeva hi puggalo mandabuddhitāya kusalādidhamme paralokattikādīni ca yāthāvato appaṭipajjamāno attanā aviññātassa atthassa paraṃ viññāpetuṃ asakkuṇeyyatāya musāvādabhayena ca vikkhepaṃ āpajjati. Atha vā puññapāpānaṃ tabbipākānañca anavabodhena asaddahanena ca tabbisayāya pucchāya vikkhepakaraṇaṃyeva sundaranti khantiṃ ruciṃ uppādetvā abhinivisantassa uppannā visuṃyeva sā ekā diṭṭhi sattabhaṅgadiṭṭhi viyāti daṭṭhabbā, indriyabaddhato ca tatiyaṭṭhānabhāve dassito.

234. Sannidhikāraṇaṃ kāmeti ettha anindriyabaddhāni adhippetānīti tilataṇḍulādiggahaṇaṃ, tassa lokassa appasādaparihāraṭṭhaṃ kadāci taṇḍulanāliādisaṅgahaṇakaraṇaṃ sandhāya vuttaṃ “**tilataṇḍulādayo paññāyanti**”ti.

236. Ājīvakaṃ matā nāmāti ime ājīvakaṃ sabbaso sammāpaṭipattirahitā micchā eva ca paṭipajjamānā adhisīlasaṅkhātassa sīlajīvitassa abhāvena matā nāma. **Puttamātāti** mataputtā. **Samaṇe gotame brahmacariyavāso atthīti** samaṇaṃ eva gotamaṃ parisuddho superipuṇṇo takkarassa sammā dukkhakkhayāvaho brahmacariyavāso atthi. Etenettha dhammasudhammatādidīpanena buddhasubuddhatañca dīpeti, **aññattha natthīti** iminā bāhirakesu tassa abhāvaṃ. Sesam suviññeyyameva.

Sandakasuttavaṇṇanāya līnatthappakāsanā samattā.

7. Mahāsakuludāyisuttavaṇṇanā

237. Abhiññātāti ediso ediso cāti abhilakkhaṇavasena ñātā. Appasaddassa vinīto, appasaddatāya mandabhānitāya vinītoti ca **appasaddavinītoti** vuccamāne aññena vinītabhāvo dīpito hoti, bhagavā pana sayambhuññaṇena sayameva vinīto. Tasmā pāliyaṃ “appasaddavinīto”ti na vuttaṃ. Tenāha “**na hi bhagavā aññena vinīto**”ti.

238. Hiyyodivasam upādāya tato āsannāni katipayāni divasāni **purimāni nāma honti, purimānīti** ca pubbakāni, atītānīti attho. **Tato paranti** yathā vuttaatīta divasato anantaraṃ paraṃ purimataraṃ atisayena purimattā. Iti imesu dvīsu pavattīto yathākkamaṃ purimapurimatarabhāvo, evaṃ santepi yadettha “purimatara”nti vuttaṃ, tato pabhuti yaṃ yaṃ oraṃ, taṃ taṃ paraṃ, yaṃ yaṃ paraṃ, taṃ taṃ “purimatara”nti vuttaṃ hoti. Kutūhalayuttā sālā **kutūhalasālā** yathā “ājāññaratho”ti. **Ime** dassanādayo.

Ayathābhūtaguṇehīti ayathābhūtaṃ micchādīpitaatthamatteneva ugghositaguṇehi **samuggato** ghosito. Taranti atikkamanti etenāti titthaṃ, aggamaggo. Diṭṭhigatikamaggo pana ayathābhūtopi tesam tathā vitarāṇaṃ upādāya titthanti voharīyatīti taṃ karontā **titthakarā. Osaratīti** pavisati.

239. Sahitanti pubbāparāvuddhaṃ. **Na kiñci jātanti** paṭiññādosahetudosaudāharaṇadosaduṭṭhadosaṭāya na kiñci jātaṃ. Tenāha “**āropito te vādo**”ti. Vadanti tena paribhāsantīti **vādo** doso. **Sabhāvakkosenāti** sabhāvato pavattakoṭṭhāsena.

240. Pīleyyāti madhubhaṇḍena saha bhājane pīletvā dadeyya. **Sabrahmacārīhi sampayojetvāti** sahadhammikehi viheṭhanapayogaṃ katvā, tenāha “**vivādaṃ katvā**”ti.

241. Itarītarenāti pañītato itarena. Tenāha “**lāmakalāmakenā**”ti.

242. Bhattakosakenāti kosakabhattena, khuddakasarāvabhattakenāti attho.

Beluvamattabhattāhārāti billapamānabhattabhojanā. **Oṭṭhavaṭṭiyāti** mukhavatṭiyā. **Sabbākārenevāti** sabbappakāreneva. **Anappāhāroti na vattabbo** kadāci appāhāroti katvā. Tattha ativiya aññehi avisayhaṃ appāhāratam bhagavato dassetuṃ “**padhānabhūmiya**”ntiādi vuttam. **Mayāti** nissakkavacanam. **Visesatarāti** tena dhammena visesavantatarā.

Vatasamādānavaseneva paṃsukūlam dhārentīti **paṃsukūlikāti** āha – “**samādinnaṃ paṃsukūlikaṅgā**”ti, saddattho pana “**visuddhimagge**” (visuddhi. 1.24) vuttanayena veditabbo. **Piṇḍapātikā sapaḍānacāriṇoti**tiādisupi eseva nayo. Tattha tattha satthena chinditattā **satthalūkhāni**. Yaṃ yaṃ sappāyam, tasseva gahaṇam **uccinanti** āha “**uccinitvā...pe... thiraṭṭhānameva gahetvā**”ti. **Alābulomasānīti** alābulomāni viya sukhumatarāni cīvarasuttamaṃsūni etesaṃ santīti alābulomasāni. **Pātitasāṇapaṃsukūlanti** kaḷevarena saddhiṃ chaḍḍitasāṇamayam paṃsukūlam, yaṃ tumbamatte puḷave odhunitvā satthā gaṇhi.

“Yathāpi bhamaro puppha”ntiādinā (dha. pa. 49) vuttam madhukarabhikkhācāravatam “piṇḍiyālopabhojanam nissāya pabbajjā”ti (mahāva. 73, 128) vacanato bhikkhūnam pakatibhūtam vatanti vuttam “**uñchāsake vate ratā**”ti. Vata-saddo cettha pakativatasāṅkhātam sakavatam vadati. Tenāha “**uñchācariyasāṅkhāte bhikkhūnam pakativate**”ti. **Uccānicagharadvāṭṭhāyīnoti** mahantakhuddakagehānam bahidvārakoṭṭhakatṭhāyino. **Kabaramissakam bhattam saṃharitvāti** kaṇḍjakamissakam bhattam sampiṇḍitvā. **Ummārato paṭṭhāyāti** gharummārato paṭṭhāya.

Cīvarānuggahatthanti cīvarānurakkhaṇattham. Ettha ca yasmā buddhā nāma sadevake loke anuttaram puññakkhetam, sā cassa puññakkhetatā paramukkaṃsagatā, tasmā sattānam tādisaṃ upakāram ācikkhitvā te ca anuggaṇhantā gahapaticīvaram sādīyanti, catupaccayasantose pana ne paramukkaṃsagatā evāti daṭṭhabbam.

244. Sappaccayanti sahetukam sakāraṇam hutvā dhammam desetīti ayamettha attho. Codako pana adhippāyam ajānanto “**kiṃ panā**”tiādimāha. Itaro “**no na deseti**”tiādinā adhippāyam vivarati. **Nidānanti** cettha nāpakam uppattikāraṇam adhippetam, tañca tassa tassa anuppattiyuttassa atthassa paṭipakkhaharaṇato “**sappāṭihāriya**”nti vuccatīti āha “**purimassevetam vevacana**”nti. Rāgādīnam vā paṭiharaṇam paṭihāriyam, tadeva pāṭihāriyam, saha pāṭihāriyenāti **sappāṭihāriyam**. Rāgādīpaṭisedhavaseneva hi satthā dhammam deseti.

245. Tassa tassa pañhassāti yaṃ yaṃ pañham paro abhisāṅkharitvā bhagavantam upasaṅkamtivā pucchati, tassa tassa pañhassa. **Upari āgamanavādapathanti** vissajjane kate tato upari āgacchanakam vādammaggaṃ. **Visesetvā vadantoti** vattati, “bho gotama, vattumarahatī”ti attano vādabhedanattham āhatam kāraṇam attano māraṇattham āvudham nidassento viya visesetvā vadanto pahārakena vacanena. **Antarantareti** mayā vuccamānakathāpabandhassa antarantare. **Dadeyya** vadeyya. **Evarūpesu ṭhānesūti** paravādīhi saddhiṃ vādapaṭivādaṭṭhānesu. Te niggahetuṃ mayā desitam suttapadam ānetvā **mamayeva anusāsanim ovadam paccāsanti**.

246. Sampādemīti manoratham sampādemi. **Paripūremīti** ajjhāsayaṃ paripūremi. **Adhisīleti** adhike uttamasīle. Sāvakaṣīlato ca paccekabuddhaṣīlato ca buddhānam sīlam **adhikam** ukkaṭṭham paramukkaṃsato anaññasādhāraṇabhāvato. Tenāha “**buddhaṣīlam nāma kathita**”nti. **Ṭhānuppattikapaññāti** tattha tattha ṭhānaso uppannapaññā. Tenāha “**tatthā**”tiādi. **Avasesā paññāti** idha pāḷiyam āgatā anāgatā ca yathāvuttañānavayavinimuttā paññā.

247. Visēsādhigamānanti satipaṭṭhānādīnam adhigandhabbavisesānam. Abhiññā nāma cha abhiññā, tāsū ukkaṭṭhaniddesena chaḷabhiññārahato va aggammaggaṃ paññā idha abhiññāti adhippetā, tassa vosānam pariyoṣānam pāramī paramukkaṃsāti avakāṃsāti ca aggaphalam vuccatīti āha “**abhiññā... pe... arahattam pattā**”ti.

Upāyapadhāneti ariyaphalādhigamanassa upāyabhūte padhāne.

“Anuppannapāpakānuppādādiatthā”ti gahitā tatheva honti, taṃ atthaṃ sādhetiye vāti etassa atthassa dīpako sammā-saddoti yathāadhippetatthassa anuppannapāpakānuppādādino upāyabhūte, padhānaupāyabhūtetī attho. Sammā-saddassa vā yoniso atthadīpakataṃ sandhāya “yoniso padhāne”ti vuttaṃ. **Chandaṃ janetīti** kattukamyatākusalacchandaṃ uppādeti pavatteti vā. **Vāyamaṭṭīti** payogaparakkamaṃ karoti. **Vīriyaṃ ārabhatīti** kāyikacetāsikavīriyaṃ karoti. **Cittaṃ ukkhipatīti** teneva sahaṃjātavīriyena kosajjapakkhato cittaṃ ukkhipati. **Padahatīti** sammappadhānabhūtaṃ vīriyaṃ pavatteti. Paṭipāṭiyā panetāni cattāri padāni āsevanābhāvanābahulīkammaśācakkiriyāhi yojetabbāni. “Padahatī”ti vā iminā āsevanādīhi saddhiṃ sikhāpattaṃ ussoḥivīriyaṃ yojetabbaṃ. **Vadḍhiyā paripūraṇatthanti** yāvata bhāvanāparipūriyā paripūraṇatthaṃ. **Yā tḥitīti** yā kusalānaṃ dhammānaṃ paṭipakkhavigamena avatḥḥitī. **So asamosoti** so avināso. **Yaṃ vepullanti** yo sabbaso vipulabhāvo mahantatā. **Bhāvanāparipūrīti** bhāvanāya paripūrītā. **Atthotipi veditabbaṃ purimacchimapadānaṃ samānatthabhāvato.**

Pubbabhāgaṭṭipadā kathitātaṃtaṃviseśādhigamassa paṭipadāvibhāvanāya āradḍhattā.

Akusalānaṃ dhammānaṃ anuppajjanena anattāhāvahatā nāma natthīti vuttaṃ – “**uppajjamānā**”ti vacanaṃ uppannānaṃ rāsantarabhāvena gahitattā. Tathā kusalānaṃ dhammānaṃ uppajjanenāti vuttaṃ – **anuppajjamānāti** vacanaṃ uppannānaṃ rāsantarabhāvena gahitattā. **Nirujjhamānāti** paṭipakkhasamāyogena vinassamānā, na khaṇanirodhavasena nirujjhamānā.

Lobhādayo veditabbā, ye āradḍhavipassakānaṃ uppajjanārahā. **Sakiṃ uppajjitvāti**

sabhāvakathanamattametāṃ. Ekavārameva hi maggo uppajjati. **Nirujjhamānoti** saraseneva nirujjhamāno. Na hi tassa paṭipakkhasamāyogo nāma atthi. **Phalassāti** anantarakāleva uppajjanakaphalassa. **Paccayaṃ datvāva nirujjhatīti** iminā maggo sampati āyatiñca ekanteneva atthāvahoti dasseti. **Purimasimpīti** “anuppannā me kusalā dhammā anuppajjamānā anattāya saṃvatteyyu”nti etasmiṃ tatiyavārepi. “**Samathavipassanā gahetabbā**”ti **vuttaṃ** atḥhakathāyaṃ, **taṃ pana** maggassa anuppannatāya sabbhāvato, anuppajjamāne ca tasmim vaṭṭānatthasabbhāvatoṭi maggassapi sādḥāraṇabhāvato **na yuttanti** paṭikkhipati. Yadi samathavipassanānampi anuppatti anattāhāvā, maggassa anuppattiyā vattabbaṃ natthīti.

Mahantaṃ, gāraṃ hoti, tasmā “saṅghagāraṃ yathārucci vanditūṃ na labhāmī”ti saṅghena

saha na nikkhami. **Ettakaṃ dhātūnaṃ nidhānaṃ nāma aññatra natthi**, mahādātūnidhānato hi nīharitvā katipayā dhātuyo tattha tattha cetiye upanītā, idha pana rāmagāmathūpe vinaṭṭhe nāgabavanaṃ pavatḥḥā doṇamattā dhātuyo upanītā. **Atimandāni notī** nanu ativiya mandāni.

Samvijjivāti “kathāhi nāma mādiso īdisaṃ anattaṃ pāpuṇissatī”ti saṃvegaṃ janetvā. Īdisaṃ

nāma mādisaṃ ārabba vattabbanti **kiṃ vadatīti** taṃ vacanaṃ anādiyanto.

Santasamāpattito aññaṃ santhambhanakāraṇaṃ balavaṃ natthīti tato parihīno sammāpaṭipattiyā

paṭiṭṭhā kathaṃ bhavissatīti āha “**santāya...pe... na sakkotī**”ti. Na hi mahārajjuyā chinnāya suttatantū santhambhetuṃ sakkotīti. Samathe dassetvā tena samānagatikā imasmiṃ visaye vipassanāpīti iminā adhippāyenāha “**evaṃ uppannā samathavipassanā...pe... saṃvattantī**”ti.

Kāsāvanti kāsāvavattaṃ. Kacchaṃ piḥetvā nivatthanti pacchimaṃ ovattikaṃ piḥento viya

dalhaṃ katvā nivattaṃ addasaṃsūti yojanā.

Vuttanayenāti (a. ni. ṭi. 1.1.394) “kāmā nāmete aniccā dukkhā vipariṇāmadhammā”tiādinā

vatthukāmakilesakāmesu ādīnavadassanapubbakanekkhampapaṭipattiyā chandarāgaṃ vikkhambhayato samucchindantassa ca “anuppanno ca kāmāsavo na uppajjati”tiādinā heṭṭhā sabbāsavasuttavaṇṇanādīsu (ma. ni. 1.15 ādayo; ma. ni. atṭha. 1.15 ādayo) vuttanayena. **Ārammaṇarasaṃ anubhavitvā niruddhavipākoti** tadārammaṇamāha. Anubhavitvā bhavitvā ca vigataṃ **bhūtavigataṃ.**

Anubhūtabhūtā hi bhūtātāsāmaññena bhūta-saddena vuttā. Sāmaññameva hi upasaggena visesīyatīti. Anubhūtasaddo ca kammavacanicchāya abhāvato anubhavakavācako daṭṭhabbo. Vipāko ārammaṇe uppajjitvā niruddho bhutvāvigatoti vattabbataṃ arahati, vikappagāhavasena rāgādīhi tabbipakkhehi ca akusalaṃ kusalañca kammaṃ ārammaṇarasam anubhavitvā vigatanti vattabbataṃ arahati. Yathāvutto pana vipāko kevalaṃ ārammaṇasānubhavanavaseneva pavattatīti anubhavitvā vigatattā nippariyāyeneva vutto, tassa ca tathā vuttattā kammaṃ bhavitvā vigatapariyāyena, yaṃ “uppannānaṃ akusalānaṃ dhammānaṃ pahānāya, uppannānaṃ kusalānaṃ dhammānaṃ ṭhitiyā”ti ettha “uppanna”nti gahetvā taṃsadisānaṃ pahānaṃ, vuddhi ca vuttā. Vipaccituṃ okāsakaraṇavasena uppatitaṃ atītakammañca tato uppajjituṃ āraddho anāgato vipāko ca “okāsakatuppanno”ti vutto. Yaṃ uppannasaddena vināpi viññāyamānaṃ uppannaṃ sandhāya “nāhaṃ, bhikkhave, sañcetanikāna”ntiādi (a. ni. 10.217, 219) vuttaṃ.

Tesūti vipassanāya bhūmibhūtesu khandhesu. **Anusayitakilesāti** anusayavasena pavattā appahīnā maggena pahātabbā kilesā adhippetā. Tenāha “**atītā...pe... na vattabbā**”ti. Tesañhi ambarukkhopamāya vattamānādītā na vattabbā maggena pahātabbānaṃ tādisassa vibhāgassa anuppajjanato. **Appahīnāva hontīti** iminā appahīnaṭṭhena anusayaṭṭhoti dasseti. **Idaṃ bhūmiladdhuppannaṃ nāmāti** idaṃ tesu khandhesu uppattirahakilesajātaṃ tāya eva uppattirahatāya bhūmiladdhuppannaṃ nāma, tebhūmakabhūmiladdhā nāma hotīti attho. **Tāsu tāsu bhūmīsūti** manussadevādiattabhāvasaṅkhātesu upādānakkhandhesu. Tasmīṃ tasmīṃ santāne anuppattianāpādītātāya **asamugghātītā**. Ettha ca laddhabhūmikaṃ **bhūmiladdhanti** vuttaṃ aggiāhito viya.

Okāsakatuppanna-saddepi ca okāso kato etenāti okāso kato etassāti ca atthadvayepi kata-saddassa paranipāto daṭṭhabbo. Āhatakhīrarukkho viya nimittaggāhavasena adhiggahitaṃ ārammaṇaṃ, anāhatakhīrarukkho viya avikkhambhitātāya antogadhakilesaṃ ārammaṇaṃ. Nimittaggāhakāvikkhambhitakilesā vā puggalā āhatānāhatakhīrarukkhasadisā. **Purimanayenevāti** avikkhambhituppanne viya “imasmīṃ nāma ṭhāne nuppajjissantīti na vattabbā. Kasmā? Asamugghātītattā”ti yojetvā vitthāretabbaṃ.

Vuttaṃ paṭisambhidāmagge. Tattha ca maggena pahīnakilesānameva tidhā navattabbataṃ apākaṭaṃ supākaṭaṃ kātuṃ **ajātaphalarukkho** upamābhāvena **āgato**. Atītādīnaṃ appahīnatā dassanattampi “**jātaphalarukkheṇa dīpetabba**”nti vuttaṃ. Tattha yathā acchinne rukkhe nibbattārahāni phalāni chinne anuppajjamānāni na kadāci sasabhāvāni ahesuṃ honti bhavissanti cāti tāni atītādibhāvena na vattabbāni, evaṃ maggena pahīnakilesā ca daṭṭhabbā. Yathā chede asati phalāni uppajjissanti, sati ca nuppajjissantīti chedassa sātthakatā, evaṃ maggabhāvanāya ca sātthakatā yojetabbā.

Tepi pajahatiyeva kilesappahāneneva tesampi anuppattidhammatāpādanato. **Abhisāṅkhāraviññāṇassāti** paṭisandhiviññāṇassa. **Upādinnaanupādinnoti** upādinnaṃkhandhato ceva kilesato ca. Upapattivasena vuṭṭhānaṃ dassetumāha – “**bhavavasena panā**”tiādi. Ye sotāpannassa satta bhavā appahīnā, tato pañca ṭhapetvā itare dve “**sugatibhavekadesā**”ti adhippetā. **Sugatikāmabhavato**ti sugatibhavekadesabhūtakāmabhavato. **Arahattamaggo rūpārūpabhavato vuṭṭhāti** uddhambhāgiyasamyojanasamugghātābhāvato. Yadi arahattamaggo eva ariyamaggo siyā, so eva sabbakilese pajaheyya, sabbabhavēhi vuṭṭhaheyya. Yasmā pana odhisova kilesā pahīyanti, tasmā heṭṭhimahēṭṭhimamaggehi pahīnāvasese kilese so pajahati, iti imaṃ sāmattiyaṃ sandhāya “**sabbabhavēhi vuṭṭhātiyevātipi vadantī**”ti vuttaṃ. Tathā hi so eva “vajirūpamo”ti vutto.

Hotu tāva vuttanayena anuppannānaṃ akusalānaṃ anuppādāya, uppannānaṃ uppannasadisānaṃ pahānāya anuppattidhammatāpādanāya maggabhāvanā, **atha maggakkhaṇe kathaṃ anuppannānaṃ kusalānaṃ uppādāya uppannānañca ṭhitiyā bhāvanā hoti** ekacittakkhaṇikattā tassāti codeti, itaro “maggappavattiyāyevā”ti parihāramāha. Maggo hi kāmāñcekacittakkhaṇiko, tathārūpo panassa

pavattiviseso, yaṃ anuppannā kusalā dhammā sātisayaṃ uppajjanti, uppannā ca savisesaṃ pāripūriṃ pāpuṇanti. Tenāha “**maggo hī**”tiādi. Kiñcāpi ariyamaggo vattamānakkhaṇe anuppanno nāma na hoti, anuppannapubbataṃ upādāya upacāravasena tathā vuccatīti dassetuṃ “**anāgatapubbaṃ hī**”tiādi vuttaṃ. **Ayamevāti** ayaṃ maggassa yathāpaccayapavatti eva **ṭhiti nāmāti**, maggasamaṅgī puggalo maggampi bhāvento eva tassa **ṭhitiyā bhāvetīti vattuṃ vaṭṭati**.

Upasamamānaṃ gacchatīti vikkhambhanavasena samucchadavasena kilese upasantaṃ vattati. Pubbhāgindriyāni eva vā adhippetāni. Tenevāha “**kilesūpasamatthaṃ vā gacchatī**”ti.

248. Adhimuccanaṭṭhena (dī. ni. ṭī. 2.129; a. ni. ṭī. 3.8.66) adhikaṃ savisesaṃ muccanaṭṭhena, tenāha “**suṭṭhu muccanaṭṭho**”ti. Etena satipi sabbassapi rūpāvacarajjhānassa vikkhambhanavasena paṭipakkhato vimuttabhāve yena bhāvanāvisesena taṃ jhānaṃ sātisayaṃ paṭipakkhato vimuccitvā pavattati, so bhāvanāviseso dīpito. Bhavati hi samānāṭṭhiyutto bhāvanāvisesena pavattiākāraviseso. Yathā taṃ saddhāvimuttato diṭṭhippattassa, tathā paccanīkadhammehi suṭṭhu vimuttatāya eva aniggahitabhāvena nirāsaṅkatāya abhirativasena suṭṭhu adhimuccanaṭṭhena vimokkho. Tenāha “**ārammaṇe cā**”tiādi. **Ayaṃ panatthoti** ayaṃ adhimuccanaṭṭho **pacchimavimokkhe** nirodhe **natthi**. Kevalo vimuttattho eva tattha labbhati, taṃ sayameva parato vakkhati.

Rūpīti yenāyaṃ sasantaṭṭhiyāpannena rūpena samannāgato, taṃ yassa jhānassa hetubhāvena viṣiṭṭhaṃ rūpaṃ hoti. Yena viṣiṭṭhena rūpena “**rūpī**”ti vucceyya rūpī-saddassa atisaṃyathā dīpanato, tadeva sasantaṭṭhiyāpannarūpanimittaṃ jhānamiva paramatthato rūpībhāvasādhakanti daṭṭhabbaṃ. Tenāha “**ajjhata**”ntiādi. **Rūpajjhānaṃ rūpaṃ** uttarapadalopena. **Rūpānīti** panettha purimapadalopo daṭṭhabbo. Tena vuttaṃ “**nīlakasiṇādīni rūpānī**”ti.

Antoappanāyaṃ subhanti ābhogo natthīti iminā pubbābhogavasena adhimutti siyāti dasseti. Evañhettha tathāvattabbatāpatticodanā anavakāsā hoti. Yasmā suvisuddhesu nīlādīsu vaṇṇakasiṇesu tattha katādhikāraṇaṃ abhirativasena suṭṭhu adhimutti siyā, tasmā aṭṭhakathāyaṃ tathā tatiyo vimokkho saṃvaṇṇito. Yasmā pana mettādivasena pavattamānā bhāvanā satte appaṭikūlato dahati, te subhato adhimuccitvā pavattati, tasmā paṭisambhidāmagge (paṭi. ma. 1.212) brahmavihārabhāvanā “**subhavimokkho**”ti vuttā, tayidaṃ ubhayampi tena tena pariyaṇena vuttatā na virujjhatīti daṭṭhabbaṃ.

Sabbasoti anavasesato. Na hi catunnaṃ arūpakkhandhānaṃ ekadesopi tattha avasiṭṭhōti. **Vissatṭhattāti** yathāparicchinne kāle nirodhitatā. **Uttamo vimokkho nāma** ariyeheva samāpajjitabbato, ariyaphalaparīyosānattā diṭṭheva dhamme nibbānappattibhāvato ca.

249. Abhibhavatīti abhibhu (dī. ni. ṭī. 2.173; a. ni. ṭī. 3.6.61-65) parikammaṃ, ñāṇaṃ vā. Abhibhu āyatanam etassāti **abhibhāyatanam**, jhānaṃ. Abhibhavitabbaṃ vā ārammaṇasaṅkhātāṃ āyatanam etassāti **abhibhāyatanam**, jhānaṃ. Ārammaṇābhibhavanato abhibhu ca taṃ āyatanaṃca yogino sukhavisesānaṃ adhiṭṭhānabhāvato manāyatanadhammāyatanabhāvato cātipi sasampayuttaṃ jhānaṃ **abhibhāyatanam**. Tenāha “**abhibhavanakāraṇānī**”tiādi. **Tānīti** abhibhāyatanasaññitāni jhānāni. Samāpattito vuṭṭhitassa ābhogo pubbhāgabhāvanāvasena jhānakkhaṇe pavattaṃ abhibhavanākāraṃ gahetvā pavattoti daṭṭhabbo. **Parikammavasena ajjhataṃ rūpasāññī**, na appanāvasena. Na hi paṭibhāganimittārammaṇā appanā ajjhataṃvisayā sambhavatī. **Taṃ pana** ajjhataṃ parikammavasena laddhaṃ kasiṇanimittaṃ **asuvisuddhameva hoti**, na bahiddhā parikammavasena laddhaṃ viya visuddhaṃ.

Parittānīti yathāladdhāni suppasarāvamattāni. Tenāha “**avaḍḍhitānī**”ti. **Parittavasenevāti** vaṇṇavasena ābhoge vijjamaṇepi parittavaseneva **idamabhibhāyatanam vuttaṃ**. Parittatā hettha abhibhavanassa kāraṇaṃ. Vaṇṇābhoge satipi asatipi abhibhāyatanabhāvanā nāma tikkhapaññasseva sambhavatī, na itarassāti “**ñānuttariko puggalo**”ti. **Abhibhavitvā samāpajjatīti** ettha abhibhavanam samāpajjanaṃca upacārajjhānādhiḡamasamanantameva appanājjhānuppādananti āha “**saha**

nimittuppādenevettha appanaṃ pāpetī’ti. **Saha nimittuppādenāti** ca appanāparivāsābhāvassa lakkaṇavacanametam. Yo “khippābhiñño”’ti vuccati, tatopi ñāṇuttarasseva abhibhāyatanabhāvanā. **Etthāti** etasmiṃ nimitte. **Appanaṃ pāpetī**ti bhāvanā appanaṃ neti.

Ettha ca keci “uppanne upacārajjhāne taṃ ārabba ye heṭṭhimantena dve tayo javanavārā pavattanti, te upacārajjhāna pakkhikā eva, tadanantarañca bhavaṅgaparivāseṇa upacārāsevanāya ca vinā appanā hoti, saha nimittuppādeneva appanaṃ pāpetī”’ti vadanti, taṃ tesam matimattaṃ. Na hi pārivāsikaparikammaṇa appanāvāro icchito, nāpi mahaggatappamañajjhānesu viya upacārajjhāne ekantato paccavekkhaṇā icchitabbā, tasmā upacārajjhānādhigamato paraṃ katipayabhavaṅgacittavasāne appanaṃ pāpuṇanto “saha nimittuppādenevettha appanaṃ pāpetī”’ti vutto. “Saha nimittuppādenā”’ti ca adhippāyikamidaṃ vacanaṃ, na nītatthaṃ, adhippāyo vuttanayeneva veditabbo.

Na antosamāpattiyam tadā tathārūpassa ābhogassa asambhavato, samāpattito vuṭṭhitassa ābhogo pubbhāgabhāvanāvasena jhānakkhaṇe pavattaṃ abhibhavanākāraṃ gahetvā pavattoti daṭṭhabbaṃ. **Abhidhammaṭṭhakathāyam** (dha. sa. aṭṭha. 204) pana “iminā panassa pubbhāgo kathito”’ti vuttaṃ. Antosamāpattiyam tathā ābhogaḅbhāve kasmā “jhānasaññāyapī”’ti vuttanti āha “**abhibhava...pe...atthī**”’ti.

Vaḍḍhitappamañānīti vipulappamañānīti attho, na ekaṅguladvāṅgulādivasena vaḍḍhitappamañānīti tathā vaḍḍhanassevettha asambhavato. Tenāha “**mahantānī**”’ti.

Rūpe saññā rūpasaññā, sā assa atthīti rūpasaññī, na rūpasaññī **arūpasaññī**. Saññāsīsena jhānaṃ vadati. Rūpasaññāya anuppādanamevettha **alābhitā**. **Bahiddhāva uppannanti** bahiddhāvatthusmiṃyeva uppannaṃ. **Abhidhamme** pana “ajjhattaṃ arūpasaññī bahiddhā rūpāni passati parittāni suvaṇṇadubbaṇṇāni, appamañāni suvaṇṇadubbaṇṇānī”’ti evaṃ catunnaṃ abhibhāyatanānaṃ āgatattā **abhidhammaṭṭhakathāyam** (dha. sa. aṭṭha. 204) “kasmā pana yathā suttante – ‘ajjhattaṃ rūpasaññī eko bahiddhā rūpāni passati parittānī’tiādi vuttaṃ, evaṃ avatvā idha catūsupi abhibhāyatanesu ajjhattaṃ arūpasaññītāva vuttā”’ti codanaṃ katvā “ajjhattarūpānaṃ anabhibhavanīyato”’ti kāraṇaṃ vatvā “tattha vā hi idha vā bahiddhārūpāneva abhibhavittabbāni, tasmā tāni niyamato vattabbānīti tatrāpi idhāpi vuttāni. ‘Ajjhattaṃ arūpasaññī’ti idaṃ pana satthu desanāvīlāsamattamevā”’ti vuttaṃ.

Ettha ca vaṇṇābhogarahitāni sahitāni ca sabbāni “parittāni suvaṇṇadubbaṇṇānī”’ti vuttāni, tathā “appamañānī”’ti daṭṭhabbāni. Atthi hi eso pariyāyo “parittāni abhibhuyya tāni ce kadāci vaṇṇavasena ābhujitāni honti suvaṇṇadubbaṇṇāni abhibhuyyā”’ti. Pariyāyakathā hi suttantadesanāti. Abhidhamme pana nipariyāyadesanattā vaṇṇābhogarahitāni visuṃ vuttāni, tathā sahitāni. Atthi hi ubhayattha abhibhavanapariyāyoti “ajjhattaṃ rūpasaññī”’tiādinā paṭhamadutiyaabhibhāyatanesu paṭhamavimokkha, tatiyacatutthābhibhāyatanesu dutiyavimokkha, vaṇṇābhibhāyatanesu tatiyavimokkha ca abhibhavanappavattito saṅgahito, abhidhamme pana nipariyāyadesanattā vimokkhābhibhāyatanāni asaṅkarato dassetuṃ vimokkhe vajjetvā abhibhāyatanāni kathitāni, sabbāni ca vimokkhakiccāni jhānāni vimokkhadesanāyaṃ vuttāni. Tadetam “ajjhattaṃ rūpasaññī”’ti āgatassa abhibhāyatanadvayassa abhidhamme abhibhāyatanesu avacanato “rūpī rūpāni passatī”’tiādināñca sabbavimokkhakiccāsādhāraṇavacanabhāvato vavatthānaṃ katanti viññāyati.

“Ajjhattarūpānaṃ anabhibhavanīyato”’ti idaṃ abhidhamme katthacipi “ajjhattaṃ rūpāni passatī”’ti avatvā sabbattha yaṃ vuttaṃ “bahiddhārūpāni passatī”’ti, tassa kāraṇavacanam. Tena yaṃ aññahetukaṃ, taṃ tena hetunā vuttaṃ, yaṃ pana desanāvīlāsahetukaṃ ajjhattaṃ arūpasaññītāya eva abhidhamme vacanaṃ, na tassa aññam kāraṇaṃ maggitabbanti dasseti. Ajjhattarūpānaṃ anabhibhavanīyatā ca tesam bahiddhārūpānaṃ viya avibhūtattā, desanāvīlāso ca yathāvuttavavatthānavasena veditabbo, veneyyajjhāsayasasena vijjamānapariyāyakathanabhāvato. “Suvaṇṇadubbaṇṇānī”’ti eteneva siddhattā nīlādiabhibhāyatanāni na vattabbānīti ce? Na, nīlādīsu katādhikāraṇaṃ nīlādibhāvasseva abhibhavanakāraṇattā. Na hi tesam parisuddhāparisuddhavaṇṇānaṃ

parittatā tadappamānatā vā abhibhavanakāraṇaṃ, atha kho nīlādibhāvo evāti. Etesu ca parittādikasiṇarūpesu yaṃ caritassa imāni abhibhāyatanāni ijjhanti, taṃ dassetuṃ “**imesu panā**”tiādi vuttaṃ.

Sabbasaṅgāhikavasenati sakalanīlavannaṇānīlanidassananīlanibhāsānaṃ sādharmaṇavasena. **Vaṇṇavasena**ti sabhāvavaṇṇavasena. **Nidassanavasena**ti passitabbatāvasena. **Obhāsavasena**ti sappabhāsātāya avabhāsanaṇavasena. **Umāpupphanti** atasipupphaṃ. **Nīlameva hoti** vaṇṇasaṅkarābhāvato. **Bārāṇasiyaṃ bhavanti** bārāṇasiyaṃ samuṭṭhitaṃ.

Te dhammeti te satipaṭṭhānādiddhamme ceva aṭṭhavimokkhadhamme ca. **Ciṇṇavasībhāvāyeva** tattha abhivisiṭṭhāya paññāya pariyoṣānuttaraṃ satam gatā **abhiññāvosaṇapāramippattā**.

250. Sakalaṭṭhenāti (dī. ni. ṭī. 3.346; a. ni. ṭī. 3.10.25) sakalabhāvena, asubhanimittādīsu viya ekadese aṭṭhatvā anavasesato gahetabbaṭṭhenāti attho. Yathā khettaṃ sassānaṃ uppattiṭṭhānaṃ vaḍḍhiṭṭhānaṃ, evameva taṃtaṃsampayuttadhammānanti āha “**khettaṭṭhenā**”ti. **Paricchinditvāti** idaṃ uddhaṃ adho tīriyanti yojetabbaṃ. Paricchinditvā eva hi sabbattha kasiṇaṃ vaḍḍhetabbaṃ. **Tena tena kāraṇenāti** upariādīsu tena tena kasiṇena. Yathā kinti āha – “**ālokamiva rūpadassanakāmo**”ti, yathā dibbacakkhunā uddhaṃ ce rūpaṃ daṭṭhukāmo, uddhaṃ ālokaṃ pasāreti, adho ce, adho, samantato ce rūpaṃ daṭṭhukāmo, samantato ālokaṃ pasāreti, evaṃ sabbakasiṇanti attho. **Ekassāti** pathavīkasiṇādīsu ekekassa. **Aññabhāvānupagamanatthanti** aññakasiṇabhāvānupagamanadīpanattham, aññassa vā kasiṇabhāvānupagamanadīpanattham. Na hi aññena pasāritakasiṇaṃ tato aññena pasāritakasiṇabhāvaṃ upagacchati, evampi nesam aññakasiṇasambhedābhāvo veditabbo. **Na aññaṃ** pathavīdi. Na hi udakena ṭhitaṭṭhāne sasambhārapathavī atthi. **Aññakasiṇasambhedoti** āpokasiṇādīnā saṅkaro. **Sabbatthāti** sabbesu sesakasiṇesu. Ekadese aṭṭhatvā anavasesapharaṇaṃ pamāṇassa aggahaṇato **appamāṇaṃ**. Teneva hi nesam kasiṇasamaññā. Tathā hi “**tañhī**”tiādimāha. Tattha **cetasā pharantoti** bhāvanācittena ārammaṇaṃ karonto. Bhāvanācittaṃhi kasiṇaṃ parittaṃ vā vipulaṃ vā sakalameva manasi karoti.

Kasiṇugghāṭimākāse pavattaṃ viññānaṃ pharaṇaappamāṇavasena “viññānakasiṇa”nti vuttaṃ. Tathā hi taṃ “viññāna”nti vuccati. **Kasiṇavasena**ti ugghāṭitakasiṇavasena kasiṇugghāṭimākāse uddhamadhotiriyatā veditabbā. Yattakañhi ṭhānaṃ kasiṇaṃ pasāritaṃ, tattakaṃ ākāsabhāvanāvasena ākāsaṃ hotīti. Evaṃ yattakaṃ ṭhānaṃ ākāsaṃ hutvā upaṭṭhitaṃ, tattakaṃ ākāsameva hutvā viññānaṃ pavattanato āgamanavasena viññānakasiṇepi uddhamadhotiriyatā vuttāti “**kasiṇugghāṭimākāsavasena tattha pavattaviññāṇe uddhamadhotiriyatā veditabbā**”ti āha.

252. Vuttoyeva vammikasutte. **Nissitaṅca** chavatthunissitattā vipassanāññaṇassa. **Paṭibaddhaṅca** tena vinā appavattanato kāyasaññitānaṃ rūpadhammānaṃ ārammaṇakaraṇato ca. Suṭṭhu bhāti obhāsātīti vā **subho**. Kuruvindajātiādiṇātivisesopi maṇi ākarapārisuddhimūlako evāti āha “**suparisuddhaākarasamuṭṭhito**”ti. Dosanīharaṇavasena parikammaṇipphattīti āha “**suṭṭhu kataparikamma apanītapāsāṇasakkharo**”ti. **Dhovanavedhanādīhīti** catūsu pāsāṇesu dhovanena ceva kālakādiapaharaṇatthāya suttana āvunanaṭṭhāya ca vijjhanena. Tāpasaṅhakarāṇādīnaṃ saṅgaho ādi-saddena. **Vaṇṇasampattinti** suttassa vaṇṇasampattiṃ.

Maṇi viya karajakāyo paccavekkhitabbato. **Āvutasuttaṃ viya vipassanāññaṇaṃ** anupavisitvā ṭhitattā. **Cakkhumā puriso viya vipassanālābhī bhikkhu** sammadeva tassa dassanato. **Tadārammaṇānanti** rūpadhammārammaṇānaṃ. **Phassapañcamakacittacetāsikaggahaṇena** gahitadhammāpi vipassanācittuppādapariyāpanā evāti veditabbam. Evañhi tesam vipassanāññaṇatikattā “āvutasuttaṃ viya vipassanāññaṇa”nti vacanaṃ avirodhitam hoti.

Ñāṇassāti paccavekkhaṇāññaṇassa. Yadi evaṃ ñāṇassa vasena vattabbaṃ, na puggalassāti āha “**tassa panā**”tiādi. **Maggassa anantaraṃ**, tasmā lokiyābhiññānaṃ parato chaṭṭhābhiññāya purato

vattabbaṃ vipassanāñāṇaṃ. **Evam santepīti** yadipāyaṃ ñāṇānupubbaṭṭhiti, evaṃ santepi **etassa antarā vāro natthīti** pañcasu lokiyābhiññāsu kathitāsu **ākaṅkheyyasuttādīsu** (ma. ni. 1.64 ādayo) viya chaṭṭhābhiññā kathetabbāti etassa anabhiññālakkaṇassa vipassanāñāṇassa tāsamaṃ antarā vāro na hoti, tasmā tattha avasārābhāvato idheva rūpāvacaracattahajjhānānantarameva dassitaṃ vipassanāñāṇaṃ. **Yasmā cāti ca-saddo samuccayatto**. Tena na kevalaṃ tadeva, atha kho idampi kāraṇaṃ vipassanāñāṇassa idheva dassaneti imamatthaṃ dīpeti. **Dibbena cakkhunā bheravarūpaṃ passatoti** ettha iddhividhañāṇena bheravaṃ rūpaṃ nimminivā cakkhunā passatoti vattabbaṃ, evampi abhiññālābhino apariññānavatthukassa bhayasantāso uppajjati uccavālikavāsīmahānāgattherassa viya. **Idhāpīti** imasmimṃ vipassanāñāṇepi, na satipaṭṭhānādīsu evāti adhippāyo.

253. Manomayiddhiyaṃ ciñṇavasitāya abhiññā vosānapāramippattatā veditabbāti yojanā. **Manena nibbattanti** abhiññāmanena nibbattitaṃ. **Taṃ sadisabhāvadassanattamevāti** sañṭhānatopi vaṇṇatopi avayavavisesatopi sadisabhāvadassanattameva. **Sajātiyaṃ ṭhito**, na nāgiddhiyā aññajātirūpo. **Suparikammakatamattikādayo viya iddhividhañāṇaṃ** vikubbanakiriyāya nissayabhāvato.

255. Appakasirenevāti akiccheneva.

256. Mando uttānaseyyakādārakopi “**daharo**”ti vuccatīti tato visesanatthaṃ “**yuvā**”ti vuttaṃ. Yuvāpi koci anicchanato amaṇḍanasīlo hotīti tato visesanatthaṃ “**maṇḍanakajātiko**”ti vuttaṃ. Tena vuttaṃ “**yuvāpi**”tiādi. Kālatilappamaṇā bindavo **kālatilakāni**. Nātikammāsatilappamaṇā bindavo **tilakāni**. **Vaṅkaṃ** nāma piyaṅgaṃ. Yobbanapīlakādayo **mukhadūsipīlakā**. Mukhagato doso **mukhadoso**, lakkhaṇavacanañcetamaṃ mukhe adosassapi pākaṭabhāvassa adhippetattā. Yathā vā mukhe doso, evaṃ mukhe adosopi mukhadoso saralopena, mukhadoso ca mukhadoso ca mukhadosoti ekasesanayenapettha attho daṭṭhabbo. Evañhi **paresaṃ soḷasavidhaṃ cittaṃ pākaṭaṃ hotīti** vacanaṃ samatthitaṃ hoti.

259. Paṭipadāvasenāti yathārahaṃ samathavipassanāmaggaṭipadāvasena. **Aṭṭhasu koṭṭhāsesūti** satipaṭṭhānādīsu bodhipakkhiyadhammakotṭhāsesu, vimokkakoṭṭhāsesu vāti imesu aṭṭhasu koṭṭhāsesu. **Sesesūti** vuttāvasesesu abhibhāyatanakoṭṭhāsādīsu. Sesamaṃ suviññeyyameva.

Mahāsakuludāyisuttavaṇṇanāya līnatthappakāsanā samattā.

8. Samaṇamuṇḍikāputtasuttavaṇṇanā

260. Uggahitunti sikkhituṃ. **Uggāhetunti** sikkhāpetuṃ, pāṭhato attanā yathāuggahitamattaṃ tabbibhāvanatthāya uccāraṇavasena paresaṃ gāhetunti attho. **Samayanti** diṭṭhiṃ. Sā hi saṃyojanabhāvato sameti sambandhā eti pavattati, daḥhaggahaṇabhāvato vā saṃyuttā ayanti pavattanti sattā yathābhinivesaṃ etenāti **samayoti** vuccati. Diṭṭhisamyojanena hi sattā ativiya bajjhantīti. Sūriyassa uggamanato atthaṅgamā ayaṃ ettako kālo rattandhakāravidhamanato divā nāma, tassa pana majjhimapahārasaññito kālo samujjalitapabhātejadahanabhāvena divā nāma. Tenāha “**divasassapi divābhūte**”ti. **Paṭisaṃharitvāti** nivattetvā. Evaṃ cittassa paṭisaṃharaṇaṃ nāma gocarakkhette ṭhapananti āha “**jhānaratisevanavasena ekībhāvaṃ gato**”ti. Etena kāyavivekapubbakaṃ cittavivekamāha. Sīlādiguṇavisesayogato manasā sambhāvanīyā, te pana yasmā attano sīlādiguṇehi viññūnaṃ manāpā honti (kilesaaniggahassa pañcapasādāyattatā,) tasmā āha “**manavaḍḍhanakāna**”ntiādi. Tattha **unnamatīti** udaggaṃ hoti. **Vaḍḍhatīti** saddhāvasena vaḍḍhati. Tenāha bhagavā – “anussaraṇampahaṃ, bhikkhave, tesamaṃ bhikkhūnaṃ bahūpakāraṃ vadāmi”ti (itivu. 104; saṃ. ni. 5.184).

261. Paññapemīti pajānanabhāvena ñāpemi tathā vavatthapemi. Tenāha “**dassemi ṭhapemī**”ti. **Paripuṇṇakusalanti** sabbaso puṇṇakusaladhammaṃ, **uttamakusalanti** uttamabhāvaṃ seṭṭhabhāvaṃ pattakusaladhammaṃ. **Ayojjhanti** vādayuddhena ayodhaniyaṃ, vādayuddhaṃ hotu, tena parājayo na

hotīti dasseti, tenāha “**vādayuddhenā**”tiādi. **Samvarappahānanti** pañcasu samvaresu yena kenaci samvarena samvaralakkhaṇaṃ pahānaṃ. **Paṭisevanappahānaṃ vāti** vā-saddena parivajjanappahānādiṃ saṅgaṇhāti. Sesapadesūti “na bhāsati”tiādīsu padesu. **Eseva nayoti** iminā “abhāsanamattameva vadatī”ti evamādiṃ atidisati.

Nābhinandīti na sampaticchi. Sāsane tiṇṇaṃ duccharitānaṃ micchājīvassa vivajjanaṃ vaṇṇiyati, ayañca evaṃ katheti, tasmā **sāsanassa anulomaṃ viya vadati**, vadanto ca sammāsambuddhe dhamme cassa appasādaṃ na dasseti, tasmā **pasannakārampi vadatīti maññamāno** tassa vādaṃ **na paṭisedheti**.

262. Yathā tassa vacanaṃ, evaṃ santeti yathā tassa paribbājakassa vacanaṃ, evaṃ samaṇabhāve sante labbhamāne. **Mayaṃ pana evaṃ na vadāmāti** etena samaṇabhāvo nāma evaṃ na hotīti dasseti. Yo hi dhammo yādiso, tatheva taṃ buddhā dīpenti. **Visesaññaṃ na hotīti** kāyavisesavisayaññaṃ tassa tadā natthi, yato parakāye upakkamaṃ kareyyāti dasseti, tassa pana tattha visesaññaṃ natthevāti. Yasmā kāyapaṭibaddhaṃ kāyakammaṃ, tasmā taṃ nivattento āha “**aññatra phanditamattā**”ti. **Kilesasahagatacittenevāti** dukkhasamphassassa asahananimittena domanassasahagatacitteneva. Dutiyavārepi eseva nayo. Jighacchāpipāsadukkhassa asahananimittena domanasseneva. **Vikūjitamattāti** ettha virūpaṃ kūjitaṃ vikūjitaṃ pubbenivāsasannissayaṃ upayaṃ, taṃ panettha rodanahasanasamuṭṭhāpakacittasahagatanti dosasahagataṃ lobhasahagatañcāti daṭṭhabbaṃ. **Cittanti** kusalacittaṃ. Akusalacittaṃ pana atītārammaṇaṃ pavattatīti vattabbameva natthi. **Sarivāti** yāva na satisaṅghāpanā dhammā uppajjanti, tāva supinante anubhūtaṃ viya dukkhaṃ saritvā rodanti. **Hasantīti** etthāpi eseva nayo. Ayañca nayo ye laddhasukhārammaṇā hutvā gahitapaṭisandhikā mātukucchitopi sukheveva nikkhamanti, tesam vasena vuttoti daṭṭhabbo. **Pāyantiyāti** attano janapadadesarūpena pāyantiyā. **Ayampīti** ājīvopi mātu aññavihitakāle ca lokassādasena **kilesasahagatacitteneva hoti**.

263. Samadhigayhāti sammā adhigatabhāvena gahetvā abhibhavitvā visesetvā visiṭṭho hutvā. **Khīṇāsavaṃ sandhāyāti** byatirekavasena khīṇāsavaṃ sandhāya. Ayañhettha attho – khīṇāsavampi sotāpannakusalaṃ paññapeti sekkhabhūmiyaṃ ṭhitattā. Sesapadesupi eseva nayo.

Tīṇi padāni nissāyāti na kāyena pāpakaṃ kammaṃ karotī, na pāpakaṃ vācaṃ bhāsati, na pāpakaṃ ājīvaṃ ājīvatīti imāni tīṇi padāni nissāya kusalasīlamūlakā ca akusalasīlamūlakā cāti **dve paṭhamacatukkā ṭhapitā. Ekaṃ padaṃ nissāyāti** na pāpakaṃ saṅkappaṃ saṅkappetīti imaṃ ekapadaṃ nissāya kusalasāṅkappamūlakā akusalasāṅkappamūlakā cāti ime **dve pacchimacatukkā ṭhapitā**.

264. Vicikicchuddhaccasahagatacittadvayampi vaṭṭati balavatā mohena samannāgatattā. Tathā hi tāni “momūhacittāni”ti vuccanti.

Kuhinti kiṃnimittaṃ. **Kataraṃṭhānaṃ pāpuṇivāti** kiṃ kāraṇaṃ āgamma. **Ettheteti etthāti** kāyavacīmanosucaritabhāvanāsājīvanipphattiyā. Sā pana heṭṭhimakoṭiyā sotāpattiphalena dīpetabbāti āha “**sotāpattiphale bhumba**”nti. Yasmā ājīvaṭṭhamakaṃ avasiṭṭhañca sīlaṃ pātimokkhasaṃvarasīlassa ca pārisuddhipātīmokkhādhigamena sotāpattiphalaṃ pattiyaṃ siddho hotīti āha – “**pātimokkha...pe... nirujjhatī**”ti. “Sukhasīlo dukkhasīlo”tiādīsu viya pakatiatthasīlasaddaṃ gahetvā vuttaṃ “**akusalasīla**”ntiādi.

265. Kāmāvacarakusalacittameva vuttaṃ sampattasamādānaviratipubbakassa sīlassa adhippetattā. Tenāha – “**etena hi kusalasīlaṃ samuṭṭhātī**”ti.

Sīlavāti ettha vā-saddo pāsaṃsatthova veditabboti āha “**sīlasampanno hotī**”ti. Yo sīlamatte patiṭṭhito, na samādhipaññāsu, so sīlamayadhammapūritatāya **sīlamayo**. Tenāha “**alamettāvātā**”tiādi. **Yatthāti** yassaṃ cetovimuttīyaṃ paññāvimuttīyañca. Tadubhayañca yasmā arahattaphale saṅgahitaṃ,

tasmā vuttaṃ “**arahattaphale bhumma**”nti. **Asesaṃ nirujjhati** sukhavipākabhāvassa sabbaso paṭippassambhanato.

266. Kāmapaṭisaṃyuttā saññā **kāmasaññā**. Sesesupi eseva nayo. **Itarā dveti** byāpādavihiṃsāsaññā.

Anāgāmiphalapaṭhamajjhānanti anāgāmiphalasahagataṃ paṭhamajjhānaṃ. **Etthāti** yathāvutte paṭhamajjhāne. Ettha ca ujuvipaccanīkena paṭipakkhappahānaṃ sātisaṃyanti paṭhamajjhānaggahaṇaṃ. Tenāha “**aparisesā nirujjhati**”ti. Nekkhammasaññānaṃ kāmāvacaracittasahagatā tassa sīlassa samuṭṭhānatā ca sampayuttanayena veditabbā.

267. Kusalasaṅkappanirodhadutiyaajjhānikaarahattaphalaakusalasaṅkappanirodha-paṭhamajjhānikaanāgāmiphalaggahaṇena samaṇo dassito. Sesam suviññeyyameva.

Samaṇamuṇḍikāputtasuttavaṇṇanāya līnatthappakāsanā samattā.

9. Cūlasakuludāyisuttavaṇṇanā

271. Pañhoti nātuṃ icchito attho, tadeva dhammadesanāya nimittabhāvato **kāraṇaṃ**. **Upaṭṭhātūti** ñāṇassa gocarabhāvaṃ upagacchatu. **Yena kāraṇenāti** yena tuyhaṃ upaṭṭhitena kāraṇena dhammadesanā upaṭṭhaheyya, taṃ pana paribbājakassa ajjhāsayaavasena tathā vuttaṃ. Tenāha “**etena hi...pe... dīpeti**”ti. **Ekaṅgaṇānti** pidhānābhāvena ekaṅgaṇasadisāni. Tenāha “**pākaṭāni**”ti.

Jānantoti attano tathābhāvaṃ sayam jānanto. **Sakkaccaṃ sussūsātīti** “tathābhūtaṃyeva maṃ tathā avocā”ti sādaraṃ sussūsāti. **Tasmāti** dibbacakkhulābhino anāgataṃsaññānalābhato. **Evamāhāti** “yo kho, udāyi, dibbena cakkhunā”ti ārabhitvā “so vā maṃ aparantaṃ ārabha pañhaṃ puccheyyā”ti evaṃ avoca.

Itaranti avasiṭṭhaṃ imasmiṃ ṭhāne vattabbaṃ. **Vuttanayamevāti** “yo hi lābhī”tiadinā vuttanayameva. **Atīteti** pubbenivāsānussatiñāṇassa visayabhūte atthe. **Anāgateti** anāgataṃsaññāṇassa visayabhūte anāgate atthe.

Paṃsupadese nibbattanato paṃsusamokiṇṇasarīratāya **paṃsupisācakaṃ**. **Ekaṃ mūlaṃ gahetvāti** dīghaso hetthimantena caturaṅgulaṃ, uparimantena vidatthikaṃ rukkhagacchalatādīsu yassa kassaci ekaṃ mūlaṃ gahetvā aññajātikānaṃ **adissamānakāyo hoti**. Ayaṃ kira nesam jātisiddhā dhammatā. **Tatrāti** tassa mūlavasena adissamānakatāya. **Na dissati** ñāṇena na passati.

272. **Na ca atthaṃ dīpeyyāti** adhippetamatthaṃ sā vācā sarūpato na ca dīpeyya, kevalaṃ vācāmatamevāti adhippāyo. Paṭiharitabbaṭṭhena parasantāne netabbaṭṭhena paṭihāriya-saddadvārena viññātabbo bhāvatto, sova paṭihāriko niruttinayena, natthi etassa paṭihārikanti **appāṭihīrakataṃ**, ta-saddena padaṃ vaḍḍhetvā tathā vuttaṃ, aniyyānaṃ. Tenāha “**niratthakaṃ sampajjati**”ti. **Subhakiṇḍhadevaloke khandhā viya jotetīti** iminā – “dibbo rūpī manomayo sabbaṅgapaccaṅgī ahīnindriyo attā”ti imamatthaṃ dasseti.

273. Saupasaggapadassa attho upasaggena vināpi viññāyatīti āha “**viddheti ubbidde**”ti. Sā cassa ubbidhatā upakkilesavigamena sucibhāvena upaṭṭhānanti āha “**meghavigamena dūrībhūte**”ti. Indanīlamanī viya dibbati jotetīti **devo, ākāso**. “**Aḍḍharattasamaye**”ti vattabbe bhummatthe vihītavacanānaṃ accantasamāyogābhāvā upayogavacanāṃ veditabbaṃ. Puṇṇamāsiyañhi gaganamajjhassa purato vā pacchato vā ante ṭhite aḍḍharatte samayo bhinno nāma hoti, majjhe eva pana ṭhito abhinno nāma. Tenāha “**abhinne aḍḍharattasamaye**”ti.

Ye **anubhontī** ye devā candimasūriyānaṃ ābhā anubhonti vinibhuñjanti vaḷañjanti ca **tehi** devehi **bahū ceva bahutarā ca** candimasūriyānaṃ ābhā ananubhonto. Tenāha – “**attano sarīrobhāseneva ālokaṃ pharitvā viharantī**”ti.

274. Pucchāmūlho pana jāto “ayaṃ paramo vaṇṇo”ti gahitapadassa vidhamanena. **Acelakapālīnti** “acelako hoti muttācāro”tiādīnayappavattaṃ (dī. ni. 1.394) acelakapaṭipattidīpakaganthaṃ, ganthasīseneva tena pakāsītavādāni vadati. Surāmerayapānamanuyuttapuggalassa surāpānato virati tassa kāyaṃ cittaṃca tāpentī saṃvattatīti surāpānavirati (tapo, soyeva guṇo. Tenāha “surāpānaviratīti attho”ti).

275. Ekantaṃ accantameva sukhaṃ assāti **ekantasukhaṃ. Pañcasu dhammesūti** “pāṇātipātā paṭivirati”tiādīsu pañcasu sīlācāraddhammesu. **Na jānimsūti** sammosena anupaṭṭhahanti tadatthaṃ na bujjhanti. Buddhuppādena kira vihatatejāni mahānubhāvāni mantapadāni viya bāhirakānaṃ yogāvacaraganthena saddhiṃ yogāvacarapaṭipadā nassati. **Uggaṇhimsūti** “pañca pubbhāgadhāme”tiādīvacanamattaṃ uggaṇhimsu. **Tatiyajjhānatoti** kāraṇopacārena phalaṃ vadati, phalabhūta **tatiyajjhānato**.

276. Ekantasukhassa lokassa paṭilābhena pattiya tāttha nibbatti **paṭilābhasacchikiriya**. Ekantasukhe loka anabhinibbattitvā eva iddhiyā tāttha gantvā tassa sattalokassa bhājanalokassa ca paccakkhato dassanaṃ **paccakkhasacchikiriya**. Tenāha “**tatthā**”tiādī.

277. Udañcanikoti udañcano. Viñjhupabbatapasse gāmaṇaṃ aniviṭṭhattā tiṃsayojanamattaṃ thānaṃ aṭavī nāma, tāttha senāsanāṃ, tasmīṃ **aṭavisenāsane** padhānakammikānaṃ bhikkhūnaṃ bahūnaṃ tāttha nivāsena **ekaṃ padhānagharaṃ ahoṣi**.

Cūḷasakuludāyisuttavaṇṇanāya līnatthappakāsanā samattā.

10. Vekhanasasuttavaṇṇanā

280. Saha vatthukāmena kilesakāmo garu garukātabbo etassāti **kāmagaru**. Tesveva kāmesu ninnapoṇapabbhārajjhāsayoti **kāmādhimutto**. Pabbajjāpaṭhamajjhānādikaṃ nekkhammaṃ garu garukātabbaṃ etassāti **nekkhammagaru**. Tāttha ninnapoṇapabbhārajjhāsayo **nekkhammādhimutto** svāyamattho yathā ekacce gahaṭṭhe labbhati, evaṃ ekacce anagārepīti āha “**pabbajitopi**”tiādī. **Ayaṃ pana** vekhanaso paribbājako. So hi vekhanasatāpasapabbajjaṃ upagantvā vekhanasena iminā diṭṭhimādāya samādiyitvā thitattā “vekhanaso”ti vuccati. Yathā loko sayam ekādasahi aggīhi ādittopi samāno paccakkhato anubhaviyamānaṃ sālākikaṃ aggisantāpaṃ viya anādikālānugatasammāvacarasantāpaṃ ādittatāya na sallakkheti, sammāsambuddhena pana mahākaruṇāsamussāhitamānasena “sabbaṃ, bhikkhave, āditta”nti **ādittapariyāye** (saṃ. ni. 4.28; mahāva. 54) desiyamāne sallakkheti, evaṃ ayampi anādikālaparibhāvitaṃ attajjhāsāya avatṭhitaṃ kāmādhimuttaṃ sarasena anupadhārento satthārā – “pañca kho ime, kaccāna, kāmaguṇā”tiādīnā kāmaguṇesu kāmasukhe bhāsiyamāne “kāmādhimuttaṃ vata pabbajitassa citta”nti upadhāressatīti āha – “**imāya kathāya kathiyamānāya attano kāmādhimuttataṃ sallakkhessatī**”ti. **Kāmaggasukhanti** kāmetabbavatthūhi aggabhūtaṃ sukhaṃ. Sabbe hi tebhūmakadhammā kāmanīyaṭṭhena kāmā, te paṭicca uppajjanasukhato nibbānasukhameva aggabhūtaṃ sukhaṃ. Yathāha – “yāvata, bhikkhave, dhammā saṅkhatā vā asaṅkhatā vā, virāgo tesam aggamakkhāyatī”ti (itivu. 90; a. ni. 4.34) – “nibbānaṃ paramaṃ sukha”nti (ma. ni. 2.215, 217; dha. pa. 203) ca. Tena vuttaṃ “**nibbānaṃ adhippeta**”nti.

281. Pubbenivāsaññalābhino pubbantaṃ ārabha vuccamānakathā anucchavikā tadatthassa paccakkhabhāvato, tadabhāvato vekhanasassa ananucchavikāti āha “**yasmā...pe... natthī**”ti. **Anāgatakathāya...pe... natthīti** etthāpi eseva nayo. **Ārakkhatthāyāti** devatāhi mantapadehi saha thitā tāttha ārakkhatthāya. **Avijjāyāti** idaṃ lakkhaṇavacanāṃ, taṃmūlakattā vā sabbakilesadhammānaṃ

avijjāva gahitā. **Jānanam** pahīnakilesapaccavekkhaṇañāṇena. Sesam suviññeyyameva.

Vekhanasasuttavaṇṇanāya līnatthappakāsanā samattā.

Niṭṭhitā ca paribbājakavaggavaṇṇanā.

4. Rājavaggo

1. Ghaṭikārasuttavaṇṇanā

282. Cariyanti bodhicariyaṃ, bodhisambhārasambharaṇavasena pavattitaṃ bodhisattaṭṭipattinti attho. **Sukāraṇanti** bodhiparipācanassa ekantikaṃ sundaraṃ kāraṇaṃ, kassapassa bhagavato payirupāsanādiṃ sandhāya vadati. Tañhi tena saddhiṃ mayā idha katanti vattabbaṃ labhati. **Mandahasitanti** īsakaṃ hasitaṃ. **Kuham kuhanti** hāsa-saddassa anukaraṇametaṃ. **Haṭṭhapahaṭṭhākāramattanti** haṭṭhapahaṭṭhamattaṃ. Yathā gahitasāṅketā “pahaṭṭho bhagavā” ti sañjānanti, evaṃ ākārādassanamattaṃ.

Idāni iminā pasaṅgena tāsam samuṭṭhānaṃ vibhāgato dassetaṃ “**hasitañca nāmeta**” ntiādi āradhaṃ. Tattha ajjupekkhanavasena hāso na sambhavati, pageva domanassavaseṇāti āha “**terasahi somanassasahagatacittēhi**” ti. Nanu ca keci kodhavasena hasantīti? Na, tesampi yaṃ taṃ kodhavatthu, tassa mayam dāni yathākāmakāritaṃ āpajjissāmāti duviññeyyantarena somanassacitteneva hāsassa uppajjanato. **Tesūti** pañcasu somanassasahagatacittesu. **Balavārammaṇeti** uḷāraārammaṇe yamakamahāpāṭihāriyasadise. **Dubbālārammaṇeti** anulāre ārammaṇe. **Imasmiṃ pana thāne...pe... uppādesīti** idaṃ porāṇaṭṭhakathāyaṃ tathā āgatattā vuttaṃ. Na ahetukasomanassasahagatacittena bhagavato sitaṃ hotīti dassanattham.

Abhidhammaṭṭikāyaṃ (dha. sa. mūlaṭī. 568) pana “atītaṃsādīsū appaṭṭhitaṃ nāṇaṃ vatvā ‘imehi tīhi dhammehi samannāgatassa buddhassa bhagavato sabbam kāyakammaṃ nāṇapubbaṅgamaṃ nāṇānuparivatta’ ntiādivacanato (mahāni. 69, 156; cūḷani. māgharājamaṇavapucchāniddeśa 85; paṭi. ma. 3.5; netti. 15; dī. ni. aṭṭha. 3.305; vibha. mūlaṭī. suttantabhājanīyavaṇṇanā; dī. ni. ṭī. 3.141, 305) ‘bhagavato idaṃ cittaṃ uppajjati’ ti vuttavacanam vicāretabba’ nti vuttaṃ. Tattha iminā hasituppādacittena pavattiyamānampi bhagavato sitakaraṇaṃ pubbenivāsa-anāgataṃsa-sabbaññutaññāṇaṃ anuvattakattā nāṇānuparivattiyevāti, evaṃ pana nāṇānuparivattibhāve satī na koci pālīaṭṭhakathānaṃ virodho. Tathā hi **abhidhammaṭṭhakathāyaṃ** (dha. sa. aṭṭha. 568) “tesam nāṇānaṃ ciṇṇapariyante idaṃ cittaṃ uppajjati’ ti vuttaṃ. Avassañca etaṃ evaṃ icchitabbaṃ, aññathā āvajjanassapi bhagavato pavatti tathārūpe kāle na saṃyujjeyya, tassapi hi viññattisamuṭṭhāpakabhāvassa icchitattā, tathā hi vuttaṃ – “evañca katvā manodvārāvajjanassapi viññattisamuṭṭhāpakattaṃ upapannaṃ hoti’ ti, na ca viññattisamuṭṭhāpakatte taṃsamuṭṭhitāya viññattiyā kāyakammādibhāvaṃ āpajjanabhāvo vibandhatīti tameva sandhāya vadati. Tenāha “**evaṃ appamattakampi**” ti. Sateritā vijjulatā nāma **sateratāvijjulatā**. Sā hi itaravijjulatā viya khaṇaṭṭhitikā sīghanirodhā ca na hoti, apica kho dandhanirodhā, tañca sabbakālaṃ catudīpikamahāmeghatova niccharati tenāha “**cātuddīpikamahāmeghamukhato**” ti. Ayaṃ kira tāsam rasmivaṭṭinaṃ dhammatā, yadidaṃ tickhattuṃ siravaraṃ padakkhiṇaṃ katvā dāṭhaggesuyeva antaradhānaṃ.

283. Yadi pi cattāri asāṅkhyeyyāni kappānaṃ sataśahassañca paññāpāramitā paribhāvitā, tathāpi idāni taṃ buddhantaṃ tassā paṭipādetabbattā vuttaṃ “**aparipakkaññattā**” ti. Kāmañcassa nāṇāya idāni paṭipādetabbattā atthi, evaṃ santepi nanu sammāsambuddhesu pasādena sambhāvanāya bhavitabbaṃ tathā cirakālaṃ paribhāvitattā, kathaṃ tattha hīlanāti āha “**brāhmaṇakule**” tiādi. Cirakālaparicitāpi hi guṇabhāvanā appakenapi akalyāṇamittasamsaggena viparivattati aññathattaṃ gacchati. Tena mahāsattopi jātisiddhāyaṃ laddhiyaṃ ṭhatvā jātisiddhena mānena evamāha – “**kiṃ pana**

tena muṇḍakena samaṇakena diṭṭhenā’’ti. Tathā hi vuttaṃ **aṭṭhakathāyaṃ** –

‘‘Tasmā akalyāṇajanaṃ, āsīvisamivoraṃ,
Ārakā parivajjeyya, bhūtikāmo vicakkhaṇo’’ti. (dī. ni. aṭṭha. 1.170-172);

Nhānacuṇṇena suttena katā **sotti**, kuruvindaguḷikā, sā eva sināyanti kāyaṃ visodhenti etāyāti **sinānaṃ**. Tenāha – **‘‘sotti sinānanti sinānatthāya katasotti’’**nti.

284. Ariyaparihārenāti ariyānaṃ parihārena, anāgāmīnaṃ nhānakāle attano kāyassa parihāranīyāmenāti attho. Attano ñāṇasampattiyā vibhavasampattiyā **pasannakāraṃ kātuṃ sakkhissati. Etadatthanti** ‘‘ahitanivāraṇaṃ, hite niyojanaṃ byasane parivajjana’’nti yadidaṃ, etadatthaṃ mittā nāma honti. Keci ‘‘yāvettha ahupī’’ti paṭhanti, tesam yāva ettha kesaggagahaṇaṃ tāva ayaṃ nibandho ahupīti attho.

285. Satipaṭilābhatthāyāti bodhiyā mahābhīnīhāraṃ katvā bodhisambhārapaṭipadāya pūraṇabhāve satiyā paṭilābhatthāya. Idāni tassa satuppādanīyakathāya pavattitākāraṃ saṅkhepeneva dassetuṃ **‘‘tassa hī’’**tiādi vuttaṃ. Tattha **na lāmakaṭṭhānaṃ otiṇṇasattoti** iminā mahāsattassa paṇītādhimuttataṃ dassetvā evaṃ paṇītādhimuttikassa pamādakiriyaṃ na yuttāti dassento **‘‘tādisassa nāma pamādavihāro na yutto’’**ti āha. Tadā bodhisattassa nekkhammajjhāsayo telappadīpo viya visesato nibbatti, taṃ disvā bhagavā tadanurūpaṃ dhammakathaṃ karonto **‘‘tādisassa...pe... kathesi’’**ti. **Parasamuddavāsī therā aññathā vadanti. Aṭṭhakathāyaṃ** pana nāyaṃ buddhānaṃ bhāro, yadidaṃ pūritapāramīnaṃ bodhisattānaṃ tathā dhammadesanā tesam mahābhīnīhārasamanantarampi bodhisambhārasa sayambhuññāneva paṭividitattā. Tasmā bodhisattabhāvapavedanameva tassa bhagavā akāsīti dassetuṃ **‘‘satipaṭilābhatthāyā’’**tiādi vuttaṃ. **Satipaṭilābhatthāyāti** sammāpaṭipattiyā ujjalane pākāṭakarasaṭipaṭilābhāya.

286. Nāṇaṇhi kilesadhammavidālanapadālanehi siṅgaṃ viyāti **siṅgaṃ**. Tañhi paṭipattiyā upatthambhitaṃ ussitaṃ nāma hoti, tadabhāve **patitaṃ** nāma. Keci pana vīriyaṃ siṅganti vadanti. Tasmim sammappadhānavasena pavatte bāhirapabbajjaṃ upagatāpi mahāsattā visuddhāsayaṃ appicchatādiguṇasamaṅgino yathārahaṃ ganthadhuraṃ vāsadhuraṅca paribrūhayantā viharanti, pageva buddhasāsane appicchatādīhīti āha **‘‘catupārisuddhisīle panā’’**tiādi. Vipassanaṃ brūhentā sikhāpattavipassanā hontīti vuttaṃ – **‘‘yāva anulomaññaṃ āhacca tiṭṭhanti’’**ti, anulomaññaṇato orameva vipassanaṃ ṭhapentīti attho. **Maggaphalattaṃ vāyāmaṃ na karonti** paññāpāramitāya sabbaññutaññāgabbhassa aparipuṇṇatā aparipakkattā ca.

287. Therehīti vuddhatarehi. **Nivāse satīti** yasmim ṭhāne pabbajito, tattheva nivāse. **Vappakālatoti** sassānaṃ vappakālato. Pubbe viya tato paraṃ tikhiṇena sūriyasantāpena payojanaṃ natthīti vuttaṃ – **‘‘vappakāle vitānaṃ viya upari vatthakilañjaṃ bandhitvā’’**ti. **Puṭaketi** kalāpe.

288. Paccayasāmaggihetukattā dhammappattiyā padesato pariññāvattukāpi ariyā upaṭṭhite cittavighātapaccaye yadetaṃ nātisāvajjaṃ, tadevaṃ gaṇhanti ayamettha dhammatāti āha – **‘‘alābhaṃ ārabha cittaññathatta’’**ntiādi. **Soti** kiki kāsirājā. **Brāhmaṇabhattoti** brāhmaṇesu bhatto. **Deveti** brāhmaṇe sandhāyāha. **Bhūmidevāti** tesam samaññā, tadā brāhmaṇagaruko loko. Tadā hi kassapopi bhagavā brāhmaṇakule nibbatti. **Dhītu avaññaṃ vatvāti**, ‘‘mahārāja, tava dhītā brāhmaṇasamayaṃ pahāya muṇḍapāsaṇḍikasamayaṃ gaṇhī’’tiādinā rājaputtīyā aguṇaṃ vatvā. **Varaṃ gaṇhimsu** ñātakā. **Rajjaṃ niyyātesī** ‘‘mā me vacanaṃ musā ahoṣi, aṭṭhame divase niggaṇhissāmī’’ti.

Pāvanaasmanayanavasena sammā pāvīkatattā **parisuddhataṇḍulāni**. Pāḷiyaṃ **taṇḍulapaṭibhastāni** taṇḍulakhaṇḍāni. **Muggapaṭibhastakalāyapaṭibhastesupi** eseva nayo.

289. Ko nu khoti bhummatthe paccattavacananti āha – **‘‘kuhiṃ nu kho’’**ti pāripūriṃ yojīyanti

byañjanabhojanāni etthāti pariyogo, tato **pariyogā**. Tenāha “**sūpabhājanato**”ti. **Saññaṃ datvāti** vuttaṃ sabbam ācikkhitvā tumbhākaṃ atthāya sampādetvā nikkhitto upaṭṭhākoti bhagavato ārocethāti saññaṃ datvā. **Ativissatthoti** ativiya vissattho. **Pañcavaṇṇāti** khuddikādivasena pañcappakārā.

290. Kinti nissakke paccattavacaṇaṃ, kasmāti attho? **Dhammikoti** iminā āgamanasuddhiṃ dasseti. **Bhikkhūnaṃ patte bhattasadisoti** iminā upāsakena satthu pariccattabhāvaṃ tattha satthuno ca aparisaṅkataṃ dasseti. **Sikkhāpadavelā nāma natthīti** dhammassāmibhāvato sikkhāpadamariyādā nāma natthi paṇṇattivajje, pakativajje pana setughāto eva.

291. Chadanaṭṭhāne yadākāsaṃ, tadeva tassa gehassa chadananti **ākāsacchadanaṃ**. **Pakatiyā utupharaṇamevāti** chādite yādisaṃ utu, chadane uttiṇabhāvepi tamhi gehe tādiseva utupharaṇaṃ ahoṣi. **Tesaṃyevāti** tesaṃ ghaṭikārassa mātāpitūnaṃ eva.

292. “Catasso muṭṭhiyo eko kuḍuvo, cattāro kuḍuvā eko pattho, cattāro patthā eko āḷhako, cattāro āḷhakā ekaṃ doṇaṃ, cattāri doṇāni ekā mānikā, catasso mānikā ekā khārī, vīsati khārīkā eko vāhoti tadeva ekasakaṭa”nti **suttanipātaṭṭhakathādīsu** (su. ni. aṭṭha. 2.662) vuttaṃ, idha pana “**dve sakaṭāni eko vāho**”ti vuttaṃ. **Telaphānitādinti ādi**-saddena sappiādiṃ maricādikaṭukabhaṇḍaṅca saṅgaṇhāti. **Nāhaṃ raññā diṭṭhapubbo**, kuto paripphassoti adhippāyo. **Naccitvāti** naccaṃ datvā.

Ghaṭikārasuttavaṇṇanāya līnatthappakāsānā samattā.

2. Raṭṭhapālasuttavaṇṇanā

293. Thūlameva thullaṃ, thullā vipulā mahantā koṭṭhā jātā imassāti **thullakoṭṭhikanti** odanapūpapahūtavasena laddhanāmo nigamo. **Aṭṭhakathāyaṃ** pana **thullakoṭṭhanti** attho vutto. Tena pāliyaṃ ika-saddena padavaḍḍhanaṃ katanti dasseti.

294. **Raṭṭhapāloti** idaṃ tassa kulaputtassa nāmaṃ. Paveṇivasena āgatakulavaṃsānugatanti samudāgamato paṭṭhāya dassetuṃ “**kasmā raṭṭhapālo**”tiādi vuttaṃ. **Sandhāretunti** vināsanato pubbe yādisaṃ, tatheva sammadeva dhāretuṃ samattho. **Saddhāti** kammaphalasaddhāya sampannā. **Sāmaṇeraṃ disvāti** sikkhākāmatāya etadagge ṭhapiyamānaṃ disvā.

Saha raññāti **sarājikaṃ**, raññā saddhiṃ rājapariṣaṃ. **Cātuvaṇṇanti** brāhmaṇādicatuvaṇṇasamudāyaṃ. **Posetunti** vaddhetuṃ dānādīhi saṅgahavatthūhi saṅgaṇhituṃ. **Yaṃ** kulaṃ. **Pahossatīti** sakkhissati.

Tena tena me upaparikkhatoti “kāmā nāmete aniccā dukkhā vipariṇāmadhammā, aṭṭhikaṅkalūpamā”ti (ma. ni. 1.234; pāci. 417; mahāni. 3, 6) ca ādinā yena yena ākārena kāmesu ādīnavam okāraṃ saṅkilesaṃ, tabbipariyāyato nekkhamme ānisaṃsaṃ guṇaṃ pakāsentam bhagavatā dhammaṃ desitam ājānāmi, tena tena pakārena upaparikkhato vīmaṃsantassa mayhaṃ **evaṃ hoti** evaṃ upaṭṭhāti. **Sikkhattayabrahmacariyanti** adhisīlādisikkhattayasaṅgahaṃ seṭṭhacariyaṃ. Akhaṇḍādibhāvāpādanena **akhaṇḍaṃ** lakkaṇavacanaṅhetam. Kañcipi sikkhekadesaṃ asesetvā ekanteneva paripūretabbatāya **ekantaparipuṇṇaṃ**. Cittuppādamattampi saṅkilesamalaṃ anuppādetvā accantameva visuddhaṃ katvā pariharitabbatāya **ekantaparissuddhaṃ**. Tato eva saṅkhaṃ viya likhitanti **saṅkhalikhitaṃ**. Tenāha “**likhitasāṅkhasadisa**”nti. Dāṭhikāpi massuggahaṇeneva gahetvā “**massu**”tveva vuttaṃ, uttarādhamassunti attho. Kasāyena rattāni **kāsāyāni**. **Ananuññātaṃ puttaṃ na pabbājeti** “mātāpitūnaṃ lokiyamahājanassa cittaññāthattaṃ mā hotū”ti. Tathā hi suddhodanamahārājassa tathā varo dinno.

295. Piyāyitabbato **piyoti** āha “**pītijanako**”ti. Manassa appāyanato **manāpoti** āha

“**manavaḍḍhanako**”ti. **Sukhedhito** taruṇadāarakakāle. Tato parañca sappikhīrādisādurasamanuññabhojanādiāhārasampattiyā **sukhaparibhato**. Atha vā daḷhabhattikadhātijanādiparijanasampattiyā ceva paricchadasampattiyā ca uḷārapañītasukhapaccayūpahārehi ca **sukhedhito**, akiccheneva dukkhappaccayavinodanena **sukhaparibhato**. Ajjhattikaṅgasampattiyā vā **sukhedhito**, bāhiraṅgasampattiyā **sukhaparibhato**. **Kassacīti** upayogatthe sāmivacanam, kiñcīti vuttam hoti, ayameva vā pāṭho. Tathā hi “**appamattakampi kalabhāgam dukkhassa na jānāsī**”ti attho vutto. **Evam santeti** nanu mayam raṭṭhapāla maraṇādīsu kenaci upāyena appatīkārena maraṇenapi tayā akāmakāpi vinā bhavissāma, evam sati. **Yenāti** yena kāraṇena. **Kim panāti** ettha **kinti** kāraṇatthe paccattavacananti dassento āha “**kena pana kāraṇenā**”ti.

296. Paricārehīti parito tattha tattha yathāsakam visayesu cārehi. Tenāha “**ito cito ca upanehi**”ti. **Paricārehīti** vā sukhūpakaraṇehi attānam paricārehi, attano paricaraṇam kārehi. Tathābhūto ca yasmā laḷanto kīḷanto nāma hoti, tasmā “**laḷā**”tiādi vuttam. Niccadānam **dānam** nāma, uposathadivasādīsu dātabbam atirekadānam **padānam** nāma. Paveṇīrakkhaṇavasena vā dīyamānam **dānam** nāma, attanāva paṭṭhapetvā dīyamānam **padānam** nāma. Pacurajanasādhāraṇam vā nātiulāram **dānam** nāma, anaññasādhāraṇam atiuḷāram **padānam** nāma. **Uddassetabbāti uddham dassetabbā**. Kuto uddham te dassetabbā? Pabbajitato uddham attānam mātāpitāro dassetabbā, tenāha “**yathā**”tiādi.

299. Balam gahetvāti ettha balaggahaṇam nāma kāyabalassa uppādanamevāti āha “**kāyabalam janetvā**”ti. **Evam viharantoti** yathā pāḷiyam vuttam evam eko vūpakaṭṭho appamatto viharanto. **Tasmāti** yasmā neyyo, na ugghaṭṭitaññū, na ca vipañcītaññū, tasmā. Cīrena pabbajito **dvādasame vasse arahattam pāpuṇi**. Yam pana vuttam pāḷiyam “na cirassevā”ti, tam saṭṭhi vassāni tato adhikampi vipassanāparivāsam vasante upādāya vuttam.

Sattadvāraakoṭṭhakassāti sattagabbhantaradvāraakoṭṭhakasīsenā gabbhantarāni vadati. **Paharāpetīti** vayovuḍḍhānurūpam kappāpanādinā alaṅkārapeti. Antojātātāya ñātisadisī dāsī **ñātidāsī**. Pūtibhāveneva lakkhitabbo doso vā abhidoso, sova **ābhidosiko**, abhidosaṃ vā paccūsakālam gato patto atikkantoti **ābhidosiko**. Tenāha “**ekarattātikkantassā**”tiādi. **Aparibhogāraho** pūtibhūtabhāvena. **Ariyavohārenāti** ariyasamudācārena. Ariyā hi mātugāmaṃ bhaginivādena samudācaranti. **Nissatṭhapariggahanti** pariccattālayam. **Vattum vaṭṭatīti** nirapekkhabhāvato vuttam, idha pana visesato aparibhogārahattāva vatthuno. Nimīyati saññāyatīti **nimittam**, tathāsallakkhito ākārōti āha “**ākāram aggaheṣī**”ti.

300. Gharam pavisitvāti gehasāminiyā nisīditabbaṭṭhānabhūtam antogeham pavisitvā. **Ālapaneti** dāsijanassa ālapane. **Bahi nikkhamantāti** yathāvuttaantogehato bahi nikkhamantiyo. **Gharesu sālā hontīti** gharesu ekamante bhojanasālā honti pākāraparikkhittā susaṃvihitadvārabandhā susammaṭṭhavālikaṅgaṇā.

Anokappanam asaddahanam. **Amarisanam** asahanam. **Anāgatavacanam** anāgatasaddappayogo, attho pana vattamānakālikova. Tenāha “**paccakkhampi**”ti. **Ariyiddhiyanti** “paṭīkūle apaṭīkūlasaññī viharatī”ti (a. ni. 5.144) evam vuttaariyiddhiyam.

Pūtikummāso chaḍḍanīyadhammo tassa gehato laddhopi na dātabbayuttako dāsijanena dinnoti āha “**deyyadhamavasena neva dānam alatthamhā**”ti. “Imehi muṇḍakehī”tiādinā nitthunanavacanena paccakkhānam atthato laddhameva, tassa pana ujukaphāsusamācāravasena aladdhattā vuttam “**na paccakkhāna**”nti. Tenāha – “**paṭisanthāravasena paccakkhānampi na alatthamhā**”ti. “Neva dāna”ntiādi paccāsīsāya akkhantiyā ca vuttam viya pacurajano maññeyyāti tannivattanattham adhippāyamaṃsa vivaritam “**kasmā panā**”tiādi vuttam. **Suttikāpaṭicchannanti** sippikāchadhāhi channam.

Ukkaṭṭhaekāsanikatāyāti idaṃ bhūtakathanamattaṃ therassa tathābhāvadīpanato. Mudukassapi hi ekāsanikassa yāya nisajjāya kiñcimattaṃ bhojanaṃ bhuttaṃ, vattasīsenapi tato vuṭṭhitassa puna bhujjituṃ na vaṭṭati. Tenāha tipītakacūlābhayatthero “āsanam vā rakkheyya bhojanaṃ vā”ti. **Ukkaṭṭhasapadānacārikoti** purato pacchato ca āhaṭabhikkhampi aggahetvā bahidvāre ṭhatvā pattavissajjanameva karoti. Eteneva therassa ukkaṭṭhapiṇḍapātikabhāvo dīpito. Tenāha – “**svātanāya bhikkham nāma nādhivāseti**”ti. Atha kasmā adhvīsesīti āha “**mātu anuggahenā**”tiādi. Paṇḍitā hi mātāpitūnaṃ ācariyupajjhāyānaṃ vā kātappaṃ anuggahaṃ ajjuhekkhitvā dhutaṅgasuddhikā na bhavanti.

301. Payuttanti vaddhivasena payojitaṃ, taddhitalopaṃ katvā vuttanti veditappaṃ yathā aññatthāpi “pitāmaṃ dhanam laddhā, sukham jīvati sañcayo”ti. **Jeṭṭhakittiyoti** padhāntthiyō. **Itoti** imasmiṃ kule anubhavittabbavibhavasampattito. **Aññatoti** imassa dinnattā aññasmiṃ kule anubhavittabbasampattito.

302. Cittavicittanti kappanāya ceva arahaṅrūpena alaṅkāradīnā ca cittitañceva vicittitañca. **Vaṇakāyanti** vaṇabhūtaṃ kāyaṃ. **Samantato ussanti** heṭṭhimakāyavasena heṭṭhā upari ca sannissitaṃ. **Niccaturanti** abhiṅghappaṭipīlitaṃ, sadā dukkhitaṃ vā. **Bahusaṅkappanti** rāgavatthubhāvena abhijanehi hāvabhāvavilāsavasena, āmisavasena ca soṇasiṅgālādīhi bahūhi saṅkappetappaṃ. **Ṭhitīti** avaṭṭhānaṃ avipariṇāmo natthi. Tenāha – “**bhijjanadhammatāva niyatā**”ti, parissavabhāvāpatti ceva vināsapatti ca ekantikāti attho.

Cittakatampīti gandhādīhi cittakatampi. **Rūpanti** sarīraṃ.

Alattakakātāti piṇḍialattakena suvaṇṇakātā. Tenāha “**alattakena rañjitā**”ti. **Cuṇṇakamakkhanti** dosanīharaṇehi tāpadahanādīhi katābhisaṅkhāramukhaṃ gorocanādīhi obhāsanakacuṇṇehi makkhitaṃ, tenāha “**sāsapakakenā**”tiādi.

Rasodakenāti saralanīyyāsarasamissena udakena. **Āvattanaparivatte katvāti** āvattanaparivattanavasena nate katvā. **Aṭṭhapadakaracanāyāti** bhittikūṭaddhacandādivibhāgāya aṭṭhapadakaracanāya.

Viravamāneti “ayaṃ palāyati, gaṇha gaṇhā”ti viravamāne. Hiraññasuvaṇṇaorodheti vattappaṃ.

303. Ussitāya ussitāyāti kulavibhavabāhusaccapaññāsampattiyā uggatāya uggatāya. **Abhilakkhito** uḷārabhāvena.

304. Parijuññānti pariḥānāni. Ye byādhinā abhibhūtā sattā jīṇṇakappā vayohānisattā viya honti, tato nivattento “**jarājīṇṇo**”ti āha. **Vayovuḍḍho**, na silādivuḍḍho. Mahattaṃ lāti gaṇhātīti mahallako, jātiyā mahallako, na vibhavādīnāti **jātimahallako**. Dvattirājaparivattasāṅkhātāṃ addhānaṃ kālaṃ gato vītivattoti **addhagato**. Tathā ca paṭhamavayaṃ majjhimavayañca atīto hotīti āha “**addhānaṃ atikkanto**”ti. Jīṇṇādīpadehi paṭhamavayamajjhimavayassa bodhitattā anuppattatāvisiṭṭho vāya-saddo osānavayavisayoti āha “**pacchimavayaṃ anupatto**”ti.

“Appiccho, appaḍaṃsamakasavātātapasarīsapasamphasso”ti (a. ni. 10.11) evamādīsu viya appa-saddo abhāvatthoti adhippāyena āha “**appābādhoti arogo, appātaṅkoti niddukkho**”ti. Appattho vā idha, tatthāpi appa-saddo daṭṭhabbo. Evañhi “yo hi, gahapati, imaṃ pūtikāyaṃ pariharanto muhuttampi ārogyaṃ paṭijāneyya kimaññatra bālyā”ti (saṃ. ni. 3.1) suttapadaṃ samatthitaṃ hoti. Vipaccanaṃ vipāko, so eva vepāko. Samo vepāko etissā atthīti **samavepākinī**, tāya. Teneva samavepākinibhāvena sabbampi sammadeva gaṇhātī dhāretīti **gahaṇī**. Gahaṇisampattiyā hi yathābhuttaāhāro sammadeva jīranto sarīre tiṭṭhati, no aññatthā **bhuttabhutto āhāro jīrati** gahaṇiyā tikkhabhāvena. **Tatheva tiṭṭhatīti** bhuttākāreneva tiṭṭhati gahaṇiyā mandabhāvato. **Bhattachando uppajjateva** bhuttaāhārassa sammā

pariṇāmaṃ gatattā. **Tenevāti** samavepākinibhāveneva. Pattānaṃ bhogānaṃ parikkhiyamānaṃ na sahasā ekajjhaṃyeva parikkhayaṃ gacchanti, atha kho anukkamena, tathā ñāṭayopīti āha “**anupubbenā**”ti. **Chātakabhayādināti ādi**-saddena byādhibhayādiṃ saṅgaṇhāti.

305. Uddesaṣīsenā niddeso gahitoti āha “**dhammaniddesā uddiṭṭhā**”ti. Yasmā vā ye dhammā uddisitabbaṭṭhena “uddesā”ti vuccanti. Teva dhammā niddisitabbaṭṭhena niddesāti “**dhammaniddesā uddiṭṭhā**”ti attho vutto. Atha vā ye dhammā aniccatādivibhāvanavasena uddhaṃ uddhaṃ desessanti, te dhammā tatheva nissesato desessantīti evaṃ uddesaniddesapadānaṃ anattahantarātā veditabbā. **Tatthāti** jarāmarāṇasantike. Addhuvoti niddhuvo na thiro, aniccoti attho. Tenāha “**dhuvattṭhānavirahito**”ti, ajātābhūtāsankhatadhuvabhāvakāraṇavivittoti attho. **Upaṇīyyatīti** vā jarāmarāṇena loko sammā nīyati, tasmā addhuvoti evamettha attho daṭṭhabbo. **Tāyitunti** jātiādibyasanato rakkhituṃ **samatthena** issarena attanā **virahitoti**. “Imaṃ lokaṃ ito vaṭṭadukkhatō mocessāmi, jarābyādhimaraṇānaṃ taṃ adhibhavituṃ na dassāmī”ti evaṃ abhisaratīti abhissaraṇaṃ, lokassa sukhasa dātā hitassa vidhātā koci issaro, tadabhāvato āha “**anabhissaroti asaraṇo**”ti. **Nissako** mamāyitabbavatthuabhāvato, tenāha “**sakabhaṇḍavirahito**”tiādi. Taṇhāya vase jāto taṇhāya vijitoti katvā “**taṇhāya dāso**”ti vuttaṃ.

306. Hatthivisayattā hatthisannissitattā vā hatthisippaṃ “hatthī”ti gahitanti āha – “**hatthisinti hatthisippe**”ti, sesapadesupi eseva nayo. Sāṭisayaṃ ūrubalaṃ etassa atthīti **ūrupalīti** āha – “**ūrubalasampanno**”ti, tamevatthaṃ pākaṭaṃ katvā dassetuṃ “**yassa hī**”tiādi vuttaṃ. **Abhinnaṃ** parasenaṃ **bhindaṭo bhinnaṃ** sakasenaṃ sandhārayato upatthambhayato. **Bāhubalīti** etthāpi “yassa hi phalakaṇṭha āvudhaṇṭha gahetvā”tiādinā attho vattabbo, idha pana parahatthagataṃ rajjaṃ āharituṃ bāhubalanti yojanā. Yathā hi “ūrupalī”ti etthāpi bāhubalaṃ anāmasitvā attho, evaṃ “bāhubalī”ti ettha ūrubalaṃ anāmasitvā attho veditabbo, āhito ahaṃmāno etthāti attā, attabhāvo. Alaṃ samattho attā etassāti alamattoti āha “**samatthaattabhāvo**”ti.

Pariyodhāyāti vā parito ārakkhaṃ odahitvā. “Saṃvijjante kho, bho raṭṭhapāla, imasmiṃ rājakule hatthikāyāpi...pe... vattissanti”ti **idampi so rājā upari dhammuddesassa kāraṇaṃ āharanto āha**.

Vuttasseva anu pacchā gāyanavasena kathanaṃ **anugīti**. Tā pana gāthā dhammuddesānaṃ desanānupubbim anādiyitvāpi yathārahaṃ saṅgaṇhanavasena anugītāti āha “**catunnaṃ dhammuddesānaṃ anugīti**”nti.

307. Ekanti ekajātiyaṃ. Vatthukāmakilesakāmā visayabhedena bhinditvā tathā vuttāti daṭṭhabbo.

Sāgarantenāti sāgarapariyantena.

Aho vatāti socane nipāto, “aho vata pāpaṃ kataṃ mayā”tiādisu viya. **Amarāti**ādisu **āhūti** kathenti. Mataṃ uddissa “amha”nti vattabbe sokavasena “amara”nti vuccati.

Vosānanti niṭṭhaṃ, pariyoṣānanti attho. **Sāvāti** paññā eva. **Dhanatoti** sabbadhanato. **Uttamatarā** seṭṭhā, tenevāha “paññājīvim jīvitamāhu seṭṭha”nti (saṃ. ni. 1.246; su. ni. 184).

Tesu pāpaṃ karontesu sattesu, niddhāraṇe cetāṃ bhummavacanaṃ. **Paramparāyāti** attabhāvaparamparāya. **Saṃsāraṃ āpajjitvāti** bhavādisu saṃsāraṃ āpajjanahetuṃ āpajjanto paralokaṃ upeti, paralokaṃ upentova bahuvīdhadukkhasākhātāṃ gabbhaṇṭha upeti. **Tādisassāti** tathārūpassa gabbhavāsadukkhādīnaṃ adhiṭṭhānabhūtassa **appapaññaṃ aṇṇo appapañño** ca **abhisaddahanto** hitasukhāvahanti pattiyāyanto.

“Pāpadhammo”ti vuttattā tādisassa paraloko nāma duggati evāti āha “**paramhi apāyaloke**”ti.

Vividharūpenāti rūpasaddādivasena tatthapi paṇītatarādivasena bahuvividharūpena.

Sāmaññamevāti samaṇabhāvo eva seyyo. Ettha ca ādito dvīhi gāthāhi catuttho dhammuddeso anugīto. Catutthagāthāya tatiyo. Pañcamagāthāya dutiyo. Chaṭṭhagāthāya dutiyatatiyā. Sattamagāthāya paṭhamo dhammuddeso anugīto, aṭṭhamādīhi pavattinivattīsu kāmesu nekkhamme ca yathārahaṃ ādīnavānisamsaṃ vibhāvetvā attano pabbajjakāraṇaṃ paramato dassento yathāvuttadhammuddesaṃ nigameti, tena vuttaṃ “tā pana gāthā dhammuddesaṃ desanānupubbim anādiyitvāpi yathārahaṃ saṅgaṇhanavasena anugītā”ti. Sesam suviññeyyameva.

Raṭṭhapālasuttavaṇṇanāya līnatthappakāsanā samattā.

3. Maghadevasuttavaṇṇanā

308. Pubbe maghadevo nāma rājāti atītakāle imasmiṃyeva kappe anekavassasahassāyukesu manussesu paṭipāṭiyā uppannānaṃ caturāsītisahasānaṃ cakkavattirājūnaṃ ādipuriso maghadevoti evaṃnāmo rājā.

Dhammoti rājadharmoti lokikā vadanti. Mahābodhini dhānapāramitāsankhāto pana dhammo atthīti **dhammiko**. **Dhammenāti** ñāyena. Tadā brahmavihārādibhāvanādhammassa rañño anadhigatattā tassapi vā anabhihādīhi samānayogakkhamattā vuttaṃ “**dasakusalakammapathe ṭhito**”ti. **Dhammanti** dhammato anapetaṃ. Tathā hi ca so pakkhapātābhāvato “samo”ti vuccatīti āha “**samaṃ caratī**”ti. **Pakatiniyāmenevāti** paveniyā āgataniyāmeneva. Yasmā nigamajanapadesu yebhuyyena gahapatīnaṃ saṅgaho, tasmā aṭṭhakathāyaṃ “**gahapatikāna**”ntveva vuttaṃ. Pāḷiyam pana aññameva nāgaracārittaṃ, aññaṃ negamajanapadacārittanti te visuṃ gahitā “negamesu ceva janapadesu cā”ti. Paccuggamananiggamanavasena uposathassa paṭiharaṇaṃ pāṭihāriyo, so eva **pāṭihāriko, pakkho. Ime divasāti** ime cattāro divasā.

309. Devoti maccu abhibhavanaṭṭhena. Yathā hi devo pakatisatte abhibhavati, evaṃ maccu satte abhibhavati. “Ahaṃ asukaṃ madditum āgamissāmi, tvam tassa kese gahetvā mā vissajjehī”ti maccudevassa āṇākarā dūtā viyāti **dūtāti vuccanti**. **Alaṅkatapaṭiyattāyāti** idaṃ attano dibbānubhāvaṃ āvikatvā ṭhitāyāti dassetum vuttaṃ. **Devatābyākaraṇasadisameva hoti** na cireneva maraṇasambhavato. **Visuddhidevānanti** khīṇāsavabrahmānaṃ. Te hi carimabhava bodhisattānaṃ jīṇṇādike dassenti.

Dukhitaṅca byādhitanti byādhibhāvena sañjātadukkhanti attho. Antimabhavikabodhisattānaṃ visuddhidevehi upaṭṭhāpitabhāvaṃ upādāya tadaññesaṃ tehi anupaṭṭhāpitānampi paṇḍitānaṃ tathā voharitabbatā pariyaṃyasiddhāti āha “**iminā pariyaṃyena**”ti.

Disampatīti vibhattialopena niddeso, disāsīsena desā vuttāti desānaṃ adhipatirājāti attho. Uttamaṅge sirasi ruhantīti **uttamaṅgaruhā**, kesā. Te panettha yasmā palitattā avisesato sabbpacchimavayasandassakā honti, tasmā “**vayoharā**”ti vuttā.

Purisayugo yasmā tasmim vaṃse sañjātapurisaṭṭhitiyā paricchinnō, tasmā āha “**vaṃsasambhave purise**”ti. **Rājagehato āhaṭabhikkhāya yāpentoti** iminā kumārakapabbajjāya upagatabhāvaṃ dasseti.

Parihariyamānovāti aññena aññena parihariyamāno viya velāya velāya tena mahatā pariṇāna upaṭṭhiyamāno kumārakīlaṃ kīlīti attho. Keci pana “parihariyamāno evā”ti avadhāraṇavasena atthaṃ vadanti, tathā sati caturāsītivassasahasāni thaññapāyī taruṇadārako ahoṣīti āpajjatīti tadayuttaṃ. Kumārakālaṃ vatvā tadanantaraṃ oparajjavacanato viruddhañcetam. (**Pañcamaṅgalavacanena** unnaṅgalamaṅgalaukkantanamaṅgalakammahāyamaṅgaladussamaṅgalāni samupagatāni eva ahesunti daṭṭhabbaṃ).

311. Savaṃsavasena āgatā puttānuttādayo puttā ca paputtā ca etissāti **puttapaputtakā** paramparā. **Nihatanti** nihitaṃ ṭhapitaṃ, pavattitanti attho. **Nihatanti** vā satataṃ patitṭhitabhāvena vaḷañjitanti attho. Tenāha “**kalyāṇavatta**”nti. **Atirekatarā dve guṇāti** mahāsattassa maghadevakālato atirekatarā dve guṇā itararājūhi pana atirekatarā anekasatasahassappabhedā eva guṇā ahesunti.

312. Tettiṃsa sahapuññakārino ettha nibbattāti taṃsahacaritaṭṭhānaṃ tettiṃsaṃ, tadeva tāvatiṃsaṃ, taṃnivāso etesanti **tāvatiṃsā**. Nivāsabhāvo ca tesam tattha nibbattanapubbakoti āha – “**devānaṃ tāvatiṃsānanti tāvatiṃsabhavane nibbattadevāna**”nti. **Raññoti** nimimahārājassa. **Ovāde ṭhatvāti** “sīlaṃ arakkhanto mama santikaṃ mā āgacchatū”ti niggaṇhanavasena, “ekantato mama vijjite vasantena sīlaṃ rakkhitabba”nti evaṃ pavattitaovādavasena ovāde ṭhatvā.

Atha nanti mahājutikaṃ mahāvippahāraṃ mahānubhāvaṃ nimirājānaṃ. “Sakkohamasmi devindo, tava santikamāgato”ti attano sakkabhāvaṃ pavedetvā “**kaṅkhaṃ te paṭivinodessāmi**”ti āha. Tenāha “**sabbabhūtānamissarā**”tiādi.

Sīlaṃ upādāya omakatāya “**ki**”nti hīlento vadati. **Guṇavisitṭhatāyāti** lābhayasādīnañceva piyamaṇāpatādīnañca āsavakkhayapariyosānānaṃ nimittabhāvena uttamaguṇatāya. Tadā sakko anuruddhatthero, so attano purimajātiyaṃ paccakkhasiddhaṃva dānato sīlaṃ mahantaṃ vibhāvento “**ahañhi**”tiādimāha. Tattha attanā vasiyamānaṃ kāmāvacaradevalokaṃ sandhāya “**pettivisayato**”ti vuttaṃ. Tassa hi kappasatasahassaṃ vivaṭṭajjhāsayaṃ pūritapāramissa devaloko petaloko viya upaṭṭhāsi. Tenevāha “accharāgaṇasaṅghuṭṭhaṃ, piśācagaṇasevita”nti (saṃ. ni. 1.46).

Khattiyeti khattiyajātiyaṃ. **Visujjhatīti** brahmalokūpapattiṃ sandhāya vadati kāmasaṃkilesavisujjhanato. **Kāyāti** ca brahmakāyamāha.

Imassa mama adiṭṭhapubbarūpaṃ disvā “ahudeva bhaya”nti cintetvā āha “**avikampamāno**”ti. Bhāyanto hi cittassa aññathattena kāyassa ca chambhitattena vikampati nāma. Tenāha “**abhāyamāno**”ti. **Sukhaṃ kathetuṃ hotīti** puññaphalaṃ kathetuṃ sukhaṃ hoti.

313. Manam āgamma yuttāyeva hontīti mātālissa sakkasseva cittaṃ jānitvā yuttā viya honti, rathe yuttaājānīyakiccaṃ karonti devaputtā. Evaṃ tādise kāle tathā paṭipajjanti, yathā erāvaṇo devaputto hatthikiccaṃ. **Naddhito paṭṭhāyāti** rathapañjarapariyantena akkhassa sambandhaṭṭhānaṃ naddhī, tato paṭṭhāya. Akkho bajjhati etthāti **akkhabaddho**, akkhena rathassa baddhaṭṭhānaṃ. Yathā devalokato yāva candamaṇḍalassa gamanavīthi, tāva attano ānubhāvena heṭṭhāmukhameva rathaṃ pesesi, evaṃ candamaṇḍalassa gamanavīthito yāva rañño pāsādo, tāva tatheva pesesi. **Dve magge dassetvāti** patodalatṭhiyā ākāsaṃ vilikhanto viya attano ānubhāvena nirayagāmī devalokagāmī cāti dve magge dassetvā. **Katamenāti**ādi desanāmatam, yathā tena rathena gacchantassa nirayo devaloko ca pākāṭā hontī, tathā karaṇaṃ adhippetam.

Vuttakāraṇameva sandhāyāha mahāsatto “**ubhayeneva maṃ mātali nehī**”ti. **Dugganti** duggamaṃ. **Vettaraṇinti** evaṃnāmaṃ nirayaṃ. **Kuthitanti** pakkuthitaṃ nipakkatelasadisajālaṃ. **Khārasamyuttanti** khārodakasadiṣaṃ.

Rathaṃ nivattetvāti nirayābhimukhato nivattetvā. **Bīraṇīdevadhītāyāti** “bīraṇī”ti evaṃnāmikāya accharāya. **Soṇadinnadevaputtassāti** “soṇadīno”ti evaṃnāmakassa devaputtassa. **Gaṇadevaputtānanti** gaṇavasena puññaṃ katvā gaṇavaseneva nibbattadevaputtānaṃ.

Pattakāleti upakaṭṭhāya velāya. **Atithinti** paccekasambuddhaṃ. Kassapassa bhagavato sāsane ekaṃ khīṇāsavatherantipi vadanti. **Mātāva puttaṃ sakimābhinandīti** yathā pavāsato āgataṃ puttaṃ mātā sakimā ekavāraṃ āgatakāle abhinandati, tathā niccakāle abhinandī sakkaccaṃ parivisi. **Samyamā samvibhāgāti** sīlasamyamā samvibhāgasīlā. **Jātaketi** nimijātake.

Cittakūṭanti devanagarassa dakkhiṇadisāya dvāraakoṭṭhakaṃ. **Sakko cittaṃ sandhāretuṃ asakkontoti** mahāsatte pavattaṃ devatānaṃ sakkārasammānaṃ paṭicca uppannaṃ attano usūyacittaṃ bahi anāvikatvā abbhantareyeva ca naṃ ṭhpetuṃ asakkonto. **Aññesaṃ puññaṃ vasāhīti** sakkassa mahāsattaṃ rosetukāmatāya ārādhanāṃ nidasseti. Purāṇasakko dīghāyuko, taṃ upādāya jarājīṇṇaṃ viya katvā “**jarasakko**”ti vuttaṃ.

315. Sesam sabbanti pabbajjupagamaṇā sesaṃ attano vaṃse porāṇarājūnaṃ rājacārittaṃ. **Pākatikanti** puna sabhāvattameva gato ahosi, apabbajitabhāvavacanenevassa brahmavihārabhāvanādīnaṃ pabbajjaguṇānaṃ abhāvo dīpito hoti.

316. Vīriyaṃ akaronto samucchindati, na tāva samucchinnaṃ, kalyāṇamittasaṃsaggādīpaccayasamavāye sati sīlavataṃ kalyāṇavattaṃ pavattetuṃ sakkoti. **Dussīlena samucchinnaṃ nāma hoti** tassa tatha nirāsabhāvena paṭipattiyā eva asambhavato. **Satta sekhā pavattenti** kalyāṇavattassa apariniṭṭhitakiccattā. **Khīṇāsavena pavattitaṃ nāma** pariniṭṭhitakiccattā. Sesam suviññeyyameva.

Maghadevasuttavaṇṇanāya līnatthappakāsanā samattā.

4. Madhurasuttavaṇṇanā

317. Madhurāyanti uttaramadhurāyaṃ. **Gundāvaneti** kāḷasippalivane. Atimuttakavaneti ca vadanti. Catūsu vaṇṇesu **brāhmaṇova seṭṭho vaṇṇo**. **Paṇḍaroti** parisuddho. **Kāḷakoti** aparisuddho. **Jātigottādīpanāpanaṭṭhānesūti** jātigottādivasena suddhacintāyaṃ brāhmaṇā eva suddhajātikā, na itareti adhippāyo. Saṃsārato vā suddhacintāyaṃ brāhmaṇāva sujjhanti vedavihitassa suddhavidhino aññesaṃ avisayattāti adhippāyo. Taṃ panetaṃ tesam virujjhanti khattiyavessānampi mantajjhenassa anuññātattā, mantajjhenavidhinā ca saṃsārasuddhiyābhāvato. Puttā nāma anorasāpi honti, na tathā imeti āha “**orasā**”ti. Ure saṃvaḍḍhitaputtopi “**orasā**”nti vuccati. Ime pana mukhato niggato hutvā ure saṃvaḍḍhāti dassetuṃ “**orasā mukhato jātā**”ti vuttaṃ. Tato eva brahmato jātāti **brahmajā**, brahmasambhūtāpi “**brahmajā**”ti vuccanti, na tathā ime. Ime pana paccakkhato brahmunā nimmitāti **brahmanimmitā**, tato eva brahmato laddhabbavijjādīdayajjadāyādāti **brahmadāyādāti** sabbametaṃ brāhmaṇānaṃ katthanāpalāpasadisam viññūnaṃ appamāṇaṃ avimaddakkhamaṃ vācāvattumattaṃ brahmakuttasseva abhāvato. Yaṃ panettha vattabbaṃ, taṃ **visuddhimaggavaṇṇanāyaṃ** vuttameva. Tenāha “**ghosoyevā**”tiādi. **Vohāramattamevetanti** etaṃ “brāhmaṇova seṭṭho vaṇṇo”tiādi vacanamattameva, na tassa attho tehi adhippetappakāro atthi.

318. Samijjheyāti diṭṭhidīpanavasena attano ajjhāsayo nipphajjeyya. Tenāha “**manoratho pūreyyā**”ti. **Khattiyopīti** parakhattiyopi. **Assāti** samiddhadhanādīṃ pattassa. Tenāha – “**issariyasampattassā**”ti **nesanti** etesaṃ catunnaṃ vaṇṇānaṃ ettha pubbuṭṭhāyibhāvādīnā itarehi upacaritabbatāya na kiñci nānākaraṇanti yojanā.

322. Ahaṃ cīvarādīhi upaṭṭhāko, tumhākaṃ icchitacchitakkhaṇe vadeyyātha yenatthoti yojanā. Corādiupaddavanisedhanena **rakkhāgutti**, dānādīnimittaupaddavanisedhanena **āvaraṇagutti**. Paccuppannānathanisedhanena vā **rakkhāgutti**, āgāmīnathanisedhanena **āvaraṇagutti**. Ettha ca khattiyādīsu yo yo issaro, tassa itarena anuvattetabbabhāve, kusalākusalakaraṇena nesam vasena laddhabbaabhisamparāye, pabbajitehi laddhabbasāmīcikiriyaṃ ca aṇumattopi viseso natthi, tasmā so visesābhāvo pāliyaṃ tatha tatha vāre “**evaṃ sante**”tiādinā vibhāvito. Sesam suviññeyyameva.

Madhurasuttavaṇṇanāya līnatthappakāsanā samattā.

5. Bodhirājakumārasuttavaṇṇanā

324. Olokanakapadumanti līlāravindaṃ. **Tasmāti** kokanadasaṅṭhānattā **kokanadoti saṅkhaṃ labhi.**

325. Yāva pacchima...pe... phalakaṃ vuttaṃ tassa sabbapacchā santhatattā. Uparimaphalagatañhi sopānamatthakaṃ. **Olokanatthamevāti** na kevalaṃ bhagavato āgamanaññeva olokanattham, atha kho attano patthanāya santharāpitāya celapaṭikāya akkamanassapi.

Sakuṇapotaketi kādambaṭṭibhaputtake. **Añño va bhaveyyāti** tasmim attabhāve mātugāmato añño idāni bhariyābhūto mātugāmo bhaveyya. **Puttaṃ labheyyāti** attano kammavasena puttaṃ, no tassa. **Ubhohīti** imehi eva ubhohi. **Imehi kāraṇehīti** tassa rājakumārassa buddhaṃ paṭicca micchāgahaṇaṃ, titthiyānaṃ ujjhāyanaṃ, anāgate manussānaṃ bhikkhūnaṃ uddissa vippaṭisāroti imehi tīhi kāraṇehi. **Paññattanti** santhatam celapaṭikaṃ. Maṅgalaṃ icchantīti **maṅgalikā.**

326. Tatiyaṃ kāraṇanti iminā bhikkhūsu vippaṭisārānuppādanamāha. Yaṃ kiñci paribhuñjana-sukhaṃ kāmasukhallikānuyogoti adhippāyena **kāmasukhallikānuyogasaññi hutvā...pe... maññamāno evamāha.**

327. Atha naṃ bhagavā tato micchābhinivesato vivecetukāmo “so kho aha”ntiadinā attano dukkaracariyaṃ dassetuṃ ārabhi. **Mahāsaccake**(ma. ni. 1.364 ādayo) **vuttanayeneva veditabbaṃ** “so kho aha”ntiādīpāṭhassa tattha āgataniyāmeneva āgatattā. **Pāsarāsīsutte** (ma. ni. 1.272 ādayo) **vuttanayenāti** etthāpi ese va nayo.

343. Aṅkusaṃ gaṇhanti etena tassa gahaṇe cheko hotīti **aṅkusagahaṇasippaṃ. Meghautunti** meghaṃ paṭicca uppannasītautuṃ. **Pabbatautunti** pabbataṃ paṭicca uṇhātuṃ. Ubhayavasena ca tassa tathā sītuṇhaututo eno āgatoti ta-kārassa da-kāraṃ katvā **udenoti nāmaṃ akāsi.**

Tāpaso ogaḷhaññāvasena **rañño matabhāvaṃ ñatvā. Ādito paṭṭhāyāti** kosambinagare parantaparañño aggamaheśibhāvato paṭṭhāya. **Pubbeti** sīlavantakāle. **Hatthiganthanti** hatthīnaṃ attano vase vattāpanasattham. Tenevassa taṃ sikkhāpeti, kiccañca ijjhati.

344. Padahanabhāvoti bhāvanānuyogo. Padhāne vā niyutto padhāniyo, padhāniyassa bhikkhuno, tasseva padhāniyabhāvassa aṅgāni kāraṇāni **padhāniyaṅgāni.** Saddhā etassa atthīti **saddho.** Kiñcāpi paccakabodhisattānampi abhinīhārato paṭṭhāya āgatā āgamanasaddhā eva, mahābodhisattānaṃ pana saddhā garutarāti sā eva gahitā. **Acalabhāvena okappaṇaṃ** “sammāsambuddho bhagavā, svākhyāto dhammo, suppaṭipanno saṅgho”ti kenaci akampiyabhāvena ratanattayagūṇe ogaḷhitvā kappanaṃ. **Pasāduppatti** ratanattaye pasādanameva. **Bodhinti catumaggaññanti** vuttaṃ taṃnimittattā sabbaññutaññānaṃ, **bodhīti** vā sammāsambodhi. Sabbaññutaññānapadaṭṭhānañhi maggaññaṃ, maggaññaṃpadaṭṭhānañca sabbaññutaññānaṃ “sammāsambodhi”ti vuccati. Nicchitasubbuddhatāya dhammassa sudhammatā saṅghassa suppaṭipatti vinicchitā eva hotīti āha “**desanāsīsameva ceta**”ntiadi. **Tassa padhānaṃ vīriyaṃ ijjhati** ratanattayasaddhāya “imāya paṭipadāya jarāmarāṇato muccissāmī”ti padhānānuyoge avaṃmukhasambhavato.

Appābādhotiadi heṭṭhā vuttameva. **Aguṇaṃ pakāsetā** āyatim saṃvaram āpajjitā sammāpaṭipattiyā visodhanattham. **Udayaṅca atthaṅca gantunti** “avijjāsamudayā”tiadinā pañcannaṃ upādānakkhandhānaṃ udayaṅca vayaṅca jānituṃ. Tenāha “**etenā**”tiadi. **Parisuddhāya** upakkilesavinimuttāya. **Nibbijhitunti** tadaṅgasena pajahituṃ samucchadappahānaṃ paccayo bhavituṃ. **Yaṃ dukkhaṃ khīyatīti** kilesesu appahīnesu tena tadupanissayakammaṃ paṭicca yaṃ dukkhaṃ uppajjeyya, taṃ sandhāya vuttaṃ.

345. Sesadivaseti sattadivasato paṭṭhāya yāva dve rattindivā.

346. Kucchisannissito gabbho nissayavohārena “kucchī”ti vuccati, so etissā atthīti **kucchimati**. Tenāha “**āpannasattā**”ti. **Ārakkho panassa paccupaṭṭhito hotīti** mātaraḥ gahitasaraṇaṃ gabbhavuṭṭhitassa tassa saraṇagamanāṃ pavedayitassa kusalaṃ saraṇaṃ nāma, mātu katarakkho puttassapi paccupaṭṭhitoti. **Mahallakakāleti** vacanattaṃ jānanakāle. **Sārentīti** yathādiṭṭhaṃ yathābalaṃ ratanattayaguṇapatiṭṭhāpanavasena assa sārenti. **Sallakkhetvāti** vuttamatthaṃ upadhāretvā. **Saraṇaṃ gahitaṃ nāma hoti** ratanattayassa saraṇabhāvasallakkhaṇapubbakatanninnacittabhāvatova. Sesam suviññeyyameva.

Bodhirājakumārasuttavaṇṇanāya līnatthappakāsanā samattā.

6. Aṅgulimālasuttavaṇṇanā

347. Aṅgulīnaṃ mālaṃ dhāretīti iminā anvatthā tassa samaññāti dasseti. **Tatrāti** tasmiṃ ācariyavacanena aṅgulimālassa dhāraṇe. **Karīsasahassakhette ekasālisīsaṃ viya** apaññāyamānasakakicco hotīti adhippāyo. **Takkasilāṃ pesayimsu** “tādisassa ācariyassa santike sippuggahasammāpayogena diṭṭhadhammike samparāyike ca atthe jānanto bhāriyaṃ na kareyyā”ti. **Bāhirakā ahesuṃ** ahiṃsakassa vattasampattiyā ācariyassa cittasabhāvato nibbattanatibhāvena. **Sineheneva vadanteti** sinehena viya vadante.

Gaṇanampi na uggaṇhātīti gaṇanavidhimpī na sallakkheti. Tattha kāraṇamāha “**pakatiyā**”tiādīnā. **Ṭhapitaṭṭhāneti** rukkhagacchantarādike ṭhapitaṭṭhāne sakuntasiṅgālānaṃ vasena **aṅguliyo vinassanti**. **Bhaggavoti** kosalarañño purohitaṃ gottena vadati. **Coro avissāsanīyo** sāhasikabhāvato. **Purāṇasanthatā sākā avissāsanīyā** vicchikādīnaṃ pavesanayogyattā. **Rājā avissāsanīyo** issariyamadena dhanalobhena ca kadāci jīvite saṅkābhāvato. **Itthī avissāsanīyā** lolasīlacittabhāvato. **Anuddharaṇīyo bhavissati** saṃsārapaṅkato.

348. Saṅkaritvāti “mayam ekajjham sannipatitvā coram māretvā vā palāpetvā gamissāmā”ti saṅkaram katvā. **Iddhābhisaṅkhāranti** abhisaṅkharāṇaṃ adhiṭṭhānaṃ. **Abhisaṅkhāsīti** adhiṭṭhahi. **Samharitvāti** saṃkhipitvā. **Orabhāgeti** corassa orabhāge.

349. Daṇḍoti paharaṇahatthacchedanādiko daṇḍanasāṅkhāto daṇḍo. **Pavattayitabboti** ānetabbo. **Apanetvāti** attano santānato samucchadavasena pahāya. **Paṭisaṅkhāyāti** paṭisaṅkhānena. **Avihimsāyāti** karuṇāya. **Sāraṇīyadhammesūti** chasupi sāraṇīyadhammesu, **ṭhito** aṭṭhitānaṃ pāpadhammānaṃ bodhimūle eva samucchinnattā. Yathā atīte aparimitaṃ kālaṃ sandhāvitaṃ, evaṃ imāya paṭipattiyā anāgatepi sandhāvissatīti dassento “**idānī**”tiādīmāha.

Itvevāti iti eva, **iti**-saddo nidassanatto. Tenāha “**evaṃ vatvā yevā**”ti. **Akirīti** ākiri, pañcapi āvudhāni vikiri. Tena vuttaṃ “**khipi chaḍḍesi**”ti.

350. Ettovāti ato eva āgatamaggeneva sāvatthiṃ **gatā**. **Adhivāsessatīti** “coram paṭisedhetuṃ gamissāmī”ti vutte tuṅhī bhavissati. **Dāruṇakammena uppannaṃamanti** “aṅgulimālo”ti imaṃ nāmaṃ sandhāya vadati.

351. Hatthī araññahatthī honti manussānaṃ tattha gantuṃ asakkuṇeyyattā, evaṃ **assāpi**. **Kūṭasahassānaṃ bhijjanakāraṇaṃ hoti** therassa āgamanabhayena ghaṭe chaḍḍetvā palāyanena. **Gabbhamūlhāyāti** byākulagabbhāya. **Pabbajjābalenāti** vuttaṃ, satthu desanānubhāvenāti pana vattabbaṃ. So hi tassāpi kāraṇanti. **Ariyā nāma jāti** pabbajjā ariyabhāvatthāya jātīti katvā.

Mahāparittaṃ nāmetanti mahānubhāvaṃ parittaṃ nāmetam. Tathā hi naṃ thero sabbabhāvena ariyāya jāto saccādiṭṭhānena akāsi. Tenāha “**saccakiriyakataṭṭhāne**”ti. **Gabbhamūlhanti**

mūlḥagabbhaṃ. Gabbho hi paripakko sampajjamāno vijāyanakāle kammajavātehi sañcāletvā parivattito uddhampādo adhosīso hutvā yonimukhābhimukho hoti, evaṃ so kassaci alaggo sotthinā bahi nikkhamati, vipajjamāno pana viparivattanavasena yonimaggaṃ pidahitvā tiriyaṃ nipajjati, tathā yassā yonimaggo pidahati, sā tattha kammajavātehi aparāparaṃ parivattamānā byākulā mūlḥagabbhāti vuccati, taṃ sandhāya vuttaṃ “**gabbhamūlha**”nti.

Saccakiriyā nāma buddhāsayaṃ attano sīlaṃ paccavekkhitvā katā, tasmā saccakiriyā vejjakammaṃ na hotīti daṭṭhabbaṃ. **Therassapī cāti**adinā upasaṅkamitabbakāraṇaṃ vadati. Ime dve hetū paṭicca bhagavā therāṃ saccakiriyāṃ kāresi. **Jātinti** mūlajātiṃ.

352. Pariyādāya āhacca **bhinnena sīsena. Sabhāgadiṭṭhadhammavedanīyakammanti** niraye nibbattanasakakammasabhāgabhūtaṃ diṭṭhadhammavedanīyakammaṃ. Sabhāgatā ca samānavatthukatā samānārammaṇatāekavīthipariyāpannatādivasena sabbathā sarikkhatā, sadisampī ca nāma tadevāharīyati yathā “tasseva kammaṃ vipāko”ti ca “sā eva tittirī tāneva osadhānī”ti ca. Idāni tameva sabhāgataṃ dassetuṃ “**kammaṃ hī**”tiādi āraddhaṃ. **Kariyamānamevā**ti paccayasamavāyena paṭipāṭiyā nibbattiyamānameva. **Tayo koṭṭhāse pūreti**, diṭṭhadhammavedanīyaparāpariyāyavedanīyapapajjavedanīyasankhāte tayo bhāge pūreti, tesāṃ tiṇṇaṃ bhāgānaṃ vasena pavattati.

Diṭṭhadhammo vuccati paccakkhabhūto paccuppanno attabhāvo, tattha veditabbaphalaṃ kammaṃ **diṭṭhadhammavedanīyaṃ**. Paccuppannabhavato anantaraṃ veditabbaphalaṃ kammaṃ **upapajjavedanīyaṃ**. Diṭṭhadhammānantarabhavato aññasmiṃ attabhāvapariyāye attabhāvaparivatte veditabbaphalaṃ kammaṃ **aparāpariyāyavedanīyaṃ**. Paṭipakkhehi anabhibhūtatāya, paccayavisesena paṭiladdhavisestatāya ca balavabhāvappattā tādisassa pubbābhisaṅkhārassa vasena sātisayā hutvā pavattā paṭhamajavanacetanā tasmīṃyeva attabhāve phaladāyini diṭṭhadhammavedanīyā nāma. Sā hi vuttākārena balavati javanasantāne guṇavisesayuttesu upakārānupakāravasappavattiyā āsevanālabhena appavipākatāya ca itaradvayaṃ viya pavattasantānuparamāpekkhaṃ okāsalābhāpekkhaṅca kammaṃ na hotīti idheva pupphamattaṃ viya pavattivipākamattaṃ phalaṃ deti.

Tathā asakkontanti kammaṃ phaladānaṃ nāma upadhipayogādipaccayantarasamavāyeneva hotīti tadabhāvato tasmīṃyeva attabhāve vipākaṃ dātuṃ asakkontaṃ. **Ahosikammanti** kammaṃyeva ahosi, na tassa vipāko ahosi, atthi bhavissati vāti evaṃ vattabbaṃ kammaṃ. **Atthasādhikā**ti dānādīpāṇātipātādīatthassa nipphādikā. Kā pana sāti āha “**sattamajavanacetanā**”ti. Sā hi sannīṭṭhāpakacetanā vuttanayena paṭiladdhavisēsā purimajavanacetanāhi laddhāsevanā ca samānā anantare attabhāve vipākadāyini upapajjavedanīyakammaṃ nāma. Tenāha “**anantare attabhāve vipākaṃ deti**”ti. **Sati saṃsārappavattiyā**ti iminā asati saṃsārappavattiyā ahosikammaṃpakkhe tiṭṭhati vipaccanokāsassa abhāvatoti.

Samugghāṭitāni vipaccanokāsassa anuppattidhammatāpādanena. **Diṭṭhadhammavedanīyaṃ atthi** vipākārahābhāvassa anibbattitattā vipaccanokāsassa anupacchinnattā. Katūpacitañhi kammaṃ sati vipaccanokāse yāva na phalaṃ deti, tāva attheva nāma vipākārahābhāvato. “Yassa kho”ti idaṃ aniyamākāravacanaṃ bhagavatā kammaṃsarikkhatāvasena sādharmaṇato vuttanti āha “**yādisassa kho**”ti.

Pamādakilesavimuttoti pamādahetukehi sabbehi kilesehi vimutto.

Pāpassa pidhānaṃ nāma avipākadhammatāpādananti āha “**appaṭisandhikaṃ karīyati**”ti. **Buddhasāsaneti** sikkhāttayasāṅgahe buddhassa bhagavato sāsane. **Yuttappayutto viharatī**ti akattabbassa akaraṇavasena, kattabbassa ca paripūraṇavasena pavattati.

Dissanti kujjhantīti **disā**, paṭipakkhāti āha “**sapattā**”ti. **Tappasamsapakāranti** mettānisamsakittanākāraṃ. **Kālenā**ti āmedītalopena niddesoti āha “**khāṇe khāṇe**”ti. **Anukarontūti**

yesaṃ kalyāṇamittānaṃ santike suṇanti, yathāsutaṃ dhammaṃ tesāṃ anukarontu diṭṭhānugatikaraṇaṃ āpajjantu, attano veripuggalānampi bhagavato santike dhammassavanaṃ sammāpaṭipattiṅca paccāsīsatī.

Tasanti gatiṃ patthayantīti **tasā** bhavantarādīsu saṃsaraṇabhāvato. Tenāha “**tasā vuccanti satanḥā**”ti.

Netabbaṭṭhānaṃ udakaṃ nayantīti **nettikā**. **Bandhitvā**i daḷhaṃ bandhitvā. **Telakaṇḍjikenā**i telamissitena kaṇḍjikenā.

Yādisova anīṭṭhe, tādisova iṭṭheti iṭṭhāniṭṭhe nibbikārena **tādī**. Yesaṃ pana kāmāmisādīnaṃ vantattā rāgādīnaṃ cattattā kāmoghādīnaṃ tiṇṇattā tādibhāvo bhaveyya, tesāṃ bhagavatā sabbaso vantā cattā tiṇṇā, tasmā bhagavā **vantāvīti tādī, cattāvīti tādī, tiṇṇāvīti tādī**, yehi anaññasādhāraṇehi sīlādiguṇehi samannāgatattā bhagavā tādibhāvena ukkaṃsapāramippatto taṃniddeṣo, tehi guṇehi yāthāvato niddisittabbatopi **tādī**. Yathā yantarajjuyā yantaṃ nīyati, evaṃ yāya taṇhāya bhavo nīyati, sā “bhavanetti bhavarajjū”ti vuttā. Tenāha “**tāya hī**”tiādi, kammāni kusalādīni vipaccayanti apaccayanti etāyāti **kammavipāko**. Apaccayabhāvo nāma ariyamaggacetaṇāyāti āha “**maggacetaṇāyā**”ti. Yāva na kilesā pahīyanti, tāva ime sattā saiṇā eva aserivihārabhāvato āha “**aṇaṇo nikkilesa jāto**”ti.

Theyyaparibhogo (visuddhi. ṭī. 1.91) nāma sāmiparibhogābhāvato. Bhagavatāpi hi attano sāsane sīlavato paccayā anuññātā, na dussīlassa, dāyakānaṃ sīlavato yeva pariccāgo, na dussīlassa attano kārānaṃ mahapphalabhāvassa paccāsīsanato. Iti satthārā ananuññātattā dāyakehi ca apariccattattā “**dussīlassa paribhogo theyyaparibhogo nāmā**”ti vuttaṃ. Iṇavasena paribhogo **iṇaparibhogo**. Paṭiggāhakato dakkhiṇāvisuddhiyā abhāvato iṇaṃ gahetvā paribhogo viyāti attho. Yasmā sekkhā bhagavato orasaputtā, tasmā te pitusantakānaṃ paccayānaṃ dāyādā hutvā te paccaye paribhuñjantīti tesāṃ paribhogo **dāyajjaparibhogo nāma**. Kiṃ pana te bhagavato paccaye paribhuñjanti, udāhu gihīhi dinnanti? Gihīhi dinnāpi te bhagavatā anuññātattā bhagavato santakā honti ananuññātesu sabbena sabbāṃ paribhogābhāvato anuññātesuyeva paribhogasambhavato. **Dhammadāyādasutta**ñcetha (ma. ni. 1.29 ādayo) sādhaṃ.

Avītarāgānaṃ taṇhāparavasatāya paccayaparibhoge sāmibhāvo natthi, tadabhāvena vītarāgānaṃ tattha sāmibhāvo yathārucci paribhogasambhavato. Tathā hi te paṭikūlampi appaṭikūlākārena, appaṭikūlampi paṭikūlākārena tadubhayaṃ vivajjeyvā upekkhākārena ca paccaye paribhuñjanti, dāyakānaṃ manorathaṃ paripūrenti. Sesametha yaṃ vattabbaṃ, taṃ **visuddhimagge, taṃsaṃvaṇṇanāsu ca** vuttanayeneva veditabbaṃ. **Kilesaiṇānaṃ abhāvaṃ sandhāya “aṇaṇo”ti vuttaṃ**, na paccavekkhitaparibhogamattaṃ. Tenāha āyasmā ca bākulō – “sattāhameva kho ahaṃ, āvuso, saraṇo raṭṭhapaṇḍaṃ bhuñji”nti (ma. ni. 3.211).

Vatthukāmakilesakāmehi taṇhāya pavattiākāraṃ paṭicca atthi ramaṇavohāroti āha – “**duvidhesupi kāmesu taṇhāratīsanthava**”nti. **Mantitanti** kathitaṃ. **Uppannehi** satthupaṭiṇṇehi. **Samvibhattā**i kusalādivasena khandhādīhi ākārehi vibhattā. Sundaraṃ āgamananti **svāgataṃ**. Tato eva na kucchitaṃ āgataṃ. Soḷasavidhakiccassa pariyoṣitattā āha “**taṃ sabbāṃ mayā kata**”nti. Maggapaññāyameva tatiyavijjāsamaññāti āha – “**tīhi vijjāhi navahi ca lokuttaradhammehī**”ti.

Āṅgulimālasuttavaṇṇanāya līnatthappakāsanā samattā.

7. Piyajātikasuttavaṇṇanā

353. Pakatiniyāmenāi yathā sokuppattito pubbe iti kattabbesu asammo havasena cittaṃ pakkhandati, tāni cassa upaṭṭhahanti, na evaṃ sokassa cittasankocasabhāvato. Tena vuttaṃ “**pakatiniyāmena pana na paṭibhanti**”ti. Keci pana “sāmantā katipaye na kuṭumbaṃ sandhāreti.

Tenāha ‘**na sabbena sabbam paṭibhantī**’ti” vadanti. **Etthā**ti dutiyapade. Anekatthattā dhātūnaṃ “na paṭibhātī”ti padassa “na ruccatī”ti atthamāha. **Na paṭibhātī**ti vā bhuñjitukāmatācittam na upaṭṭhitanti attho. **Paṭiṭṭhitokāsanti** indriyāviṭṭhaṭṭhānaṃ vadati. Piyāyitabbato piyo jāti uppattiṭṭhānaṃ etesanti **piyajātikā**. Piyo pabhuti etesanti piyappabhutikāti vattabbe, u-kārassa va-kāraṃ, ta-kārassa ca lopam katvā “**piyappabhāvikā**”ti vuttam. Tenāha “**piyato pabhavanti**”ti.

355. Para-saddena samānattham ajjhattikabhāvanisedhanattham “pire”ti padanti āha “**ambhākaṃ pare**”ti. **Pireti** vā “parato”ti iminā samānattham nipātapadanti āha “**cara pireti parato gacchā**”ti.

356. **Dvidhā chetvā**ti ettha yadi itthī tassa purisassa piyā, katham dvidhā chindatīti āha “**yadi hī**”tiādi.

357. **Katham katheyanti** yathā bhagavā etassa brāhmaṇassa katesi, so ca me katesi, tathā cāham katheyam. **Maraṇavasena vipariṇāmo** attabhāvassa parivattattā. **Palāyivā gamanavasena** aññathābhāvo mittasanthavassa samāgamassa ca aññathābhūtattā.

Chaḍḍitabhāvenāti parivattitabhāvena. **Hatthagamanavasena aññathābhāvo** pubbe savase vattitānaṃ idāni vase avattanabhāvena.

Ācamehīti ācamanaṃ mukhavikkhālanam kārehi. Yasmā mukham vikkhālentā hi hatthapāde dhovivā vikkhālenti, tasmā “**ācamitvā**”ti vatvā pacchāpi tassa attham dassento “**mukham vikkhāletvā**”ti āha. Sesam suviññeyyameva.

Piyajātikasuttavaṇṇanāya līnatthappakāsanā samattā.

8. Bāhitikasuttavaṇṇanā

359. Sāvajjatāya upārambham arahatīti **opārambho**. Tenāha “**dosam āropanāraho**”ti. Bālā upārambhavatthumaññaṃ amūlakampi nam āropentā ugghosenti, tasmā te anāmasitvā “**viññūhī**”ti **idam padaṃ gahetvā** pañhena ñātuṃ icchitena atthena upārambhādīnaṃ upari uttaram **paripūretuṃ nāsakkhimhā**. **Tam kāraṇanti** tam uppattikāraṇam. Yadi hi mayā “viññūhī”ti padaṃ pakkhipitvā vuttam bhaveyya, pañhā me paripuṇṇā bhaveyya, na pana vuttā. Idāni pana tam kāraṇam uttaram **āyasmatā** ānandena “viññūhī”ti **evam vadantena paripūritam**.

360. Kosallapaṭipakkhato akosallam vuccati avijjā, taṃsamuṭṭhānato **akosallasambhūto**. Avajjam vuccati garahitabbaṃ, saha avajjehīti **sāvajjo**, gārayho. Rāgādīdosehi **sadoso**. Tehi eva **sabyābajjho**, tato eva sampati āyatiṅca **sadukkho**. Sabyābajjhādiko **nissandavipāko**.

Tathā attho vutto bhaveyyāti pucchāsabhāgenapi attho vutto bhaveyya, pucchantassa pana na tāva cittārādhanam. Tenāha – “**evam byākaraṇam pana na bhāriya**”nti, garukaraṇam na hoti visārajjam na siyāti adhippāyo. Tenāha – “**appahīnaakusalopi hi pahānam vaṇṇeyyā**”ti. Evarūpo pana yathākārī tathāvādī na hoti, na evam bhagavāti āha “**bhagavā**”tiādi. **Evam byākāsī**ti “sabbākusaladhammapahīno kho, mahārāja, tathāgato”ti evam byākāsī. **Sukkapakkhepi eseva nayoti** iminā “sabbesaṃyeva kusalānaṃ dhammānaṃ upasampadam vaṇṇeti”ti vutte yathā pucchā, tathā attho vutto bhaveyya, evam byākaraṇam pana na bhāriyam, asampādītakusaladhammopi upasampadam vaṇṇeyya. Bhagavā pana sammadeva sampādītakusalattā yathākārī tathāvādīti dassetuṃ “**evam byākāsī**”ti imamattam dasseti. Sesam suviññeyyameva.

Bāhitikasuttavaṇṇanāya līnatthappakāsanā samattā.

9. Dhammacetiyasuttavaṇṇanā

364. Medavaṇṇā uḷupavaṇṇā ca tattha tattha pāsāṇā ussannā ahesunti **medāḷupanti** gāmassa samañña jātā. **Uḷupavaṇṇā**ti candasamānavavaṇṇatāya medapāsāṇā vuttāti keci. Aṭṭhakathāyaṃ pana “**medavaṇṇā pāsāṇā kirettha ussannā ahesu**”nti idaṃ vuttaṃ. **Assā**ti senāpatissa. **Kathāsamuṭṭhāpanatthanti** mallikāya sokavinodanadhammakathāsamuṭṭhāpanattham.

Raṇṇāti pasenadīkosalarañña. **Mahaccā**ti mahatiyā. Padavipallāsenā cetam vuttaṃ. Pasādamarahantīti **pāsādikāni**. Tenāha “**saha rañjanakāni**”ti. Yāni pana pāsādikāni, tāni passituṃ vuttāni. **Pāsādikāni**ti vā saddahanasahitāni. Tenāha “**pasādajanakāni**”ti. “Appābādha”nti ādisu viya appasaddo abhāvatthoti āha “**nissaddāni**”ti. Aniyamatthavācī ya-saddo aniyamākāravācakopi hotīti “yatthā”ti padassa “yādisesū”tiādīmāha. Tathā hi **aṅgulimālasutte** (ma. ni. aṭṭha. 2.347 ādayo) “yassa kho”ti padassa “yādisassa kho”ti attho vutto.

366. **Paṭicchadanti** paṭicchādakaṃ. **Rājakakudhabhaṇḍāni**ti rājabhaṇḍabhūtāni. **Rahāyatī**ti raho karoti, maṃ ajjhesatīti attho.

367. Yathāsabhāvato ñeyyaṃ dhāreti avadhāretīti **dhammo**, ñāṇanti āha “**paccakkhaññaṇasaṅkhātassa dhammassā**”ti. **Anunayoti** anugacchanako. Diṭṭhena hi adiṭṭhassa anumānaṃ. Tenāha “**anumānaṃ anubuddhī**”ti. **Āpāṇakoṭikanti** yāva pāṇakoṭi, tāva jīvitapariyosānaṃ. **Etanti** dhammanvayasaṅkhātaṃ anumānaṃ. **Evanti** “idha panāha”nti vuttappakārena.

369. **Cakkhuṃ abandhante viyā**ti apāsādikatāya passantānaṃ cakkhuṃ attani abandhante viya. Kulasantānānubandho rogo **kularogo**. **Uḷāranti** sānubhāvaṃ. Yo hi ānubhāvasampanno, taṃ “mahesakka”nti vadanti. **Arahattaṃ gaṇhantoti** ukkaṭṭhaniddesoyaṃ, heṭṭhimaphalāni gaṇhantopi.

373. Jīvikā **jīvitavutti**.

374. Dhammaṃ ceteti saṃvedeti etehīti **dhammacetiyanī**, dhammassa pūjāvacaṇāni. Nanu cetāni buddhasaṅghaguṇadīpanānīpi santi? Kathaṃ “**dhammacetiyanīti dhammassa cittikāravacaṇāni**”ti vuttanti āha “**tīsu hī**”tiādi. Tattha yasmā buddharatanamūlakāni sesaratanāni tassa vasena laddhabbato. Kosalarañña cettha buddhagāravena dhammasaṅghagāraṃ paveditaṃ, tasmā “**bhagavati cittikāre kate dhammopi katova hoti**”ti vuttaṃ. Yasmā ca ratanattayapasādapubbikā sāsane sammāpaṭipatti, tasmā vuttaṃ – “**ādibrahmacariyāni maggabrahmacariyassa ādibhūtāni**”ti. Sesam suviññeyyameva.

Dhammacetiyasuttavaṇṇanāya līnatthappakāsanā samattā.

10. Kaṇṇakatthalasuttavaṇṇanā

375. **Anantarasutte vuttakaraṇīyenevā**ti “pāsāde vā nāṭakesu vā cittassādaṃ alabhamāno tattha tattha vicarituṃ āraddho”ti vuttakaraṇīyena. Appaduṭṭhapadosīnañhi evaṃ hotīti.

376. **Pucchitoti** “aññaṃ dūtaṃ nālatthu”nti pucchito. **Soti** rājā. Tāsaṃ vandanā sace uttarakālaṃ, **attano āgamanakāraṇaṃ kathessati**.

378. **Ekāvajjanenā**ti ekavīthijavanena. Tena ekacittaṃ tāva tiṭṭhatu, ekacittavīthiyāpi sabbam jānituṃ na sakkāti dasseti. “Idaṃ nāma atītaṃ jānissāmi”ti aniyametvā āvajjato yaṃ kiñci atītaṃ jānāti, niyamite pana niyamitamevāti āha – “**ekena hi...pe... ekadesameva jānāti**”ti. **Tena cittenā**ti “atītaṃ

sabbaṃ jānissāmī’ ti evaṃ pavattacittena. **Itaresūti** anāgatapaccuppannesu. **Kāraṇajātikanti** yuttisabhāvaṃ, yuttiyā yuttanti attho. **Samparāyagūṇanti** samparāye katakammaṃ viśesaṃ.

379. Lokuttaramissakāni kathitāni bodhirājakumārasutte viya lokiyā ceva lokuttarā ca. Yathālābhavasena cettha padhāniyaṅgānaṃ lokuttaraggahaṇaṃ veditabbaṃ. Paccekaṃ eva nesañca padhāniyaṅgatā daṭṭhabbā yathā “aṭṭhavimokkhā sandissanti lokuttaramissakā” ti. **Lokuttarānevāti** cettha yaṃ vattabbaṃ, taṃ parato āvi bhavissati. **Padhānanānattanti** padahananānattaṃ, bhāvanānuyogavisesanti attho. Saṅkhāre parimadditvā paṭipakkhadhamme ekadesato pajahitvā ṭhitassa bhāvanānuyogo sabbaṃ aparimadditasāṅkhārassa appahīnapaṭipakkhassa bhāvanānuyogato sukhumo visadova hoti, saccābhisamayena santānassa āhitavisesattāti āha – “**aññādisameva hi puthujjanassa padhānaṃ, aññādisaṃ sotāpannaṃ**” tiādi. Ayañca viśeso na kevalaṃ anariyaariyapuggalato eva, atha kho ariyesupī sekkhādivisesatopi labbhati abhisāṅkhāravisesato abhinīhārato ca ijjanatoti dassento “**aññādisaṃ sakadāgāmino**” tiādimāha. **Na pāpuṇātīti** yasmā puthujjano sabbathāva padhānaṃ padahanto sotāpattimaggaṃ adhigacchati, sotāpanno ca sakadāgāmimaggaṃ heṭṭhimaṃ uparimato oḷārikaṃ, uparimañca itarato sukhumāṃ tena pahātuṃ asakkuneyyassa pajahanato, iti adhigantabbavisesena ca adhigamapaṭipadāya saṅhasukhumatā tikkhavisadatā ca viññāyatīti āha – “**puthujjanassa padhānaṃ sotāpannaṃ padhānaṃ na pāpuṇātī**” tiādi.

Akūṭakaraṇanti avañcanakiriyaṃ. **Anavacchindananti** atiyānaṃ. **Aviñchanaṃ na** ākaḍḍhanaṃ, niyuttataṃ viniveṭhetvā samantā viparivattitvā samadhārāya chaḍḍanaṃ vā. Tassa kāraṇaṃ **taṃkāraṇaṃ, taṃ kāraṇanti** vā taṃ kiriyaṃ taṃ adhikāraṃ. **Dantehi gantabbabhūminti** dantehi pattabbaṭṭhānaṃ, pattabbavatthūṃ vā. **Cattāropi assaddhā nāma** uparimauparimasaddhāya abhāvato. Yena hi yaṃ appattaṃ, tassa taṃ natthi. **Ariyasāvakaṃ...pe... natthi** paṭhamamaggeneva māyāsāṭṭheyyānaṃ pahātābhattā. **Tenevāti** sammadeva viruddhapakkhānaṃ saddhādīnaṃ idhādhippetattā. Yadi evaṃ kathaṃ missakakathāti āha “**assakhaḷuṅkasuttante panā**” tiādi. **Cattārova honti** puthujjanādivasena.

Opammaṃsaṃsandane **adantahatthiādayo viyātiādinā** kaṇhapakkhe, **yathā pana dantahatthiādayotiādinā** sukkapakkhe ca sādharmaṇato ekajjhaṃ katvā vuttaṃ, asādharmaṇato bhinditvā dassetuṃ “**idaṃ vuttaṃ hotī**” tiādi vuttaṃ.

380. Sammappadhānā nibbisitṭhavīriyā. Tenāha – “**na kiñci nānākaraṇaṃ vadāmi, yadidaṃ vimuttiyā vimutti**” nti. Na hi sukkhavipassakatevijjachaḷabhiññānaṃ vimuttiyā nānākaraṇaṃ atthi. Tena vuttaṃ “**yaṃ ekassa**” tiādi. Kiṃ tvaṃ na jānāsīti sambandho. **Āgacchantīti** uppajjanavasena āgacchanti. **Nāgacchantīti** etthāpi eseva nayo. **Idaṃ pucchantoti** idaṃ pucchāmīti dassento. **Appahīnacetāsikadukkhā** anadhigataanāgāmītā. Tenāha “**upapattivasena āgantāro**” ti. **Samucchinnadukkhāti** samugghāṭitacetāsikadukkhā.

381. Tamhā ṭhānāti tato yathādighigataissariyaṭṭhānato. Puna **tamhā ṭhānāti** tato duggatā. **Sampannakāmaguṇanti** uḷārakāmaguṇasamannāgatāṃ.

Tatthāti kāmadevaloke. **Ṭhānabhāvato** arahattañce adhigataṃ, tāvadeva parinibbānato. **Uparideve cāti** uparūpari bhūmivāse deve ca, cakkhuviññāṇadassanenaṃpi dassanāya nappahontīti vojanā.

382. Vuttanayenevāti devapucchāya vutteneva nayena. **Sā kira kathāti** “natthi so samaṇo vā brāhmaṇo vā, yo sakideva sabbaṃ neyya” nti kathā. **Teti** viṭaṭṭubhasañjayā. **Imasmimpyeva ṭhāneti** imasmiṃ migadāyeyeva. Sesāṃ suviññeyyameva.

Kaṇṇakattthalasuttavaṇṇanāya līnatthappakāsanā samattā.

Niṭṭhitā ca rājavaggavaṇṇanā.

5. Brāhmaṇavaggo

1. Brahmāyusuttavaṇṇanā

383. “Mahāsatto mahiddhiko mahānubhāvo”tiādīsu (mahāva. 38) ulāratā visayo, “mahājanakāyo sannipatī”tiādīsu sambahulabhāvavisayo, idha pana tadubhayampissa atthoti “mahatāti guṇamahattenapi mahatā”tiādi vuttaṃ. **Appicchatādīti ādi-saddena** santuṭṭhisallekhapavivekaasamsaggavīriyārambhādīnaṃ saṅgaho.

Diṭṭhisīlasāmaññaṅghātasāṅkhātenāti ettha “niyato sambodhiparāyaṇo” (saṃ. ni. 2.41; 3.998, 1004) – “atṭhānametaṃ, bhikkhave, anavakāso, yaṃ diṭṭhisampanno puggalo sañcicca pāṇaṃ jīvitā voropeyyāti netam ṭhānaṃ vijjati”tiādivacanato diṭṭhisīlānaṃ niyatasabhāvattā sotāpannāpi aññaṃaññaṃ diṭṭhisīlasāmaññaṇa saṃhatā, pageva sakadāgāmiādayo. “Tathārūpāya diṭṭhiyā diṭṭhisāmaññaṅgato viharati (dī. ni. 3.324, 356; ma. ni. 1.492; 3.54; a. ni. 6.11; pari. 274) tathārūpehi sīlehi sīlasāmaññaṅgato viharatī”ti (dī. ni. 3.324; ma. ni. 1.492; 3.54; a. ni. 6.12; pari. 274) vacanato puthujjanānampi diṭṭhisīlasāmaññaṇa saṃhatabhāvo labbhatiyeva.

Oṭṭhapahatakaraṇavasena atthavibhāgavasena. **Sanighaṇḍukeṭubhānanti** ettha **nighaṇḍū**ti vacanīyavācakahāvena atthaṃ saddaṅca khaṇḍati vibhajja dassetīti **nikhaṇḍu**. So eva idha kha-kārassa gha-kāraṃ katvā “**nighaṇḍū**”ti vutto. Kiṭṭati gameti kiriyādivibhāgaṃ, taṃ vā anavasesapariyādānato gamento pūretīti **keṭubhaṃ**. **Vevacanappakāsakanti** pariyaṃsaddadīpakam, ekekassa atthassa anekapariyāyavacanavibhāvakanti attho. Nidassanamattañcetaṃ anekesampi atthānaṃ ekasaddavacanīyatāvibhāvanavasenaṃ tassa ganthassa pavattattā. Vacībhedaḍilakkhaṇā kiriyā kappīyati etenāti kiriyākappo, so pana vaṇṇapadasambandhapadathavibhāgato bahuvikappoti āha “**kiriyākappavikappo**”ti. Idaṅca mūlakiriyākappaganthaṃ sandhāya vuttaṃ. So hi satasahassaparimāṇo nalacariyādīpakaraṇaṃ. Ṭhānakaraṇādivibhāgato nibbacanavibhāgato ca akkharā pabhedīyanti etehīti **akkharappabhedā**, sikkhāniruttiyo. **Etesanti** vedānaṃ. Te eva vede padaso kāyatīti **padako**. Taṃ taṃ saddaṃ tadatthaṅca byākaroti byācikkhati etenāti **byākaraṇaṃ**, saddasatthaṃ. Āyatim hitaṃ tena loko na yatati na īhatīti **lokāyataṃ**. Tañhi ganthaṃ nissāya sattā puññakiriyāya cīttampi na uppādentī. Vayatīti vayo, na vayo avayo, na avayo **anavayo**, ādimajjhapariyosānesu kathaci aparikilanto avitthāyanto te ganthe sandhāreti pūretīti attho. Dve paṭisedhā pakatiṃ gamentīti dassento “**avayo na hotī**”ti vatvā tattha avayaṃ dassetuṃ “**avayo...pe... na sakkotī**”ti vuttaṃ.

384. Garūti bhāriyaṃ attānaṃ tato mocetvā gamanaṃ dukkaraṃ hoti. **Anatthopi uppajjati** nindābyārosaupārambhādi. **Abbhuggatoti** ettha abhisaddayogena **itthambhūtākhyānatthe upayogavacanam**.

Lakkhaṇānīti lakkhaṇadīpanāni mantapadāni. **Antaradhāyantīti** na kevalaṃ lakkhaṇamantāniyeva, aññānīpi brāhmaṇānaṃ ñāṇabalābhāvena anukkamena antaradhāyanti. Tathā hi vadanti “ekasataṃ addhariyaṃ dipaññaṃsamattato sāmā”tiādi. Paṇidhimahato samādānamahatotiādīnaṃ paccakaṃ **maha-saddo** yojetabbo. Paṇidhimahantatādi cassa **buddhavaṃsacariyāpiṭakavaṇṇanā**divaseneva veditabbo. **Niṭṭhāti** nipphattiyo. **Jātisāmaññatoti** lakkhaṇajātiyā lakkhaṇabhāvena samānabhāvato. Yathā hi buddhānaṃ lakkhaṇāni suvisuddhāni supariyattāni paripuṇṇāni ca honti, na evaṃ cakkavattīnaṃ. Tenāha “**na teheva buddho hotī**”ti.

Abhirūpatā dīghāyukatā, appātaṅkatā brāhmaṇādīnaṃ piyamaṇāpatāti **catūhi acchariyadhammehi**. Dānaṃ piyavacanāṃ atthacariyā samānattatāti imehi **catūhi saṅgahavattūhi**. **Raṅjanatoti** pītijananato. Cakkaṃ cakkaratanaṃ vatteti pavattetīti **cakkavattī**, sampatticakkehi sayam vatteti, tehi ca paraṃ sattanikāyaṃ vatteti pavattetīti **cakkavattī**, parahitāvaho iriyāpathacakkānaṃ vatto

vattanam etassa atthīti cakkavattī, appaṭihataṃ vā āṇāsankhātaṃ cakkam vattetīti **cakkavattī**, appaṭihataṃ vā āṇāsankhātaṃ cakkam vattetīti **cakkavattī**, khattiyamaṇḍalādisaññītaṃ cakkam samūhaṃ attano vase vattetīti **cakkavattī**. Dhammaṃ caraṭīti **dhammiko**. Dhammato anapetattā dhammo rañjanatthēna rājāti **dhammarājā**. **Kopādīti ādi**-saddena kāmaloḥhamānamadādīke saṅgaṇhāti. **Vijitāvīti** vijitavā. Kenaci akampiyatṭhena **janapadatthāvariyaṃ**. Dalhabhattibhāvato vā janapado thāvariyaṃ patto etthāti **janapadatthāvariyaṃ**. Cittikatabhāvādināpi (khu. pā. aṭṭha. 6.3; dī. ni. aṭṭha. 2.33; saṃ. ni. aṭṭha. 3.5.223; su. ni. aṭṭha. 1.226; mahāni. aṭṭha. 50) cakkassa ratanaṭṭho veditabbo. Esa nayo sesesupi. Ratinimittatāya vā cittikatādibhāvassa ratijanaṇaṭṭhena ekasaṅgahatāya visuṃ aggaṇaṃ.

Imehi pana ratanehi rājā cakkavattī yaṃ yamatthaṃ paccanubhoti, taṃ taṃ dassetuṃ “**imesu panā**”tiādī vuttaṃ. **Ajitaṃ jināti** mahesakkhataṣaṃvattaniyakammanissandabhāvato. **Vijite yathāsukhaṃ anuvarati** hatthiratanam assaratanañca abhiruhitvā tesam ānubhāvena antopātarāseyeva sakalam pathaviṃ anusaṃyāyitvā rājadhāniyaṃ paccāgamanato. **Pariṇāyakaratanena vijitamanurakkhati** tena tattha tattha kattabbakiccassa saṃvidhānato. **Sesehīti** maṇiratanaitthiratanagahapatiratanehi. Tattha maṇiratanena yojanappamāṇe dese andhakāraṃ vidhamitvā ālokadassanādinā sukhamanubhavati, itthiratanena atikkantamānusrūpasampattidassanādivasena, gahapatiratanena icchiticchitamānikanakarajatādihanappaṭilābhavasena. **Ussāhasattiyogo** yena kenaci appaṭihatāṇācakkabhāvasiddhito. Hatthiassaratanādīnaṃ mahānubhāvattā kosasampattiyāpi pabhāvasampattisiddhito “**hatthi...pe... yogo**”ti vuttaṃ. Koso hi nāma sati ussāhasampattiyam (uggatejassa sukumāraparakkamassa pasannamukhassa sammukhe pāpuṇāti). **Pacchimenāti** pariṇāyakaratanena. Tañhi sabbarājakkicesu kusalam avirajjhanapayogaṃ. Tenāha “**mantasattiyogo**”ti. Tividhasattiyogaphalam paripuṇṇam hotīti sambandho. **Sesehīti** sesehi pañcahi ratanehi. **Adosakusalamūlajanitakammānubhāvenāti** adosasaṅkhātena kusalamūlena sahaṇātipaccayavasena uppāditakamassa ānubhāvena **sampajjanti** sommataratanajātikattā. **Majjhimāni** maṇiitthigahapatiratanāni. **Alobha...pe... kammānubhāvena sampajjanti** ulāradhanassa ulāradhanapaṭilābhakāraṇassa ca pariccāgasampadāhetukattā. **Pacchimanti** pariṇāyakaratanam. Tañhi **amoha...pe... kammānubhāvena sampajjati** mahāpaññeneva cakkavattirājakkiccassa pariṇetabbattā.

Saraṇato paṭipakkhavidhamanato **sūrā**. Tenāha “**abhīrukajātikā**”ti. Asure vijjintvā ṭhitattā vīro, sakko devānamindo, tassa aṅgaṃ devaputto senaṅgabhāvatoṭi vuttaṃ “**vīraṅgarūpāti devaputtasadisakāyā**”ti. **Sabhāvoti** sabhāvabhūto attho. **Vīrakāraṇanti** vīrabhāvakāraṇam. **Vīriyamayasarirā viyāti** saviggahavīriyasadisā saviggahañce vīriyam siyā, taṃsadisāti attho. Nanu rañño cakkavattissa paṭisenā nāma natthi, yamassa puttā pamaddeyyuṃ, atha kasmā “parasenapamaddanā”ti vuttanti codanam sandhāyāha “**sace**”tiādī. Tena parasenā hotu vā mā vā, te pana evam mahānubhāvāti dasseti. **Dhammenāti** katūpacitena attano puññadharmena. Tena hi sañcoditā pathaviyam sabbarājāno paccuggantvā “svāgataṃ te mahārājā”tiādī vtvā attano rajjam rañño cakkavattissa niyyādentī. Tena vuttaṃ “**so imaṃ...pe... ajjhāvasati**”ti. Aṭṭhakathāyaṃ pana tassa yathāvuttadhammassa cirataram vipaccituṃ paccayabhūtam cakkavattivattasamudāgataṃ payogasampattisaṅkhātam dhammaṃ dassetuṃ “**pāṇo na hantabbotiādinā pañcasiladhammenā**”ti vuttaṃ. Evañhi “adaṇḍena asatthenā”ti idaṃ vacanam suṭṭhutam samatthitam hoti, yasmā rāgādayo pāpadhammā uppajjamānā sattasantānam chādetvā pariyoṇandhitvā tiṭṭhanti, kusalapavattim nivārenti, tasmā te “chadanā, chadā”ti ca vuttā.

Vivaṭṭetvā parivattetvā. Pūjārahata vuttā “arahatīti araha”nti. **Tassāti** pūjārahataya. **Yasmā sammāsambuddho**, tasmā arahanti. **Buddhattahetubhūtā vivaṭṭacchadatā vuttā** savāsanasabbakilesappahānapubbakattā buddhabhāvasiddhiyā. **Arahaṃ vaṭṭābhāvenāti** phalena hetuanumānadassanaṃ. **Sammāsambuddho chadanābhāvenāti** hetunā phalānumānadassanaṃ. **Hetudvayaṃ vuttaṃ** “vivaṭṭo vicchado cā”ti. **Dutiya vesārajjenāti** “khīṇāsavassa te paṭijānato”tiādinā (ma. ni. 1.150) āgatena vesārajjena. **Purimasiddhīti** purimassa padassa atthasiddhi.

Paṭhamenāti “sammāsambuddhassa te paṭijānato”tiādīnā (ma. ni. 1.150) āgatena vesārajjena. **Dutiyasiddhīti** buddhattasiddhi. **Tatīyacatutthehīti** “ye kho pana te antarāyikā dhammā”tiādīnā (ma. ni. 1.150), “yassa kho pana te atthāyā”tiādīnā (ma. ni. 1.150) ca āgatehi tatiyacatutthehi vesārajjehi. **Tatīyasiddhīti** vivaṭṭacchadanatā siddhi. Yāthāvato antarāyikanīyānikadhammāpadesena hi satthu vivaṭṭacchadabhāvo loke pākaṭo ahosi. **Purimaṃ dhammacakkhūti** purimapadaṃ bhagavato dhammacakkhūṃ **sādhēti** kilesārīnaṃ saṃsāracakkassa ca arānaṃ hatabhāvādīpanato. **Dutīyaṃ** padaṃ **buddhacakkhūṃ sādhetī** sammāsambuddhasseva taṃ sambhavato. **Tatīyaṃ** padaṃ **samantacakkhūṃ sādhetī** savāsanasabbakilesappahānadīpanato. “Sammāsambuddho”ti hi vatvā “vivaṭṭacchado”ti vacanaṃ buddhabhāvāvahameva sabbakilesappahānaṃ vibhāvetīti. **Sūrabhāvanti** lakkhaṇavibhāvanena visadaññataṃ.

385. Gavesīti (dī. ni. 1.287) ñāṇena pariyesanaṃ akāsi. **Samānayīti** ñāṇena saṅkalento samānaṃ ānāyī samāhari. **Na sakkoti** saṅkucite iriyāpathe yebhuyyena tesāṃ dubbibhāvanato. **Kaṅkhatīti** padassa ākaṅkhatīti ayamatthoti āha – “**aho vata passeyyanti patthanaṃ uppādetī**”ti. **Kicchatīti** kilamati. “Kaṅkhatī”ti padassa pubbe āsīsanatthataṃ vatvā idāni tassa saṃsayatthattameva vikappantaravasena dassento “**kaṅkhāya vā dubbalā vimati vuttā**”tiādī vuttam. **Tīhi dhammehi** tippakārehi saṃsayadhammehi. **Kālussiyabhāvoti** appasannatāya hetubhūto āvilabhāvo. Yasmā bhagavato kosohitaṃ sabbabuddhāveṇikaṃ vatthaguyhaṃ suvisuddhakañcanaṃaṇḍalasannikāsaṃ attano saṅghānasannivesasundaratāya ājāneyyagandhahatthino varaṅgacārubbhāvaṃ vikasamānatapaniyāravindasamujjalakesarāvattavilāsaṃ sañjhāpabhānurañjītajalavanantarābhilakkhita-sampuṇṇacandamaṇḍalasoḥaṅca attano siriyā abhibhuyya virājati, yaṃ bāhirabbhantaramalehi anupakkilīṭṭhatāya cirakālaṃ supericītabrahmacariyādhikāratāya susaṅghitasāṅghānasampattiyā ca kopīnampi santāṃ akopīnameva, tasmā vuttam “**bhagavato hī**”tiādī. **Pahūtabhāvanti** puthulabhāvaṃ. Ettheva hi tassa saṃsayo, tanumudusukumāratādīsu panassa guṇesu tassa vicāraṇā eva nāhosi.

Hirikaraṇokāsanti hiriyitabbaṭṭhānaṃ. **Chāyanti** paṭibimbaṃ. Kīdisanti āha “**iddhiyā**”tiādī. **Chāyārūpanti** bhagavato paṭibimbarūpaṃ. Tañca kho buddhasantānato vinimuttaṃ rūpakamattaṃ bhagavato sarīravaṇṇasaṅghānāvayavaṃ iddhimayaṃ bimbakamattaṃ, taṃ pana dassento bhagavā yathā attano buddharūpaṃ na dissati, tathā katvā dasseti. **Nīharitvāti** pharitvā.

Kaṇṇasotānaṃ upacitatanutambalomatāya dhotarajatapanālikāsadisatā vuttā. **Mukhapariyanteti** kesante.

Kiriyākaraṇanti kiriyāya kāyikassa vācasikassa paṭipatti. **Tatthāti** tesu kiccesu. Dhammakathikānaṃ vattaṃ dassetuṃ **bījaniggahaṇaṃ** kataṃ. Na hi aññathā sabbassapī lokassa alaṅkārahūtaṃ paramukkamaṃsagataṃ sikkhāsaṃyamānaṃ buddhānaṃ mukhacandamaṇḍalaṃ paṭicchādetabbaṃ hoti.

Pattharītavītānaolambitagandhadāmakusumadāmaka **gandhamaṇḍalamāle**. **Pubbabhāgena paricchinditvāti** “**ettakaṃ velaṃ samāpattiyā vītināmessāmī**”ti evaṃ pavattena pubbabhāgena kālaṃ paricchinditvā. Paccayadāyakesu anurodhavasena **parisaṃ ussādentō vā** paggaṇhanto, adāyakesu virodhavasena **parisaṃ apasādentō vā**.

Yogakkhemaṃ antarāyābhāvaṃ. **Sabhāvaguṇenevāti** yathāvuttaguṇeneva. Bhoto gotamassa guṇaṃ saviggahaṃ **cakkavāḷaṃ atisambādhaṃ** vitthārena sandhāretuṃ appahontato. **Bhavaggaṃ atinīcaṃ** uparūpari sandhāretuṃ appahontato.

386. Tīhānagamanādīsu (dī. ni. 1.285) bhūmiyaṃ suṭṭhu samāpattiṭṭhitā pādā etassāti **suppatiṭṭhitapādo**. Taṃ pana bhagavato suppatiṭṭhitapādātaṃ byatirekamukhena vibhāvetuṃ “**yathā hī**”tiādī vuttam. Tattha **aggatalanti** aggapādātaṃ. **Pañhīti** pañhitalaṃ. **Passanti** pādātalassa dvīsu passesu ekekaṃ, ubhayameva vā pariyaṇtaṃ passaṃ. **Suvaṇṇapādukatalaṃ viya** ujukaṃ

nikkhipiyamānaṃ. **Ekappahārenevāti** ekakkhaṇeveyeva. **Sakalaṃ pādatalaṃ bhūmiṃ phusati** nikkhipane. Ekappahāreneva sakalaṃ pādatalaṃ bhūmito uṭṭhahatīti yojanā.

Tatrāti tāya suppatiṭṭhitapādatāya anupubbaninnāva acchariyabbhutaṃ **idaṃ** vuccamānaṃ nissandaphalaṃ. Vuttamevatthaṃ satthu tidivagamanena supākaṭaṃ kātum **“tathā hi”**tiādiṃ vatvā **“na hi”**tiādinā taṃ samattheti. Tena paṭhamalakkhaṇatopi dutiyalakkhaṇaṃ mahānubhāvanti dasseti. Tathā hi vakkhati **“antamaso cakkavattirañño parisāṃ upādāya sabbopi cakkalakkhaṇasseva parivāro”**ti. Yugandharapabbatassa tāvatimsabhavanassa ca pakatipadanikkhepaṭṭhānupasaṅkamane neva buddhānaṃ, na devatānaṃ ānubhāvo, atha kho buddhānaṃ lakkhaṇānubhāvoti imamattaṃ nidassitaṃ. **Sīlatejena...pe... dasannaṃ pāramīnaṃ ānubhāvenāti** idampi lakkhaṇanibbattakammavisesakittanamevāti daṭṭhabbaṃ. **Sabbāvantehīti** sabbapadesavantehi.

Nābhiparicchinnāti nābhiyaṃ paricchinnā paricchedavasena ṭhitā. **Nābhimukhaparikkhepapaṭṭoti** pakaticakkassa akkhabbhāhatapariharaṇatthaṃ nābhimukhe ṭhapetabbaparikkhepapaṭṭo. **Nemimaṇikāti** nemiyaṃ āvaḷibhāvena ṭhitamaṇikālekhā.

Sambahulavāroti bahuvidhalekhaṅgavibhāvanavāro. **Sattīti** āvudhasatti. **Sirivacchoti** sirimukhaṃ. **Nandīti** dakkhiṇāvattaṃ. **Sovattikoti** sovattiaṅko. **Vaṭṭasakoti** āveḷaṃ. **Vaḍḍhamānakanti** purisaḥāri purisaṅgaṃ. **Morahatthakoti** morapiṇchakalāpo, morapiṇcha parisibbito vā bījaniviseso. **Vālabījanīti** cāmarivālaṃ. Siddhatthādi **punṇaghaṭapunṇapātiyo**. **“Cakkavālo”**ti vatvā tassa padhānāvayave dassetaṃ **“himavā sineru...pe... sahasānī”**ti vuttaṃ.

Āyatapaṇhīti idaṃ aññesaṃ paṇhito dīghataṃ sandhāya vuttaṃ, na pana atidīghatanti āha **“paripuṇṇapaṇhī”**ti. Yathā pana paṇhilakkhaṇaṃ paripuṇṇaṃ nāma hoti, taṃ byatirekamukhena dassetaṃ **“yathā hi”**tiādi vuttaṃ. **Āraggenāti** maṅḍalāya sikhāya. **Vaṭṭetvāti** yathā suvaṭṭaṃ hoti, evaṃ vaṭṭetvā. **Rattakambalagenḍukasadisāti** rattakambalamayagenḍukasadisā.

Makkaṭassevāti vānarassa viya. Dīghabhāvena samataṃ sandhāyetaṃ vuttaṃ. **Niyyāsatenāti** chadikaniyyāsādiniyyāsasammissena telena.

Talunāti sukumārā.

Cammenāti aṅgulantaraveṭhitacammena. **Paṭibaddhaaṅgulantaroti** ekato sambaddhaaṅgulantaro. **Ekappamāṇāti** dīghato samānappamāṇā. **Yavalakkhaṇanti** abbhantarato aṅgulipabbeṭhitaṃ yavalakkhaṇaṃ. **Paṭivijjhivāti** taṃtampabbānaṃ samānadesatāya aṅgulīnaṃ pasāritakāle aññamaññaṃ vijjhitaṃ viya phusitvā tiṭṭhanti.

Saṅkhā vuccanti gopphakā, uddhaṃ saṅkhā etesanti **ussaṅkhā**, pādā. **Piṭṭhipādeti** piṭṭhipādasamīpe. **Sukhena pādā parivattanti** pādanāmanādīsu, teneva gacchantānaṃ tesam heṭṭhā **pādatalāni** dissanti. **Tenāti** gopphakānaṃ piṭṭhipādato uddhaṃ patiṭṭhitattā. Caturāṅgulamattañhi tāni uddhaṃ ārohitvā patiṭṭhahanti, nigulhāni ca honti, na aññesaṃ viya paññāyamānāni. Satipi desantarappavattiyaṃ niccaloti dassanattaṃ **nābhiggahaṇaṃ**.

Yasmā eṇīmigassa samantato ekasadisamaṃsā anukkamena uddhaṃ thūlā jaṅghā honti, tasmā vuttaṃ **“eṇīmigasadisajaṅghā”**ti. **Paripuṇṇajaṅghoti** samantato maṃsūpacayena paripuṇṇajaṅgho. Tenāha **“na ekato”**tiādi.

Etenāti **“anonamanto”**tiādivacanena, jāṇuphāsuhāvadīpanenāti attho. **Avasesajanāti** iminā lakkhaṇena rahitā janā. **Khujjā vā honti** heṭṭhimakāyato uparimakāyassa rassatāya. **Vāmanā vā** uparimakāyato heṭṭhimakāyassa rassatāya. Etena ṭhapetvā sammāsambuddhaṃ cakkavattinañca itare

sattā khujjā vāmanā cāti dasseti.

Ohitanti samohitaṃ antogadhaṃ. Tathābhūtaṃ pana taṃ tena channaṃ hotīti āha “**paṭicchanna**”nti.

Suvaṇṇavaṇṇoti suvaṇṇavaṇṇavaṇṇoti ayamettha atthoti āha “**jātihiṅgulakenā**”tiādi. Svāyamattho āvuttiñāyena ca veditabbo. Sarīrapariyāyo idha vaṇṇasaddoti adhippāyena paṭhamavikappaṃ vatvā tathārūpāya pana rulhiyā abhāvaṃ manasi katvā vaṇṇadhātupariyāyameva vaṇṇasaddaṃ gahetvā dutiyavikappo vutto.

Rajoti sukhumarajo. **Jallanti** malīnabhāvāvaho reṇusañcayo. Tenāha “**malaṃ vā**”ti. Yadi vivaṭṭati, kathaṃ nhānādīti āha “**hatthadhovanā**”tiādi.

Āvaṭṭapariyosāneti padakkhiṇāvattāya ante.

Brahmuno sarīraṃ purato vā pacchato vā anonamitvā ujukameva uggatanti āha “**brahmā viya ujugatto**”ti. **Passavaṅkāti** dakkhiṇapassena vā vāmapassena vā vaṅkā.

Hatthapiṭṭhiādivasena satta ussādā etassāti **sattussado**.

Sīhassa pubbaddhaṃ sīhapubbaddhaṃ, paripuṇṇāvayavatāya sīhapubbaddhaṃ viya sakalo kāyo assāti **sīhapubbaddhakāyo**. **Sīhassevāti** sīhassa viya. **Sanṭhantīti** sanṭhahanti. **Nānācittēnāti** vivīdhacittēna. **Puññacittēnāti** pāramitāpuññacittarūpena. **Cittitoti** sañjātacittabhāvo.

Dvinnam koṭṭānamantaranti dvinnam piṭṭhibāhānaṃ vemajjhaṃ, piṭṭhimajjhassa uparibhāgo. **Citaṃ paripuṇṇanti** aninnabhāvena citaṃ, dvīhi koṭṭehi samatalatāya paripuṇṇam. **Uggammāti** uggantvā.

Nigrodhaparimaṇḍalo viya parimaṇḍalo **nigrodhaparimaṇḍalo** ekassa parimaṇḍalasaddassa lopam katvā. Na hi sabbo nigrodho maṇḍalo. Tenāha “**samakkhandhasākho nigrodho**”ti. Parimaṇḍalasaddasannidhānena vā parimaṇḍalova nigrodho gayhatīti parimaṇḍalasaddassa lopena vināpi ayamattho labhatīti āha “**nigrodho viya parimaṇḍalo**”ti. **Yāvatakvaṣṣāti** o-kārassa va-kārādesam katvā vuttaṃ.

Samavaṭṭitakkhandhoti samaṃ suvaṭṭitakkhandho. Koñcā viya dīghagalā, bakā viya vaṅkagalā, varāhā viya puthulagalāti yojanā. **Suvaṇṇāliṅgasadisoti** suvaṇṇamayakhuddakamudīṅgasadiso.

Rasaggasaggīti madhurādibhedam rasam gasanti anto pavesantīti rasaggasā, rasaggasānam aggā rasaggasaggā, tā etassa santīti rasaggasaggī. **Tenāti** ojāya apharaṇena, hīnadhātukattā **te bahvābādhā honti**.

“Hanū”ti sannissayadantādhārassa samaññā, taṃ bhagavato sīhahanusadisam, tasmā bhagavā **sīhahanu**. Tattha yasmā buddhānaṃ rūpakāyassa dhammakāyassa ca upamā nāma nihīnupamāva, natthi samānupamā, kuto adhikūpamā, tasmā ayampi nihīnupamāti dassetuṃ “**tatthā**”tiādi vuttaṃ. Tibhāgavasena maṇḍalatāya **dvādasiyam pakkhassa candasadisāni**.

Dantānaṃ uccanīcatā abhantarabāhirapassavasēnapi veditabbā, na aggavasēneva. Tenāha “**ayapaṭṭachinnasaṅkhapaṭalam viyā**”ti. **Ayapaṭṭanti** ca kakacam adhippetam. **Visamāti** visamasanṭhānā.

Vicchinditvā vicchinditvā pavattasaratāya **chinnassarāpi**. Anekākāratāya **bhinnassarāpi**. Kākassa viya amanuññasaratāya **kākassarāpi**. **Apalibuddhattāti** anupaddutavatthukattā. **Vatthunti** ca akkharupattiṭṭhānamāha. **Aṭṭhaṅgasamannāgatoti** ettha aṭṭhaṅgāni parato āgamissanti. **Mañjughosoti** madhurassaro.

Karavīkasaddo yesaṃ sattānaṃ sotapathaṃ upagacchati, te attano sarasampattiyā pakatiṃ jahāpetvā avase karonto attano vase vatteti, evaṃ madhuroti dassento “**tatrida**”ntiādimāha. **Taṃ pītinti taṃ** buddhagataṃ pītiṃ. Teneva nīhārena punappunaṃ pavattantaṃ avijahitvā vikkhambhitakilesā therānaṃ santike laddhadhammassavanasappāyā upanissayasampattiyā paripakkaññatāya “**sattahi...pe... patiṭṭhāsī**”ti. Sattasatamattena orodhajanena saddhiṃ padasāva therānaṃ santikaṃ upagatatā “**sattahi jaṅghāsatehi saddhi**”nti vuttaṃ.

Abhinīlanettoti adhikanīlanetto. Adhikanīlatā ca sātisayaṃ nīlabhāvena veditabbā, na nette nīlavaṇṇasseva adhikabhāvatoti āha “**na sakalanīlanettovā**”tiādi. Pītalohitavaṇṇā setamaṇḍalagatarājivasena, nīlasetakāḷavaṇṇā pana taṃtaṃmaṇḍalavaseneva veditabbā.

Cakkhubhaṇḍanti akkhidalanti keci, akkhidalapattanti aññe. Akkhidalehi pana saddhiṃ akkhibimbanti veditabbaṃ. Evañhi viniggaṭagambhīrajotanāpi yuttā hoti.

Uṇṇāsaddo loke avisesato lomariyāyo, idha pana lomavisesavācakoti āha “**uṇṇaloma**”nti. **Nalāṭamajjhajātāti** nalāṭamajjhagatā. **Odātātāya upamā**, na mudutāya. **Rajatapubbuḷakāti** rajatamayatārakā.

Dve atthavase paṭicca vuttanti yasmā buddhā cakkavattino ca paripuṇṇanalāṭatāya paripuṇṇasābimbatāya ca “**uṇḥīsāsīsā**”ti vuccanti, tasmā te dve atthavase paṭicca “**uṇḥīsāsīsō**”ti idaṃ vuttaṃ. Idāni taṃ atthadvayaṃ bhagavati suppatiṭṭhitanti dassetuṃ “**tathāgatassahi**”tiādi vuttaṃ. Saṅhatamatāya suvaṇṇavaṇṇatāya ca **rañño baddhaṇḥīsapaṭṭo viya viroceti**. **Kappasīsāti** dvidhābhūtasīsā. **Phalasisāti** phalasadisasīsā. **Aṭṭhisīsāti** maṃsassa abhāvato tacopariyonaddhaaṭṭhimattasīsā. **Tumbasīsāti** lābusadisasīsā. **Pabbhārasīsāti** piṭṭhibhāgena olambamānasīsā. **Purimanayenāti** paripuṇṇanalāṭatāpakkena. **Uṇḥīsaveṭṭhitasīsō viyāti** uṇḥīsapaṭṭena veṭṭhitasīsapadeso viya. **Uṇḥīsaṃ viyāti** chekena sippinā viracitaṇḥīsamaṇḍalaṃ viya.

Kammanti yena yena kammena yaṃ yaṃ lakkhaṇaṃ nibbattaṃ, taṃ taṃ kammaṃ. **Kammasarikkhakanti** tassa tassa lakkhaṇassa taṃkammānurūpatā. **Lakkhaṇanti** tassa mahāpurisalakkhaṇassa aviparītasabhāvo. **Lakkhaṇānisamsanti** taṃ lakkhaṇapaṭilābhena laddhabbaṃ. **Imāni kammādīnīti** imāni anantaraṃ vuttāni kammakammasarikkhakādīni **dassetvā** taṃ sarūpato vibhāvetvā **kathetabbāni** saṃvaṇṇakena.

Ratanavicittasuvaṇṇatorānaṃ tasmim kāle manussaloke natthīti vuttaṃ “**devanagare**”ti. Sabbaso supupphitasālarukkho asādhāraṇasobho manussūpacāre na labhatīti āha “**selantaramhī**”ti. **Kiriyaṅcāranti** kāyikavācasikakiriyaṃpavattiṃ.

387. Satatapāṭihāriyanti satataṃ carimabhava sabbakālaṃ lakkhaṇanibbattakammānubhāvahetukaṃ buddhāveṇikaṃ pāṭihāriyaṃ. Buddhānaṃ atidūre pādaṃ nikkhipitukāmānampi nātidūre eva nikkhipanaṃ hotīti “**na atidūre ṭhapessāmīti uddharatī**”ti vuttaṃ. Pakatisaṅcaraṇavasenetāṃ vuttaṃ, tādisena pādena anekayojane ṭhapessāmīti uddharaṇampi hotiyeva. **Atidūraṃ hītiādi** pamāṇātikame dosadassanaṃ. **Evaṃ satīti** evaṃ dakkhiṇapādavāmapādānaṃ yathādhīppetapatiṭṭhitaṭṭhāne sati. **Padavicchedoti** padavāravicchedo. Yādisaṃ pasārento vāmapādassa uddharaṇaṃ patiṭṭhānaṅca, dakkhiṇapādassa tādisameva, iti nesaṃ uddharaṇapatiṭṭhānānaṃ samānato aññamaññabhāvena anūnādhikatāya vuttaṃ “**dakkhiṇapādakiccaṃ vāmapādena niyamitaṃ, vāmapādakiccaṃ dakkhiṇapādena niyamita**”nti.

Divāti upakaṭṭhāya velāya. **Vihārabhattatthāyāti** vihāre yathāvuddhaṃ gahetabbabhattatthāya. **Pacchato āgacchantoti** pakatigamanena pacchato āgacchanto. **Okāsaṃ na labhatī** padanikkhepaṭṭhānaṃ na labhati. Ūrupariyāyo idha **satthi-saddoti** āha “**na ūruṃ unnāmetī**”ti. Daṇḍaṅkusaṃ vuccati dīghadaṇḍo aṅkuso, tena rukkhasākhaṃ chindato purisassa yathā pacchābhāgena pādānaṃ osakkaṇaṃ hoti, evaṃ bhagavato pādā na osakkantīti āha “**rukkhasākhāchedana...pe... osakkāpetī**”ti. **Obaddhānābaddhaṭṭhānehi pādaṃ koṭṭento viyāti** ābaddhaṭṭhānena anābaddhaṭṭhānena ca pādakhaṇḍaṃ koṭṭetvā thaddhaṃ karonto viya. **Na ito cito ca cāletīti** aparāparaṃ na cāleti. Ussaṅkhaṇḍatāya sukheveva pādānaṃ parivattanato nābhito paṭṭhāya uparimakāyo na iñjati **heṭṭhimakāyova iñjati**. Tenāha “**uparima...pe... niccalo hotī**”ti. **Na jānāti** aniñjanato. **Kāyabalenāti** gamanapayogasaṅkhātena kāyagatena visesabalena. Javagamanahetubhūtena vā **kāyabalena**. Tenāha “**bāhā khipanto**”tiādi. Javena gacchanta hi bāhā khipati, sarīrato sedā muccanti. **Nāgāpalokitavasenāti** nāgassa apalokanamiva sakalakāyeneva parivattetvā apalokanavasena.

Anāvarenañāṇassāti anāvarenañāṇabalena dassanassa. Anāvarenaṇavāro pana kāye patiṭṭhitarūpadassanampi anāvarenaṇamevāti dassanatthaṃ vutto. **Indakhīlato paṭṭhāyāti** nagaradvāre indakhīlato paṭṭhāya. **Pakatiiriyaṇathenevāti** onamanādiṃ akatvā ujukagamanādinā eva. Yadi evaṃ koṭṭhakadvāreghappavese kathanti āha “**daliddamanussāna**”ntiādi. **Parivattententi** nipajjanatthaṃ kāyaṃ parivattentena.

Hatthehi gahetvāti ubhohi hatthehi ubhosu kaṭṭippadesesu pariggahetvā. **Patati** nisīdanatṭhāne nipajjanavasena patati. **Orimaṃ aṅgaṃ nissāya nisinnoti** pallaṅkamābhujitvā ukkuṭikanisajjāya uparimakāyaṃ heṭṭhimakāye patiṭṭhapentoyeva bhārīkaraṇavasena orimaṅgaṃ nissāya nisinno. **Ghaṃsantoti** ānisadadesena āsanatṭhānaṃ ghaṃsanto. **Pārimaṅganti** satthibhāgasammaddaṃ ānisadapadesaṃ. **Tathevāti** ghaṃsanto eva. **Olambakaṃ dhārento viyāti** olambakasuttaṃ otārento viya. Tena ujukameva nisīdanamāha. Sarīrassa garukabhāvahetūnaṃ dūrato samupāyitabhāvena sallahukabhāvato **tūlapicuṃ ṭhapento viya**.

Appesakkhānaṃ mahānubhāvagehappavese siyā chambhitattaṃ, cittakkhobho, darathavasena nānappakārakappaṇaṃ, bhayavasena taṇhāvasena paritassanaṃ, taṃ sabbaṃ bhagavato natthīti dassetuṃ pāliyaṃ “na chambhatī”tiādi (ma. ni. 2.387) vuttanti āha “**na chambhatī**”tiādi.

Udakaṃ dīyati etenāti **udakadānaṃ**, bhīnkārādi udakabhājanaṃ. **Baddhaṃ katvāti** hatthagatamattikaṃ viya attano vase avattantaṃ katvā. **Parivattetvāti** kujjitvā. **Vichaḍḍayamāno** udakassa vikkhipanavasena chaḍḍayamāno.

Tathā na gaṇhāti, byañjanamattāya eva gaṇhanto. Bhattaṃ vā amanāpanti ānetvā yojanā. Byañjanena ālopaatināmanaṃ, ālopa byañjanaatināmananti imesu pana dvīsu paṭhamameva asārūppatāya anīṭṭhaṃ vajjetabbanti pāliyaṃ paṭikkhittanti daṭṭhabbaṃ. **Sabbatthevāti** sabbasmim āharitabbavatthusmim supaṇītabhāvena **raso pākaṇo hoti** nāṇena pariññātattā. **Rasagedho pana natthi** setughātattā.

Assāti “neva davāyā”tiādi padassa. **Vuttametanti** “**visuddhimagge** vinicchayo āgato”ti sabbāsavasutte (ma. ni. 1.23) saṃvaṇṇayantena vuttametaṃ, tasmā na ettha taṃ vattabbanti adhippāyo, tasmā yo tasmim tasmim vinicchaye visesavādo icchitabbo. So paramatthamañjūsāya **visuddhimaggavaṇṇanāya** vuttanayeneva veditabbo. **Pattassa gahaṇaṭṭhānanti** hatthena pattassa gahaṇapadesaṃ. **Vinivattitvāti** patte sabbaṃ āmisagataṃ saddhim bhattena vinivattitvā gacchati. **Pamāṇātikkantanti** kelāyanavasena atikkantapamaṇaṃ ārakkhaṃ ṭhapeti. **Cīvarabhogantaranti** cīvarapaṭalantaraṃ. **Udarena akkamitvāti** udareneva sannirumbhitvā.

Appattakālaṃ abhimukhaṃ nāmeti upanāmetīti **atināmeti**, pattakālaṃ atikkāmento nāmeti apanetīti **atināmeti**. Ubhayampi ekajjhaṃ gahetvā pāliyaṃ “na ca anumodanassa kālamatināmetī”ti

vuttanti dassento “**yo hī**”tiādimāha.

Vegagamanena paṭisaṃmuñcitvā dhāvitvā **gacchati. Accukkaṭṭhanti** ativiya uddhaṃ katvā kaḍḍhitapārutam. Tenāha “**yo hi yāva hanukaṭṭhito...pe... hoti**”ti. **Accokkaṭṭhanti** ativiya heṭṭhā katvā kaḍḍhitapārutam. Tenāha “**yāva gopphakā otāretvā**”ti. **Ubhato ukkhipitvā**ti dakkhiṇato vāmatoti ubhosu passesu uttarāsaṅgaṃ ukkhipitvā. **Thananti** dakkhiṇathanam.

Vissatṭhoti vimutto. Tenāha “**vissatṭhattāyeva cesa viññeyyo**”ti. Yasmā amuttavādino vacanam avissatṭhattāya na siniyhati, na evaṃ muttavādinoti āha “**siniddho**”ti. **Viññeyyoti** supariyattatāya akkharato ca byañjanato ca viññātaṃ sakkuṇeyyo. Tenāha “**pākaṭo**”ti. **Viññāpaniyoti** vijānitabbo. Byañjanavaseneva cettha viññeyyatā veditabbā ghosassa adhippetattā. **Madhuroti** piyo pemaṇiyo apalibuddho. Savanamarahati, savanassa sotassa hitoti vā **savanīyo. Sampiṇḍitoti** sahito. Bhagavato hi saddo uppattiṭṭhānakatāsañcitattā sahitākārenea āpāthamāgacchati, na ayosalākāya pahaṭakamsathālam viya vippakiṇṇo. Tenāha “**avisārī**”ti. **Gambhīroti** yathā gambhīravatthuparicchindanena ñāṇassa gambhīrasamaññā, evaṃ gambhīraṭṭhānasambhavato saddassa gambhīrasamaññāti āha “**gambhīroti gambhīrasamuṭṭhito**”ti. **Ninnādavāti** savisesaṃ ninnādavā. Svāyaṃ viseso gambhīrabhāvasiddhoti āha “**gambhīrattāyeva cesa ninnādi**”ti. Evamettha cattāri aṅgāni caturaṅganipphādāni veditabbāni. **Akāraṇā mā nassīti** buddhānubhāvena viya sarassa parisapariyantatā vuttā, dhammatāvaseneva pana sā veditabbā tassa mūlakāraṇassa tathā avatṭhitattā.

Paccosakkivāti paṭinivattitvā. **Samussitakañcanapabbataṃ viya** upari indanīlaratanavitatasikhaṃ vijjullatābhūsitam. Mahāpathaviādayo satthugunaṇapaṭibhāgatāya nidassanam, kevalam mahantatāmattaṃ upādāya nidassitā.

390. Appaṭisaṃviditoti anārocito. Āgamanavasena cettha paṭisaṃveditanti āha “**aviññātaāgamano**”ti. **Uggatabhāvanti** kulabhogavijjādīhi uḷārabhāvaṃ. **Anuddayasampannāti** kāruṇikā.

391. Sahasāva okāsakaraṇena uccakulīnatā dīpitā hotīti āha “**vegena utṭhāya dvidhā bhijjitvā**”tiādi.

Nārisamānanāmanti itthiatthajotakanāmaṃ. Tenāha “**itthiliṅga**”nti. **Avhātābbāti** kathetabbā.

394. Ekanīhārenea **aṭṭha pañhe byākaronto**. “Pubbenivāsaṃ...pe... pavuccatī”ti iminā pubbenivāsassa viditākāraṇam vuttanti āha “**tassa pubbenivāso pākaṭo**”ti. **Dibbacakkuññaṃ kathitaṃ** tassa paribhaṇḍaññabhāvato yathākammūpagaññaṇassa. “Jātikkhayaṃ patto, abhiññā vosito”ti ca vuttattā munīti asekkhamuni idhādhippetoti āha “**arahattaññaṃ moneyyena samannāgato**”ti.

Kilesarāgehi kilesavivaṇṇatāhi. **Jātikkhayappattattā** “atho jātikkhayaṃ patto”ti vuttattā. **Abhijānitvāti** abhivisiṭṭhatāya aggamaggapaññāya ñatvā. Idāni paṭisambhidāyaṃ āgatanayena pariññāpahānabhāvanāsacchikiriyāsamāpattīnam pāragamanena **pāragūti** ayamettha atthoti dassetuṃ “**pāragūti vā**”tiādi vuttam. Abhiññeyyadhammānaṃ jānanavasena **abhiññāpāragū. Tādisoti** yādiso “pāragū sabbadhammāna”nti padadvayena vutto, tādiso. **Chahi ākārehīti** pajānanādīhi yathāvuttehi chahi ākārehi.

Kāmañcettha dve eva pucchāgāthā dve ca vissajjanāgāthā, pucchāpaṭipāṭiyā pana asaṅkarato ca vissajjanam pavattati, taṃ niddhāretuṃ **kiṃ panāti**tiādi vuttam. **Vedehi gatattāti** vedehi maggañāṇehi pāraṅgatattā. **Pubbenivāsantiādīhi vijjānaṃ atthitāya** bodhitattā. **Pāpadhammānanti** chattimsapāpadhammānaṃ sotthānaṃ maggaṃ pāpanena nissesato sodhitattā.

395. Dhammo nāma arahattamaggo kusaladhammesu ukkaṃsapāramippattiyā ukkaṭṭhaniddesena. Tassa anurūpadhammabhāvato **anudhammo nāma** hetṭhimamaggaphaladhammā. Yo satthu santike dhammaṃ sutvā yathānusiṭṭhaṃ na paṭipajjati, so tathāgataṃ dhammādhikaraṇaṃ viheṭṭheti nāma. Yo pana paṭipajjanto ca dandhābhiññatāya kammaṭṭhānasodhanatthaṃ antarantarā bhagavantaṃ upasaṅkamitvā anekavāraṃ kathāpeti, so ettāvata dhammādhikaraṇaṃ tathāgataṃ viheṭṭhēti na vattabbo. Na hi bhagavato dhammadesanāya parissamo atthi, ayañca attho **mahāsudassanasuttādīhi** (dī. ni. 2.241 ādayo) dīpetabbo, tasmā – “saccadhammassa anudhamma”’nti vattabbe vuttameva byatirekamukhena vibhāvetuṃ “**na ca maṃ dhammādhikaraṇaṃ vihesesī**”’ti vuttanti daṭṭhabbaṃ. **Tattha parinibbāyīti** parakāle cettha parinibbānampi saṅgayhati, taṃ pana imasmiṃ gahitameva hotīti āha “**desanāya arahatteneva kūṭaṃ gahita**”’nti.

Brahmāyusuttavaṇṇanāya līnatthappakāsanā samattā.

2. Selasuttavaṇṇanā

396. Keṇiyoti tassa nāmaṃ, pubbe keṇiyā jīvikākappanatoti vadanti. **Jaṭiloti** jaṭādharo. Brāhmaṇajātikattā koṭisārātāya ca **brāhmaṇamahāsālo**. Payojetvā nissayo hutvā vasati, rattim kāmasampattiṃ anubhavaṭīti vā yojanā. **Susaṅkhatanti** sappimadhusakkarādīhi ceva maricasīṅgiverādīhi ca suṭṭhu abhisāṅkhatam.

Paṭikkhepapasannatāyāti ahovatāyaṃ appiccho, yo nimantiyamānopi na sādiyatīti upanimantiyamānassa paṭikkhepe titthiyānaṃ pasannabhāvatoti. Taṃ katham? Viruddhametanti “**akāraṇameta**”’nti paṭikkhipati.

398. Kappasahassehipi...pe... ahoṣīti idaṃ nānussavasiddhaṃ anumānaggahaṇaṃ sandhāyāha. **Padeti** uttarapadalopena niddesoti āha “**padappamāṇe**”’ti. Pajjati nikkhipati etthāti vā padaṃ pakatiyā pādanikkhipatṭhānaṃ, tasmim **pade**. Kīṭāpasutatādīnā **pamādaṃ āpajjati**. **Bodhisattacārikanti** dukkaracariyaṃ sandhāya vadati.

399. Paripuṇṇatāyāti anūnatāya. **Ahīnaṅgatāyāti** avekallabhāvato. Rocatīti ruci, dehappabhā, sobhaṇā ruci etassāti **suruci**. **Ārohasampatti** kāyassa pamāyayuttauccatā. **Pariṇāhasampatti** kisathūlabhāvavajjitapariṇāhatā. **Saṅṭhānasampatti** avayavānaṃ susaṅṭhitatā. **Cārudassanoti** piyadassano tenāha “**sucīrampī**”’tiādi. **Suvaṇṇasadisavaṇṇoti** jātihiṅgulakena madditvā silāniḅhaṃseneva parikammaṃ katvā ṭhapitaghanasuvaṇṇarūpavaṇṇo. Mahāpurisabhāvaṃ byañjenti pakāsentīti **byañjanāni**, mahāpurisalakkhaṇānīti āha “**paṭhamam vuttabyañjanānevā**”’ti.

Pubbe vuttanti “suruci”’ti pubbe vuttam, “ādiccova virocasī”’ti **puna vuttam**. “Cārudassano suvaṇṇavaṇṇosī”’ti pubbe vuttam, “kalyāṇadassano bhikkhu kañcanābhattaco”’ti puna vuttanti imamatthaṃ sandhāyāha “**uttaragāthāyapi eseva nayo**”’ti. Sātisayaṃ uttamavaṇṇe vaṇṇetvā **uttamavaṇṇinoti** padena santaṃ pakāsetīti āha “**uttamavaṇṇasampannassā**”’ti. **Uttamasārathīti** seṭṭhapurisasārathī. Tattha tattha jambuvanasañḍamaṇḍitatāya jambudīpo “**jambusaṇḍo**”’ti vuccati. **Issariyanti** cakkavattissariyaṃ.

Jātikhattiyāti jātimanto khattiyā. **Rājābhirājāti** ettha **abhi-saddo** pūjatthoti āha “**rājūnaṃ pūjanīyo**”’ti.

Appamāṇāti aparimāṇā lokadhātuyo. “Yāvata pana ākaṅkheyyā”’ti (a. ni. 3.81) hi vuttam. **Dhammarājā anuttaroti** ettha vuttaanuttarabhāvaṃ “yāvata hi”’tiādinā pākātaram katvā dhammarājabhāvaṃ vibhāvetuṃ “**svāha**”’ntiādi vuttam. **Dhammenāti** paṭivedhadhammena. Tenāha “**anuttarenevā**”’ti. **Anuttarenāti** viṣiṭṭhena uttamena. Imasmiṃ pakkhe **dhammenāti** paṭipattidhammenātipi saṅgayhati. **Pariyattidhammenāti** desanādhhammena āṇacakkaṃ pavattemīti

yojanā. Desanāñāṇapaṭivedhañāṇavibhāgaṃ **dhammacakkameva vā. Appaṭivattiyanti** paṭivattitum asakkuṇeyyaṃ.

Tathāgatena jātoti tathāgatena hetunā ariyāya jātiyā jāto. Hetuatthe karaṇavacanaṃ. **Anujātoti** ca vutte anu-saddassa vasena **tathāgatanti** ca upayogavacanameva hoti, so ca anu-saddo hetuatthajotakoti āha “**tathāgataṃ hetum anujāto**”ti. Avaññātabbabhāvena jātoti **avajāto** duppaṭipannattā. Tenāha “**dussīlo**”ti. Tathā hi vuttaṃ kokālikaṃ ārabba “purisantakali avajāto”ti. **Putto nāma na hoti** tassa ovādānusāsaniyaṃ aṭṭhitattā. **Evamāhāti** “anujāto tathāgata”nti evamāha.

Vijjāti maggavijjā. Ukkaṭṭhaniddesena **vimuttīti** phalavimutti. Nanu ca maggo bhāvetabbena gahitoti? Saccam gahito, sabbe ca pana satta dhammā abhiññeyyāti vijjāya abhiññeyyabhāvo vutto. Iminā vā nayena sabbesampi abhiññeyyabhāvo vutto evāti vedītabbo. Phalena vinā hetubhāvasseva abhāvato **hetuvacanena phalasiddhi**, nirodhassa ca sampāpanena maggassa hetubhāvo. Dukkassa nibbattanena taṇhāya samudayabhāvoti imamatthaṃ saṅgahitameva atthato āpannattā. **Yuttahetunāti** yuttiyuttana hetunā **buddhabhāvaṃ sādheti** saccavinimuttassa bujjhitabbassa abhāvato saccasambodhaneneva ca tassa anavasesato buddhattā. Atthavacanañcetam, payogavacanaṇi pana – brāhmaṇa, ahaṃ sammāsambuddho sabbathā aviparītadhammadesano, sammāsambuddhattā sabbattha aviparītāmācikkhati yathāhaṃ sabbamaggadesakoti. Kiṃ pana bhagavā sayameva attano sammāsambuddhabhāvaṃ ārocetīti? Mahākaruṇāya aññesaṃ mahāvisayato. Tattha “ekomhi sammāsambuddho, sabbābhībhū sabbavidūhamasmī”tiādīni (mahāva. 11; ma. ni. 1.285; 2.341; kathā. 405) suttapadāni idameva ca suttapadaṃ etassa atthassa sādhaṃ.

Sallakantanoti sallānaṃ samucchinnattā. **Rogassāti** kilesarogassa. **Tasmāti** apunapavattipādanena tikicchanaṭo. Brahmaṃ vā seṭṭhaṃ sammāsambodhiṃ pattoti **brahmabhūto**. **Evam āgatāyāti** iminā –

“Kāmā te paṭhamā senā, dutiyā arati vuccati;
Tatiyā khuppipāsā te, catutthī taṇhā pavuccati.

Thinamiddhaṃ te paṇicamaṃ thinamiddhaṃ te, chaṭṭhā bhīrū pavuccati;
Sattamī vicikicchā te, makkho thambho te aṭṭhamo.

Lābho siloko sakkāro, micchāladdho ca yo yaso;
Yo cattānaṃ samukkaṃse, pare ca avajānati;
Esā namuci te senā, kaṇhassābhīpāhārinī”ti. (su. ni. 438-441);

Evam vuttaṃ navavidhaṃ senaṃ saṅgayhati. **Vase vattetvāti** samucchindanaṇa anuppādāpādanena vase vattetvā. **Kutoci abhayo** nibbhayo.

Sayameva daṭṭhabbanti yena yena adhigato, tena tena parasaddhāya gantabbaṃ hitvā asammohato paccavekkhañāñāneva sāmaṃ daṭṭhabbaṃ. Tenāha “**paccakkha**”nti. Pasaṭṭhā diṭṭhi sandiṭṭhi. Yathā rathena jayatīti rathiko, evaṃ idaṃ maggabrahmacariyaṃ sandiṭṭhiyā jayatīti **sandiṭṭhikaṃ**. Atha vā diṭṭhanti dassanaṃ vuccati, diṭṭhameva sandiṭṭhaṃ, sandassananti attho. Sandiṭṭhaṃ arahatīti **sandiṭṭhiko** yathā vatthayugaṃ arahatīti vatthayugiko. Sandiṭṭhikaṃ phaladānaṃ sandhāya nāssa kāloti akālaṃ, akālameva **akālikaṃ**, na kālantaraṃ khepetvā phalaṃ deti, attano pana pavattisamanantameva phalaṃ detīti attho. Atha vā attano phalappadāne pakatṭho kālo patto assāti kālika, lokiyo kusaladhammo, idaṃ pana samanantaraphalattā na kālikaṃ.

400. “Mahāyaññaṃ pavattayī”tiādīsu kevalaṃ dānadhammādīsu yaññapariyāyasambhavato “**brāhmaṇānaṃ yaññābhāvato**”ti vuttaṃ. Brāhmaṇā hi “aggimukhā devā”ti aggijuhanapubbakaṃ yaññaṃ vidahanti. Tenāha “**aggijuhanappadhānāti attho**”ti “bhūrhuva? Sva?” Iti **sāvittī** pubbakattā **mukhaṃ** pubbaṅgamaṃ. “Mukhamiva mukha”ntiādīsu viya idhāpi padhānapariyāyo mukhasaddoti

dassento “**manussānaṃ seṭṭhato rājā ‘mukha’nti vutto**”ti āha. **Ādhāratoti** ogāhantīnaṃ nadīnaṃ ādhārabhāvato **paṭisaraṇato** gantabbatṭhānabhāvato. **Saññāṇatoti** candayogavasena ajja asukanakkhattanti paññāyanato. **Ālokkaraṇatoti** nakkhattāni abhibhavitvā ālokkaraṇato. **Sommabhāvato**ti sītahimavāsītavātūpakkarabhāvato. **Tapantānanti** dīpasikhā aggijālā asanivicakkanti evamādīnaṃ vijjalantānaṃ. **Āyamukhaṃ** aggadakkhiṇeyyabhāvena.

Dibbacakkhu dhammacakkhu paññācakkhu buddhacakkhu samantacakkhūti imehi **pañcahi cakkhūhi**. **Te saraṇassāti** te saraṇassa ca, te saraṇabhāvamūlakattā itaradvayassa ca, yathāvutta tepadena vuttatthato parassa cāti attho. Idamaṃ vuttaṃ hoti – “te tuyhaṃ, itarassa ca saraṇassa aho ānubhāvo”ti. Āvuttivasena vā **te saraṇassāti** ettha attho vibhāvetabbo – tuyhaṃ saraṇabhūtassa ca itarasaraṇassa ca ānubhāvoti. Sesamaṃ suviññeyyameva.

Selasuttavaṇṇanāya līnatthappakāsanā samattā.

3. Assalāyanasuttavaṇṇanā

401. Aññamaññaviṣiṭṭhattā visadisamaṃ rajjamaṃ virajjamaṃ, virajjato āgatā, tattha jātāti vā **verajjakā**, evamaṃ jātā kho pana te, yasmā vatthābharaṇādivibhāgena nānappakārā honti, tasmā vuttaṃ “**nānaverajjakāna**”nti. Aṭṭhakathāyamaṃ pana verajjasseva vasena nānappakārātā vuttā. **Yaññupāsanaḍḍināti** yaññānubhavanamantajjhenadakkhiṇapariyesanaḍḍinā. **Catuvannaṣasādhāraṇanti** khattiyāḍḍinaṃ catunnaṃ vaṇṇānaṃ sādharmaṇamaṃ saṃsārasuddhipāpatassanaṃ. **Nhānasuddhiyāti** tittasamuddakhātesu mantajappanapubbakamaṃ sāyamaṭṭatīyudakoroḥanaḍḍinānasuddhiyā. **Bhāvanāsuddhiyāti** paramajotibhūtāya purisabhāvanāsankhātāya suddhiyā. **Vāpitasiroti** oropitakeso. Tameva hi siro vāpīnti vuccati.

Sabhāvavādīti yathābhūtavādī. **Pabbajantāti** brāhmaṇapabbajjamaṃ upagacchantā, tasmā brāhmaṇānaṃ pabbajjāvidhānaṃ sikkhantena bhota “brāhmaṇāva sujjhanti, no abrāhmaṇā”ti ayam vidhi sahetuko saupadāno sakkaccaṃ uggahito, **tasmā tuyhaṃ parājayo natthi...pe... evamaḥamsu**.

402. **Laddhibhīndanattanti** “brāhmaṇāva brahmuno puttā orasā mukhato jātā brahmajā”ti evamaṃ pavattaladdhiyā viniveṭhanattamaṃ. **Puttapaṭilābhatthāyāti** “evamaṃ mayamaṃ pettikaṃ iṇadhāraṃ sodheyyamā”ti laddhiyamaṃ ṭhatvā puttapaṭilābhatthāya. Ayañhettha adhammikānaṃ brāhmaṇānaṃ ajjhāsayo. **Nesanti** brāhmaṇānaṃ. **Saccavacanamaṃ siyāti** “brahmuno puttā”tiādivacanamaṃ saccaṃ yadi siyā **brāhmaṇīnaṃ...pe... bhaveyya**, na cetamaṃ atthi. Mahābrahmuno mukhato jātoti vādachedakavādo **mukhatojātaccekavādo**. Assalāyanoviññū jātiko “nirakkhepaṃ samaṇena gotamena vutta”nti jānantopi sahatānaṃ brāhmaṇānaṃ cittānurakkhaṇattamaṃ “**kiñcāpi bhavaṃ gotamo**”tiādimāha.

403. Idāni brāhmaṇova seṭṭho vaṇṇoti vādaṃ bhīnditumaṃ “**sutamaṃ te yonakakambojesū**”tiādi āradhamaṃ. Yadi brāhmaṇova seṭṭho vaṇṇo, sabbattha brāhmaṇova seṭṭho bhaveyya, atha kasmā yonakakambojādījanapadesu brāhmaṇānaṃ seṭṭhabhāvo natthi? Evañhi tattha vaṇṇā, tasmā “brāhmaṇova seṭṭho”ti laddhimattametaṃ. Tesu hi janapadesu jānā ekajjamaṃ sannipatitvā sammantayitvā katikamaṃ akaṃsu, dāsaṃ sāmikamaṃ katvā itare sabbe taṃ pūjetvā tassa vase vattanti, yo tesamaṃ ayyo hoti itare sabbe tassa dāsā honti, te katipayasaṃvaccharātikkamena tassa kiñci dosaṃ disvā taṃ tato ṭhānato apanetvā aññaṃ ṭhapenti, iti so **ayyo hutvā dāso hoti**, itaro **dāso hutvā ayyo hoti**, evamaṃ tāva keci “ayyo hutvā dāso hoti, dāso hutvā ayyo hoti”ti ettha atthamaṃ vadanti. **Aṭṭhakathāyamaṃ** pana purimavaseneva tamattamaṃ dassetaṃ “**brāhmaṇo sabhariyo**”tiādi vuttaṃ. Vayappatte putte asatīti idamaṃ vakkhamānassa dārakassa dāyajjasāmikabhāvassa tāva dassanaṃ. **Mātito suddhoti** ettha yo mātito suddhattā ayyo, pitito asuddhattā dāso hoti, so eva pitito asuddhattā dāso hutvā mātito ayyo hotīti jātiṃ sambhedeti. Sova sabbena sabbamaṃ hotīti na sakkā vattanti apare. **Ko thāmoti** mahante lokasannivāse anamatagge atīte kāle itthīnaṃ vā citte anavaṭṭhite dāsā dāsā eva honti, ayyā ayyā eva

hontīti ettha ko ekantiko sahetuko avassayo, tassa sādhamo siddhanto, kiṃ nidassananti attho.

404. Sukkacchedakavādo nāmāti “brāhmaṇova sukko vaṇṇo”ti evaṃ vutto sukkacchedakavāro nāma.

408. Sabbasmiṃ aggikiccaṃ karonteti etena yathā yato kutoci nissayato uppanno aggiupādānasampanno aggikiccaṃ karoti, evaṃ yasmiṃ kasmiñci dāsakule jāto upanissayasampanno sammāpaṭipajjamāno saṃsārato sujjhati evāti dasseti.

409. Pādasikavaṇṇoti antarāḷavaṇṇo. **Etesanti** khattiyakumārena brāhmaṇakaññāya uppannaputto, brāhmaṇakumārena khattiyakaññāya uppannaputtoti etesaṃ dvinnāṃ māṇavakānaṃ. **Matakabhatteti** mate uddissa katabhatte. **Thālipāketi** katamaṅgalabhatte.

410. Tumheti jātisāmaññato māṇavaṃ brāhmaṇehi saddhiṃ ekajjhaṃ saṅgaṇhanto āha. **Ko nu khoti** avaṃsiro isivādo, tesāṃ brāhmaṇīsīnaṃ asāmatthiyadassanena jātiyā appamāṇataṃ vibhāvetuṃ gāmadāravasesena upagacchi. Tena vuttaṃ “**gāmaṇḍalarūpo viyā**”ti. **Koṇḍadamakoti** adantadamako.

411. Janetīti janikā janetti. Janako pitāti etthāpi eseva nayo. **Gandhabbapañhanti** gandhabbassa mātukucchiyaṃ uppajjanakasattassa khattiyabhāvādīpucchaṃ. **Dabbigahaṇasippampi** ekā vijjā veditabbā. Tattha kira kusalo yaṃ kiñci āhārūpagapaṇṇapupphaphalabījāṃ antamaso elālūkampi gahetvā bhesajjehi yojetvā pacanto sappimadhuphāṇitehi samānaraṣaṃ katvā sampādetuṃ sakkoti, puṇṇopi tādiso, tena ñātaṃ tvaṃ dabbigahaṇasippamattampi na jānāsīti sambandho. **Saddhoti** kammaphalasaddhāya saddho, pothujjanikeneva ratanattayapasādena **pasanno**. Tenevāha – “**upāsakaṃ maṃ bhavaṃ...pe... saraṇaṃ gata**”nti.

Assalāyanasuttavaṇṇanāya līnatthappakāsanā samattā.

4. Ghoṭamukhasuttavaṇṇanā

412. Khemiyā nāma rañño deviyā ropitattā taṃ ambavanaṃ **khemiyambavananti** vuccatīti vadanti. **Dhammikoti** dhammayutto sabbasova adhammaṃ pahāya dhamme ṭhito. Paribbajati pabbajati etenāti **paribbajo**, gharāvāsato nikkhamanapubbakaṃ līngaggahaṇavasena sīlasamādānaṃ. **Etthāti** etasmiṃ paribbaje. **Sabhāvoti** taṃ paribbājaniyaṃ, tehi tehi paribbājakehi anuṭṭhātabbo paṭipattidhammasaṅkhāto sabhāvo. **Dhammova pamāṇanti** etena mayaṃ ahirimaṇā cittassa yathāupaṭṭhitāṃ kathema, tasmā taṃ appamāṇaṃ, yo panettha avitatho dhammo, tadeva pamāṇaṃ. Adhigatapaṭipattisaṅkhāto sabhāvo atthi, tassa tumhehi tumhehi **bahunā** nānāsandassanādi **kammena idha bhavitabbaṃ**, bahudevetha vattabbanti adhippāyo.

414. Sārattarattāti sārājjanavasena rattā, bahularāgavasena abhirattāti attho. Attanā ñāpetabbamatthaṃ anuggahāpeti bodhetīti anuggaho, ñāpitakāraṇaṃ, saha anuggahenāti **sānuggahā**. Tenāha “**sakāraṇā**”ti. Kiṃ pana taṃ kāraṇaṃ? Imassādhippāyo “**natthi dhammiko paribbajo**”ti mayā vutto, addhā panāyasmā udeno yāthāvato dhammikaṃ paribbajaṃ me ācikkhatīti. Tenāha “**vuttañheta**”ntiādi.

421. Sabbamidaṃ thāvarajaṅgamaṃ purisakataṃ, tasmā yaṃ kiñci katvā attā posetabbo rakkhitabboti lokāyatanissito nītimaggo ghoṭamukhakanto, tasmā āha “**etassa kira jānanasippe**”tiādi. **Sagge nibbato nāma natthi** akattabbameva karaṇato. Devalokapariyāpannadhanaṃ manussānaṃ upakappapuññābhāvato pubbe attanā nihitadhanaṃ “**asuke cā**”ti ācikkhitvā gato. Sesāṃ suviññeyyameva.

Ghoṭamukhasuttavaṇṇanāya līnatthappakāsanā samattā.

5. Caṅkīsuttavaṇṇanā

422. Tasminti sālavane. **Uttarena opāsādanti** opāsādagāmassa uttaradisāyaṃ. **Uttarenāti ena-**saddayogena hi **opāsādanti** upayogavacanāṃ. **Ajjhāvasatīti** ettha adhi-ā-saddānaṃ anattantaratam hadaye katvā āha “**vasatī**”ti. Idāni tesam atthavisesabhāvitam dassento “**abhibhavitvā vā āvasatī**”tiādīmāha. **Etthāti** opāsādapade. **Sattussadanti**ādīsu pana kathanti āha – “**tassa anuppayogattāva sesapadesū**”ti. Upa-anu-adhi-iti-evam-pubbake vasanakiriyayāṭṭhāne upayogavacanameva pāpuṇātīti saddavidū icchantīti āha “**lakkhaṇaṃ saddasatthato pariyesitabba**”nti. Tathā hi vuttaṃ “**upasaggavasena panettha bhummatthe upayogavacanāṃ veditabba**”nti. Ussadatā nāmettha bahulatāti taṃ bahulatam dassetuṃ “**bahujana**”ntiādi vuttaṃ. **Āvajjitvāti** parikkhipivā.

Raññā viya bhuñjitabbanti vā **rājabhoggaṃ**. **Rañño dāyabhūtaṃ** kulaparamparāya bhoggabhāvena raññā laddhadāyabhūtaṃ. Tenāha “**dāyajjanti attho**”ti. Rājanīhārena paribhuñjitabbato uddham paribhogalābhassa seṭṭhadeyyatā nāma natthīti āha – “**chattaṃ ussāpetvā rājasāṅkhepena paribhuñjitabba**”nti. **Titthapabbatādīsūti** nadītīthapabbatapādagāmadvāraaṭṭavīmukhādīsu. **Nissaṭṭhapariccattanti** muttacāgavasena pariccattam katvā. **Etesam brāhmaṇagahapatikānaṃ**.

423. Ti sannipatitā. Yo koci viññūnaṃ icchito pañho, tassa pucchitassa yāthāvato kathanasamattho **pucchitapañhabyākaraṇasamattho**. Kulāpadesādinā mahatī mattā etassāti mahāmatto.

424. Teti “nānāverajjakā”ti vuttabrāhmaṇā. “Ubhato sujāto”ti (dī. ni. 1.303; a. ni. 1.3.5.134) ettake vutte yehi kehici dvīhi bhāgehi sujātata viññāyeyya, sujātasaddo ca “sujāto cārudassano”tiādīsu (ma. ni. 2.399; su. ni. 553; theragā. 818) ārohapariṇāhasampattipariyāyoti jātivaseneva sujātataṃ vibhāvetuṃ “**mātito ca pitito cā**”ti vuttaṃ. Anorasaputtavasenapi loke mātupitusamaññā dissati, idha panassa orasaputtavaseneva icchīyatīti dassetuṃ “**saṃsuddhagahaṇiko**”ti vuttaṃ. Pitā ca mātā ca pitaro, pitūnaṃ pitaro pitāmahā, tesam yugo pitāmahayugo, tasmā **yāva sattamā pitāmahayugāti** evamettha attho daṭṭhabbo. Yugasaddo cettha ekasesanayena daṭṭhabbo “yugo ca yugo ca yugā”ti. Evañhi tattha tattha dvinnāṃ gahitameva hoti. Tenāha – “**tato uddham sabbepi pubbapurisā pitāmahagahaṇeneva gahitā**”ti. **Purisaggahaṇaṅcetha** ukkaṭṭhaniddesavasena katanti daṭṭhabbaṃ. Evañhi “mātito”ti pālīvacanaṃ samatthitaṃ hoti. **Akkhittoti** appattakhepo. **Anavakkhittoti** saddhathālīpākādīsu na avakkhitto. **Jātivādenāti** hetumhi karaṇavacananti dassetuṃ “**kena kāraṇenā**”tiādi vuttaṃ. Ettha ca **ubhato...pe... pitāmahayugāti** etena brāhmaṇassa yonidosābhāvo dassito saṃsuddhagahaṇīkabhāvakkittanato. **Akkhittoti** iminā kiriyāparādhābhāvo. Kiriyāparādhena hi sattā khepaṃ pāpuṇanti. **Anupakuṭṭhoti** iminā ayuttasaṃsaggābhāvo. Ayuttasaṃsaggampi hi paṭicca sattā akkosam labhanti.

Issaroti adhipateyyasaṃvattaniyakammaphalena īsanasīlo. Sā panassa issaratā vibhavasampattipaccayā pākaṭā jātāti aḍḍhatāpariyāyabhāvena vadanto “**aḍḍhoti issaro**”ti āha. Mahantaṃ dhanamassa bhūmigatañceva vehāsaṭṭhañcāti **mahaddhano**. **Tassāti** tassa tassa. **Vadanti** “anvayato byatirekato ca anupasaṅkamanakāraṇaṃ kitemā”ti.

Adhikarūpoti viṣiṭṭharūpo uttamasarīro. Dassanaṃ arahatīti **dassaniyo**. Tenāha “**dassanayoggo**”ti. Pasādaṃ āvahaṭīti **pāsādiko**. Tenāha “**cittapasādajananato**”ti. **Vaṇṇassāti** vaṇṇadhātuyā. **Sarīranti** sannivesaviṣiṭṭho karacaraṇagīvāsīsādi avayavasamudāyo, so ca saṅghānamukhena gayhatīti “**paramāya vaṇṇapokkharatāyāti paramāya...pe... sampattiyā cā**”ti vuttaṃ. Sabbavaṇṇesu suvaṇṇavaṇṇova uttamoti vuttaṃ “**seṭṭhena suvaṇṇavaṇṇena samannāgato**”ti. Tathā hi buddhā cakkavattino ca suvaṇṇavaṇṇāva hontī. **Brahmavacchasīti** uttamasarīrabho

suvanṇābhoti attho. Imameva hi atthaṃ sandhāyāha “**mahābrahmuno sarīrasadisena sarīrena samannāgato**”ti. Na brahmujugattataṃ. **Akhuddāvakaṣo dassanāyāti** ārohapariṇāhasampattiyaṃ avayavapāripūriyaṃ ca dassanāya okāso na khuddako. Tenāha “**sabbānevā**”tiādi.

Yamaniyamalakkhaṇaṃ **sīlamassa atthīti sīlavā**, taṃ panassa rattaññutāya **vuddhaṃ vaḍḍhitaṃ sīlaṃ assa atthīti vuddhasīli**, tena ca sabbadā samāyogato **vuddhasīlena samannāgato**. **Pañcasīlamattameva sandhāya vadanti** tato paraṃ sīlassa tattha abhāvato tesaṃca ajānanato.

Ṭhānakaraṇasampattiyaṃ sikkhāsampattiyaṃ ca katthacipi anūnatāya parimaṇḍalapadāni byañjanāni akkharāni etissāti **parimaṇḍalapadabyañjanā**. Atha vā pajjati attho etenāti padaṃ, nāmādi, yathāhippetamatthaṃ byañjetīti byañjanaṃ vākyam, tesam paripuṇṇatāya **parimaṇḍalapadabyañjanā**. Atthañāpanasādhanatāya vācāva karaṇanti **vākkaraṇam**, udāharaṇaghoso. **Guṇapariṇābhāvena** tassa brāhmaṇassa, tena vā bhāsitaḥḥassa. **Pūre** puṇṇabhāve. **Pūreti** ca purimasmiṃ atthe ādhāre bhummaṃ, dutiyasmiṃ visaye. **Sukhumālattanēti** iminā tassā vācāya mudusaṇhabhāvamāha. **Apalibuddhāya** pittasemhādīhi. **Sandiṭṭhaṃ** sabbam dassetvā viya ekadesakathanam. **Vilambitaṃ** saṅkamaṃ cirāyitvā kathanam. “Sandiddhivilambitādī”ti vā pāṭho. Tattha **sandiddhaṃ** sandehajanakam. **Ādi**-saddena khalitānukaḍḍhitādiṃ saṅgaṇhāti. **Ādimajjhapariyosānam pākaṭam katvāti** iminā cassa vācāya atthapāripūriṃ vadanti.

425. Sadisāti ekadesena sadisā. Na hi buddhānam guṇehi sabbathā sadisā kecipi guṇā aññesu labbhanti. **Itareti** attano guṇehi asadisaguṇe. **Idanti** idaṃ atthajātam. **Gopadakanti** gāviyā pade ṭhitaudakam. **Kulapariyāyenāti** kulānukkamena.

Tatthāti mañcake. **Sihaseyyam kappesīti** yathā rāhu asurindo āyāmato vitthārato ubbedhato ca bhagavato rūpakāyassa paricchedam gahetum na sakkoti, tathārūpaṃ iddhābhisaṅkhāram abhisaṅkharonto sihaseyyam kappesi.

Parisuddhatṭhena ariyanti āha “**ariyam uttamaṃ parisuddha**”nti. **Anavajjattṭhena kusalam**, na sukhavipākattṭhena. Katthaci **caturāsīti pāṇasahassāni** katthaci **aparimāṇāpi devamanussā** yasmā catuvīsatiyā ṭhānesu asaṅkhyeyyā aparimeyyā **maggaphalāmatam pivanti**. Koṭisatasahassādiaparimāṇenapi bahū eva. Tasmā anuttarācārasikkhāpanavaseneva bhagavā **bahūnam ācariyo**. Teti kāmārāgato aññe bhagavatā pahīnakilese.

Apāpapurekkhāroti apāpehi purakkharīyati, na vā pāpam purato karotīti apāpapurekkhāroti imamatthaṃ dassetum “**apāpe nava lokuttaradhamme**”tiādi vuttam. Tattha **apāpeti** pāpapapaṭipakkhe pāparahite ca. Brahmani bhavā, brahmuno vā hitā garukaraṇādīnā, brahmānam vā maggaṃ jānātīti brahmaññā, tassā **brahmaññāya pajāya**.

Tirorattṭhā tirojanapadāti ettha rajjam rattṭham rājanti rājāno etenāti katvā. Tadekadesabhūtā padesā pana janapado janā pajjanti ettha sukhajīvikam pāpuṇantīti katvā. Pucchāya dosam sallakkhetvāti sambandho. **Bhagavā vissajjeti** tesam upanissayasampattiṃ cintetvāti adhippāyo. **Navakāti** āgantukabhāvena amhākam abhinavā.

426. Opātetīti nippātetīti attho. Tathābhūto ca tattha pesitā hotīti vuttam “**pavesetī**”ti. **Sampurakkharontīti** sakkaccam pubbaṅgamaṃ karontī. Tenāha “**purato katvā vicarantī**”ti.

427. Sudde bahi katvā raho sāsitaḥḥatṭhena mantā eva taṃtamattṭhapaṭipattihetutāya padanti **mantapadam** vedam. Tenāha “**vedo**”ti. **Evam kirāti paramparabhāvena ābhatanti** ācariyaparamparāya ābhatam. **Pāvacaṇasaṅkhātasampattiyaṃ** pamukhavacanamhi udattādisampattiyaṃ. **Sāvittiādīhi chandabandhehi vaggabandhehi cāti** gāyattīādīhi ajjhāyānuvākādīhi chandabandhehi ca

vaggabandhehi ca. **Sampādetvāti** padasampattiṃ ahāpetvā. **Pavattāroti** vā pāvacanavasena vattāro. **Sajjhāyitanti** gāyanavasena sajjhāyitaṃ, taṃ pana padeneva icchitanti āha “**padasampattivāsenā**”ti. **Aññesaṃ vuttanti** pāvacanavasena aññesaṃ vuttaṃ. **Rāsikatanti** iruvedaya juvedasā mavedādivasena, tatthāpi paccekāṃ mantabrahmādivasena ajjhāyānuvākādivasena rāsikataṃ. **Dibbena cakkhunā oloketvāti** dibbacakkhuparibhaṇḍena yathākammūpagaññaṇena sattānaṃ kammassakataṃ, paccakkhato dassanaṭṭhena dibbacakkhusadisena pubbenivāsaññaṇena atītakappe brāhmaṇānaṃ mantajjhenavidhiṅca oloketvā. **Pāvacanena saha saṃsandetvāti** kassapasammāsambuddhassa yaṃ vacanaṃ vaṭṭasannissitaṃ, tena saha aviruddhaṃ katvā. Na hi tesāṃ vivaṭṭasannissito attho paccakkho hoti. **Aparāpareti** aṭṭhakādīhi aparāpare, pacchimā okkākarājakālādīsu uppannā. **Pakkhipitvāti** aṭṭhakādīhi ganthitamantapadesu kilesasannissitapadānaṃ tattha tattha pade pakkhipanaṃ katvā. **Viruddhe akāṃsūti brāhmaṇadhammikasuttādīsu** (khu. ni. brāhmaṇadhammikasuttaṃ) āgatanayeneva saṃkilesikatthadīpanato paccanīkabhūte akāṃsu.

428. Paṭipāṭiyā ghaṭitāti paṭipāṭiyā sambaddhā. **Paramparasāṃsattāti** ādāniyāya yaṭṭhiyā saṃsattā. Tenāha “**yaṭṭhiggāhakena cakkhumatā**”ti. **Purimassāti** maṅḍalākārena ṭhitāya andhaveriyā sabbapurimassa hatthena sabbapacchimassa kacchaṃ gaṇhāpetvā. **Divasampīti** anekadivasampi. Cakkhussa anāgatabhavaṃ ñatvā yathāakkantaṭṭhāneyeva anupatitvā akkamaṇaṃva sallakkhetvā “**kahaṃ cakkhumā kahaṃ maggo**”ti pariveditvā.

Pāliāgatesu dvīsūti saddhā anussavoti imesu dvīsū. **Evarūpeti** yathā saddhānussavā, evarūpe eva paccakkhagāhinoti attho. **Tayoti** ruciākāraparivitakkaditṭhinijjhānakkhantiyo. **Bhūtavipākāti** bhūtatthaniṭṭhāyakā adhippetatthasādhakā, vuttavipariyāyena abhūtatthavipākā veditabbā. **Etthāti** etesu saddhāyitādivatthūsu. **Ekāṃseneva niṭṭhaṃ gantum nālaṃ** anekantikattā saddhādiggāhassa. **Upari pucchāya maggaṃ vivaritvā ṭhapesi** saccānurakkhāya ñātukāmatāya uppāditattā. Passati hi bhagavā – mayā “saccamanurakkhatā...pe... niṭṭhaṃ gantu”nti vutte saccānurakkhaṇaṃ ñātukāmo māṇavo “kittāvātā”tiādīnā pucchissati, tassa taṃ vissajjetvā saccānubodhe pucchāya avasaraṃ datvā tassa upanissaye upakāradhamme kathessāmīti. Tena vuttaṃ – “upari pucchāya maggaṃ vivaritvā ṭhapesī”ti.

430. Attānaññeva sandhāya vadati, yato vuttaṃ pāliyaṃ – “yaṃ kho panāyamāyasmā dhammaṃ deseti, gambhīro so dhammo duddaso duranubodho”tiādī. Lubbhantīti **lobhanīyā** yathā “apāyagamanīyā”ti āha “**lobhanīyesu dhammesūti lobhadhammesū**”ti. Yathā vā rūpādidhammā lobhanīyā, evaṃ lobhoti āha “**lobhanīyesu dhammesūti lobhadhammesū**”ti. Tenevāha – “yaṃ loke piyarūpaṃ satarūpaṃ, etthesā taṅhā uppajjamānā uppajjati, ettha nivisamānā nivisati”ti (dī. ni. 2.400; ma. ni. 1.133; vibha. 203). Ese nayo sesapadadvayepi.

432. Nivesetīti ṭhapesi paṭṭhapesi. **Payirupāsātīti** upaṭṭhānavasena upagantvā nisīdati. Suyyati etenāti **soṭanti** āha “**pasādasota**”nti. Tañhi savanāya odahitabbanti. **Dhāreti** sandhāreti tattheva manāṃ ṭhapesi. **Atthatoti** yathāvuttassa dhammassa atthato. **Kāraṇatoti** yuttito hetudāharaṇehi upapattito. **Olokananti** evametanti yathāsabhāvato paññācakkhunā daṭṭhabbataṃ khamanti, tañca mahantassa maṇino pajjalantassa viya āvikatvā atthassa citte upaṭṭhānanti āha “**idhā**”tiādī. **Kattukamyatāchandoti** kattukāmatāsañkhāto kusalacchando. **Vāyamatīti**ādīto catunnampi vīriyānaṃ vasena vāyāmaṃ parakkamaṃ karoti. **Maggapadhānaṃ padahatīti** maggāvahaṃ maggapariyāpannañca sammappadhānaṃ padahatī, padahanavasena taṃ paripūreti. **Paramasaccanti** amoghadhammattā paramatthasaccaṃ. **Sahajātanāmākāyenāti** maggapaññāsahajātanāmākāyena. **Tadevāti** tadeva paramasaccaṃ nibbānaṃ. Tenevāha – “**sacchikiriyābhisamayena vibhūtaṃ pākaṭaṃ karonto passati**”ti.

433-4. Maggānubodhoti maggapaṭipāṭiyā bodho bujjhanaṃ, yesaṃ kilesānaṃ samucchindanavasena maggapaṭivedho, tesāṃ paṭipassambhanavasena pavattamānaṃ sāmāññaphalaṃ, maggena paṭividdhāni saccāni, paramatthasaccameva vā anurūpabujjhananti adhippāyo. “**Saccānuppattīti phalāsacchikiriyā**”ti vuttaṃ. Evañhi sati heṭṭhā vuttā saddhāpaṭilābhādayo dvādasa

dhammā saccānuppattiyā upakārā honti, tasmā vuttaṃ “**tesaṃyevāti heṭṭhā vuttānaṃ dvādasanna**”nti. **Nāyaṃ** “tesaṃyevā”ti padassa **attho**. Satipi kusalavipākādibhāvena nānatte vatthārammaṇabhūmikiccādivasena pana sadisāti upāyatova maggadhammā āsevītā bahulīkatā phalabhūtāti vattabbataṃ arahatīti taṃsadise tabbohāraṃ katvā “**tesaṃ maggasampayuttadhammāna**”nti vuttaṃ. Evañhi āsevanāgahaṇaṃ samatthitaṃ, na aññathā. Na hi ekacittakkhaṇikānaṃ maggadhammānaṃ āsevanā, bahulīkammaṃ vā atthīti. **Tulanāti** vipassanā. Sā hi vuṭṭhānagāminibhūtā maggappadhānassa bahukārā tassa abhāve maggappadhānasseva abhāvato, evaṃ ussāho tulanāya chando ussāhassa bahukārotiādinā heṭṭhimassa uparimūpakāraṃ suviññeyyamevāti āha – “**iminā nāyena sabbapadesu attho veditabbo**”ti. Sesaṃ suviññeyyameva.

Cankīsuttavaṇṇanāya līnatthappakāsanā samattā.

6. Esukārīsuttavaṇṇanā

437. Koṭṭhāsanti maṃsabhāgaṃ. **Laggāpeyyunti** nhārunā vā vākena vā bandhitvā purisassa hatthe vā vasanagehe vā olambanavasena bandheyyuṃ. **Satthadhammanti** satthikesu satthavāhena paṇetabbaṃ āṇādhammaṃ. **Tassa nikkhamanattanti** taṃ mūlaṃ satthikehi nittharaṇatthaṃ. **Pāpaṃ assāti** paricarantassa pāricariyāya ahitaṃva assa. Tenāha “na seyyo”ti. **Uccakulīnā**dayo dutiyavārādīhi vuccanti, idha upadhivipattisampattiyo pāpiyādipadehi vuttāti adhippāyo. Tenāha – “**pāpiyoti pāpako lāmako attabhāvo assā**”ti. **Seyyaṃsoti** hitakoṭṭhāso, hitasabhāvoti attho. **Uccakulīnatāti** karaṇatthe paccattavacananti āha “**uccākulīnattenā**”ti. “Vaṇṇo na khīyetha tathāgatassā”tiādīsu (dī. ni. aṭṭha. 1.305; 3.141; ma. ni. aṭṭha. 2.425; udā. 53; apa. aṭṭha. 2.7.20; bu. vaṃ. aṭṭha. 4.4; cariyā. aṭṭha. 1.nidānakathā; 2.pakiṇṇakakathā; dī. ni. ṭī. 1.ganthārambhakathāvaṇṇanā; saṃ. ni. ṭī. 1.2.1; a. ni. ṭī. 1.1.1; vajira. ṭī. ganthārambhakathāvaṇṇanā; sāratta. ṭī. 1.ganthārambhakathāvaṇṇanā; netti. ṭī. ganthārambhakathāvaṇṇanā; ma. ni. ṭī. 1.1) viya **vaṇṇasaddo** idha pasamaṃsāpariyāyoti āha “**vessopi hi ulāraṇṇo hotī**”ti.

440. “Niravo padasaddo soḷāragottassa akiṇṇamattikāpatto tiṭṭheyya asaṅgacārī”ti vuttattā **bhikkhā caritabbāva**, ayaṃ tesaṃ kuladhammoti adhippāyo. **Haritvāti** apanetvā. **Sattajīvo** sattavāṇijako. Gopeti rakkhatīti **gopo**, ārakkhādhikāre niyutto. Asanti lūnanti tenāti **asitaṃ**, lavittaṃ. Vividhaṃ bhāraṃ ābhaṅganti olambanti etthāti **byābhaṅgī**, kājaṃ.

441. Anussaratoti anussaraṇahetu kulavaṃsānussaraṇakkhaṇe khattiyotiādinā **saṅkhyāṃ gacchati**. Tenāha “**porāṇe...pe... anussariyamāne**”ti. Uccaṇīcattajānanatthañca kulavavattānaṃ kataṃ hotīti khattiyādikulakammunā tesaṃ catunnaṃ vaṇṇānaṃ sandhanaṃ jīvikaṃ paññapenti brāhmaṇā, tathāgato pana lokuttaradhammameva purisassa sandhanaṃ paññapeti tena sattassa lokagabhāvasiddhito. Sesaṃ suviññeyyameva.

Esukārīsuttavaṇṇanā līnatthappakāsanā samattā.

7. Dhanañjānisuttavaṇṇanā

445. Rājagahaṃ parikkhipitvā ṭhitapabbatassāti paṇḍavapabbataṃ sandhāyāha. Rājagahanagarassa dakkhiṇadisābhāge pabbatassa samīpe ṭhito janapado **dakkhiṇāgiri**. Taṇḍulapuṭakānaṃ pāli etthāti **taṇḍulapāli**. Tassa kira dvārasamīpe taṇḍulavāṇijā taṇḍulapasibbake vivaritvā paṭipāṭiyā ṭhapetvā nisīdanti, tenassa “**taṇḍulapālidvāra**”nti samaññā ahoṣi. **Sabbameva sassam gaṇhātīti** daliddakassakānaṃ divasapariḍayamattameva vissajjetvā sabbameva āyato nipphannaṃ dhaññaṃ gaṇhāti. **Mandasassānīti** mandanipphattikāni sassāni.

446. Iminā nāyenti dāsakammakarassa nivāsanabhavattavattānānuppadānena maṅgaladivasesu dhanavattālaṅkāraṇuppadānādinā ca **posetabbo**. Mittāmaccānaṃ piyavacanaatthacariyāsamānattatādi

tasmā jātivibhaṅgaṃ byākarissāmīti.

Yasmā idha **upādinnakajāti** byākātabbabhāvena āgatā, tassā pana nidassanabhāvena itarā, tasmā “**jātivibhaṅgaṃ pāṇāna**”nti pāḷiyaṃ vuttaṃ. Tesam tesam pāṇānaṃ jātiyoti attho. **Evanti** nidassanaṃ kathetvā nidassitabbe kathiyamāne. **Tassāti** vāseṭṭhassa. Kāmaṃ “tesam vohaṃ byakkhissa”nti ubhopi māṇave nissāya desanā āgatā, tathāpi tattha tattha “evaṃ, vāseṭṭha, jānāhi”tiādinaṃ vāseṭṭhameva ālapanto bhagavā tameva iminā niyāmena pamukhaṃ akāsi. Tena vuttaṃ “tassāti vāseṭṭhassā”ti. **Jātibhedo** jātiviseso, jātiyā bhedo **pākaṭo bhavissati** nidassanena vibhūtabhāvaṃ āpāditena paṭiññātasassa atthassa vibhūtabhāvāpattito. **Āma na vaṭṭatīti** kammanānatāya eva upādinnanānatāya paṭikkhepapadametaṃ, na bījanānatāya anupādinnaānatāya paṭikkhepapadanti dassetuṃ “**kammaṃ hi**”tiādi vuttaṃ. Tassattho – taṃtaṃyonikhipanamattaṃ kammaṃ sāmattiyaṃ, taṃtaṃyoniniyatā pana ye vaṇṇavisesā, te taṃtaṃyonisiddhiyāva siddhā hotīti taṃ pana yonikhipanakammaṃ taṃtaṃyonivisiṭṭha-visesābhībūtāya payoganiṭṭhāya, asaṃmucchitāya eva vā paccayabhūtāya bhavapatthanāya abhisāṅkhatamevāti viññātabbapaccayavisesena vinā phalavisesābhāvato etaṃ samīhitakammaṃ patthanādīhi ca bhinnasattitaṃ visiṭṭhasāmatthiyaṃ vā āpajjivā cakkhundriyādivisiṭṭhaphalanibbattakam jāyati, evaṃ yonikhipanataṃyoniniyatavisesāvahatā hotīti. Therena hi bījanānatā viya kammanānatāpi upādinnakanānatāya siyā nu kho paccayoti codanaṃ paṭikkhipivā paccayavisesavisiṭṭhā kammanānatā pana paccayoti nicchitanti daṭṭhabbaṃ.

Nānavaṇṇāti nānappakāraṇaṇā. Tālanāḷikerādīnaṃ loke abhiññātatīṇajātibhāvato **visesena gayhati** abhiññātasotanayena. **Jātiyā brāhmaṇovāti** aṭṭhānapayutto **eva-saddo**, jātiyāva brāhmaṇo bhaveyyāti yojanā. **Na ca gayhatīti** tiṇarukkhadīsu viya brāhmaṇesu jātinīyatassa līngassa anupalabbhanato, pivanabhuñjanakathanahasānādikiriyāya brāhmaṇabhāvena ekantikalingāniyatāya mantajjhenādiṃ vinā anupalabbhanato ca. **Vacībhedenavāti** āhaccavacaneneva.

Kīṭe paṭaṅgetiādīsu jātinānatā labbhati aññamaññālingavisiṭṭhatādassanā. **Kunthā** kīṭakā, khajjakhādakā **kipillikā**. **Uppatīvāti** uḍḍetvā uḍḍetvā. Paṭabhāvaṃ gacchantīti vā **paṭaṅgā**, na khuddakapāṇakā kīṭā nāma. **Tesampi** kīṭakānaṃ.

Kālakādayoti kalandakādayo.

Udaraṃyeva nesam pādā udareneva sampajjanato.

Saññāpubbako vidhi aniccoti dassento “**udake**”ti āha yathā “vīrassa bhāvo vīriya”nti.

Pattasamudāye pakkhasaddoti “**pattehi yanti**”ti vuttaṃ. Na hi avayavabyatirekena samudāyo atthi.

Saṅkhepena vutto “jātivasena nānā”tiādinaṃ. Ettha padatthe dubbhiññeyyaṃ natthīti sambandhamattaṃ dassetuṃ “**tatrāyaṃ yojanā**”tiādi vuttaṃ. “Na hi brāhmaṇānaṃ edisaṃ sīsaṃ hoti, khattiyānaṃ edisanti niyamo atthi yathā hatthiassamiḡādīna”nti idameva vākyaṃ sabbattha netabbam. Taṃ saṃnhipivā dassento “**iminā nayena sabbam yojetabba**”nti āha.

Tassāti yathāvuttanigamanavacanassa **ayaṃ yojanā** idāni vuccamānā yojanā veditabbā.

457. Vokāranti vokaraṇaṃ, yena visiṭṭhatāya na vokarīyati jātibhedoti attho. Tenāha “**nānatta**”nti.

Gorakkhādiupajīvanena **ājīvavipanno**, hiṃsādinaṃ **sīlavipanno**, nikkhattavattatādinaṃ **ācāravipannoti**. Sāmaññajotanā visese nivīṭṭhā hotīti āha “**gorakkhanti khettarakkha**”nti. “**Goti hi**

pathaviyā nāma’nti. Tehi tehi upāyehi sikkhitabbaṭṭhena **sippaṃ**, tattha kosallaṃ. Paresaṃ īsanaṭṭhena himsanaṭṭhena isso, so assa atthīti isso yodhājīviko, issassa kammaṃ paharaṇaṃ, usum sattiñca nissāya pavattā jīvikā **issattaṃ**. Tenāha “**āvudhajīvika**”nti. Yaṃ nissāya assa jīvikā, tadeva dassetuṃ “**usuñca sattiñcā**”ti vuttaṃ.

Brahmaṃ vuccati vedo, taṃ aṇati jānātīti brāhmaṇo, jānanañca porāṇehi brāhmaṇehi vihitanīyāmena brāhmaṇehi katopasamena anuṭṭhānatapena yathā “ājīvasīlācāravipanno natthī”ti brāhmaṇadhammikehi lokiyapaṇḍitehi ca sampañcchito, tathā paṭipajjanamevāti āha “**evaṃ brāhmaṇasamayena...pe... sādhetvā**”ti. **Evaṃ santeti** evaṃ ājīvasīlācāravipannassa abrāhmaṇabhāve sati **na jātiyā brāhmaṇo hoti, guṇehi pana** ājīvasīlācārasampattisaṅkhātehi **brāhmaṇo hoti, tasmā** guṇānaṃyeva brāhmaṇabhāvakarāṇato catuvaṇṇavibhāge **yattha kattthaci kule jāto yo** sīladiguṇasampannatāya **guṇavā, so** vuttalakkhaṇena nippariyāyato bāhitapāpatāya **brāhmaṇoti ayamettha** brāhmaṇabhāve **ñāyoti, evaṃ ñāyaṃ atthato** āpannaṃ katvā. Nanti tameva yathāvuttaṃ ñāyaṃ. **Yo brāhmaṇassa samvaṇṇitāyāti** mātuyā ubhatosujātātādikulavaṇṇena samvaṇṇitāya pasatthāya yathārūpāya brāhmaṇassa mātā bhavituṃ yuttā, tathārūpāya **mātarisambhūto**. Etena catunnaṃ yonīnaṃ yattha kattthaci visesaṇiṭṭhā katā. Tenāha “**tatrāpi visesenā**”ti. Evaṃ sāmāññato visesaṇiṭṭhāvasena “yonijaṃ mattisambhava”nti padassa atthaṃ vatvā idāni sāmāññajotanaṃ anādiyitvā visesajotānavaseneva atthaṃ vattuṃ “**yācāya**”ntiādi vuttaṃ. **Parisuddhauppattimaggasaṅkhātā yoni vuttāti** anupakkuṭṭhabhāvena parisuddhauppattimaggasaṅkhātā yā cāyaṃ yoni vuttāti sambandho. **Tatopi jātasambhūtattāti** tato yonito jātattā mātāpettisampattito sambhūtattā.

Visiṭṭhattāti samudāyabhūtā manussā rāgādīnā visiṭṭhattā. Rāgādīnā saha kiñcanenāti **sakiñcano**. Tatheva rāgādisaṅkhātēna palibodhanaṭṭhena saha palibodhenāti **sapalibodho**. **Sabbagaṇapaṭinissaggenāti** upādānasāṅkhātassa sabbassa gahaṇassa paṭinissajjanena. **Yasmā bāhitapāpo** attano santānato bahikatapāpo, tasmā **tamaḥaṃ brūmi brāhmaṇanti** attho vattabbo. Evarūpo etissā kathāya upadeso nānappaḥārato vibhatto, tasmā tattha tattha vuttanayeneva veditabbo.

458. Gahitadaṇḍesuti paresaṃ daṇḍena viheṭhanaṃ anidhāya ādinnadaṇḍesu.

459. Kiñci gahaṇanti taṇhāgāhādīsu kiñci gāhaṃ.

Yena kāmabhavena mānusakehi pañcahi kāmagaṇehi yuñjati, taṃ **mānusakaṃ yogaṃ**. “Mānusakaṃ yoga”nti ettha ca ekadesaṃ gahetvā vuttaṃ, esa nayo “dibbayoga”nti etthāpi. **Sabbayogavisamyuttanti** padadvayena vuttehi sabbakilesayogehi vippayuttaṃ.

Ratinti abhiraṭṭiṃ āsattiṃ. **Kusalabhāvanāyāti** kāyabhāvanādi kusaladhammabhāvanāya ukkaṇṭhitāṃ. **Vīriyavantanti** vīriyasabbhāvena vīraṃ niddisati, vīrabhāvo hi vīriyanti.

Sundaraṃ ṭhānanti nibbānaṃ. **Sundarāya paṭipattiyā** ariyapaṭipattiyā.

Nibbattinti pariyoṣānaṃ. **Atītetī** atītakotṭhāse. **Kiñcanakārakoti** palibodhahetubhūto.

Asekkhe sīlakkhandhādike **mahante guṇe**. Pañcannaṃ mārānaṃ vijitattā **vijitavijayaṃ**.

460. Idamaṃ ajānantāti “jātiyā brāhmaṇo”ti idamaṃ lokasamaññāmattanti ajānantā. Ye brāhmaṇesu nāmagottaṃ nāma tatiyaṃ diṭṭhābhīnivesaṃ janenti, **sāva nesamaṃ diṭṭhi**. **Katamaṃ abhisāṅkhatanti** parikkappaṇavaseneva katamaṃ ṭhapitaṃ tadupacitaṃ, na hetupaccayasamāyogena. **Samuccāti** sammutiyā. Kā pana sā sammutīti āha “**samaññāyā**”ti, lokasamaññātenāti attho. Sammā pana paramatthato ajānantānaṃ nāmagottaṃ evaṃ kappeti āha “**no ce**”tiādi. Taṃ pana asantampi paramatthato

santatāyeva abhinivisanti, tesamayam dosoti dassetum “**evam pakappita**”ntiādi vuttam. Tenāha bhagavā – “janapadaniruttim nābhiniveseyyā”ti (ma. ni. 3.331). **Ajānantā notī** ettha no-saddo avadhāraṇatto – “na no samam atthi tathāgatenā”tiādīsu (khu. pā. 6.3) viyāti āha “**ajānantāva evam vadantī**”ti.

Nippariyāyanti bhāvanapuṃsakaniddeso, nippariyāyena ujukamevāti attho, na pubbe viya “yo hi kocī”ti pariyāyavasena. “Na jaccā”ti gāthāya pubbaddhena **jātivādam paṭikkhipanto** pacchimaddhena **kammavādam paṭiṭṭhapento**. **Tatthāti** tissaṃ gāthāyam. **Upaḍḍhagāthāya vitthāraṇatthanti** upaḍḍhagāthāya attham vitthāretum “**kassako kammunā**”ti vuttam. Tattha purimāya catūhi pādehi, pacchime dvīhi dvinnampi sādharmaṇato attho vitthārito. Tattha **kasikammādīti ādi**-saddena sippakammavāṇijādi saṅgaho.

Paṭiccasamuppādapadhānavacanaviññeyyo paccayo paṭiccasamuppādasaddassa attho paccayuppannāpekkhāya hotīti āha – “**iminā paccayena etam hotī**”ti. Yam panettha vattabbam, tam **visuddhimagge** (visuddhi. 2.570) **taṃsaṃvaṇṇanāyañca** (visuddhi. mahāṭī. 2.570) vuttanayena veditabbam. **Sammānāvamānārahakuleti** sammānārahe khattiyādīkule, avamānārahe caṇḍālādīkule **kammavasena upapatti hotī** kammassa vipaccamānokāsakarātāya vinā tādisāya uccanīcakulanibbattiyā bhāvato. Aḍḍhadaliddatādi **aññāpi hīnapaṇītatā**.

Kammunāti cettha yathā lokapajāsattasaddhehi eko evattho vutto, evam sesasaddhehi, adhippāyaviseso pana tattha atthīti dassetum “**purimapadena cetthā**”tiādi vuttam. Nāyam loko brahmanimmitto kammena uppajjanato. Na hi sannihitakāraṇānam phalānam aññena uppattidiṭṭhi yujjati. Tenāha “**diṭṭhiyā paṭisedho veditabbo**”ti. Yam panettha vattabbam tam **visuddhimaggasaṃvaṇṇanādīsuvuttanayena** veditabbam. Tathā lokassa paṭhamuppatti na brahmunāti “**kammunā hi tāsū tāsū**”tiādi vuttam. **Tatiyena** “ayaṃ loko ādito pabhuti pabhavakammunā vattatī”ti vuttamattham **nigameti**. Vuttassevatthassa sūcanañhi nigamanam. Tam pana niyamattham hotīti āha “**kammeneva baddhā hutvā pavattanti, na aññathā**”ti. **Catutthena** padena. **Yāyatoti** gacchato. **Nibbattatoti** nibbantantassa. **Pavattatoti** pavattantassa.

Dhutadhammā visesato taṇhāya santattavasena vattantīti āha “**tapenāti dhutaṅgatapenā**”ti. Methunavirati visesato brāhmaṇānam brahmacariyanti sā idha brahmacariyenāti adhippetāti āha “**brahmacariyenāti methunaviratiyā**”ti. **Etenāti** iminā “tapenā”tiādīhi catūhi padehi vuttana. **Seṭṭhenāti** uttamena. Saṃkilesavisuddhiyā **parisuddhena**. **Brahmanti** brahmabhāvam seṭṭhabhāvam. So panettha atthato brāhmaṇabhāvoti āha “**brāhmaṇabhāvam āvhatī**”ti.

Brahmā ca sakko cāti sakkagarukānam sakko sakkenapi garukātabbato, brahmagarukānam brahmā brahmunāpi garukātabbato. **Vijānatanti** paramatthabrāhmaṇassa visesaṃ jānantānam viññūnam. Aviññūno hi appamānam. Tenāha – “**paṇḍitāna**”nti. Sesam suviññeyyameva.

Vāseṭṭhasuttavaṇṇanāya līnatthappakāsanā samattā.

9. Subhasuttavaṇṇanā

462. Tudisaññāto gāmo nigamo etassāti todeyyo, tassa attajo **todeyyaputtoti** āha “**tudigāmā**”tiādi. **Ārādhakoti** saṃrādhako. Dhammanisanti yasmā sampādanena paripūraṇena icchitā, tasmā vuttam “**sampādako paripūrako**”ti. Nāyati nicchayena gameti nibbānam, tam vā nāyati paṭivijjhīyati etenāti nāyo, tato etassa sampādakahetubhāvato nāyo dhammo ariyamaggo tam **nāyam dhammam**. Tenāha “**kāraṇadhamma**”nti. **Anavajjanti** avajjapaṭipakkham.

463. Vaṭṭacārakato niyyātīti niyyānikam ikārassa rassattam ya-kārassa ca ka-kāram katvā. Niyyāne

vā niyuttaṃ, niyyānaṃ sīlanti vā niyyānikaṃ, tappaṭipakkhato **aniyyānikaṃ**. Sā pana atthato akusalakiriyaṭi āha “**akusalapaṭipada**”nti.

Bahubhāvavācako idha **mahāsaddo** “mahājano”tiādīsuviyaṭi āha “**mahantehi bahūhī**”ti. Atthoti payojanaṃ. **Mahantānīti** bahulāni. **Kiccānīti** kātabbāni. **Adhikaraṇānīti** adhikārajīvikārūpāni. **Gharāvāsakammameva** pañcabalikaṇadasaatthaṭṭhānabhāvato lokayātrāya ca sampavattiṭṭhānabhāvato jīvitavuttiyā vā hetubhāvato **gharāvāsakammaṭṭhānaṃ**.

“Appakenapi medhāvī, pābhatena vicakkhaṇo;
Samuṭṭhāpeti attānaṃ, aṇuṃ aggaṃva sandhama”nti. (jā. 1.1.4);

Gāthāya vuttanayena **cūlantevāsikassa viya**.

464. Ayoniso pavattitaṃ vāṇijjakammaṃ viya apāyabhūtaṃ kasikammaṃ nidassanabhāve ṭhapetvā ayonisomanasikaṇavasena pavattaṃ gharāvāsakiccaṃ sandhāyāha – “**yathā kasi...pe... evaṃ gharāvāsakammaṭṭhānampī**”ti. **Brāhmaṇabhatto ahoṣīti** so kira bahū brāhmaṇe dhanam datvā yaññaṃ kāresi. **Uparīti** “upari upaṭṭhātīti vadehī”ti brāhmaṇehi attano samayena ācikkhāpitopi yathā upaṭṭhitameva kathetvā kālaṃ katvā niraye nibbatta, atha brāhmaṇā – “iminā amhākaṃ yaññe doso dinno”ti kujjhitvā tassa kaḷevaraṃ susānaṃ netuṃ nādaṃsu. Athassa ñātakehi sahasse dinne taṃ sahasaṃ gahetvā gehato nīharitum adāṃsu. Kassapasammāsambuddhakāle chaṭṭiṃsa itthiyo “ekā vatthaṃ adāsi, ekā gandhaṃ, ekā sumanamāla”ntiādīnā taṃ taṃ dānamayaṃ puññaṃ katvā āyupariyosāne tāvatimsabhavane sakkassa devaraṇño paricārikā hutvā nibbattiṃsu sahasaaccharāparivārikā, sakkassa devaraṇño vejayantarathaṃ pesetvā pakkosāpitena guttilācariyabhūtena mahābodhisattena pucchitā taṃ taṃ attanā kataṃ puññaṃ byākariṃsu. Taṃ sandhāya vuttaṃ “**sakalāya guttilavimānakathāya dipetabba**”nti. **Vaṇijjakammaṭṭhānaṃ vipajjamānanti** ettha tassa vipajjamānākāro heṭṭhā vutto. Evaṃ pabbajjakammaṭṭhānampi vipajjamānaṃ appahalaṃ hotīti ānetvā sambandho. **Silesu aparipūrakārinoti**ādī tassa vipajjanākāradassanaṃ. **Jhānādisukhanti** ettha **ādi**-saddena abhiññāvīpassanādisukhassa viya sabrahmacārīhi saddhiṃ sīlasampadādisukhassa saṅgaho daṭṭhabbo. **Arahattampi pāpuṇāti** pageva sekkhaputhujjanasampattiyoti adhippāyo.

Cāgasīsenāti padhānabhūtena cāgena dānena taṃ avassayaṃ katvā. Ettha te **na koci aphāsukabhāvoti**. **Ujukaṃ katvā** aviruddhaṃ katvā, sampayojetvāti attho. **Tapacariyanti** aggiparicāraṇaṃ, tapacariyaṅca brahmacariyaggaṇā duṭṭhullabhāvato.

466. **Ajānanabhāvanti** asabbaññubhāvaṃ. Bhagavato pana sabbaññubhāvo sadevake loke jalatala pakkhattatelaṃ viya pattharivā ṭhito, na me idaṃ patirūpaṃ, tato parivattissāmīti “brāhmaṇo, bho, gotamā”tiādīmāha. **Paccāharitum** paṭipakkhena apaharitum. **Setapokkharasadisoti** puṇḍarīkapattasadisavaṇṇo. **Suvaṭṭitāti** vaṭṭabhāvayuttaṭṭhāne suvaṭṭā. **Nāmakamyevāti** nāmamattameva vacanamattameva. Tathābhūtānaṃ bhāvassapi abhāvena nihīnaṃ nāma hoti, nāma-saddo nihīnapariyāyo. Tenāha – “**lāmakamyevā**”ti.

467. **Katamā vācā tesam seyyoti** tesam caṅkiyādīnaṃ brāhmaṇamahāsālānaṃ vuccamānavibhāgāsu vācāsu katamā vācā seyyoti. “Seyyā”ti līngavipallāsena vuttaṃ. **Sammutiyāti** avilaṅghitasādhumariyādāya lokasammutiyā. Tenāha “**lokavohārenā**”ti. **Mantāti** mantāsāṅkhātāya paññāya mantetvā jānitvā. Tenāha “**tulayitvā**”ti. **Atthasamhitanti** hetusañhitam. Taṃ pana ekamaṃsato yuttiyuttaṃ hotīti āha – “**kāraṇanissita**”nti. **Āvutoti**ādīsu ādito abhimukhaṃ ñāṇagatiyā vibandhanena **āvuto**, āvariyaṇa visesato ñāṇagatiyā nibandhanena **nivuto**, evaṃ **ophuṭo** paliguṇṭhito. **Pariyonaddhoti** samantato onaddho chādito. Tenāha “**paliveṭhito**”ti.

468. **Sace etaṃ kāraṇamatthīti** “nissaṭṭhatīṇakattṭhupādāno aggi jalatī”ti etaṃ kāraṇaṃ sace atthi

yadi siyā, so aparo tiṇakatṭhupādāno aggi yadi bhaveyya. **Sadoso** sādīnavo saporikkilesa. **Parisuddhoti** upakkilesābhāvena sabbaso suddho. **Jāti ādīnaṃ abhāvenāti** jātipaccayānaṃ kammakilesānaṃ niggamaṇa.

469. Na niccalā tiṭṭhantī tattha pakkhipitabbassa labbhamānattā yathāpaññattaṃ hutvā niccalā akampiyā na tiṭṭhanti. **Taṃ dosaṃ** taṃ ūnatādosam.

Aññasmiṃ asatī atthabhañjakamusāvāde asati. So hi attano santakassa adātukāmatādivasena pavattassa akammaopathappattassa musāvādabhāvassa viparīto añño idha adhippeto. Tathā hi itaro yebhuyyena vaḷañjitabbato voharitabbato **vaḷañjakamusāvādoti** āha. Na kadāci musāvādīti **dve kathā na kathenti**. Bāhirakānaṃ anavajjatapasammatāyapi nissitoti vattuṃ āha “**sīlavā tapanissitako hoti**”ti. Vivaṭamukhā mantajjhenamaṇḍitā sabbaso sajjhāyā honti, na itareti āha “**pabbajitā niccaṃ sajjhāyanti**”ti.

470. Ciram nikkhantoti niggato hutvā cirakāle. **Na sabbaso paccakkhā honti** satisammohato maggānañca aññathā karaṇato. **Cirāyitattanti** “ayaṃ maggo”ti kathanassa cirāyanaṃ. **Vitthāyitattanti** asappaṭibhānaṃ. Taṃ pana saupamāha dassetuṃ “**yathā**”tiādi vuttaṃ.

Balasampannoti kāyabalena samannāgato. Pamāṇakataṃ kammaṃ nāma pamāṇakarānaṃ rāgādikilesānaṃ avikkhambhitattā “**pamāṇakataṃ kammaṃ nāma kāmāvacara**”nti āha, tesam pana vikkhambhitattā vuttaṃ “**appamāṇakataṃ kammaṃ nāma rūpārūpāvacara**”nti. Tatthāpi visesato appamaññābhāvanā sambhavatīti āha “**tesupī**”tiādi. Nirīhakattā yathā appamāṇasamaññā labbhati, taṃ dassetuṃ “**pamāṇam...pe... vuccatī**”ti āha. **Na ohīyati na tiṭṭhatī**ti katūpacitampi kāmāvacarakammaṃ yathādhighate mahaggatajjhāne aparihīne taṃ abhibhavitvā āsīdetvā passe ohīyakaṃ katvā paṭisandhiṃ dātuṃ samatthabhāvena na tiṭṭhati. **Laggituntī** āvaritūṃ. **Ṭhātuntī** patiṭṭhātuṃ. **Pharivāti** paṭippharivā. **Pariyādiyivāti** tassa sāmattiyaṃ khepetvā. Kammaṃ pariyādiyanaṃ nāma vipākuppādabandhanamevāti āha – “**tassa vipākaṃ paṭibāhitvā**”ti. Sesam suviññeyyameva.

Subhasuttavaṇṇanāya līnatthappakāsanā samattā.

10. Saṅgāravasuttavaṇṇanā

473. Abhippasannāti abhisamecca pasannā. Tenāha – “**aveccappasādavasena pasannā**”ti. Brāhmaṇī vigatamalamaccheratāya “**tuyhaṃ deyyadhammaṃ ruccanakatṭhāne dehi**”ti āha. Maggeneva hissā macchariyassa pahīnattā buddhapakkhabrāhmaṇapakkhavasena ubhatopakkhikā.

Kimsūti kinti pucchāvacaṇaṃ. **Chetvā** anādiyitvā vināsetvā. **Sukhaṃ setīti** cittasantāpābhāvena sukheṇa supati. **Na socatīti** tato eva sokaṃ nāma vināseti. **Kodhanti** kujjhanalakkhaṇaṃ kodhaṃ. **Chetvā** samucchinditvā. **Sukhaṃ setīti** kodhapariḷāhena apariḷayhamānattā sukhaṃ supati. Kodhavināseṇa vinaṭṭhadomanassattā **na socati**. **Visamūlassāti** dukkhavipākassa. **Madhuraggassāti** akkosakassa paccakkosanaṇa, pahārakassa paṭippaharaṇeṇa yaṃ sukhaṃ uppajjati, taṃ sandhāyeva “**madhuraggo**”ti vutto. Imasmiñhi ṭhāne pariyoṣānaṃ “**agga**”nti vuttaṃ. **Ariyāti** buddhādayo ariyā.

Pañhaṃ kathesīti brāhmaṇo kira cintesi – “samaṇo gotamo lokapūjito, na sakkā yaṃ vā taṃ vā vatvā santajjetuṃ, ekaṃ saṅhapañhaṃ pucchissāmī”ti. So ekaṃ pucchāgāthaṃ abhisankharitvā “sace asukassa nāma vadhaṃ rocemīti vakkhati, ye tuyhaṃ na ruccanti, te māretukāmosi, lokavadhāya uppanno kiṃ tuyhaṃ samaṇabhāvenāti niggahessāmī. Sace na kassaci vadhaṃ rocemīti vakkhati, atha naṃ tvaṃ rāgādīnampi vadhaṃ na icchasi, tasmā samaṇo hutvā āhiṇḍasīti niggaṇhissāmīti imaṃ ubhatokoṭīkaṃ pañhaṃ puṭṭho samaṇo gotamo neva gilituṃ na uggilituṃ sakkhissatī”ti evaṃ cintetvā imaṃ payhaṃ pucchi. Tassa bhagavā ajjhāsayanurūpaṃ kathesi. So pañhabyākaraṇeṇa ārādhitacitto

pabbajjaṃ yāci. Sathā taṃ pabbājesi, so pabbajjākiccaṃ matthakaṃ pāpesi. Tena vuttaṃ “**pabbajitvā arahattaṃ patto**”ti.

Avabhūtāti adhobhūtā. Adhobhāvo sattānaṃ avaḍḍhi avamaṅgalanti āha – “**avaḍḍhibhūtā avamaṅgalabhūtāyevā**”ti. **Paribhūtā**ti paribhavappattā. **Vijjamānānanti** pāḷiyaṃ anādare sāmivacananti tadatthaṃ dassento “**vijjamānesū**”tiāha. Pakatṭhaṃ, pavaḍḍhaṃ vā ñāṇanti **paññāṇanti** bhagavato ñāṇaṃ visesetvā vuttaṃ.

474. Abhijānitvāti abhivisiṭṭhena ñāṇena jānitvā. **Vositavosānā**ti katakaraṇīyatāya sabbaso parisositaniṭṭhā. **Pāramisaṅkhātanti** paramukkaṃsabhāvato pāramīti saṅkhātāṃ. Tenāha “**sabbadhammānaṃ pārabhūta**”nti. **Brahmacariyassā**ti sāsanabrahmacariyassa ādibhūtaṃ. Tenāha “**uppādakā janakā**”ti. “Idamevaṃ bhavissati idameva”nti takkanaṃ takko, so etassa atthīti **takkī**. Yasmā so taṃ taṃ vatthuṃ tathā tathā takkitvā gaṇhati, tasmā vuttaṃ “**takkagāhī**”ti. Vīmaṃsanasiḷo **vīmaṃsī** paccakkhabhūtamatthaṃ vīmaṃsanabhūtāya paññāya kevalaṃ vīmaṃsanato. Tenāha “**paññācāraṃ carāpetvā evaṃvādī**”ti. Yathāvuttatakkīvīmaṃsībhāvena takkapariyāhataṃ vīmaṃsānucaritaṃ sayamṃpaṭibhānaṃ evametanti vatvā.

485. Aṭṭhitapadhānavatanti aññattha kismiñci puggale aṭṭhitapadhānavataṃ anaññasādhāraṇaṃ bhoto gotamassa padhānaṃ ahoṣi. **Sappurisapadhānavataṃ ahoṣi** sappurisapadhānavatādhigatānaṃ etādisānaṃ arahataṃ acchariyapuggalānaṃyeva āveṇikapadhānavataṃ ahoṣi. **Ajānantova pakāsetī**ti ayaṃ pucchitamatthaṃ sayamṃ paccakkhato ajānanto eva kevalaṃ saddaṃ uppādetvāva pakāsesīti saññāya āha. **Ajānanabhāve santeti** ime adhidevāti paccakkhato jānane asati. **Paṇḍitena manussenāti** lokavohāraḷakusalena manussena, tvaṃ pana lokavohārepi akusalo. Vacanatthañhi ajānanto yaṃ kiñci vadati. **Uccena sammatanti** uccaṃ supākaṭaṃ sabbaso taruṇadāraḷhipi sammataṃ. Ñātameṭaṃ yadidaṃ atthi devāti. Tenāha “**susudāraḷapī**”tiādi. **Devāti** upapattidevā. **Adhidevā nāma** sammutidevehi adhikadevāti katvā, tadaññe ca manusse adhikabhāve kimeva vattabbaṃ. Sesamṃ suviññeyyameva.

Papañcasūdaniyā majjhimanikāyaṭṭhakathāya

Saṅgāravasuttavaṇṇanāya līnatthappakāsanā samattā.

Niṭṭhitā ca brāhmaṇavaggavaṇṇanā.

Majjhimapaññāsaṭṭikā samattā.